

**EIGHTH LEGISLATIVE ASSEMBLY OF MIZORAM
(NINTH SESSION)**

LIST OF BUSINESS

FOR EIGHTH SITTING ON THURSDAY, THE 3rd MARCH, 2022
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPER

2. **PU LALRUATKIMA**, Minister to lay on the Table of the House a copy of correction of reply to Unstarred Question No. 231 Ballot No. 193 asked by Pu Zodintluanga Ralte, MLA on 1.3.2022.

FINANCIAL BUSINESS

DISCUSSION AND VOTING ON DEMANDS

3. **PU LALRUATKIMA**, Minister to submit to the vote of the House various Demands under his charge.

Demand No.	Purpose	Amount (in ₹)	<i>Demand for Grants Page No.</i>
6	Land Revenue & Settlement	31,96,34,000.00	36-41
26	Information & Public Relations	11,16,85,000.00	256-261
37	Rural Development	4,36,17,47,000.00	355-365
TOTAL		4,79,74,66,000.00	

4. **PU TAWNLUIA**, Deputy Chief Minister to submit to the vote of the House various Demands under his charge.

Demand No.	Purpose	Amount (in ₹)	<i>Demand for Grants Page No.</i>
13	Personal & Administrative Reforms	4,79,88,000.00	70-74
25	Public Health Engineering	4,71,14,09,000.00	248-255
46	Urban Development & Poverty Alleviation	7,04,67,49,000.00	434-444
TOTAL		11,80,61,46,000.00	

H. LALRINAWMA
Commissioner & Secretary

SPEAKER : *Chutichuan, inremna tur leh intihsawt tawwna tur thilte chu i um ang u.*

- Rom 14:10

Vawiinah hian kan Member zahawm tak Pu C. Lalsawivunga taksa harsatna avangin a lo kal theilo a ni.

Zawhna & Chhanna-ah kan kal nghal ang a, Member zahawmtak Pu Lalrintluanga Sailo, Starred Question No. 101 zawt turin ka sawm e.

PU LALRINTLUANGA SAILO: Pu Speaker, ka lawm e. Starred Question No. 101, Irrigation & Water Resources Department Minister zahawmtak chhana tan-

- a) Dampa Mizoram Legislative Assembly Constituency chhungah Irrigation & Water Resources Department hian tun ministry chhung hian hmalakna a nei em?
- b) Khawiah te nge hmalak a nih tawh?

SPEAKER : Chhang turin a changtu Minister zahawm tak Pu C. Lalrinsanga i lo sawm ang.

PU C. LALRINSANGA, MINISTER: Pu Speaker, Member zahawmtak Pu Lalrintluanga Sailo zawhna chhanna chu –

- a) Nei e.
- b) Hmalak a nih tawhna te chu: (i) Tuisenchhuah Zau MI Project, Chungtlang hi NABARD RIDF-XXIV hnuaiah neih niin zawhfel tawh a ni. (ii) Tuikual MI Project, Saithah-ah channel chhia cheithat a ni. Ka lawm e.

SPEAKER : Zawhbelhna zawt turin a zawhna neitu Pu Lalrintluanga Sailo ka sawm e.

PU LALRINTLUANGA SAWILO: Pu Speaker, kan Minister zahawmtak min chhanna kha a lawmawm hlein ka hria a. Ka bial chhungah khuan tunhmain Irrigation Department hian hmalakna mumal a nei ngai lova, tuna kan Minister-in min chhannaah khan, Tuisenchhuah Zau chungchangah hian nikum lamah hmalak a ni a, kan lawm hle a. Tin, kut hnathawktu, lo neitute pawh an lawm hle a ni. Tin, Tuikual, Saithahah-ah hian tunah hmalak mek a ni a. Helai hi potential a tha em em mai a, amaherawhchu, tui kan nei tha lova, a lakna a hnai em em lawi si a, chutiang chuan loneitute'n harsatna an tawk mek a. Hei hi tunah hmalak a nih avang hian lawmthu ka sawi a.

Chutihruah chuan, ka zawhbelhna chu, ka bial, hemi tlangdung chhak zawk South Sabual-ah hian leilet hmun tha tak tak te kan nei a. Tin, Tut kam phaizawl tha em em

mai hi a awm a, heng hi Irrigation-in min la hma sak lova tun hunah hian, tun sorkar kumtharah hian hma min laksak thei ang em tih ka zawt e.

SPEAKER : A chhang turin changtu Minister zahawmtak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawmtak Pu Lalrintluanga Sailo zawhbelhna bak kha ka sawi duh a awm a. Kha mai bakah khan Herhse Riahbuk Zau, Lallen-ah hian DPR siamfel tawh hmalak tumna kal mek a awm a, tin, Saithah Zau-ah hian Dilzawl Zau leh Sarzuk Zau hi DPR buaipui mek a ni bawk a. Tin, tuna zawhbelhna kha, South Sabual-ah hian leilet siam tur leh leilet an lo enkawl mekte pawh a awm niin kan hria a, kan naute lam atang hi chuan. Agriculture Department atanga land development kan lak tih mai loh chu hmalakna tur hi a awm lem lova, Irrigation Department tan.

Tuna kan ngaihthlak ang khan South Sabual te, Tut bual-ah te hian potential area tha deuh deuh a awm a ni tih erawh chu kan hria a. Hei hi tun Financial Year thar kal chho mek turah hian kan lo enzui ang a. Chumi rual chuan nichina zawhna neituin a sawi ang deuh khan, hemi Dampa bial bik hi Agriculture Development leh Irrigation nena inkaikawpah hian rinaiin an lo la hnufum hle mai a. Amaherawhchu, a bialtu hian thahnem a ngai a, khatiang khan a rawn nawr reng a. Hmundang tuna kan sawi bak pawh hi sawi te pawh kan nei a nia. Chuvang chuan, bial tan thahnem a ngai hle a ni tih kha ka sawi tel bawk a ni e.

SPEAKER : Starred Question No. 102, zawt turin Member zahawmtak Dr. ZR Thiamsanga i lo sawm ang.

DR. Z.R. THIAM SANGA: Pu Speaker, ka lawm e. Ka zawhna, hon. Minister zahawmtak Irrigation & Water Resources Department changtu chhana tan – Irrigation & Water Resources Department Champhai-a mi hi Division atanga SE (thut hmun) Circle-a hlankai a nih theih nan hma min laksak thei ang em? Ka lawm e.

SPEAKER : Chhang turin Minister zahawmtak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawmtak Dr. ZR Thiamsanga zawhna chhanna chu – Hemi chungchang hi ngaihtuah mek a ni e.

SPEAKER : *Zawhbelhna* zawt turin zawhna neitu Member zahawmtak Dr. ZR Thiamsanga ka sawm e.

DR. Z.R. THIAM SANGA: Pu Speaker, ka lawm e. Champhai khawpui leh a chheh vel mai nilo, ka bial Champhai North huamchhung Hnahlan, Selam, Tuisaphai, Khuangphah leh Tuisaphai te mai bakah hian kan Minister zahawmtak Pu Manuna bial Champhai South leh kan MLA zahawmtak Pu Papua bial East Tuipui te hi buh leh bal tharchhuah nana potential area tha tak mai a ni a. Ka hriatsual loh chuan nikum chung pawh khan Champhai District hi buh thar tam ber niin ka hria a. Chuvang chuan, Champhai-ah hian EE mai nilo, SE hian min awp tawh se hma kan sawn leh zual nan a pawimawh khawp mai a.

Tichuan, ka zawhbelhna tak chu, Irrigation & Water Resources hnuai ah solar hmanga tui pump chhuah hi beiseiawm anga hriat a ni a, tun hunah hian engge kan hmalakna leh kan thlen chin ni tawh tih hriat a chakawm khawp mai a. Tin, hmalak ni ta se, kan bial chung Champhai North-ah hian hmalak a ni ve dawn em tih kha ka zawt tel duh bawk a ni e. Ka lawm e.

SPEAKER : *Zawhbelhna* zawt turin Member zahawmtak Prof. F. Lalnunmawia ka sawm e.

DR. F. LALNUNMAWIA: Pu Speaker, ka lawm e. Kan Minister zahawmtak Irrigation & Water Resources changtu ka zawhbelh duh chu, ka bial chung Lungleng ram Serzawl Zau leh Khankawn Lui leh Samtlang inkar velah sawn thlai chinna hmun tha tak tak a awm a, tui mamawhna a nasa khawp mai a. Sawlai velah sawn irrigation lamah hian hma min laksak ve thei ang em tih ka zawh belh e.

SPEAKER : A theih ang anga chhang turin Minister zahawmtak Pu C. Lalrinsanga ka sawm e.

PU C. LALRINSANGA, MINISTER: Pu Speaker, a zawhna neitu Dr. ZR Thiamsanga rawn zawhbelhna kha, Circle hi hmun hnih, hmun thuma han dah te pawh a tha a, amaherawhchu, District pali Division-ah chauh Irrigation Department hian hma kan la a. Tun dinhmunah chuan District 11 lai kan lo ni ta a, Irrigation & Water Resources Department hian hmachhawp tam tak kan nei a, chung zingah chuan District tina Division Office siam leh a khaikhawmtu tur Circle siam thar ni se tiin a pawimawhna kan thlir thin a, chu ruahmanna chu tunah hian kan kalpui mek a. Amaherawhchu, Sorkarin sum a indaih lova, Division pawh 4 chauh kan la nei a nih lain circle dinhmun hi chu thlir pawh a la harsa ang reng viau a. Amaherawhchu, department tangkaina, a dinhmun en erawh chuan Circle anga han ho khawm thei tur

Division dah thar theih nisela tun ai hian tharchhuah leh intodelhna kawngah hian hma kan sawn ngei turah pawh ka ngai a. Engpawh nisela, a tul ang zelin leh kan sum dinhmun ten a zir chuan hei hi chu kan la enchho turah ngai ta ila.

Tin, Solar tui pump chungchanga zawhbelhna kha, nikum lam khan PM Kusum Scheme, Ministry of MNRE hnuai atangin unit 200 kan hmu a, a matching share pawh a sang hle mai a, mahse kan House Leader hian min duhsak avangin unit 200 match theihna tur ruahmanna min siamsak a. Amaherawhchu, Central lam khan *empanelled power*-a an neih ho kha rintlak an lo awm hlawm lova, chuvang chuan anni kaltlanga channelize theih tur reliable empanelled firm kha min han zawn sak ve leh a, chungah chuan duhthlan tur offer min pe a. Tata Power Solar Ltd. te, Suria International te, Abishek Solar Industry Pvt. Ltd. te, Bright Solar Ltd. heng firm pali-te hi min rawn offer a, heng atangte hian hmalakna kalpui kan la tum turah ngai ila. He hmalakna hi kan kalpui thei anih chuan tuna hmun hrang hranga kan tui harsatna, a bikin thlasik thlai chingtute tan hian hlawk thlak tak turah pawh kan ngai a. Tuna empanelled firm-te zingah hain tu ber nge kan thlan ang tih kan la final chiah lova, Tata Power Solar Ltd. hi tlema reliable deuha kan ngaih avangin, anni hi kan han tinzawn deuh chu a ni a, kha kha ka chhanna ni sela.

Tin, kan member zahawm tak Pu F. Lalnunmawia zawhna kha, a bial potential area-ah hian hmalakna eng emaw zah kan nei a, amah hian an bialchhunga hmalaknaah hian theihtawp a chhuah thin a, thahnem pawh a ngai a, an farmer-te harsatna pawh vawi tam a rawn sawi thin a. Hmun hrang hranga kan hmalaknate hi a theih chin chinah chuan thuam mam kan tum a, a chhan chu Aizawl hnaivai deuh hleka tharchhuah tipung tura hmalakna hmun hma tha anih avangin tuna a rawn sawi kha theihtawp kan lo chhuah ang e tih kha ka chhanna a ni e. Ka lawm e.

SPEAKER : Starred Question No. 103, zawt turin Dr. K. Pachhunga, member zahawm tak kan sawm e.

DR. K. PACHHUNGA : Pu Speaker, ka lawm e. Hon. Minister for Public Health Engineering Department, kan Dy. Chief Minister chhana tan ka zawhna chu –

Mizoram-a kuate hi tlang chhipah an awm deuh vek a, thalah tui kan harsa hle a. Tui harsatna sutkian nan PHE Department-in JJM Scheme tha tak kan kalpui mekah hian, hengte hi ka zawhna a ni e -

- a) Mizoram khua engzatah nge solar pump kan siam tawh?
- b) Lunglei South bialah solar pump engzat nge min siam sak dawn, a khaw hming nen min hrilh thei em?

Ka lawm e.

SPEAKER : Chhang turin a changtu Dy. Chief Minister zahawm tak Pu Tawnluia kan sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Lunglei South bialtu zawhna chhanna chu -

- a) Mizoram khua 34-ah solar pump siam tawh a ni.
- b) Lunglei South MLA Constituency chhung khaw sawm panga (15 Nos.) ah solar pump siam tum mek a ni a, chung khuate chu -
 1. Vaisam
 2. Chithar
 3. Runtung
 4. Pachang
 5. Rangte
 6. New & South Lungrang
 7. Rualalung
 8. Mautlang
 9. Sailen
 10. Mamte
 11. Thingfal
 12. Tawipui South
 13. S. Mualcheng
 14. Thangpui
 15. S. Mualthuam.

SPEAKER : *Zawhbelhna* zawt turin member zahawm tak Pu Ramthanmawia kan sawm e.

PU RAMTHANMAWIA : Pu Speaker, ka lawm e. Kan hriat angin thingtlang lamah chuan tui kan harsa a, chu chu hriain JJM Scheme tha tak hmangin tui in tur tha tak min buatsaih sak mek a, kan lawm hle a, kan thla pawh a muang a. Ka zawhbelhna chu, tuna hmalak (tender) mek bakah tender tur dangte hi kumin chhungin tender hman a ni ang em? Ka bialchhungah pawh khaw 9 (pakua) laiah la tender tur a awm a, chungte chu min hrilh theih chuan ka lawm khawp ang.

SPEAKER : Chhang turin a changtu Dy. Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Tuipui East bialtu zawhna chhanna chu –

JJM Scheme-ah hian Mizoram thingtlang khaw tin huam veka hmalak mek a ni a, tun 2021-2022 financial year chhung hian solar pump hi khaw za leh tlemah kan ti mek a, tunah hian tender chhuah tawh a ni a, tender chhan pawh enfel mek a ni a. Enfel hnuah a hmu turte department officer-ten dan angin an rawn thlang ang a, 2022-2023 chhung hian kumina kan cover loh, kan huam phakloh khua zawng zawngah hian JJM Scheme hi kalpui tum a ni a. Tuihnate hi a tlem tawh em avangin pump loh chuan a harsa tawh khawp mai a, gravitation-a a sang zawk atanga hip tur hian tuihna kan hmu zo tawh lova. Chuvangin, JJM Scheme-a kan hlabak kumthara kan tih leh turah pawh

pumping scheme a tam zawk chu anih kan ring a, a number chiah a sawi mai theih lova. Thingtlang khua zawng zawng hi cover tura tih anih avangin hmalak tura kan hmachhawp vek a ni e.

SPEAKER : Starred Question No. 104, zawt turin Member zahawm tak Pu Vanlalhlana ka sawm e.

PU VANLALHLANA : Pu Speaker, ka lawm e. Starred Question 104, Minister zahawm tak Land Revenue & Settlement Department chhana tan ka zawhna chu -

- a) Vairengte leh Sairang inkar four-lane kawngpui siam turah compensation la turin eng pass nge neih ngai?
- b) Compensation hmu tur engzat nge thlan ni tawh?

SPEAKER : Chhang turin a changtu Minister zahawm tak Pu Lalruatkima ilo sawm ang.

PU LALRUATKIMA, MINISTER: Pu Speaker, Member zahawm tak Pu Vanlalhlana zawhna chhanna chu -

- a) Competent Authority-in dan ang thlapa a pek pass neih a ngai.
- b) Four-lane compensation hi process kal lai mek anih avangin compensation la tu tur zat hriat a la ni lo.

SPEAKER : *Zawhbelhna* zawt turin a zawhna neitu member zahawm tak Pu Vanlalhlana ka sawm e.

SPEAKER : Pu Speaker, Competent Authority-in tul a tih chu eng chiah nge ni tih ka zawt duh a. Tin, ka hriat danin compensation la tur hi tihfel vek a ni tawh a, Gazette of India-ah pawh a chuang tawh a, chu chang ni lovin NHIDCL Portal-ah pawh tihlan a ni tawh a, amaherawhchu, compensation hmu tur final vek tawh chu siamthat leh a ngai a ni. A ngaihna chhan chu, tute emaw lut tur an luhloh vang pawh a ni mai thei a, harsa takin list hi siamthar a ni. Chung list thar siama chuangte chu engzat nge an niha, compensation hmu tur zingah hian an tel ve ngei em tih kha kan zawhbelh a ni.

SPEAKER : *Zawhbelhna* zawt turin Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e. Revenue Minister zahawm takin min chhan a tan ka zawhblehna chu -

Mualkhang Gas Bottling Plant extension siamna turin ram pek belh a ni tawh em? Pek a nih chuan, engtikah nge pek a nih tih a ni e.

SPEAKER : *Zawhbelhna* zawt turin Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, I nalh hle mai, vawiin chu. Ka zawhbelhna chu (**Speaker:** ka sawi ve leh kher a ngai em? Hei pawh hi mi min pek bawk a ni. Ka dawng thei riau a, chuvangin ‘i nalh hle mai’ min ti zel)

Pu Speaker, ka *Zawhbelhna* chu – Mualpui World Bank Road-ah khuan (kan Minister hian a chiang em em a) ram pass (LSC) neitu hriat mumalloh a awm a, chuvang chuan ‘vantlang ram’ tiin Welfare Committee-in hma a la a, thui tak an kal tawh a, a hmun pawh laih vek a ni tawh a. Amaherawhchu, laih fel a nih hnu khan buaina awm leh ta tlat niin a lang a. Mualpui rama welfare hmalakna, LSC fel lo leh neitu mumal hriat hleihtheihloh a vanga Mualpui Welfare Committee hma lo lak tawhna khu kan Minister hian engtia kalpui zel nge a tum tih kha ka zawt e. Ka lawm e.

SPEAKER : A theih ang anga chhang turin Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, ka lawm e. Helai NH-6 leh NH-306 Vairengte - Sairang four-lane siam chungchangah hian in a chinchhuak deuh te pawha sawi hi a thain ka hria a. Hemi chhuah theihna tura tan hian supplement pawh kan la lova, a hmasaah khan.

Kan hriat angin Compensation, Land Acquisition hi Acquisition Act, 1894 kan nei a, chu 1894 Act chu *repeal* a ni a, “the right to fell compensation and transparency in land acquisition, rehabilitation and resettlement Act, 2013” kan nei a, chu chu Mizoram-ah hian hman ve theih a ni dawn lova, ‘solatium 100% a ni ang’ tiin bill putluh a ni a, chutah chuan “Mizoram Land Acquisition, Rehabilitation and Resettlement Act, 2016 siam a ni a. Chumi siam tur pawh chuan a kawng a chhukchho viau a, Select Committee-a a rawn kal hnu-ah ngun takin kan ngaihtuah ho a, chutah chuan “MLA (RR) Act” kan tiha kha kan nei ta a. Amaherawhchu, chuta provision thenkhatte High Court-a khin anih a vangin duh angin kan hmang thei lova. Chutih lai chuan compensation hi sorkar pek emaw tih hi kan thlir dan a ni fo a, mipuite pawhin kan hriatchian law law a thain ka hria a.

National Highway hi ‘*Kala*’ an ti a, National Highway Act, 1956 hmangin chu *Kala* chu section 3A hmangin appointment a rawn pe thin a ni. Appointment a rawn

pekah chuan Revenue & Land Settlement lamin assessment engkim a rawn ti vek a. Pu Speaker, hemiah hian Surveyor tur a neihloh a vangin deputation-in an rawn dil a, kan pe mai thin a ni. Chuvangin, ram acquire-tu hi helai bikah chuan sorkar kan ni lova, NHIDCL-in a aiawhtu tur *Kala* a rawn ruat te hi an ni. A dang zawng zawng leh Land Acquisition-ah chuan District Collector (DC) hi Authority a ni tih hi hriatchian law law a thain ka hria a. Mi tamtak sorkar ram lak emaw ti tlat pawl hi kan awm thin a, chulai chu kan sawi duh a. “Competent Authority-in dan ang thlapa a pek *pass* neih a ngai” kan ti a. Member zahawm tak Pu Vanlalhlana khan, “tul a tih chu engchin chiah nge” a ti a. Ni e, kan Land Act hma hian thil tam tak tarlan a ni a. Chu kan Land Act-ah chuan VC-pass te hi a thenah a valid a ni; chulai chu hriatchian a thain ka hria a.

Vairengte leh Sairang inkar khua hi “survey village” an ti a, Land Revenue & Settlement Department-in a puang thin a ni. Vairengte hi May ni 17, 1987-ah puan a ni a, Bilkhawthlir hi June ni 22, 1987-ah puan a ni leh a, Kolasib hi August ni 19, 1976-ah a ni baw a, Kawnpui hi May ni 27, 1982-ah puan a ni ta a ni. Heng khuate hi *notified town surveyed-village* khuaa puan anih hma VC-in pass a lo pekte, village perimeter pek a awm anih chuan, Land Revenue & Settlement Department, a competent authority-in a pek nilo pawh kha la *valid*-a ngaih loh theihloh a ni a. Chuvangin, *Huan lo Ram* pek chungchang kha chu pawm a ni lova, village perimeter chhunga In-hmun kha a ni mai a. Chuvang chuan NHIDCL-in compensation a pek tura hi, ‘engzah nge’ tih kha a la rawn report baw si lova, chulai chu kan chhan theihlohna lai a ni a.

Tin, chumi piahlahmah chuan, kan hriat angin ni 25 April, 2020 khan NH-06 siamthat chungchangah Land Revenue & Settlement Department chuan “Development of Economics Corridors, Inter-corridors and feeders routes to improve the efficiency of freights movement in India under Barak Mala, Paryajona, package 3 and 4-lane of Vairengte – Sairang (111 kms), NH 6/306, freezing of land transaction, allotment of new plot of land and recommendation for competent authority of land acquisition regarding....” tiin min rawn hrilh a, e-mail-a rawn thawn an ni a, a copy pawh ka kawl tho a. **(Pu Vanlalhlana:** Khatia sawi kual duah lo khan min chhang mai e. Ka zawhna kha i chhan theih chuan a tawk mai. Ennawn leh tul te kha min hrilh la. Tin, *notified-town* puan kha hun hrang hrangah a ni. ‘Notified-town’ tih khan sawi mai rawh a tawk mai. ‘Engvangin nge tih nawn leh thlirkir a tul’ tih kha min hrilh la a tawk mai.)

Competent Authority of Land Acquisition hian Preliminary Notification a chhuah section 3A (Capital A) ah khan Preliminary Notification a chhuah a, chuta an assessment kha NHIDCL khan sang a ti ta lutuk a, keini lamah an rawn thlen a. Chung ang kalphung (formula) chu hemi chungchangah hian a awm a. Price determination kha kan han en a, chu pawh chu a dik chiah lo a nih hi kan ti a, *Kala* hnenah ennawn leh turin kan ti mai chauh a ni. Khalaiyah khan a rate fix tu kha kan ni lova. A rate

chungchangah hian kum 3 kal ta chhunga registration kan neih, stamped registration a percentage atanga lak kha a ni a. Chuvang chuan, portal-ah hian upload vek a ni tawh a. Chutih karah chuan hei hi preliminary a nih chauh avangin khalaiah khan final a la chhuak lo a ni tih kha a chiang mai awm e. Chuvang chuan, portal-ah pawh thun ni mahse *Kala*-in a rate a fix san lutuk avang khan NHIDCL-in an pawm lo a ni. Chu zawk chu ka chhanna ni se la.

Tichuanin, Member zahawm tak ... (*interruption*)

PU LALDUHOMA : A rate san lutukna kha NHIDCL portal-a thun leh Gazette of India-a thun fel a nih tawh naah khan a ni lova, khami bak ram la awm zawng zawng kha frozen tur a ni tiin Revenue Secretary-in order a chhuah a. Revenue Secretary transfer a ni a, Kolasib Assessment Officer transfer a ni a, Surveyor pawh transfer a ni a. Thun belh leh tur duhlo tu kha in transfer a, Secretary pawh in thlak a, order thar in siam a. Tichuan, pass kha in siam belh ta teuh a, surveyor 6 Kolasib-ah in tir thla a, chu chu a buaina a ni zawk.

SPEAKER : Ngawi rawh aw, Chair kha rawn address rawh u. Chair kha rawn address u la a mawi deuh e aw.

PU LALRUATKIMA, MINISTER: Pu Speaker, member zahawm tak khan thil a hre fuh lo deuh niin ka hria a. Revenue Secretary transfer leh transfer loh hi Land Revenue & Settlement mawhphurhna a ni lova, DP&AR mawhphurhna a ni a, Revenue Offer transfer leh transfer loh pawh kha DP&AR kut vek a ni. Kan hon. Minister DP&AR hnenah hian transfer tur chungchang hi vawikhatmah he House zahawm tak kaltlang hian kan sawi lo tih ka han puang duh a ni. Rinthu in kan kal lutuk deuh thin em aw ka ti a. Khang kha a nih avangin kan ngaihbel kual a, thil kan hre fuh tawk lo niin ka hria a. Tichuan, May 27, 2020 khan Land Freezing Order kan ti a, ka sawi tawh ang khan KMLA AutoCAD hmanga an rawn thawna kha kan hawng thei lova. Chutah chuan, rehabilitation tur anga an rawn sawi avang khan a ngaia kha kan freeze a ni. Amaherawhchu, new alignment a lo awm tak avang khan harsatna kan tawk a, chuvang chuan, khalai kha siamthat a ni a, siam that duh lohna tur emaw, siamtha duh lo emaw tumah kha an awm lo. He House zahawm tak kaltlang hian kan SO ngei pawh kha, khati zawnga mimal taka han thlir chuan Election 2003-a ka khingpui fapa kha a ni a. Chuvang chuan, kha mite kha duhsak emaw, thil diklo tihpui tur khan tunge dah duh ang tih kha he House zahawm tak hian min hriatpui teh u.

Tin, Mualkhang gas bottling plant chungchang kha; ni e, kan hriat angin gas lamah harsatna kan tawk nasa a, sorkarin a ngaipawimawh a. MNF manifesto-ah chuan, “gas bottling plant lian zawk buatsaih a ni ang” kan ti a. Food Civil Supplies &

Consumer Affairs Minister zahawm tak hi thahnem a ngai a, vawiin ni thlengin hun harsa kan tawh karah pawh, kawtlaiah, ‘gas duh em?’ tiin, ‘kan sem leh ang’ kan tih kha kan lo sem leh thei ta a, a lawmawm khawpin ka hria a. Mualkhang Gas Bottling Plant extension tur hian phalna nikum July 28, 2021 khan provisional land lease (Member zahawm tak Pu Lalrinsanga Ralte zawhna kha) kan pek tawh thu ka han sawi lang ni se la.

Tin, Member zahawm tak Pu C. Ngunlianchunga’n “Mualpui-ah mimal ram pek a awm a, mahse a neitu hriatchian a ni si lova, tun thlengin vantlang tana an humhalh hi eng tianga kalpui tum nge anih” a tih kha, Ni e, ram thenawm chiah In nena insi reng a ni a. He thil hi a mak khawp mai a. Kan hriat angin Mualpui House Pass, Site Plan hi 1990 khan siam a lo ni tawh a, chutah chuan Sl. No. 38, Pu Chawngchhunga S/o Dengrikhuma, Plot No. 36 hi zawhna rawn zawhbelhtu MLA zahawm tak Pu C. Ngunlianchunga thenawm kha a ni a. A neitu hi kan zawng thin a, tun thleng hian kha allotment peka kha kan hmuchhuak thei ta lo a ni. Chuvang chuan, dan angin kan cancel ang a. Chutah chuan dan ang vekin land lease dil an awm a, chu chu vantlang tan a ni a. Chumi tur chuan kan inchinfel veleh dan anga pek turin kan inruahman tih kha ka chhanna ni se. ka lawm e.

PU ZORAMTHANGA, CHIEF MINISTER: Pu Speaker, House information atan kha thil connect-ah khan tawi te ka han pe lawk ang a.

Ni e, Member zahawm tak Pu Hlana rawn zawh, “Vairengte atanga Sairang inkar 4-lane tur hi engkim alignment te tih fel a ni tawh a, khatah khan” tih kha a rawn sawi zawk a. Ni e, kha laia khan “fel chiah lo lai a la awm e,” tih kha kan sawi duh chu a ni a. Hei, Mualkhang ram dep zawka kal tir kha kan sorkar-a PWD lam chuan kan kawng hlui, (Tlawng lui kam) tuna kan kawng pangngaia Sairang rawn pan hian siam an tum a, NHIDCL-a consultant-te khan. Mahsela, tuna kan kawng te tak te enkawl pawh kan ti hlei thei lova, a min leh thildang a hautak lutuk a. He kawng dung phei Tlawng lui kam a mi hi four-lane in. A lei kha zau em em, han khawih chet chuan tui a rawn lian ang a, lui chhak lawk kha a ni si a, a tawlh leh ang a, kan buai lutuk ang kan ti a. Tichuan, a chhak zawk Mualkhang ram hnung lamah khian kal tir rawh u kan ti a. An han survey a, NHIDCL Consultant te pawh khan report an pe a, kan hriat dan chuan NHIDCL pawh khan ngaihndan phir an nei a ni. Hlawm khat khan Tlawng lui kama kal tir an duh a, a dangin, “hei chu a chi loh, a chhakah kal tir ila a safe ang” ti kha an awm bawk a. Tichuan, Tlawng Lui kama kal tur khan an recommend ta a. Chumi thu chu Pu Nitin Gadkari, MoRTH Minister pawhin min rawn phone a, ‘khata kal tir kha kan tum e,’ a ti a. Mahse, nasa takin hei hi chu keipawhin ka object a.

Tin, NHIDCL mite pawh kovin, kan hrilh a. “in han ti mah ang a, tuna 2-lane pawh ni mang lo kan kal tir lai pawhin, fur chhe karah a mual tawlha tawlh nen; khu khu 4-lane in laiin lei han khawih che tak tak ula, nangni chuan in ti zo ang a, in haw ang a, nakinahrawn tawlh in han buai leh tak tak se la, “hei hi tu laih tir nge” an ti ang a, thangthar anchhia kan khum ang. Chuvangin, hei hi chu keini chuan rem kan ti lo reng reng” tiin justification pawh kan thawn vek a. Tunah, “helai khawi zawkah nge kawng a kal ang” tih pawh kha, hei hi MoRTH-in an enpui mek a ni.

Chutih lai chuan nichina kan sawi gas bottling plant neitu company khan, 4-lane in rawn laih ... (*interruption*)

PU VANLALHLANA : Pu Speaker, khawngaihtakin, Nitin Gadkari khan kan House Leader sawi kha a pawmlo niin ka hria a, a pawmlohna lehkha, a rawn hriattirna copy pawh kha ka lo hmuh hmaih a, nghe nghea na. Chumi hnu thil em ni, kha kha?

PU ZORAMTHANGA, CHIEF MINISTER: Aw, chumi hnu thil ni e, tunlai hian kan innawr mek a ni. Chuvangin, gas bottling plant pawh hi 4-lane-a an laih dawn chuan a buai vek a, kan objection-ah kha kha pakhat. Tin, a dawt lehah chuan, “rel kawng a hnai lutuk a, 4-lane-in rawn lai ula, min sela, a chhakah sang deuh deuha in do kai nen a hlauhawm lutuk, a chi loh” kan ti a, chu chu tunah hian nasa takin kan innawr a. Tunah hian NHIDCL consultant te pawh kan entir nawn leh a, kan PWD hotute nen an han en chuan lui kama 4-lane kawng laih pheih chu a tha kan tilo, in han lai ang a, kan kawng awmchhun traffic a tibuai vek ang a, fur chhe lain khitah Sakawrhmutuiai tlanga kawng kha truck kal theihna a ni tawh si lova, kan vaiin kan buai vek ang. Amaherawhchu a chhak zawka an laih chuan kawng pahnih, pakhat alo chhiat palh pawhin alternative a ni ang a, chu chu a tha ang a.

Tin, NHIDCL pawh tunah hian kan innawr mek a, kan hmin thei viauin kan hria a, an mahni pawhin, “a ni tak e” an ti a, technical assessment te pawh kan pe a. Chuvangin kha lai kha innawr lai mek an ni a, 4-lane kalna tura compensation pawh kha han ti tak tak turin ala chiang thei lo a ni tih kha Pu Speaker, ka han belh a ni e.

SPEAKER : Starred Question No. 105, zawt turin Dr. Vanlalhlana ilo sawm ang u.

DR. VANLALTHLANA : Pu Speaker, ka lawm e. Hei, ka zawhna hi nimin lamah te khan a then chu kan sawi tawh a, amaherawhchu Starred Question-ah a rawn chhuak dawn tih ka hre tawh bik si lova, a rawn chhuak nghal a ni. Minister zahawm tak Higher & Technical Education Department changtu chhan atan –

- a) RUSA hnuai Assistant Professor te hi dah ngheh tumna a awm em?
- b) RUSA hnuai hnathawkte hi tute nge endik thin?
- c) Aizawl North College building tur hi Aizawi DIET campus-ah hian sak belh tumna a awm em?

SPEAKER : Chhang turin a changtu Minister zahawm tak Dr. R. Lalthangliana ilo sawm ang u.

DR. R. LALTHANGLIANA, MINISTER: Pu Speaker, Member zahawm tak Dr. Vanlalhlana zawhna -

- a) RUSA hnuai Assistant Professor te hi RUSA Faculty Recruitment Support a tawp hnuah State Sorkar hnuai an thawh zui dan tur ngaihtuah mek a ni.
- b) RUSA hnuai hnathawhte hi Technical Support Group (TSG) leh Project Monitoring Unit (PMU) ten an endik thin a ni. Helaiah hian Principal pawh hian role pawimawh tak, mawhpurhna pawimawh tak mai a nei tel a ni.
- c) Aizawl North College building tur hi Aizawl DIET Campus-ah sak belh tumna a awm lo.

SPEAKER : *Zawhbelhna* zawt turin member zahawm tak Dr. ZR Thiamsanga ka sawm e.

DR. Z.R. THIAM SANGA: Pu Speaker, ka zawhbelhna chu –

Champhai Government College khi tunhma lama assessment-ah pawh, Hrangbana College tih lohah chuan a tha ve pawl ber a ni thin a. Amaherawchu nikum lamah khan zirtirtu kan indaih lo ta riau mai a, nikumah khan Chemistry zirtirtu pahnihin vanduaithlak takin min boral san ta hlauh mai a, tunah hian Chemistry zirtirtu pahnih kan nei a, tin Mathematics zirtirtu hi pathum chauh kan nei a. NAAC assessment pawh hi han ti leh dawn ila, minimum requirement pawh pali neih kha a ngai si a. Chuvang chuan hei hi khawngaih takin min dah belh sak thei ang em? Ka lawm e.

SPEAKER : *Zawhbelhna* zawt turin member zahawm tak Pu KT Rokhaw ka sawm a, chumi zawhah a zawhna neitu.

PU K.T. ROKHAW : Pu Speaker, Govt. Siaha College-ah Science Department dah let leh turin session-ah vawi tam ka dilin ka sawi tawh thin a, mahse vawiin ni thleng hian hlawhtlinna kan la hmu lova. RUSA hnuai atanga Assistant Professor an lak atang hian Govt. Siaha College-ah hian academic session thar atang hian Science Department min dahsak thei ang em tih ka zawt e.

SPEAKER : Zawhna neitu Dr. Vanlalhlana ka sawm leh e.

DR. VANLALHLANA : Ka lawm e. Ka zawhbelhna chu hei hi a ni - Faculty Support Scheme-ah khan RUSA a scheme a zawh khan 123 ang te pawh kha dah ngheh tura tih a ni a. Lok Sabha Session-a Minister chhannaah pawh “RUSA Scheme-ah hian a awm e” tih a ni a, chu chu an dah ngheh tak loh avanga Court-ah pawh kal ta an niin ka hria a, hetah hian inbiakna te engtin nge a neih tih kha ka zawhna a ni e.

Tin, RUSA hnuai hmathawhte, ka bial chhung bikah chuan Aizawl North College sak a ni a, kan kawmchhak lawka awm a ni a, a department leh Secretariat lam te pawh kan in kova remchangah. A ban a kawia, a beam a kul bawka, chutiang chuan thil a awm avangin department pawhin a rawn endik nghe nghe a. Department endiknaah chuan a ban kawia hi, “a kawma kha an an lo ti kawia deuh a ni e,” tih a ni a. Chuti anih chuan, tunge endik tih kha, technical support group te kha an awm a, lock-down lai te khan an hna chu a chaklo deuh thin a. Hei hi endik that deuh dan, RUSA hnuai hna tam tak a awm si a, tan la deuh sela ka duh a, engtin nge tan lak an tum tih kha ka han zawt bawka.

Tin, Aizawl North College hi a pathumna-ah chuan kan sawi deuh hlek ang a. ‘Aizawl pawn lam’ ti ila, a sir lampang deuha college hrang hrangin ram an neih ang hian, Aizawl North College chiah hian ram a nei lova. Tin, session hmasa lamah kan CM zahawm takin, “zirlai hovin thutna te an nei lova, kan hriatpui a, churang chuan DIET campus-ah hian building sak te a ni dawn a, chutah chuan hmalak mek a ni” tih kha min hrilh dan a ni. Amaherawhchu tunah hian hmalakna engmah a awm leh si lova, tun budget tharah te hian Finance lampangah te rawtna thehluh tumna a awm em tih kha ka zawt duh bawka.

Tin, a tawp berah chuan kan Minister zahawm takin RIPANS chungchangah report te a han pe tel thin a, hei hi Mizoram sorkar hnuai awm nge central sorkar hnuai tih kha kan zawt tel duh bawka a ni e.

SPEAKER : Awle, a theih ang ang chhang turin a changtu Minister Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, RIPANS chungchang kha ka han chhang ang a. Kan ram chhunga awm a ni a, a awmzia chu, India hmarchhak hi ‘beneficiary state’ kan ni a, chung zingah chuan *most beneficiary state* kan ni a, hei hi kan ta tlukah kei chuan ka ngai hmiah mai a, amaherawhchu thuneihna kan neih chin erawh chu a awm a. Nizan lampanga hei hi ka han sawina chhana kha, Mizoram

University kan han neih te pawh pawnlam atangin admission eng emaw zat kan ti a, pawnlam atangin zirtirtu enge maw zat an rawn kal bawka. RIPANS pawh a tak takah chuan keimahni hian kan chhawr ber a ni tih hi sawi ila a dik ka ring a.

Tin, ‘infrastructure’ kan ti a, kan building tha pui pui saw va en ve ula ka duh khawp mai a, crore zahnih chuangin national contractor-te thawhtir an ni a. Chuvang chuan, kan ta tluk hian kei chuan kan ngai hmiah mai a. Tin, Mizoram-a Central Government, Central Office-te pawh hi kan in-tih tatu thiam a tha hrim hrimin ka hria a, chu chu Dr. Mathlana ka chhanna kha ni ta sela. Tin, beneficiary state kan awm a, helai hmuna awm anih avang hian director leh thil dangah pawh tunah pawh hian *min pa pek* deuh a ni.

A hma pawhin Mizoram-a kan doctor a director-in an dah a. Tin, a staff te pawh saw kan mi leh sa, kan leilung fate deuh vek an ni a, non-teaching staff leh teaching faculty-ah pawh an ni. Hei hi a thatna em em chu, (nizan khan ka sawi hman lova, tlemin hun kha a tlai deuh tawh a) an han zir chhuah tawh hnua hna zawnaah hian a tha khawp mai a, 100% hian hna an hmu tlangpui a ni. Kha kha ka han tihbelh lawk a nih chu. (**Speaker:** Kha lamah kha chuan peng thui loving aw.) Pu Speaker, zawhna neitu a ni a, ka zah ve si a. Thil hi a ngaihtuah nasa thin a, Pu Mathlana hi a fakawm a, chuvang chuan ka han ti mai a ni e.

Member zahawm tak Dr. ZR Thiamsanga, Champhai North bialtu-in a rawn sawi kha, Mamit bialtu pawhin khatiang deuh zawhna kha a nei bawka. “MLA Fund atangin cheng nuai 7 ka seng tawh e; Geography Department Mamit College-ah ka ti” a tih te pawh kha chhang tel nghal ila. A zawt lo naa, a zawt duhin ka ring a, a theih tawh si lova.

Hemi chungchang hi a buaithlak khawp mai. Pu Speaker, zirtirtu kan indaihlohna hi a nasa khawp mai a, tunah hian clear vacancies 173 kan nei a, heti em ema vacancy kan nei tam hi kawng leh lamah kan vanduai zawk nge kan vannei aw ka ti a. *A vanduin* ti zawngin sawi ta ila, nikum chho atang khan zirtirtu pension runpui a thleng a ni. Tun thla ringawtah pawh kan Joint Director-te pahnih an pension a, College Principal eng emaw zat an pension bawka, a sawm tel hi an pension a ni. A hmian thite kan lo nei bawka si a, nichinah kan ngaihtlak ang khan, Champhai-ah te. Chuvang chuan rin aiin indaihlohna a nasa khawp mai a. Chuvang chuan MLA fund-in Champhai leh Mamit-ah te in lo thuam kha a lawmawm lutuk lain, kan la inchhawk thei lo deuh hlek a. Eng pawh ni se, kan sum dinhmun te a la hriat theihloh deuh hlek a, ngaihtuahna kan la seng turah ngai ila. Champhai pawh vanduin kha an tawka, kan hria a. Khang post ruak ang chi kha tam tak kan nei a ni tih kha ka sawi duh a ni.

Chutiang deuh chuan kan member zahawm tak Pu KT Rokhaw khan a zawt thin a. Govt. Siaha College-ah Science stream introduce kan ti a, eng emaw lai khan. Amaherawhchu, kan han tih dawn khan survey neih a ngai a, a feeding school te atanga chhut khan zirlai naupang an awm mang dawn lova hriatna kha kan nei a ni. Tlem te an nih khan science stream hawn khan awmzia a neilo tlat mai a, Pu Speaker. Kawng lehlamah chuan kha khan harsatna min siam a. Chumi hnuah pandemic-in min han tlakbuak chho leh a, zirtirtu indaihlohna boruak nen, ruahmanna a hmaa kan neih lai khan han ti ila chuan kawng dang a ni a. Eng pawh ni se, thutawp a la ni lo turah ka ngai deuh a, kan dinhmun te a ziaawm chuan. Govt. Lunglei College-ah science a awm a, saw lampang, a hla zawkah hian neih chu a tul ka ti khawp mai a, “ngaihtuahna kan lo seng zui turah ngai ila” tih khan ka han chhang mai ang e. **(Pu KT Rokhaw: “Science zirtur students an awm mang lova” tih kha, Pu Speaker, students zingah science zir tur hi kan ngah tawh khawp mai a, chuvanga Science Stream chungchang pawh House-ah vawi tam sawi ka ni a. Chuvang chuan, kan Minister khan min ti hlawhtling sak hram se tih kha ka ngen nawn leh a ni e.)** Ni e, uluk takin hei hi ngaihtuah a ngai a. Sawlai ah survey neih that leh a ngaih ka ring a. Thil kan tih dawn hian uluk takin, ‘a intake capacity’ ti mai ila, kan neih theih dan tur ang chi, a feeding higher secondary school atang tea zir chian a tul ka ring a. Eng pawh ni se, kan lo enzui turah ngai ta ila.

Tin, a question neitu hian zawhna chi hrang hrang a rawn zawt a. Chung zingah chuan a hmunhma chungchang kha ka han chhang hmasa ang a.

“DIET premises-ah khian a accommodate theih lawm ni” tih kha, kha kha a tul hle mai a, kan ram erawh chu a nilo thung a, School Education ram a ni a, kan awt khawp mai a. Nimina ka sawi ang khan Aizawl khawpui chhunga college ho hi a buaithlak em em mai a. Aizawl Govt. College pawh Mualpui-ah kan sawn, Zirtiri College pawh Durtlang ah kan sawn, Hrangbana College pawh Muthi-ah, khatianga tih kual kha a ngai a. Aizawl West College, Dawrpui Vengthar-a awm pawh traffic a ti jam nen a remchang lo kan ti a, academic atmosphere a awm bawk si lova. Chuvang chuan, kan hon. CM hma lakpuina a zarah (ka department enkawl lam a lo ni bawk a) Handloom ram kha kan tifel tawh a, khalamah khan insawn thlak kan tum mek a.

Sawlai saw a buaithlak a, kei pawhin tum 3 ka tlawh tawh a. Market a bul chiahah a lo awm a, ka chan lam a lo ni ve leh a, “engtin emaw i siam rem ang” kan ti a, a bialtu MLA pawh hian a buaipui viau mai a. Kan inbe nasa a, official file-ah pawh hian a kal hnem viau a ni. An mamawh khawp mai a, amaherawhchu ka rilru tak takah chuan Aizawl khawpui atanga hla deuhah remchang zawn dan a awm em aw, kan CM bial Zemabawk lamah te sawn ram kan la nei mai lawm ni te kan ti a, ani pawh hian ngaihtuahna a hmang em emin ka hria. Engpawh ni se, DIET campus kha chu kan kut

a nihloh avangin commitment ka pe thei lo hrim hrim a. A hmun chungchang erawh chu enzui tlak tak a ni tih kha ka chhanna ni sela.

A dang lehah chuan, RUSA zirtirtu Faculty Support kan lakte hi House hian a nihna diktak kan hriatchian a pawimawhin ka hria a. RUSA-1 hi 2017-a lokal a ni a, chutah chuan zirtirtu 72 min phalsak a ni. Kan han ngaihtuah a, Cabinet-ah kan pulut nghe nghe a ni. “Dah ngheh ngei ngei tur a ni” tih ang zawng tak khan Govt. of India khan a ziak em ka hre lova.

Amaherawhchu, an sawi zawk chu, a ‘terminal period’ ti mai ang, Govt. of India-in, “HRD Ministry lam atanga an rawih theih hun chhung a tawp a nih chuan State sorkar-in an thawh chhunzawm dan tur ang chi ah chuan mawh a la ang” tih kha Cabinet-a kan ngaihtuah dan dik tak a ni. Chutah erawh chuan “hei chu kan mawhphurhna a ni” kan ti a, Cabinet minute-ah pawh a awm a ni. A lak dan tur chungchangah pawh hian, “University Grant Commission Scale anih ang hian...” tih te pawh kha a awm a ni. Chutah chuan “Mizoram Public Service Commission lak tir a tha ang” kan ti a, *Quality, Academic Excellence* kan duh avangin.

Tichuan MPSC kaltlangin kan la ta a ni. An han thawk chho char char a, nizana ka sawi kha ka sawi nawn leh duh a. HRD Ministry ah khuan eng emaw fel lo tam tak a awm a ni. Kei pawhin DO letter vawi tam tak ka ziak a, nikum May thla atang khan an hlawh hi India ram hmun danga RUSA zirtirtute pawh pek an la ni tlat lo mai a, chu chuan harsatna tam tak a siam a ni. “RUSA-3 in ti leh dawn em” kan tihin final decision an siam ngai bawk si lova, “hei hi chu State Level-ah pawh meeting nei ila, i sawiho teh ang u” tiin rawtna ka siam thin a, Union Minister hmasa hunlai te leh vawiina mite-ah pawh. Meeting an ko duh bawk si lova, (ka han ang ve deuh teh ang min hmupha lo bawk a) hei hi chu a fello ka ti khawp mai a, hei hi vawiinni thlenga RUSA Assistant Professor te lawmman tur an pek theihloh chhan dik tak a ni. UC progress report engkim mai kan thawn thlak hi a tam lutuk tawh tlat mai a, official communication bakah verbal communication tam tak a awm a ni. Engpawhnise khu lamin thutawp an la siam lo a ni.

Tin, a dang lehah chuan, an lo tawp palh anih pawhin State sorkar mawh tur anga cabinet-in kan lo tih hi chu kan comply chu a ngai ang a, eng emaw harsatna an tawh mek lai pawh chuan Pu Speaker, engtin emaw talin “State sorkar hian hma kan lak a ngai anih hi maw le” tih kan ngaihtuah a. Nikum kumtawp lam atang khan kan ngaihtuah ngun khawp a, post ruak fill-up tur zawng zawng kha DP&AR leh Finance lam te kaihhnawih a lo ni dawn a. Amaherawhchu, vanduaithlak takin kan tih dawn ni khan court-ah hemi chungchang thu hi an lo thlen tlat mai a, churang chuan ‘subjudice’ a nihna lai a awm tlat mai a, han kal thui leh hlek tur khan min ti khawlhkham deuh hlek a ni tih kha ka chhanna ni sela. Anni hi (post ruak hrim hrim kan ngah naa) kan

sorkar hian kan hria a, theihtawpa hmalaka, tan kan lak erawh chu a tul a ni. Tin, NAAC assesment an rawn tih hian faculty awm zat te leh thil tam tak kha an rawn ti a.

Tichuan building sak chungchang kha ka beng pawh a thleng tawh a, nikum eng emaw lai khan “a ban a kawi, a bim...” tih vela kha a dik a. Endik vat turin ka ti a, kei pawhin ka hriat ve leh an endik a. Hei, hun ka la nei lova, session te a la ni a, remchang nakinah a hmunah ngei va en te pawh ka duh khawp mai a. Sawlai a chung kan sak laia saw tlema zawng pawisa dah a ni a, a bialtu MLA te nen pawh kan en ang chu maw le, a hmunah. Tute emaw tirh leh ngawt thin ai chuan. A bakah Pu Speaker, hnathawh hi a pawimawhin ka hria a, kan endik dawn nia aw, remchangah kan inbia ang a. Ka lawm e.

SPEAKER : Starred Question No.106 hi chhuak hman se ka ti khawp mai a. Kan leader zahawm tak leh Revenue Minister te bakah House ka ngen duh chu, hei, Pu Duha zawhna hi a ni a. Government Complex-ah khuan, tuna *Zawhna leh Chhanna*-a a lan danin In 433 a ding a, hei hi tumahin kan cancel tak tak ka ring lova, a committee te dinin regularize ila a thain ka hria. Hawh u, hei hi chu i chingfel ang u, he 8th Legislative Assembly hian. Zawhna hi kumtin hian a awm ziah mai a, a ngai reng tho mai chhan a ni a, khutiang In khu kan thiat lek loving. In Za-li, Za-nga dawn khu, chu chu ka han sawi belh a ni e.

Awle, tunah chuan *Laying of Papers*-ah kan kal ang a, Minister zahawm tak Pu Lalruatkima'n, “a copy of correction of reply of Unstarred Question No. 231, Ballot No. 193 asked by Pu Zodintluanga Ralte, MLA on 1.3.2022” hi House Dawhkan-ah rawn *lay* se.

PU LALRUATKIMA MINISTER: Pu Speaker, ka lawm e. Unstarred Question No. 231, Ballot No. 193, Pu Zodintluanga Ralte, MLA zahawm takin a zawhna Ni 1.3.2022 ami chhanna chu he house-ah hian ka rawn *lay* e.

SPEAKER : A copy kha han sem ula. Kan chang kim em? Awle, tunah chuan *Financial Business*-ah kan kal tawh ang a, vawiinah hian kan Minister zahawm tak tak Pu Lalruatkima leh kan Deputy Chief Minister zahawm tak Pu Tawnluia te demand kan sawiho leh dawn a, pass nghal kan tum dawn a ni. Hun kal taa kan tih thin angin a pahnihin kan la kawp leh mai ang a, a rualin kan la leh ang a. Tunah kan Minister zahawm tak Pu Lalruatkima kan sawm ang a, House Dawhkan-ah hian a demand te –

- | | | |
|---------------|---|---------------------------------|
| Demand No. 6 | - | Land Revenue & Settlement; |
| Demand No. 26 | - | Information & Public Relations; |
| Demand No. 38 | - | Rural Development |

submit turin ka sawm e.

PU LALRUATKIMA, MINISTER : Pu Speaker, Governor of Mizoram recommend-na leh i phalnain, he House zahawm takah hian heng ka Demand te –

Demand No.	Purpose	Amount (in ₹)
6	Land Revenue & Settlement	31,96,34,000.00
26	Information & Public Relations	11,16,85,000.00
37	Rural Development	4,36,17,47,000.00
TOTAL		4,79,74,66,000.00

he House zahawm takah hian min ngaihtuah sak turin ka rawn submit e. Ka lawm e.

SPEAKER : Tunah chuan Deputy Chief Minister zahawm tak Pu Tawnluia, House-ah a demand-te submit turin lo sawm ila.

PU TAWNLUIA, DEPUTY CHIEF MINISTER: Pu Speaker, i recommend-na leh i remtihain, Demand No. 13, 25, 46 atana 2022-23 chhunga pawisa hman tur ₹11,80,61,46,000.00/- heng a hnuiaia department te hman tur –

Demand No.	Purpose	Amount (in ₹)
13	Personal & Administrative Reforms	4,79,88,000.00
25	Public Health Engineering	4,71,14,09,000.00
46	Urban Development & Poverty Alleviation	7,04,67,49,000.00
TOTAL		11,80,61,46,000.00

hi House ngaihtuah turin ka rawn submit e. Ka lawm e.

SPEAKER : Awle, kan Minister zahawm tak tak ten an demand te an rawn submit ta a, sawihona kan nei ang a. Minute engzat nge kan inpek leh ang le? *Minute 10* kan ti leh anih chu. Minute 10 inpe leh ila, tha kan ti tlang maw? Awle, tunge han sawi hmasa ang le? Member zahawm tak Pu Zodintluanga Ralte ka sawm e.

PU ZODINTLUANGA RALTE : Pu Speaker, ka lawm e. Kan thusawite kan Minister-ten uluk takin lo ena, nakinah hun thawl nilenga an neiha min chhan theih nan ka ti a. A hnuhnung lama sawi chuan official ten an lo hrilh hman loh palh takin, hun hmasa ka rawn dil a ni e.

A hmasa berahah chuan Demand 46, Urban Development & Poverty Alleviation Department chungchangah hian rawn luh ka duh a. Nimin lama Smart City chungchangah khan Sport Minister khan ‘Sorkar hmasain a ngaihna an hre lova, kalpui dan pawh an hre lova, kan Sorkar hian hetiang hi kan rawn kalpui a ni’ a rawn ti a. Tuna ka sawi tur hi Pu Speaker, kan Sport Minister hian nakin a wind-up naah “hengte hi a dik a ni” min lo tihsak ngei turin ka rawn ngen lawk duh a ni.

Kan hriat theuh angin Smart City hi kan Prime Minister Pu Modi khan June 25, 2015-ah khan a launch a, khawpui 100 thlanchhuah a ni a, Khawpui 100 thlanchhuah zingah Aizawl hi a tel ve a ni. Hemi thlanchhuah a nihna ang hian ‘preparatory stage’ an ti a, chutah chuan cheng vaibelchhe 2 kan hmuh nghal a. Chumi hmang chuan Aizawl City proposal kan siam a, khatih laia sharing pattern kha 50-50 a ni a, vawiin thleng pawhin 50-50 a la ni. Hei hi chiang takin ka rawn sawi duh a. A tirh te atang khan keini ang State te atan chuan huphurhawm kan ti a, *50-50 sharing* hi Meghalaya Sorkar phei chuan an phuphurh em avangin competition-ah pawh an tel ve lo a ni. Amaherawh chu politics boruak, BJP Sorkar khan kha competition-a tel miah lo kha Smart City selection-ah khan a pawm tel ve ta tih kha kan hria a ni. Smart City proposal siamna hi competition a ni a, round 1 leh round 2. Round 1-ah kan tling zo lova, round 2-ah pawh kan tling zo lo a ni. Kan Official-ten theihtawp an chhuah a, a vawithumna-ah chuan kan tling ve ta a, chu chu June, 2017 a ni.

Vawiinah hian an state atana bul tan tlai te an awm ve a ni. Ka sawi duh chu, khatihlai pawh khan Congress Sorkar kha chuan theihtawp a chhuah a, hma a la a. Smart City Commission-in a a sawi angin Special Purpose Vehicle (SPV) din a ngai a, Chu SPV chu Aizawl Smart City Limited (ASCL) Smart City project-te vawiin nia implement-tu hi an ni. He SPV hi Aizawl Smart City Limited dinna tur proposal UD&PA Department-a pek chu Council of Ministers-in October Ni 25, 2017 khan a approved tawh bawka a ni. Sorkarin ASCL a phal takah chuan Public Company anih dawn avangin corporate tura tih ni a, March Ni 28, 2018-ah ASCL chu Ccompany Act, 2013 hnuaiyah corporate a lo ni leh ta a ni. Hemi hnu hian Smart City proposal zulzuiin project siam a ngai a, ASCL project siam tur chuan Management Project Consultant (MPC) rawih a ngai ta a, a ruai turin ni 19.6.2018-ah *request for proposal* chhuah a ni a, Central UD&PA-a panel firm chauhin an chhang thei a, consulting firm 4-in an chhang a. Chuta tang chuan a chhang tha ber, (score sang ber) WAPCOS Ltd. chu thlan a ni. WAPCOS Ltd. chuan DPR te siama pawisa te lachhuakin, a hnathawkte zawng zawng a buaipui tur a ni. Chutah sorkar thar a lo piang a, Minister chak tak Deputy Chief Minister-in a enkawl avangin hma an la a ni.

Tute emaw mahni thil tih that sawi pung punga, midangte sawisel tur chu ni ve ta ila, “engatinge kum 3 chhung, vawiin ni thleng hian tender stage chauh i thlen le” tiin

han hau ve pung pung pawh ni ila, a awm viauin ka ring. Mahse Sorkar kalphung kan hria a, WAPCOS Ltd. hi sorkar tan a tha ber lo. A hmain sorkar-in kan hmang tawh a, a tha lova, mahse a score a san ber avangin loh theih lovin hman a ngai si a, chu chu duh angin a chak lo tih ka hriatpui a ni, WAPCOS Ltd. Chuvang chuan, central sorkar-a hmalakna te pawh duh angin a chak lova, tunah pawh hian a kal chho zel a ni.

Tin, sorkar hmasa kha project hrethiam lo leh project hrechiang lo ang te khan nimin khan a sawi a. Pu Speaker, he Smart City hian *guideline* mumal tak a nei a, chumi hnuaiah chuan *crore infrastructure element* a nei a. Chung zinga pawimawh a sawite chu - adequate water supply; assure electricity supply; sanitation including solid management; efficient urban mobility and public transport; affordable housing especially for the poor, ropeway connectivity and digitalization; good governance especially e-governance and specialisation and participation; sustainable environment; safety or security of citizen particularly women, children and elderly; leh health & education te an ni. Heng zawng zawngte hi an ni. Smart City-in a tum chu khawpui hmasawna tur electric mumal zawk kan neih leh cable line tawp lutuk thlak te; kan water supply tawp lutuk leh kan tuichhe paihnate siamthata khawpui tihchangkan kha a ni. “Sport Department hi chu district hran nei a ni a, sorkar ministry fund atangin Sports hmasawna ti tur anih laiin, hetah hian engatinge a rawn tih” Dr. Vnalalthlana’n a rawn tih kha thudik tho a ni. Chutihrualin, he mission hnuaia infrastructure component an sawi pawh hi district te tein an then a, state sorkar-in a duh chuan a tidanglam thei. Kan Chief Minister zahawm takin khatiang infrastructure, electricity leh water supply, mirethei insakte aia infrastructure tur a zuk nawr pawh kha a awm reng a ni.

Ka rawn sawi duh chu, sorkar hmasa kha Smart City-ah engmah ti lo anga sawi kha Pu Speaker, ka rawn sawi hi nakinah Minister zahawm tak UD&PA changtu hian khang ka sawi te kha “a dik a ni” tih min rawn nemnggeh sak sela ka duh a. Tin, *50-50 sharing* nilo anga sawi te kha, *50-50 sharing* hi a tirah a ni a, amaherawhchu, North-East bik hian Finance Ministry-ah 90:10 sharing a ti a ni. Mahse, UD&PA Department chuan vawiin thleng hian *50-50 sharing pattern* kha a tawlh chuang lova, chuti chung chungin sorakar hmasa hmalaknain vawiinniah sum tam tak a rawn lut chho a, heng hi tangkai takin kan hmang chho tan a ni. Pu Speaker, mahni chauh thil hria anga kan inngaih lai hian project kalphung te hria hi mi tam tak an awm ve a ni tih hi ka rawn sawi tel duh a ni.

Demand No. 26, Information & Public Relation hi tawi tein Pu Speaker, ka sawi leh duh a. Department pawimawh tak, sorkar leh mipuite inkara awm a ni a, sorkar thu pawimawhte, sorkar-in mipuite hnena a puanzar turte puangzar tu department pawimawh tak a ni. Tunah hian officer post 19-a awm mek a, tun thla tawpah hian pakhatin a pension san leh dawn a, ngaihtuah an ngai ve hlein ka hria a. Hetiang khawpa

department officer nei tlem chu a buaithlak dawnin ka hria. Ka hriat sual loh chuan tunah pawh hian Chief Minister hian PIO nghet ni lo, attached mai a neiin ka hria a, Governor pawh chutiingin. Kan rama kan hotupa ber te hi chuan a zinna apiangah leh zingah te, chhunah te mi pawimawh tak tak ten an hmu a, khatiang puanzar kha a pawimawh a. Chuvang chuan, hengte hi chu a nghetin han dah thei se la, officer-te a rang lama dah belh theih ni se la chuan tangkai lehzualin he department hi kan hmang theiin ka ring a.

Tin, advertisement chungchang hi kan sorkar hian dan mumal tak chu a nei nachungin, tunlaih chanchinbu mite an changkang chho ve zel a, colour printer te, chanchinbu pawh colour tein kan hmu ve thei tawh a, colour advertisement rate hi a hranpaa siamsak theih ni se chuan a lawmawm lehzualin ka ring a. Tin, kan Minister zahawm tak mawh chu a ni lo nain chanchinbu neitute hi mi harsa ve tak takte pawh an awm a. Sorkar atanga an advertisement bill an nghahhle em em te hi department thenkhatte hian an bat sak rei lutuk thin a, hengte hi kan department lam hotute pawh hian chanchinbu mite hi chu lo duhsak hram hrama, a hma lama an bill-te hi pechhuak turin ka rawn ngen sak nghal a ni.

Tin, Pu Speaker, Demand No. 25, Public Health Engineering hi, sorkar a inthlak a, Vanglaini chanchinbu-ah tui zuarin pheh khat an luah leh ta mai a, tan a ngai leh deuh awm mang e aw ka ti a. Thingtlang lamah kan Minister zahawm takin hmasawmna turin project hrang hrang a buaipui laiin khawpui chhungah hian tui harsatna sawi hi a tam leh ta riau mai a, hengah te hian tan han la leh se la. Vanglaini advertisement-a ‘tui kan zuar e’ tih kha awm lo thei se chuan a lawmawm hle ang tih ka ran sawi duh a.

Tin, khawpui chawmtu tur, darkar 24 water supply nei thei tura ruahmanna sorkar hmasain a lo siam, ‘37 MLD project’ siam mek khu, kan lo chan ve tawh te a nih avangin ka tuipei a, ka enpei a, a progress a tha ka ti a, kan Minister chungah pawh lawmthu ka sawi duh a. Sorkar hmasa hmalakna mah ni se a ni hi chuan chak takin a rawn bawhzui a, a hun takah project-te hi hawn har thin mahsela a progress ka hmuh hian, Covid karah pipe lian tak han phum hi ka huphurh khawp mai a, Pu Speaker, Chanmari atanga Laipuitlang pipe lak chhoh tur khi ka haw kawng a ni thin a. Project an siam lai khan an tih theih hi ka ring thlawt lova, engineer pawh hian khatiang pipe kha khilaih khian engtin nge an elh chhoh ang le ka ti a, tunah chuan an zo der tawh mai a. A ropui ka ti a, a hlawhtlin hun a nghahhleawm hle a ni.

Pu Speaker, hun dik tak ka hmang leh ta. Ka lawm e.

SPEAKER : Member zahawm tak Pu L. Thangmawia ka sawm e.

PU L. THANGMAWIA : Pu Speaker, ka lawm e. Vawinah hian department pawimawh tak tak Demand kan sawi leh dawn a ni a, hun a tlem avangin thluathlum vakna hun a awm lova, han sawi leh mawp mawp ila.

A hmasa berah chuan Demand No. 6, Land Revenue & Settlement hi mi tam tak kaihhnawih a ni a. Keini MLA ho hnenah pawh hian LSC tihfel theih dan tur te leh surveyor indaihloh thute min hrilh an tam thin a. Department hi an hah ngawtin ka ring a, an indaih lo ni pawhin a lang a. Chutihlai chuan, khawpui mai nilo thingtlang lam te pawh rawn hawi thei se la. Compensaton-te an tih dawn hian LSC tih loh te a lo ni a. Sorkar-in hmalakna an neih dawn hian an phu ang leh, pi leh pu atanga an ram neih tea an dawn tur ang zat an dawn loh phah thin ni tein ka lo hria a, LSC rang takin a tih theih thin loh bawk nen.

Chutih rual chuan, dan tam tak an nei a, a tha em emin ka hria a. Mahse, hengte pawh hi mipui tan awlsam zawka ennawn leh ngaite a awm lo maw tih te hi a changtu minister zahawm tak hnena ka zawhna ni tel se la. Dan tha deuh pawh hi han hman tak tak dawna mi tibuai mah zawk, ‘a chek duh, chek ni vek chuang si lo’ te pawh hi a awm ve thei a. Hmalak mek te pawh a awm niin ka hria a, chung chu ka han thlen duh ve a.

A dawtah chuan Demand No. 26, Information & Public Relation-ah hian, kan minister hi IV-Grade emaw a inti mai emaw aw ka ti a, Covid information chungchangah pawh hian zingkar hma deuh deuhah, vawiin thlengin a la ti char char mai a, a tei rei peih ka ti a, a fakawm ka ti bawk a. Ama zarah Covid hran lai tak tak phei kha chuan a information hi kan lo en a, nimin test result engzat nge ni leh ang aw kan lo ti thin a. A dinhmunah ding ve ta ila, tu officer hnenah emaw, ‘lo ti rawh u’ ti mai awma ka ngaih a ni a, mahse amah hian mipui rawngbawlna a ni tih hriain a han ti hi a lawmawmin ka hria a.

Tin, I&PR zarah vawiin session pawh media-te nena an tan kawpnain live-in kan en thei a. I&PR-a thawktu, sorkar thil tih puangzartu leh hah taka thawkte chungah pawh lawmthu ka sawi a. Chutihrual chuan, an hnungah hian ‘infiamna’ kan han ti a, a department-a thawk nilo, infiam mite rilruah a han lang tel ang deuh hian kan media ho, printed media pawh a ni ang a, cable-te leh a dang dang ho hi rim taka mipuiin thutharte leh thudikte kan hriat theih nana thawk an ni a. Mizoram-ah phei chuan ‘*Yellow Journalism*’ kan tih ang hi an awm vak lovin ka hria a, ‘an awm lo tawp’ han tih hi chu a har deuh mai thei a, mi zawng zawng kan va zir hman lova. Chutiang khawp chuan kan society-ah, kohhran chenchilh te kan lo nih avangin media ho pawhin an hna an thawk tha niin ka hria a, House zahawm tak kaltlangin lawmthu ka sawi a.

Demand No. 38, Rural Development hi ka bial kaihhnawih bertu a ni thin a, mahse nakinah UD&PA demand kan la sawi ang a, Demand No. 46 hi. Ka bial khaw pakhat UD&PA hnuaiah *town*-a min puansak tak avangin, vawiinah hian ka bial khua zawng zawng kaihhnawih department pahnih demand kan sawi mek a ni tih ka han sawi duh a.

BADP area kan ni tel a, eng emaw chenah chuan Kawlkulh, Vankal, Puilo leh Chhawrtui-te hi RURBAN hnuaiah an awm a, hengte pawh hi hmasawna tam tak kan sorkar hnua thleng a ni a. Hemi Kawlkulh, Vankal, Puilo leh Chhawrtui bakah hian khaw dangte pawh hi minister zahawm tak hian, chhaklam te pawh hi RURBAN hnuaiah a rawn zauh thei dawn tawh em tih te pawh ka hre duh a. BADP pawh khaw thum laiah a minister hnu hian kan neih belh tawh a. Khawkawn, Khawdungsei leh Ngopa-te BADP hnuaiah, a hmaa awm lo kha kan awm belh leh tawh a, kan lawm em em a ni.

Tin, IWMP hnuhma pawh a awm a, DRDA hnuaiah hian ‘Pu Aichhinga Road’ kan ti a, Puilo - Tuichang kawng kan han lai a, Champhai DRDA-a nih laiin. Khing te pawh khi MNF sorkar chuan damlai hminga road hming phuah a phal ve loh avangin helai House-a lo thu tawh ngei Pu Aichhinga hmingin ‘Pu Aichhinga Road’ kan ti a. Amaherawhchu, tuna Champhai highway laih hian a thenlai hia a rawn lai chhia a, mahse, ka va tlawh khan, “hemi road hi chu laih chhiat ka phal lo a nia, a kawngpui pawhna lai tur hi in siam leh a ngai a nia” ka ti a. Khi lai pawh khi Rural Development zar ka zona lai a ni bawka a ni.

Ni 100 Inhlawhna te pawh hi ni 100 tak tak kan la chho ta niin ka hria a, hengah hian a changtu minister leh a thawhpui officer leh staff zawng zawngte, central lam hi ka hre tlem a, ka hriat chinah chuan, “a hun taka report pek zat zat hi chuan a dan a dang deuh thin” an tiin ka hria a. Chuvang chuan, rim takin an thawk ang tih ka ring a, lawmthu ka han sawi bawka a, minister viak tha takin a enkawl tih a hriatin ka hria. Tunah pawh hian Ngopa-ah hall kan sa mek a, heng te pawh hi a zawh hunah chuan min rawn hawn sak nghe nghe se a thain ka ring a. Sawi tur a tam khati chinah khan Pu Speaker, duhtawka ta phawt i la.

Demand No. 13-ah hian, Personal & Administrative Reforms Department (DP&AR) leh Finance phalna tel lo hian post create emaw, create sa lak pawh hi a awm hleithei si lova. Budget speech-a ka lo lawmna em em chu, ‘Manpower Assesment Committee’ din hi a ni a. Hmanni-ah Finance Minister zahawm tak kan Chief Minister ni bawkin a sawi fiah tawh a. Ka lawmna chhan chu, ‘department tar’ ti ila ngaihloh lamah lo ngai lo ula, ‘tar’ ka tihna chhan chu senior officer hlii awm khawmna, officer thar kan lak tawh loh chuan a hmasa ho an pension huna inphaman tawh lo tur hi an awm nual a ni. Heng hi Manpower Assesment Committee din chhan niin ka hria a.

Chuvang chuan, hun harsa karah pawh department an rawn en chho dawn niin ka hria a, a report-te pawh hi ka nghakhlel em em a ni. Chutiang department chu pahnih, pathum emaw lai ka hria a ni. MCS chu kumtin deuthaw kan la a, a inphaman chho viauin ka hria a. Amaherawhchu, department dang tam tak en ngai an awm a, hei hi a rawn hmu fuh leh chat mai a, kan Chief Minister zahawm tak kaihruaina hnuaiah. Hei hian hna tha tak a rawn thawk leh dawn a ni.

Demand No. 25, PHE-ah hian a lawmawm khawp mai a, he House zahawm takah pawh ka lo sawi tawh a. Solar pump ni kher lo pawh gravity la nei tha ka bialah chuan Vankal te khi tui lak tur a tha a, ‘pipe hlui tawh hi engtin emaw tih dan a awm em’ tih te pawh budget session hmasa berah khan ka sawiin ka hria a, vawiinah chuan solar pump mai bakah khing te pawh gravity-a lak turin min tih that sak vek dawn a, ka lawm khawp mai a. MLA fund-a han tih dawnin a tam tham deuh bawk si a, nuai nga te chu nise kan ti mai ang a, mahse, nuai 50, nuai 60 emaw te a lo ni a. Tichuan tuizem tam tak min siam sak dawn bakah khaw ruk emaw, khaw sarih emaw laiah solar pump min tih sak dawn bawk a, hengah hian kan minister leh a thawhpui officer leh staff zawng zawng chungah lawmthu ka sawi duh a. A chhan chu heng project pumpui ti tur hian zan engzat nge an tlaivar tawh, an rawn nawr hmanhmawh thin zia te ka hriatpui a, “kan Deputy Chief Minister zahawm tak kaihruaina hnuaia an thawhrimna zara hlawhtling a ni” tih kha ka sawi duh a ni.

Pu Speaker, kum 10 kal ta 2007, 2008 vel, tuna kan House leader tho a leader laia budget speech hi ka hmu hlauh mai a, Finance Department website-ah. Ka rilru la deuh mai a awm a, chu chu Demand No. 46, UD&PA rawn din chhoh dan hi a rawn lang ta a ni. Phek 48-na, a lunglen thlak an tiin ka ring a, ka han chhiar ve reng reng ang e, Pu Speaker, i phalna-in aw. “During 2006-2007, we have created a new department of Urban Development & Poverty Alleviation with the intention of bringing about a more efficient Urban Development & Poverty Alleviation and amount of ₹50 lakh was allocated for initial establishment cost.” tih a ni. Nuai 50-in kum 2006, 2007-ah kan House leader zahawm tak hovin an lo ti a. Vawiin hian budget hi ka han en a, (ka chhiar sual ang em aw, a tam tam lutuk a) vaibelchhe 7,04,67,49,000.00 a ni chho tawh a ni. Hetah hian ka bial Ngopa a han tel thei ve tur te hi ka han lawm khawp a, ka sawi lo thei lova, Pu Speaker. Kan sorkar tirh khan kan Dy. Chief Minister zahawm tak hi ka ngen a, “Ngopa leh Kawlkulh te hi *town*-ah min puan sak ve teh” ka ti a. Mahse, khatih laia official lam atanga ka hriat dan chuan, *census town* lo chu a tih theih hrih lova, census a nih leh hma hi chuan *town* hi a awm belh tawh rih ka ring lo tih kha a ni. Ka hmuh hmaa kan officer thil hre chin ten min hrih dan a ni a, a dik pawh a dik tho a.

Amaherawhchu, kawng a han zawng ta a, an decision siam dan pawh hi ram leh hnam an hmangaih niin ka hria a. Kawlkulh chu min telh sak ta lova, ‘Civil SDO awmna

hi i ti ang' an ti a, va hnial theih pawh a ni chuang lova. Base neiin, opposition bial ngei Pu Lalrindika Ralte bial Kawrthah pawh kha a tel a ni. Tikhan, 'ruling bial chauh i ti ang aw' tih lam kha a ni lova. A hnuah "Constituency tawpa *town*-a puan loh khua, constiteuncy pahnih" an ti leh a. He judgement hi ka han ngaihtuah vang vang hian a zahawm ka ti a, a kal hmang pawh a dik ka tiin sawi nuam pawh ka ti a. Kawlkulh pawh telh se tiin theihtawp ka han chhuah naa kan hotute thutlukna siam dan ka han hrilh hian ...(Pu Speaker, ka laklawh, ka inbuatsaihna a zo tep tawh e) an hrethiam viau pawhin ka hria a.

'Swachh Bharat' an ti a, Urban bikah hian town kan nih hnuah kan tawn awm chhun a ni awm e, Ngopa-ah hian. Works pakhat mah a lo la kal lo a, mahse, 'faia inelna' an ti a, in tin maiin an thawh a, pawisa an thawh bawk a, an thawk nasa a ni. Tunah hian lawmman hi an sem tawh em ka hre lova, Ngopa hian kan la lo a nih chuan town dang hi an fai ve hle a ni ang ka ti ngam a ni. Lawmman an la ngei ang ka ti thei lo na a, chutiang khawp chuan an tang a, keipawh ka theih ang angin ka han tang ve bawk a. Chuvang chuan kan Deputy Chief Minister zahawm ka han ngen duh chu, fai taka enkawl tur auditorium leh thil dang tam tak kha UD&PA kaltlanga lo enkawl fai tur kha kan mamawh ve a ni tih kha ka ngen duh ni ta se la.

A tawp lam ti tawh mai ila, hun ka pelh rei lutuk loh nan. Pu Speaker, nang pawhin i ngaipawimawh Starred Question No. 106, kan opposition group leader zahawm tak Pu Lalduhoma zawhna chhuak hman ta lo kha wawi khat pawh House-ah ka sawi tawh a. Sorkar hmasa thil tih, tih chhonzawm duh leh duh loh hi Mizoram sorkar kal tawhah hian an awm niin ka ring a. Govt. Complex idea rawn pu chhuaktu TV interview ka hmuh khan a tap tep niin ka hria a ni. Chuvangin, Govt. Complex ang chite kha chhonzawm ni ta se. Pu Speaker, tuna "i rawt ang" tih ngai lo khan sorkar hnathawk tam tak khu quarter-ah khuan an awm tur a ni a.

Amaherawhchu, Chief Minister tha tak kan han nei a, 1998, khatih laia Chief Minister, Govt. Complex dintu idea aia ropui mah zawkin, New Capital Complex-ah officer engzat nge awm, minister zawng zawng pawh leng vekin khulaiah khuan din a ni ta a ni. Kan college kal lai zawng zawngin khulaiah khuan ram ruak a awm tih kan hre lo reng reng. Tin, sawrkar hmasa, 1998-a sorkar hma khan district pathum, *pen* pakhat pawh dah lovin a lo din a, a lo puang a, MNF sorkar a tlak meuh kha chuan kum 2008-ah chuan DC an nei fel vek tawh a ni. Chutah MNF sawrkarin 2008-ah district pathum an han din ve a, (tun session-a ka sawi ang tho khan) kum sawm chhung kha MNF sorkar leh hun nghak ngar ngarin DC office awm theih nan a lo awm a ni.

Chuvang chuan, vawiina ka sawi duh chu, “sorkar hmasa thil tih that hi chu i chhunzawm mai zel ang u, chu chu kan ram leh hnam tan a tha a ni” tih kha. Ka lawm e.

SPEAKER : Tunah chuan member zahawm tak Pu Lalrinsanga Ralte ka sawm ang a, chumi zawhah Pu KT Rokhaw.

PU LALRINSANG RALTE: Pu Speaker, ka lawm e. Hun a tlem si a, kan han sawi ve deuh zar zar ang a. A hmasa bera ka sawi duh Demand No. 26, I & PR hi a ni a.

Hei kan hriat theuh angin Covid chungchangah an thawh hlawk hle mai a, I&PR-in official taka Covid news a rawn tih hma khan thu leng vel tam tak avang khan mipui kan chia a, kan buai thin a, chutah chuan I&PR ten hma rawn lain Covid news te an rawn update ta zung zung a, a lawmawm hlein ka hria. A changtu minister pawhin a hahpui hlein ka hria a, a ropui ka ti tak zet a ni.

Pu Speaker, kan sawi duh a chu, he I&PR hi department te tak te anga lang si, mahse pawimawh em em mai, a tel lova sorkar pawh kal hlei thei loa dinhmun pawimawh luahtu a ni a. Chutah chuan a thawktu indaihlohna te puhruk sak an ngai a nih chuan puhruk sak ngei hi a tulin kan hria a ni. Tin, kan minister-te bakah official-te leh a thawktute thahnem ngaihna I&PR department-ah hian an staff zinga tel ni mai awma mawi kan *Journalists* (MJA)-te an awm a, an duat thiam hlein ka hria a. Kan minister leh official ten thahnem ngai taka ruahmanna siam sakin press tour hi vawi 5, tun MNF ministry chhung hian nei tawhin, Parliament House-ah vawi 2 training-in an kal tir tawh a, a lawmawm hlein ka hria. Hetiang ruahmanna siam thiam, kan MJA-te duhsaktu minister kan neih hi a lawmawm hle a ni.

Chulaiah chuan Pu Speaker, kan Minister-te, Finance Minister-te pawh han ngen ka duh chu, vawin nia kan journalist-te dinhmun hi kan enpui a tulin ka hria a, an tel lovin thil a tih tak tak theih lova, thu leng vel leh eng emaw thilah pawh thudik puangtu, khawvel hi ‘journalists’ kan tih te tel lo hian a kal hleithei tawh lovin ka hria a. Pu Speaker, kan journalist-te hi kum 2018 khan Zophai-a Assam Sipaite kut tuara kan zirlaite an awm khan a hma tawngtu an ni. Chutiang khawpa dinhmun pawimawh luahtu an nih avang chuan MJA-te pension sorkara an rawn dil hi awm ka tihpui khawp mai a, a theih anga ruahmanna siama ngaihtuah sak hi a tulin ka hria. He kan Ministry, kan sorkar hi a bul tan saktu ni thei ila thain ka hria tih kha kan sawi duh a.

Tin, Demand No. 6, Revenue Department-a sawi ka duh chu, department pawimawh tak mai a ni a, staff an indaih lo khawp mai a. Ram han teh tir dawn pawhin

thla 3, thla 4 te nghah a ngai thin a, chuang chuan Surveyor-hi an indaih lo zualin ka hria a, hei hi ruahmanna siam sak a pawimawh hlein ka hria a.

Pu Speaker, ka sawi leh duh chu, Vairengte leh a chhehvel, a bikin Serlui bial khua zawnz zawnz deuhthaw khu Assam ramri depa awm kan ni a, khunga kan huan lo ram khu periodic patta a kan pek zung zung a tulin ka hria. A dan leh dun kan han en thin a, a harsatna lai kan hria, amaherawhchu Assam lam khuan harsa lo deuhin thil an tih ve thin avangin keini pawhin a harsat lohna kan zawn ve hi a tulin ka hria a. Hei hi ramri issue-ah pawh document pawimawha kan hman tur a nih avangin huaisen deuh hleka *Hnam Party* sorkar kan nihna anga kan kalpui hi a tulin ka hria a.

Chutah chuan Vairengte ah khuan SDO Civil kan nei a, office lian tha tak a nei a, kan department te hian ruahmanna min siam sak turin ziakin dilna pawh an thlen tawh a, mahse staff indaihlohna avangin remchang rih lo angin min chhang a, a remchan veleh hei hi min dah sak ngei thei turin ka han ngen a. Revenue department lam atanga attach emaw in Vairengte SDO Civil-ah khuan min dahsak turin ka ngen a ni.

Tin, 1998 MNF sorkar hmasa ah khan Bilkhawthlir Thlarzawl-ah khuan veng din a ni a, kan Home Minister zahawm tak Pu Chama bial lai khan. Kum 20 chuang an awm tawh a, sikul a awm a, office a awm a, petrol pump a awm a, Biak-In engkim a awm tawh a, mahse eng pass mah pek an la ni lova. Bilkhawthlir khu *town area*-ah puan anih avangin, khu khu Bilkhawthlir VC-II (VC North) area chhunga mi a ni a, chuang chuan pass pek hi a rang thei ang bera min kalpui turin ka ngen duh bawk a ni.

Demand No. 38, RD hi sawi leh ka duh a. Hei DRDA hnuai hnthawkte an dinhmun chianglo tak, hun rei tak awma buai thin te he sorkar-a dahnggeh an ni ta hi lawmawm ka ti a. Tin, RD department hi thingtlang bialte inngahna department awm chhun a ni a, ka member pui zahawm tak Pu Thangmawia kha a thik awm viau maiin ka hria a, a bialah BADP te, Rurban te a ni a, keini bialah chuan eng scheme mah hi a awm lova, *Ni 100 Inhlawhna* atanga khawtlang hmasawna thawh ve bak hi RD atang hian kan nei lova. Chuang chuan, RD Minister hian ruahmanna thazawk min siam saka, ramri dep khuate hmasawna tura ngaihtuahna zau zawk min sen saka, tun aia tam hi hmasawna min pe turin ka ngen a ni.

Kan RD Minster hi Delhi-ah official dawrin ka zui a, official pawh hruai miah lovin kan pahnihin khulai ministry kan zu dawr tlah tlah mai a, a dila kha ka hriatpui ta zel a. Rurban hi kan hmu mai turah ka ngai a. Chuang chuan, Pu Speaker, Rurban hi pahnih khat lek kan hmu anih pawhin a zuitu ka ni a, ka chan ngei ka ring a, ka chan ngei theihna turin kan minister hian assurance min pe thei se ka duh khawp mai. Keini bial BADP, Rurban awm silo, ramri depah hmasawna hnthawh ngai nasa siah khuan

Rurban hi Bilkhawthlir RD hnuaiah a awm ngei theihna tura ruahmanna min siam sak turin ka ngen duh a. Tin, *Ni 100 Inhlawhte* pawh hi sorkar hmasa lamah khua chuan ni 100 an inhlawh phak lo thin a ni a, tun sorkar-ah chuan ni 100 kan kai ta thak thak mai a, a lawmawm hlein ka hria a. Heng anih theihna tura kan minister leh official-te inpekna te, an taimakna te, central lam an dawr peihna te a lawmawm ka ti a, fak an phu hlein kan hria a ni.

Tin, Pu Speaker, Demand No. 25, PHE hi han sawi leh ka duh a. Serlui bial chhungah department-in khaw hrang hrangah hma min laksak a, a lawmawm hlein ka hria a. Kan bialah khuan tui a harsa thin khawp mia a, thal lai phei chuan tui hi a leiin kan lei thin a, motor-in an chawi thin a ni. Chutiang karah chuan khaw tam tak mai tunah hian kan minister zahawm tak hma laknain JJM hnuaiah khaw 9-ah tui min rawn laksak dawn a. Heng - Thingthelh, North Hlimen, Saihapui V, (Saihapui V phei hi chu a tira tel lo a ni a) ramri dep tuna kan boruak avangin duhsak takin kan Deputy CM hian min rawn telhsak leh a, kan lawm tak zet a ni. N. Chhimluang, Buhchangphai, N. Thinglian, Saihapui K leh Saipum te, chutiang chuan khaw tam takah hian kan Dy. CM, PHE changtuin ruahmanna min siam sak hi kan lawm tak zet a. Tin, Saipum hi tender tura chhuak tawh a ni a, amaherawhchu kan Dy. CM kan ngen a, kan offical lam te an tui lakna tur tuihna a that tawklloh avangin (dan a ni nge, ni lo chu kan hre tawh lova) Tuirial tuikhuah pump an tum a, “ruahmanna thar min siak sak leh rawh u, pawisa min dah belh sak leh rawh u” tiin ngenna kan han thlen a, chung chu kan Dy. CM hmalaknain tunah hian min ngaihtuah sak mek a, survey pawh an nei tha leh tawh a ni tih kan hria a kan lawm tak zet a ni tih kha ka sawi duh a ni.

Tin, nikum lamah khan PHE-ah ziakin D.O. Letter kan siam tawh a, nikum Vairengte daia kan inkahna ‘IR duty post’ kan tih bulah khuan Vairengte VC-I ten ram an theh a, In eng emaw zat tunah khuan sak a ni tawh a. Khumi bulah khuan kan sipaite leh civil tena an hman theih turin tuizem (tanky) siam hi kan rawn dil tawh a, file pawh a rawn kal thui viau tawhin ka hria a. Kan dilna hmasa zawka kha duh aiin a tet deuh avangin siam tha leh turin min ti a, department lam te pawhin an siam tha leh a. Hmun pawimawh tak mai a ni a, chhungkaw 70 awm theihna turin VC ten ram an theh a ni. Tin, kan duty post pawimawh tak a ni bawk a, helai tanky min siam sak theih chuan a lawmawm hlein ka ring a. (*Dy. Speaker-in Chair a la*)

Tin, Vairengte hi, ‘hmun pawimawh tak a ni’ tih kan sawi fo kha, Mizoram khuaah chuan khaw lian ber 10 zingah a tel phak a. JE thuthmun a ni a, a rei tawh khawp mai a. Chuvangin Vairengte hi SDO (PHE) thut theihna tura ruahmanna min siamsak theih chuan a lawmawm hlein kan ring a. Kan Minister zahawm tak hnenah pawh dilna... (**Dy. Speaker:** Minute 1 i la nei e.) lehkha ziakin kan thlen tawh a ni.

Tin, Deamnd No. 46, UD&PA hi han sawi leh ka duh a. Aizawl khawpui hmun hrang hranga kan hmalaknate a fakawm hlein ka hria a. Kan Minister leh Official-te thawh hona a ropui a. Tin, Smart City hnuai a khawpui cheina turte ruahmanna a rawn kal chho a a lawmawm hle a. Khaw dang leh ram dang awt biklo tura kan khawpui kan chei chhohna turah dik leh fel fai tak, nakin zel thlira kan thawh hi a tulin ka hria a. Pu Deputy Speaker, Aizawl-ah hian UD&PA sum a luang lut hnem khawp mai a. UD&PA enkawl ve tho notified town-te tih hmasawn vena tur sum hi a kal hleitheh lova ...**(Dy. Speaker:** Hun a tawp e.) Amaherawh chu kan Deputy Chief Minister zahawm tak hian nikum lam khan notified town-te hmasawna tur ruahmanna min siamsak a. Keiniah pawh la lut ngai reng reng lo khua New Builum, Gosen leh Rengtekawn-ah te hmasawna hna kan thawk ve thei ta a ni. (Pu Deputy Speaker, ka sawi zo tep a ka rei tawh lo ang.)

New Builum khua khu kan hriat theuh angin Serlui tuikhuah tura kan sorkar hmasaka sawn chhoh kha a ni a. Kan sorkar khan ruahmanna kalpuiin engkim a tifel a, amaherawhchu kum 10 chhung kan sorkar loh kar a lo awm leh a, an neih tur ang an nei lo em em mai a ni. New Builum hian tunah hall pawh an la nei lova. New Builum, Gosen leh Rengtekawn te hi Kolasib Town Area-a rinluh an ni a. Ka sawi duh chu, New Builum, Gosen leh Rengtekawn-te hi Kolasib Town Area-a an awm avangin notified town-ah an tel tlat mai a, chuvang chuan khaw te reuh te, hmasawna mamawh takte an nih avangin ruahmanna leh special deuha ngaihtuahna neih sak ka han rawt a. Gosen-ah pawh kan Dy. CM hian hall sakna tur min pe a, a ruhrel leh a chung kan din tawh a, a bang kan la pum hleitheh lova, tin, New Builum-ah pawh chutiang chu a ni a. Hengte hi theihtawp chhuaha kan Dy. CM-in ruahmanna min siamsak turin ka han dil a ni. Tin, Vairengte hi notified-town a ni a, kan sorkar lo kal tawhah UD&PA atangin notified town-ah pawisa a lut mang si lova. Chuvangin, kan Dy. CM ka han ngen duh chu, “khawngaih takin kan notified town-te hmasawna tur sum leh pai tam zawk ruahmanna min neih sak theih chuan a lawmawm ngawt ang” tih kha kan sawi duh a ni. Pu Deputy Speaker, kan Minister zahawm tak tak pahnihte demand hi tha ka ti a, ka rawn support a ni e.

DEPUTY SPEAKER : A lawmawm e. Tunah chuan Member zahawm tak Pu KT Rokhaw i lo sawm ang u.

PU K.T. ROKHAW : Pu Deputy Speaker, ka lawm e. Demand No. 38, Rural Development atangin ka han tan ang a.

Pu Deputy Speaker, kan Minister hian Covid-19 hripui leng karah pawh Mizoram pumpua central scheme hrang hrangte tha takin a kalpui theih avangin a lawmawm ka ti a. BADP area bik hi chu keini Burma leh Bangladesh border-a mite kan

ni a. Chuvang chuan, BADP scheme chungchangah hian Bialtu MLA te ngaihdan ngai pawimawhin scheme te siam a ni thin hi a fakawm ka ti a, a minister hi a fakawm ka ti hle a. Chutih laia ka ngen duh erawh chu, BADP hna hi engpawh ni sela a bial neitu, a bik takin border area-a mite hi duhsak bik ni thei thin se la. Aizawl-a mite ai chuan a area a mite hi tunchinah chuan lo khawngaiha lo duhsak bik turin ka ngen duh a ni.

Pu Deputy Speaker, BADP scheme hmang hian international border-a khaw awmte tana hmasawna tam tak thawh a ni thin a. I hriat angin ka bial khi Burma border-a awm a ni a, BADP scheme hmang tangkai ber tur bial kan ni a. Mahse sum pekchhuahte hi a tlem deuh thin avangin tun aia tam zawka BADP scheme hawia project kan lo siamte hi min lo pawmsaka min lo duhsak deuh thin turin minister ka ngen duh a. Tin, BADP-ah hian, ka bial khawthlang lama khawpui ber Phura-ah hian Community Hall kan nei lova, khawngaiha Community Hall min sak sak turin ka ngen a.

Tin, kan hriat angin Rurban Mission, hei hi SPMRM a ni a. Rural Development Department hnuaiha hian tunah hian district pathum - Aizawl, Serchhip leh Champhai district-ah te hman mek niin ka hria a. Rurban Mission hnuaiha cluster village atana thlan bikah te hmalakna leh an hnathawh (project) te kan hmuhin kan awt hle thin a. Engpawh nise la, kan minister zahawm tak hian Siaha District hi Rurban Mission hnuaiha min thlang ve turin khawngaihin ka lo ngen a ni. Tin, Rural Development hnuaiha State flagship programme SEDP hmanga hnathawh tur tam tak project siam a niin ka hria a, Siaha District atang pawhin project tam tak lo thehluh ve a ni a, khangah te khan hmalakna a awm tawh em tih kan minister-in nakinah min hrilh thei se la ka lawm ngawt ang. Tin, Tipa V-ah khian Circuit House kan nei a. Circuit House building khi a rei tawh khawp mai a, tunah khian a chhe tawh viau a. MLA ka nih hmasak, kum 1995 bawr vela kan sak a ni a. Khawngihin kan Circuit House hi a thara min sak sak turin kan minister ka lo ngen bawk a ni.

Tin, kum eng emaw chen kal tawh atang khan inkalpawhnate a harsat em avangin Tipa RD Block huam chhunga awm thin khaw pali -Chakhei, Siasi, Siata leh Iana te hi Siaha RD Block huam chhungah rin luh an ni a. Tuna inkalpawhna kawng te a lo that takah chuan an awmna hlui Tipa RD Block hnuaiha rin luh leh nise a lawmawm ngawt ang. Hei hi ka bial chhung a ni a, ka bial chhunga khaw pali-te Siaha District lama a awm hi a buaithlak angreng khawp mai a. Chuvang chuan ka bial, a bik takin Tipa RD Block-ah hian he khaw pali-te hi khawngaiha min dahlet sak turin ka lo ngen a ni.

Tin, Demand No. 26, Information & Public Relations chungchanga han sawi ka duh chu, Siaha IPO Office khi a chhe tawh khawp mai a, a thar min sak sak se tiin ka ngen bawk a. A bik takin an staff chungchang hi, tunah hian Audio Visual Production Assistant technician pahnih chia an awm a, kum upa lam pension hnai tawhte an ni

lehngal a. Tin, LDC pakhat an nei a, chu a neih chhun chu February thla khan a pension ve ta si a, tunah hian LDC pakhatmah an nei ta lo a ni, Information Public Office khian. Tin, IV-Grade pakhat chauh a awm a, cancer patient a nih avangin a nupui hi chowdikar angin chhawr a ni mek a ni. Chuvangin, Pu Dy. Speaker, I & PRO office, Siaha-ah hian technician pahnih, IV-Grade pakhat leh LDC pakhat tal pek an nih loh chuan office *run* ngaihna a awmlo a ni tih kha kan minister-in min lo hriatsak sela, a rang lama staff mamawh ka han sawite hi min pe turin ka ngen duh a. Tin, a building hi ni 25th September, 2003 a hawn a ni a, a hlui tawh em em a, chu mai ni lovin staff quarters te pawh luah tlak a awm lova. A building hi Assam Type a ni leh ngal a, khawngaihtakin, a rang lama hma min laksak turin kan minister zahawmtak hi ka ngen a ni.

Tin, Demand No. 25, PHE hi ka sawi leh ang a. Kan Dy. Chief Minister chan a ni a, heta ka sawi duh chu, JJM hnuaiah Siaha District-ah hian household engzatah nge tui connection pek a nih tawh tih te hi hriat ka chak khawp mai a, nakinah a rawn react hunah khawngaiha min hrihfhiah turin ka ngen duh a. Tin, Solar Water Pump hi, Saikao khi kan missionary te headquarter a ni a, Siaha District mai nilo, Mizoram pumpuiah pawh khaw pawimawh tak a ni a, mi tam takin an tlawh thin a, kan missionary-te luphumna hmun a ni bawk a. Hetah hian tui hi kan harsa em em thin a, ka hun lai khan Tipa 'V' rama tui kan va la a, vawiin thlengin chu chu kan la ring a, indaihlohna a nasa em em mai a. Chuvang chuan kan minister zahawmtak hian he kan harsatna hi hriaa solar pump min ruahmansak turin ka ngen a ni.

Tin, a pahnihnaah chuan, Zero Point, (Amobyu Vaithie) hi tui an harsa em em a, an pipeline khi NHIDL kawng laitu ten an tihchhiat sak vek a. Khawngaihin tui in tur, emergency atan PHE Deptt. hian (a hma pawhin a lo tihsak tawh thin a) motor lian (truck) tein tui min sem sak leh thei se a lawmawm ngawt ang. Tin, Zero Point hian tui lakna tur tha an neihloh avangin kumtin harsatna an tawk thin a, kan Dy. CM hnenah he harsatna hi ka thlen tawh a, min ngaipawimawh a, solar pumping siam turin kan Minister zahawm tak hian hma min lak sak a, tunah hian a hlawhtling dawn tawh a, tender pawh chhawpchuah a ni tawh a. Chuvang chuan kan Dy. CM hnenah lawmthu ka sawi a ni.

Pu Dy. Speaker, Demand No. 46, UD & PA hi, ka sawi duh chu kan Dy. CM hian Futsal Ground changtlung tak kan district khawpui Siaha-ah hian min siamsak ve turin ka ngen duh a. Siaha Vaipi playground hi Futsal Ground atan a rem em em mai a, a tha hle a, chu chu khawngaihtakin min lo chhinchhiahsak se tih kha ka ngen duh bawk a.

Tin, *protection work* Siaha khawpui atan hian a pawimawh em em a. Kan hriat angin Siaha khawpui chhungah hian sinking area a tam em em a, fur kan thlen phei

chuan a hlauhawm em em thin a ni. Khawngaihtakin UD & PA changtu hian sinking area-te thawmthatna leh a venna tur protection work mumal tak min siamsak theih chuah a lawmawm ngawt ang.

A tawp berah chuan, Siaha khawpui hi a lo faia a lo thianghlim ve theih nan khawngaiha hma min laksak turin kan Minister zahawmtak hi ka ngen bawk a ni. Ka lawm e.

DEPUTY SPEAKER : Member zahawmtak Pu Lalrintluanga Sailo i lo sawm ang u.

PU LALRINTLUANGA SAILO: Pu Dy. Speaker, ka lawm e. Vawiinah kan Minister te pahnih Demand kan sawi a ni a, sawi tur a tam hle mai a. Amaherawhchu, nizan lamah kan men rei deuh hlek bakah keima private thil eng emaw tukinah zing dar 5 rik hmaa tih leh tur ka neih avangin ka tho hma deuh hlek a, ka nun a zuai deuh a ni tih kha ka sawi hmasa duh a ni.

Awle, Pu Dy. Speaker, ka sawi hmasak ber duh chu, Demand No. 26, Information & Public Relation hi a ni a. Kan hriat leh kan hmuh angin he department hi *development department* ni silovah chuan a loa kan awm theih miah loh, Mizoram sorkar department-ah hian a pawimawh ber zinga mi niin ka hria a. Kan ram tan an hnathawh hi a ropui hlein ka hre thin a. Tin, an hmalakna leh an thil tih hi a namai lo hle a, a hahthlakin thawktute indaihlohna karah thu leh hla dik ram mipuite hnena min puanzarsak thin tute an ni a. Chuvangin, an theihna zawng zawngin hma an la a, an hmaa tih tur awmte an hlen chhuak thin a ni tih a langin ka hria a. Covid-19 kan hmachhawannaah phehi hi chuan a minister a la chak bawk a, information dik tak mai a hun takah min chhawpchuah sak thin a. Hei, kumhnih ngawt chhung hi zing dar 7 velah hian information dik tak mai min pe thin a, a lawmawm hlein ka hria a, thawktute zawng zawng chung pawh lawmthu ka sawi duh a ni.

Tin, henga min tawiaawmtu kan chanchinbu mite, kan media te, electronic leh print media te an fakawm ka ti thin a. Kan chanchinbu hi mimalin tan lam nei bik kan Editor te pawh ni se, an thu chhuah hi a rintlak ta hle mai, hmasawna ropui tak he kan Ministry, Minister enkawlina hnuaiha hian thil thar duhawm tak tak kan hmuin ka hria a, a lawmawm hle a ni tih ka tarlang duh a.

A dawt lehah chuan, Demand No. 46, UD & PA Demand hi sawi ka duh a. He department hi nichinah member zahawmtak Pu Thangmawia sawi ang khan department naupang te a la ni chungin an hmalakna a ropui hlein ka hria a, an chhuanawm hle ka ti a. Chutih rual chuan “keini thingtlang bialtute tan chuan chhenfakna a awm lo mang e”

tia kan lo thlir laiin kan Dy. Chief Minister enkawlna hnuaiah kan bialchhungah notified town kan neih ve loh avangin kan harsatnate leh he department kaltlanga ram hmasawna an thawh zozaite kan hmuh hian kan it ve si a, chungah chuan, “kan qualified ve lawm ni” tiin ka han thlen a, a ni leh thla pawh liam hmian kan thu thlen te min ngaih pawimawh sak, ka bial chhunga khaw lian ber W. Phaileng chu notified town-ah min puansak tak kha a ni a, vawiinah hian kan lawm a tawp thei lo a ni tih kha ka sawi duh a. He department kaltlang hian member zahawmtak ten an sawi ang khan, sum hi kan kutah, kan bialah, kan khawtlangah la lut chiah lo mahsela, khami ina a kaihhnawih hmasa, nikumah khan *Fai Inelna* te kan nei a, a ropui hle a, khawtlangin hmasawn an duh zia a langin ka hria. Naupangte thlengin inzirtirna an kal chakpui bawk a, khaw fai ngailo kha vawiinah chuan a fai ta ut mai a. Member zahawm tak Pu Thangmawia sawi ang khan, *Fai Inelna*-ah keini W. Phaileng pawhin kan cho ve ta viau a ni.

Tunhma chuan chitin, hnamtin lenna, kan tualchaina kha a ni a, tunah chuan mikhual lo thlengte pawhin an sweet eina kawr tak ngial pawh khawlaiah paihna chang an hre tawh lova, a bawm dik takah paih an ching ta a, chung chu “kan hmasawna kawng pawimawh tak chu a ni” tih ka tarlang duh a. Chutih rual erawh chuan hmasawn kan duhna avanga notified town-a min puan hnuaiah kan hmasawna tur sum leh pai rawtna kan village council-te pahnihin an thlen kha engnge ni a chanchin tih hi nakinah a changtu Minister zahawm tak hian a wind-up naah min tarlan sak se ka duh khawp mai.

Tin, thil vei em em mai ka neih a awm a; Aizawl Smart City chungchang nichinah member zahawm tak ten an sawi a, engnge a function, engnge a duty kan hre lutuk lo, keini thingtlang bialtu chuan. Amaherawhchu, kan han hawia kan ngaih pawimawh chu Pu Dy. Speaker, electric ban tin maia cable wire hnawk em em leh ‘smart city’ a hming putna ang pawh put tir theilo tur hiala nitina kan hmuh hi ka vei a ni. Hei hi eng tianga control chi nge, eng tianga laksawn chi nge tih kha a concern a ni em ka hre lova, nakin khaikhawmnaah khan min tarlan sak se ka duh khawp mai a. Kan thiante state dang atanga lokal pawhin an sawi thin a, an vei em em mai a. Tin, truck lian tak tak khawpui chhungah zan lamah thil phurin an rawn kal a, an tihchah chang phei chuan keini west lama awm phei chu kan buai fo a ni. Bial fanga kan zin haw pawhin Tuikual chhuk thla velah wire tihchah avanga harsatna, TV an en theihloh avanga tiang nena intin uaih uaih patling zanlaiah kan hmu fo mai a, hei hi ‘keimahni thiam loh zawk a ni’ tih pawm duh silo hian khalaiah khan harsatna tam tak kan tawk thin a. Hei hi pawi ka ti khawp mai a, senghawi dan a awm em, dan fel tak kan neih ka beisei a ni tih he House zahawm takah hian kan ngaih pawimawh Demand sawi hunah hian ka han tarlang a ni.

Demand No. 38, Rural Development Department hi keini thingtlang bialtute tan chuan *kan nu leh kan pa* department tak tak a ni a, a enkawltu a chak baw k a min enkawl hneh hlein ka hria a, lawmthu kan sawi a. Chutih rual chuan ka bialah pheih chuan thil ropui tak Sam 127-na, Israel fatena an saltanna ata an chhuaha lawmthu an sawi ang deuh khan lawmthu kan sawi duh a. Khaw 8 (pariat) ngawt mai - W. Pheileng, Dinthar, Kawnmawi, Chhippui, Lallen, Parvatui, Zopui leh Saithah-te hi BADP cover area atangin sorkar hmasa khan a lo paihchhuak daih mai a, he ministry alo din ve leh hian a changtu minister hian kan sawite ngai pawimawhin central lamah nasa takin min nawr sak a, hun leh ni pawh a liam tam hmam BADP cover area-ah dahluh leh kan lo niin, Border Area Development Fund kan lo hmang leh thei ta te hi kan lawm takzet a ni tih ka sawi duh a. Hei hian hmasawna kawng hrang hrangah chak takin min kalpui thin a, dik leh fel taka kan kalpui chuan heng sum kan hmuhte hmang hian hmasawna kan thlen zel a ni tih vawiinah hian ka tarlang duh baw k a ni.

Tin, tuna laklul leh mai tura kan lo ngaih kan minister zahawm tak hian min lo chhinchhiah sak se, a ma hmalakna thovah hian Rulpuihlim leh Tuahzawl hi BADP cover area ni turin hmalak mek a niin kan hria a, engnge a chanchin tih kha nakinah min hrilh thei sela ka lawm khawp ang. Chutih rual chuan a kaihnawih ka bialchhungah hian Mizovin kan ngaih pawimawh ber mai tunhma atanga Zawlbuk neia lo khawsa kan nih tawhna anga kan chhawmnun zel, 'Hall' kan neih lohna hi a awm nual mai a, a bikin sorkar hmasa hunah an lo thiat laklawh a, a chakte kha an lo insem zo vek tawh a. A bik takin Chungtlang, Rulpuihlim, Bawlte leh Bawngthah-ah hian Hall kan nei lova, hei hi kan ngai pawimawh hle mai a, tunah hian Bawngthah pheih chu ka fund atangin ₹10,00,000/-(nuai sawm) hmangin bul kan tan a, Bawlte-ah pawh chutiang chuan hma kan la mek baw k a ni. Hei hi tan min lakpui dan a awm chuan, tan min lakpui se ka duh a ni tih ka tarlang duh a. Khaw dangin an nei thup mai a, harsatna kan taw k a ni.

Demand No. 25, Public Health-ah hian sawi duh ka nei a. He department hi keini bial tan chuan a ropui hlein ka hria a (**Dy. Speaker:** minute 1 ila nei e) Pu Dy. Speaker, ka sawi zo tep a, ka hmaa mite pawh kha chance i pein ka hria a.

A bik takin W.Pheileng khu a changtu minister zahawm takin MNF ministry hmasaah khan tui kan harsa em em mai a, 2007-2008-ah khan W. Phaileng Greater Water Supply Scheme kalpuiin tuna kan E-in-C ni ta EO to CE anih lai khan project-te siamin a kalpui a, kha ministry kha kan tlak tak avangin a hnua ministry lo ding khan hma a la chhunzawm a. Ka information-ah chuan, a project pangngai aia te deuh hleka kalpui avang khan kum 10 a lo liam ta a. Vawiinah hian abik takin W. Pheileng JJM cover area-a tel ta chiahloah hian harsatna kan taw k deuh ta a ni tih ka tarlang duh a.

Tin, ministry hmasa khan kan tui harsatna hria-in Dy. Chief Minister enkawlina hnuaiah tuizem te, rain-water harvest khatiang khan min kalpui a, kan lawm a. Tunah project ropui tak mai JJM a lo chhuak a, ka bial khaw 33-a khaw 31-ah hma min laksak a, kan lawm hle mai. Bial dangte hian min thik ang tih ka hlau deuh a, Dy. Chief Minister-in min duhsakna hi kan lawm hle mai tih ka sawi duh a. He House-ah pawh hian a bika lawmthu sawina tlak a awmin ka hria a, Aizawl atanga hnai te, ka bialchhung Reiek leh Ailawng khu tui harsatna kan ni a, hei hi NABARD sum hmangin nikum lam atangin buatsaih a ni a, vawiinah chuan Reiek tlangah tui kan pump thleng ta a, kan lawmna hi a nasa hle mai a. NABARD sum khan a daih loh avangin tunah hian JJM Scheme-ah rin lutin April thla hma-in house connection kan nei thei dawn a ni. Hei hi chu miracle a niin ka hria a, thil mak danglam tak a ni. Ministry kal tawh zawng zawnga sawi pawh an sawi ngam loh, an sawi ngailoh kha a ni a, kan lawmna a sang hle.

Chumi piahlahmah chuan kan lawm em em rual hian hemi department-ah hian sawilan duh ka nei a. Ministry of Tribal Affairs atang khan nikum lamah ₹7,00,000/- (nuai sarih) PHE complex approach road W. Phaileng panna kha kan neiin ka hria a, vawiin thlengin engnge a chanchin a hriat hleih theih lova, Social Welfare lam te kan zawt kual a, “a awm alawm” an ti a. Amaherawhchu, hma la lak a ni chiah lova. Khu lam khu kawng a te a, accident te a hlauhawm em em mai a, hei hi nakinah a changtu Minister zahawm takin a wind-up hunah PHE complex approach road W. Phaileng kha min tarlan sak se ka duh khawp mai.

Awle, kha kha thil tamtak sawi tur la awm mahse, ka sawi theih tawk ni mai rawh se. Ka lawm e.

DEPUTY SPEAKER : A lawmawm e. Tunah chuan Member zahawm tak Pu Nihar Kanti Chakma i lo sawm ang u.

PU NIHAR KANTI CHAKMA: Pu Deputy Speaker, ka lawm e. Vawiinah Minister zahawm tak Pu Ruatkima leh Pu Tawnluia, Deputy Chief Minister Demand kan sawiho mek a ni a. A hmasa berin Pu Deputy Speaker, ka han sawi duh chu Demand No. 6 – Land Revenue & Settlement, Land Committee chungchang hi a ni a.

Land Committee hi a pawimawh hle mai a, sorkar thar pian hnuah Land Committee hi din tan a ni a, kan bial chhung VC tin-ah Land Committee hi din a ngai a, he committee hi approve turin sorkar-ah thehlutin, thenkhat chuan approval an dawng tawh a, a la dawng lo an awm hi a paw ka ti hle a. Land Committee approval hi a awm loh chuan *land patta* emaw, *renew* emaw engmah a tihtheih lova, chuvangin Minister zahawm tak hian hei hi min ngaih pawimawh sak se ka duh a ni.

Pu Deputy Speaker, niminah pawh kan sawi nual tawh a, National Highway-302 (Lunglei – Tlabung) hi an lai mek a, mi ram leh huante tamtak an tichhia a, ka hriatsual loh chuan land assessment pawh a fel vek tawh a, tun thleng pawha compensation an la pek lohna chhan hi min hrilh thei se ka duh khawp mai.

Pu Deputy Speaker, Land Revenue & Settlement Department hi Department pawimawh tak mai a ni a, *earning department* ani a, Tlabung-a ka kala piangin a remchan chuan Lunglei District-a Revenue office hi ka tlawh ve thin a. Surveyor hi an indaih lo nasa em em a, Surveyor dah belh theih ni se ka duh khawp mai. Surveyor indaihloh avangin an hnate pawh a kalchak thei lo a ni.

Pu Deputy Speaker, thil dang nangmah kaltlangin ka han sawi leh duh a chu, Tlabung hian RD Block kan mamawh a ni. Ka sawi zing tawh a, Tlabung hi a kum 150-na nikumah khan kan lawm a ni. Pu Deputy Speaker, hei hi ka han sawiduhna chhan chu, RD Block hi politics khelhna chi pawh a ni lova, ‘engvangin nge hei hi kan mamawh’ tih chuan ka bial hi a zau em em a, RD Block pahnih hnuaiah kan awm a ni. Bunglei RD Block leh a then Lungsen RD Block hnuaiah kan awm a ni. Lungsen RD Block hi a zau em em a, khaw 65 lai a awm a. Lungsen RD Block hian MLA bial 3 - Thorang bial, Lunglei ‘S’ leh 35-West Tuipui te a huap a ni. Tlabung hi Sub-Division hmunpui niin, Sub-Division zinga upa ber a ni a, chute chungin communication hi a harsa em em a ni.

Helaia thilpakhat ka hriatthiam loh chu, BDO hian SDO charge hi a la thin a ni. A danah chuan SDO in BDO charge hi a la tur a ni a, a chhan chu SDO hi a sang zawk a. Sub-Division hmunpui a ni a, Communication lamah pawh a harsa em em a, kan mipuite hian an tuar nasa a ni. Tlabung-ah hian hmasawna a lut lo hi engvang nge ni kan tih chuan, RD Block kan neih loh vang a ni a, NREGS emaw, Bank Account transfer leh engkim hi RD Block kaltlanga tih a ngai si a. Communication hi a harsa em em a, ka bial thenkhatah chuan mobile network pawh a tha lo a, eng hna mah hi a thawh theih lova, hetiang a nih a vang hian harsatna hrang hrang hi kan tawh thin a, kan backward nasa a ni.

Mahse, ka bial hian potential area chu an nei tha lutuk. Pu Deputy Speaker, nangmah kaltlangin han sawi ta ilar, ‘Tlabung ropuina hi engnge ni’ tih chuan, Tlabung ropuina chu Hnam hrang hrang awmna hmun a ni. Hmana tangin unau angin kan awm ho a, Mizoram khuaah chuan khaw upa ber niin, kum 150 a tling tawh a, thil chhinchhiahtlak asset preserve tur hi tam tak a awm a ni. Mizoram-ah Post Office awmna hmasa ber, Thana nei hmasa ber, Hospital nei hmasa ber, hengte hi sorkar hian a preserve ngai a ni. Chutiang a niha vang chuan RD Block hi kan mamawh em em a ni.

Entirnan, tun sorkar kal chho mekah hian Agriculture leh Horticulture Department hnuiaia Sub-Divisional Office zawng zawng hi Lungsen-ah sawn vek a ni. Lungsen RD Block hi chhuhsak kan tum lova, a hranpa hi kan mamawh a ni tih ka sawi duh a. Chuvangin hei hi Demand pawimawh tak a ni.

Pu Deputy Speaker, tam tak sawitur a awm a, RD Block chungchang chu kha zawng kha ni mai se, mite pawhin min ning thei a, ka sawi zing tawh lutuk a. Tun tum hi RD Block chungchang sawi tawpna ni se, hei bak chu a hlawhtling emaw, hlawhtlinglo emaw, an thu a ni a. Amaherawhchu, mipui hian kan mamawh a vangin Pu Deputy Speaker, nangmah kaltlangin ka han dil ve leh a ni e.

Demand No. 46, Urban Development & Poverty Alleviation chungchanga tlem ka sawi duh chu, 'Housing for All' hi Tlabung-ah Deputy Chief Minister zahawm tak hian min tihsak a kan lawm hle a ni. Mahse, 1st Installment chiah kan dawng a, 2nd Installment hi engtikah nge kan dawn ang tih hi min hrih thei se ka lawm khawp ang.

Demand No. 25, Public Health Engineering-ah hian, ka bial chung Puankhai leh Hmundo-ah te hian tui a harsa em em a, tlangah an awm a. Solar pump hmangin emaw min tihsak theih dan awm se tiin ka ngen duh a ni. Awle, Pu Deputy Speaker, hei zawng hi ka sawitheih a ni e. Ka lawm e.

DEPUTY SPEAKER : Hun hmang dik tak a ni. A hmang zo teuh hle mai. Ti hian minute 2 vel bawr a la awm a, chutianga han zo thei tur chu kan awm ang em le? A nih leh zo thei awm kan awm siloh chuan, chhun kan chawl ang a, tichuan chawhnu dar 2:00-ah kan tan leh dawn nia.

2:00 PM

SPEAKER : Khai le, tunge han sawi chhunzawm ang le. Awle, Pu Ramthanmawia, Member zahawm tak ka sawm e.

PU RAMTHANMAWIA : Pu Speaker, ka lawm e. Vawiinah hian kan Minister zahawm tak takte pahnih demand kan sawi mek a. Minister zahawm tak Pu Lalruatkima chan rural Development Department, Demand No. 38 hi ka han sawi hmasa ang a.

Kan hriat theuh angin Rural Development Department hi keini ang thingtlang bialte inngahna lian tak a ni a, thingtlang mipuite inngahna ber pawh a ni reng bawk a ni. *Ni 100 Inhlawhna* leh BADP te hmangin thingtlang lam hmasawanna nasa taka thawh thin a ni tih kan hria a ni. Hei, kan biala hmasawnnate pawh nasa takin kan hmu chho a, kan sorkar hlim atanga 2021 thleng khan BADP hnuiaiah hna hrang hrang 60,

cheng nuai 1,020 man zet mai thawh a ni te hi a lawmawm ka ti a. Kan Minister zahawm tak hovin December, 2021 khan RD Department hnuaia hna min thawh sakte hawwna kan han nei a. Pakhatnaah chuan 'Inunauna Lei' tia phuahin Burma nena kan inkar Tiau Lei, Saikumphai-a mi chu kan Minister zahawm takin min hawn sak a, cheng nuai 27.36 man a ni. Tin, Khawbung Mini Sports Complex, cheng nuai 369.89 man NLCPR atanga sum kan hmuh hmangin min thawh sak bawk a, hawn a ni a, a lawmawm hle a. Tin, BADP sum hmangin Vaphai-ah hian Solar Pump cheng nuai 270 man thawh zawh a ni a, hei hi min hawn sak bawk a. Tin, Chawngtui 'E' Community Hall, cheng nuai 25 man BADP atangin min hawn sak bawk a, Leithum Community Hall cheng nuai 42 man BADP sum atangin thawh a ni bawk a, heng te hi min hawn sak a. A hmun ngeia Minister zahawm takin bial mamawhte minrawn hmuhpui hi kan lawm hle a ni.

Tin, *Ni 100 Inhlawhna* te pawh kan hria a. Covid avangin hun harsa kan tawng a, thingtlangah te pawh hna an thawk hlei thei lova, kan dam lova, chung hunlai chuan *Ni 100 Inhlawhna* hi kan hmang tangkai em em a ni. Tin, thingtlang lama tana pawimawh em em kan sawi fo, he House-ah ngei pawh kan sawi thin 'PMAY' hi MNF tuna kan sorkar hnu hian pek chhuah a ni ta lova, kan bialah chuan, hei hi kan nghakhlel khawp mai a. A thlanna kha chu a rei tawh a, sorkar hmasain an thlan kha a ni a, keini chuan kan thlang tawh lova. Khang an thlante khan hmu ve se kan duh a, kan nghahhlel hlei em em a ni. Hengte avang hian kan biala mirethei harsa tak tak, In thlusa deuh thawa awmte, luah tlaklohte kan nei nual a. Chung ho In, khaw hrang hranga mi chu MLA fund hmangin ni 21 zet kan sa a ni.

Pu Speaker, thil tam tak min tih sak laiin, kan bial Khawbung BDO thuthmun a ni a. BDO office khi kan pachhe khawp mai a, UDC pawh kan neih avangin LDC pakhat kha cashier-ah hman a ni mai a. Tin, kan BDO hian driver a neihloh avangin harsatna kan tawk bawk a. Chu mai ni lovin a motor kawl lai hi siam kal ngai khawpin a chhe tawh a, a tlanna te a tam si a. Hei hi kan Minister zahawm tak hian min lo chhinchhiah sak sela. Tin, staff quarter hi staff ten an indaih lo hle mai bawk a, a dang 3 tal sak a tul bawk a ni.

Tin, RUSA scheme hi khi lamah khian kan la hmelhriat vak lova, hengte pawh hi tih theih anih chuan East Tuipui bialah pawh hian rinluh theih ni se kan nghakhlel khawp mai tih kha kan sawi duh a. Tin, tunah hian Burma nena kan inrina bawk Tiau Luia Thekte kai hi RD hnuaiah SEDP sum atangin dawh tura hmalak mek a ni a, kan lawm hle a. Chhiat ni, that ni a lo awm a, Thekte leh a lehlam ral te chu inunau vek chhungkua annih avangin fur laiin chhiatna te a lo thleng thin a, chungahte chuan inkalpawh a ngai a. Hengah te hian tui lianin nunna a lak thin avangin kan RD Minister zahawm tak hian SEDP sum hmangin he Thekte Kai pawh hi min dawh sak dawn a, kan lawm hle a ni. Tin, RD hian thingtlang lam hawi thil nasa tak min thawh sak a.

Tunhma khan rangva te, silpaulin te, keini mamawh hi chu khatiang lam hawi kha a nih avangin kan RD Minister hian rangva leh silpaulin te min ngaihtuah sak thei se tih kha kan ngen duh bawka a ni.

Tin, kan Dy. Chief Minister zahawm tak Pu Tawnluia Demand No. 25 leh No. 46-ah hian han lut ila. Kan sawi fo a, thingtlang lamah chuan sik leh sa avang te, ram kan tih chereu avang te pawh a ni ang e tuihna hi a kang tawlh tawlh tawh a, a tlem tawlh tawlh tawh a. Tunhma gravity a tui kan lak thin te kha lak tur te a lo awm mumal tawh lova, a lo tlem tawh a. Tunhnaiah hian hei JJM scheme hnuai atangin min han siam sak a, kan lawm hle a. Tunah hian JJM hnuai khaw eng emaw zatah hmalak mek a ni a, khaw 10 velah hian tender tur kan la nei a, hengte hi kan nghakhlel khawp mai a, heng thal lo awm tur te hi kan huphurh em em a ni. Chuvang chuan, thalah hian motor-in tui an chawi a, tui chawina khua hi khaw tam tak a awm tawh a. He JJM scheme hi hlawhtling thuai se tiin kan nghakhlel tak meuh meuh a ni tih kha ka han sawi duh bawka a ni.

Demand No. 46, UD&PA-ah hian, kan Dy. Chief Minister zahawm takin kan bial min ngaihtuah a. Khawbung leh Farkawn te *notified-town*-a puang turin kan han dil a, amaherawhchu, wawi leh khatah khaw pahnih kha a theihloh avangin Farkawn kha minrawn puansak a, kan lawm khawp mai a. Khawbung pawh hi remchang a awm chuan min la puan sak thei se kan ti a, kan nghakhlel em em bawka a ni. Tichuan, Farkawn khawtlang tihhmasawanna tura UD&PA hnuai atanga fund te hi kan la hmu lova, (Pu speaker, ka zo tep e) *notified-town*-a min puan tak rau rauah chuan faina chungchangah te hma kan la a, khawtlangin, hma kan sawn chho tan khawp mai a. Chuvangin, kumin sorkar kum tharah chuan heng Farkawn Community Hall sak puitlinna tur te UD & PA ah khan kan han beisei a kan han dil tawh a, khang te kha min tih sak theih chuan kan lawm khawp ang tih kan sawi duh a ni. Kan bialah hmasawanna alo thleng tan ve zel a, RD atang te, UD & PA atang tein kan hmelhriat ngailoh thil thar a lo awm zel hi sorkar chungah kan lawm a, Minister te pahnih chungah pawh lawmthu kan sawi mawlh mawlh a ni. Chuvangchuan, heng Demand pahnihte hi he Houseah hian lungrual taka pass turin keipawhin ka rawn thlawp a ni e. Ka lawm e.

SPEAKER : Dr. BD Chakma, Member zahawm tak ka sawm e.

PU B.D. CHAKMA : Pu Speaker, vawiinah kan Minister pahnihte Demand kan sawi nek a ni a, a hmasain Demand No. 26-ah ka lut ang a. Information & Public Relations Department-ah hian I & PR atangin updated information, a bik takin covid-19 chungchangah chanchin thar hi, MLA covid group te kan nei a, nitin data kan lo chhiar thei hi a lawmawm ka ti a. Covid dinhmun pawh hemi group atang hian nitin chhiar theiha a awm hi kan Minister zahawm tak hnenah lawmthu ka sawi duh a ni. (Dy.

Speaker-in Chair a la) Pu Deputy Speaker, i thut chhung minute 5 vel chu hun min pek belh a ngai ang.

I & PR hi kum 2, kum 3 vel chu kan lo hmu tawh a, diary leh calender hi, Pu Deputy Speaker tun kum hi kan hmu tlem em em mai a, MLA-te tan calender hi 4 emaw, 5 emaw vel a ni a, diary pawh hi pakhat chauh kan hmu a, kuminah hian. Kan PA te pawhin an duh a, MLA tena kan dawn hi a tlem lutuk a. Chuvangin Pu Deputy Speaker, SEDP sum hmangin a tam thei ang ber chhut theih dan hi a awm lo em ni tih kha, khawngaihin Minister zahawm takin min lo hriatsak sela. SEDP hnuaiah hian sum a tam si a, heta tang hian calender leh diary hi min sem sak thei se tam deuhin. Kan bial atang tein mi tam tak an rawn kal a, sorkar calender hi min dil reng thin a, kan pek theihloh chuan keini tan pawh rilru a na duh khawp mai, Pu Deputy Speaker. Chu chu ka sawi duh a.

Demand No. 38, Rural Development-ah hian sawi tur tam tak ka nei a. BADP, international boundary atan sum tam tak kan dawng thin a. A bikin PMAY Gramin chungchangah tlem ka sawi duh a. Pu Deputy Speaker, fund pekchhuah muang lutuk, chhuak thei miah lo hi eng vang nge, state share hi a hun taka kan pek theihloh vang nge thil dang vang tih kha khawngaih takin Minister zahawm takin min lo hriatsak sela. Tin, “Socio-Economic Census, 2021 base-in PMAY Gramin hi select tur” tih kha a a ni a, mahse natural calamity, fire victim emaw, cyclone victim emaw te kha thunluh dan, dawn theih dan hi a awm ve lo em ni tih kha ka zawt duh a.

Tin, BADP, hei Unstarred Question-ah pawh kan hmu a, a implementing agency chu a concern BDO tih a ni a, BDO through-in implementation hi mipuite hnenah, mipuite kha *work agency* angin leh mimal pawh BDO through-a pekin thil kha kal a. Hetianga BDO hming ringawta thil kal hi a concern BDO tan pawh a hrehawm ka ring a. BDO hming kan hman chuan nakin zelah an mahni tanah pawh thil pawh a awm palh theih ang tih ngaihtuahnaah a awm a. Chuvangin, hetah hian *hidden policy* hi a awm em tih ka hre duh a ni.

Chu bakah hei, a local mite pawhin hna te an beisei a, a bik takin tun term bikah hian mipuite tan engmah sorkar atanga dawn tur a awm lova, BADP atangin tlem tal chu local mite hnenah a kal theih chuan a lawmawm ngawt ang. Khatiang ni lova implementing agency BDO hmanga kal kha chu hriatthiam a har a, khawngaih takin Minister-in nakinah min lo react thei sela. MGNREGA-ah pawh tunah hian Block Employment Committee, District Employment Committee leh Village Employment Committee te hnenah hian ‘40 to 30 routers’ tih hi a kaldan a ni a, mahse tun thlengin VEC kutah a kal ngai lova, mimal kutah pawisa leh contract hna engkim a kal hi engnge a awmzia? Kha kha chu a guideline ah a awm lo anih pawhin a concern village leader-

te hnena tih kal dan, pawisa pek theih dan a awm lo em ni tih Pu Deputy Speaker, ka zawt duh bawk a ni.

Tin, Borapansuri hi khaw lian tak a ni a, pawn lam mi official-te pawh sorkar thilah an lo kal thin a, an thlenna tur Guesthouse a awmlah avangin hreawm an ti hle thin a ni. Term hmasaah khan MLA LAD fund hmangin Travellers Inn ka siam sak a, mahse hetah hian chowkidar quarter kan nei lova, khawngaih takin kan RD Minister hi minister chak tak anihna angin, BAPD sum hmangin chowkidar quarter tal hi min sak sak thei se tih kha ka ngen duh a. Tin, Borapansuri mai ni lo, Parva saw tri-junction, western side ah Bangladesh, Southern side-ah Myanmar leh hetah India ram a ni a. Hemi tri-junction-ah hian Parva-III, Mizo khua a awm a. Khualzin he hmuna an kalin, Chakma mikhual annih chuan Parva-I ah an riak mai a, mahse Mizo leh hnamdang mikhual, a bikin Mizo mikhualte tan chuan a hrehawm thin a. Chuvangin, khawngaih takin Parva-III ah hian Resthouse pakhat min sak sak theih chuan a lawmawm ngawt ang.

Tin, Demand No. 25, Public Health Engineering-ah tlem ka lut ang a, a hmasain lawmthu ka sawi duh a. Chawngte Composite Water Supply Scheme tunah hian han kan tan tawh a, Jal Jeevan Mission hnuai atangin nge NABARD hnuai atangin kan hre lova, mahse hna chu tan tawh a ni. Tunah hian chak takin hna hi a kal mek a, chuvangin Pu Deputy Speaker, kan Minister chak tak hnenah lawmthu ka sawi a. Tichuan hei, Longpuighat business lamah kal i la, 'Mumbai of CADC' kan ti thin a, business lamah chuan Longpuighat hi a pawimawh khawp mai a. Tun thlengin heath hian water supply hi a la awm lova, pipe water a awm ve loh avangin tuikhura mi, tui himlo kha kan in a ngai thin a. Chuvangin Longpuighat hi Jal Jeevan Mission hnuai enge maw scheme emaw thei em tih kha khawngaih takin kan Minister chak tak hian min lo react sak se la. Tin, Individual Functional Household Tap Connection hi khaw tina awm tura tih a ni a. Khami Jal Jeevan Mission 2022 hnuai-ah hian chhungkaw tin tan fund allotment engzat nge tih kha ka hre duh a. Ka hriat danin he fund hi mimal account-ah a lut thin a, bank atang pawisa lachhuakin department hotute kutah emaw pek kir a ngai leh a. Eng dan hmangin nge khatianga tih ngai kha ka hrethiam lova. Chu chu khawngaihtakin min lo hriat sak bawk sela.

Tin, Borapansuri hi khaw lian tak a ni a, Borapansuri 1 leh 2, constituency pahnih kan nei a, hetah hian tui connection hi mipuiin kan kham khawp tawh lova, chuvangin additional reservoir pakhat leh extension hi min tihsak theih em tih kha min lo hriatsak bawk sela.

Pu Deputy Speaker, kha kha ka sawi theih tawk ni se. Ka lawm e. Hun ka hmang thiam lo a ni ang, ka pel tam lo em mai. Pu Deputy Speaker, ka lawm e, minute chanve hun min pek belh avangin.

DEPUTY SPEAKER : I sawi thiam hle mai. Tunah chuan Member zahawm tak Pu Zothantluanga i lo sawm ang u.

PU ZOTHANTLUANGA : Pu Dy. Speaker, ka lawm e. Vawiinah kan Minister zahawm tak takte pahnih demand sawina hun kan nei a, a lawmawm hle a. A hmasa berah chuan Demand No. 6, Land Revenue & Settlement chungchang hi ka sawi duh a.

Ka bial Govt. Complex khu khaw lian tak a ni ve tawh a, in 500 chuang awmah khuan LSC vawiin thlengin kan la nei thei lova, sorkar-in Govt. Complex dang MINECO-ah kan nei tawh tho bawk a. Tin, kum 30 chuang LSC nei loa lo awm hi kan ngaipawimawh khawp mai a, sorkar hmasaah pawh khan kan bialtu kha Opposition MLA a ni a, Pu Sangthuama pawh khan he House-ah hian a lo sawi tawh a. Tin, kei pawhin session hmasaah te pawh ka lo sawi ri tawh a. Hnawhchhuah ngaihna an awm lova, hnawhchhuah chi pawh an ni lova. Sawrkar-ina kan lo tihsual chu, Govt. Complex hmun ni siah khan Village Council te, Local Council te kan lo dah a, chu chuan inhmun pass an lo pe thin a. Tichuan, an pass pek hmang khan in te an lo sa zel a, an sa mai ni lovin thenkhat chuan an hralh bawk a, chutiang chuan khaw lian tak kan lo ni ta a. Keimah hian ram pakhatmah ka nei lova, ka chhungkua, ka thisen zawmpuite pawh tumah ram nei kan awm lova. Nimahsela, khutianga rilru hah tak, an neih zawng zawnga an lo inbenbelna hmun chingfel lova sorkar heti chen kan awm hi a dik lovin ka hria a.

Nichinah khan kan Speaker khan a rawn sawi zeuh a, a lawmawm ka ti a. Chhungkua khuti zat, thingtlang khaw lian ai pawha lian tawh vawiin thlenga settlement kan pe thei lo hi a pawl takzet a. Chuvang chuan kan sorkar, kan Revenue Department-a kan Minister chak tak hian khawngaihtakin min ngaih pawimawh sak sela. MNF sorkar chhung ngei hian LSC min pek sak turin ka rawn dil a ni.

Kan Opposition Leader zahawm tak Pu Lalduhoma zawhna kha a awm a, vawiin ah khan a chhuak hman lo chiah chiah a. Khatah pawh khan zawhbelhna tur ka lo inringin, ka lo inbuatsaih a. Chuvang chuan Pu Dy. Speaker, kan sorkar hian “he khua chhungkaw 500 dawn te dinhmun chingfel tur hian mutmawh hnarmawhah i nei teh ang u, i pe ngei teh ang u” tih hi ka rawn sawi duh a. Tichuan, helaia kan harsatna tam tak hi chin felin a awm ang a. Tichuan, kan mi leh sate, kan khaw mipuite thlamuangin anmahni inah khuan an khawsa thei tawh ang tih hi ka ring a ni.

Tin, a buaithlakna em em chu, harsa tak takte an ni a, loan hmang a in sak ngai tam tak an awm a, mahse LSC te an neihloh avangin loan te an la thei lova. Tin, hnawhchhuah tum ila vawiinah hi chuan kan hnawtchhuak thei lovang, an thih thain chhungkaw tin khu an tang dawn. Chuvangin, an in leh lo kalsan ai chuan, an nunna chan mah se la pawl an ti lovang tih khawpin an awm nghet tawh a ni tih kha min hriatpuia, theihtawpa he harsatna, kum 30 zet lo awm tawh chinfelna tura tan hian kan sorkar chak tak hian hma min lakpui turin ka rawn ngen a. He House kaltlang hian bialtu ka nihna leh a veng mipui aiawh pawhin chu chu ka rawn ngen duh a ni e.

Tin, Demand No. 26-na Information & Public Relations chungchang hi tawite han sawi ila. Ka hmaa sawituin a sawi ang khan kumtin calendar leh diary department-in a siam thin a. Kan mi leh sa te harsa ve tak takte hian, calendar a tam tehreng nen, engtizia nge maw ni sorkar calendar hi an ngaihlu em em a, an ngaisang a, in tin hian neih an duh a, mahse, a limit si a. Chuvang chuan, kan mipuite mamawhna phuhruk tham law law hi siam ni se a thain ka hria a. Tin, kan minister chak tak zarah kum hnih zet mai covid update nitin zingah kan han hre thin a, information kan dawn theihna, kan minister zahawm tak taimakna leh inpekna te a zahawm hlein ka hria a. Chu chu tawi tein ka han sawi duh a.

Tin, Demand No.38, Rural Development-ah hian sawi tur a tam hlein ka hria a. Ka bialah hi Sairang-Sihhmui leh Sairang-Dinthar RD-in min cover ve a, khaw thum lek nimah se khaw pawimawh deuh an ni a. Airport atangin mikhual leh, kan ram lal tak takte pawh an lokal a, Mizo khua an rawn hmuh hmasak ber khua te an ni a. Tin, India President lokal te pawh khan Sairang-a kan Govt. Primary School te min tlawhsak a ni. Chutiang chuan khaw pawimawh tak a nihna hi min hriatsak ka duh a.

Tin, kan RD Minister hmalakna leh chutiang anga a pawimawhnate hriain tunah hian Sihhmui-ah Community Centre (Hall) min sak sak a. Eng emaw chen kan sa tawh a, kan zo tep tawh a, a complete-na tur hi sum min pe thei se tih kha ka sawi duh a.

Tin, a dang lehah chuan Sairang field chhakah khuan hall atan a structure la rinawm tak si, vawiin thlenga tu department mahin an ngaihsak loh a awm a. Thil harsa vak pawh a niin ka ring lova, RD lam atang bawh hian khu khu min han siam sak se ka duhin, ka han ngen a ni.

Tin, khaw thum lek a nih rual khan, hmasawna tam tak min thawhsak a. Mizoram-ah crematorium pakhat kan nei a, a kawng chu *kutchu road* a ni a, tunah hian cement concrete pavement in eng emaw chen chu min tihsak tawh a. Amaherawhchu a te deuh hlek a, motor te a leng chang chang a ni mai a. Khu khu han tihzauh bang la awma khu min han complete sak thei sela chuan fur lai te pawhin a lo berah mithi te

kan invui thei tawh ang a, kan inhal thei tawh ang a tih kha kan sawi duh bawk a. Hma min lak sak tawhnaah lawmthu ka sawi a, la tih lehzel turte min hriat sak turin kan ngen a.

Tin, niminah khan kan Opposition Goup Leader khan Sihhmui - Nghalchawm lei dawh chungchang kha a rawn sawi a, mahse a information kha diklo deuh hlekin hriatna ka nei a, kan hriata kha kan verify lemlo thin a, han enchhina, han hriatchian chuan kan sawi ang leh kan hmuh ang hi a lo ni vek lo a ni. Khu lei khu a pawimawh khawp mai a, a hma pawh khan a awm tawh a, a chhe tawh a. Sairang - Lengte, Nghalchawm kal tur khuan motor kawngah chuan kual taka kal a ngai a, khu lei khu a awm chuan ke pawhin motor a lehpelh theih a ni. Tichuan, Sairang, Sihhmui leh khung laia mi tam takte khuan luiralah ram an nei a, chutah chuan an ei leh bar zawna kawngah khu lei khu pawimawh tak a ni a. Ka zuk hrechiang a, hei naktukah a hmunah ngei zuk kal pawh ka tum a. Hnathawktute ka han zawt chiang a, rod kha a banpuiah sut 5 an hmang a, tin a hnungah khan ban te a awm a, sut 4 an hmang a. Tin, tie-beam a awm a, chu tie-beam ah chuan sut 3 leh sut 4 an pawlh a. Tin, anchor a, awm a, chu anchor atan chuan sut 6 an hmang a ni tih kha vawinah hian house hi han hriattir ka duh a. A hautak em em a, kalkawng a nei a, motor pawhin a kal thei thin a ni. Nimahsela tunah khuan Sihhmui - Ramrikawn kawng laitu khuan a kawng laih vung khan a kalkawng kha a hnawh vek mai a ni. Tichuan, a material collect-na man pawh kha a to a, rora ₹500/- a an lei kha ₹ 15,000/-in phurh thlak a ngai a. Tin balu pawh ₹500/- a an lei kha ₹15,000/- bawkin phurh thlak a ngai a ni tih kha ka han sawi duh a ni. Hun a tlem tawh si a, Pu Dy. Speaker, Public Health Engineering te, kan biala tui semtute indaihlohna te hi kan Minister ten min lo hriatsak se ka duh bawk a ni.

Tin, Urban Development & Alleviation Department hi Aizawl khawpui chung bialtute tan chuan 'kan nu' hi a ni mai a, kan hmasawna tam tak hi he department atang hian kan hmu a. A bik takin kan bial tan lawmawm em em, Smart City hnuaiah Aizawl khawpuiin thalaite infiamna kan nei lova, Tuivamit-ah khuan Football Studium phul lem phah natur min siamsak a, tunah hian tender an call tawh a, an allot tep a ni tih min hrilh a.

Tin, Music City khutah IGC a siam tura pawh kha ka rawn luh hma lawk khan DPR buatsaih mek anih te, CEO-in an buatsaih mek a ni tih min hrilh a. Chuvang chuan he departmentin kan biala hma min laknaah hian kan Dy. Chief Minister chungah pawh lawmthu sawi tur tam tak kan nei a ni. Chuvang chuan, vawinah hian Pu Dy. Speaker, he kan Minister zahawm tak tak te demand hi pawma, pass anih theihna turin ka rawn support a ni tih kha ka sawi duh ani e. Ka lawm e.

DEPUTY SPEAKER : Member zahawm tak Pu Vanlalhlana i lo sawm ang u.

PU VANLALHLANA : Pu Dy. Speaker ka lawm e. Minister zahawm takte pahnih, Pu Ruatkima leh Pu Tawnluia demand te kan sawi dawn a ni a, Pu Ruatkima demand hi ka han sawi hmasa ang a. Amaherawh chu Rural Department hian kan area min cover veloh avangin sawi tur ka nei vak lova, Land Revenue leh Information-ah hian tlem te ka han sawi ang a.

Information Department hi department pawimawh tak a ni a, UT kan nih hllim pheih kha chuan department lian leh ngaihsanawm kha a ni. Hun a lo kal a, tunhma a ang ta lo deuh a. Hei, calendar leh diary te member-te khan an han sawi a, a lawmawm a. Information calendar hi kan duh bik a, a chhuah tawh chuan ₹50/- pawhin helai velah hian an vir hut hut mai a, “mi pakhat-in copy chuti zat bak a lei theihloh” tih a ni a, heti khawpa mipuiin kan hlut chuan han phalrai deuh, a copy te pawh tihtam deuh ni sela tih kha ka han tarlang duh a ni.

Demand No. 6 chhunga Govt. Complex chungchang te kan han ngaithla a, a dik a. Khatiang case deuh kha kan nei ve a, Bawngkawn-ah sawn, In 200 tling lo deuh, tha deuh deuh saw a ding a ni. Amaherawh chu sawng ho sawn LSC an nei miah lova, kan hriat angin Bawngkawn Brigade te chu sipaiin rei tak an luah a, a neitu dik tak te hian kut an thlak thei lo a ni, kum 10 chhung kha. Tichuan, sipaite an han chhuak a, a neitu ten kut an han thlak chho a, huan lo ram a ni ber a. Mihring kan lo pung a, inhmun atan a neitu ten an lo hralh leh ta a, chutiang chuan huan passed pakhatat khan in tam tak a lo ding a ni. Amaherawh chu tun thlengin pass neilo hi a tam zawk an la ni a, chuvangin problem saw an la nei a ni. Sawitu hmasain a sawi kan han ngaihthlak ang khan, loan lak te an duh ve a, dahkham te a lo ngai a, sumdawanna bul tan nan te, lehkhazir nan te leh insak hrim hrim nan pawh, amaherawh chu khatiang kha a theih ve ta lova, LSC a awm loh avangin. In tha deuh deuh chu a ding a ni, sawngcho saw, ‘chhuak rawh u’ tiin rejection order pe ila, thih an hreh lovang, chutiang chu a ni ve tawh a. Govt. Complex a chhungkaw tam tak problem in neih ang kha helaiah kan nei ve a ni tih kha ka han tarlang duh a ni.

Tin, Revenue Department hi department lian leh pawimawh tak a ni a, chhiah lakhawmtute an ni a, an pawimawh a, session eng emaw kal ta atang khan survayor indaihloh thu hi an sawi thin a ni. Vawiinah pawh hian chu bawk chu ka sawi leh duh chu a ni a, surveyor an pawimawh a, an tel lovin hna a thawh theih tak tak lova, chuvangin an mamawh ang zat hi Revenue department-a hlawhchhuaktu an nih ang hian pek belh a thain ka hria a, chu chu kan sorkar hian ngaihtuah se ka duh khawp mai.

A dawt lehah chuan kan Dy. Chief Minister zahawm tak Pu Tawnlua demand ah hian kan kal ang a. Demand No. 46, UD&PA hi a danglam khawp mai a, a budget kan en chuan nikum budget revised estimate a in kumina budget estimate a hi 65% in a pung a ni. Department tam takah pawisa hman tur a kiam laiin a ni chu 65% a pungin ka hria a, a lawmpuiawm pawh ka ti a, hna thawh an tum a ni tih pawh a lang a. A punna head thenkhat han en hian, *Other Capital Expenditure* tih te, *Grant for Creation of Capital Asset* tih te, *Grant-in-Aid, non-Salary portion* tihah te a ni a. General discussion-a sawi ang khan, pawisa hlawm lian tak tak hmanna tur a ni a, performance budget te, Detail Work Programme te awm se chu a justification tur atan pawh hriat a nuamin a lawmawm zawkin ka ring a. Pawisa tam tham tak *Grant in Aid* ang te, *Creation of Capital Asset*-ah chuan eng asset nge an create tur a lan theihna tur te pawh kha a awm ta lova, chung chu kan budget document a famkimlohna te pawh niin ka hria.

Tin, a dawt leh a ka sawi duh chu, he department concern BSUP hi Durtlang Ramthar-ah khian kan nei a, a min avangin in block pakhat chu thiah a ni a. A in a min ve lo te khi a ruak vek mai a, 'a him lo' tiin luah ngam a ni lo a ni. Hun a lo kal a, Covid enkawl nan hman a ni leh ta hlauh mai a, a remchang em em mai a. Tunah chuan Covid enkawl na pawh a ni ta lova, a ruak ringawt mai a. In ruak ringawt hi chu a chhe hma em em mai a, mihringin a luah loh chuan. A min atang khan lei chet thawm pawh a awm tawh lova, a che tawh lova, a luah lum leh theih tawh loh em maw ni le aw, tih kha ngaihtuahnaah a awm a. Chu chu kan Minister hian ngaihtuahna lo seng ta se ka duh a.

Tin, street-light chungchang hi Electric Department chan turah ka lo ngai a, amaherawhchu, UD&PA chan hi a lo ni a. Aizawl khawpui hi a thim em em mai a, a chheh vel hrim hrim pawh hi; mahni bathlahrah light bulb kan khai loh chuan khawlai engtu street light hi kan nei chhe em em mai a, India ram state capital-ah chuan a nei chhe ber pawh kan nih ka ring a. Zan chhuak thang kan ni lo bawk a, kan hnam hi, mahse, dar 8, dar 9, dar 10-ah te chuan khawlaia vei vak mi eng emaw chen kan ve a, misual tan hian chance a tha lutuk a, thil sual tih nan a remchang lutuk a. Chuvangin street light hi ka ngai pawimawh khawp mai a, kan Minister pawh hian min lo ngai pawimawh sak ta se la. 'PAHOSS' kan ti a, a tha em em mai a, kan Minister leh kan leader-te pawhin an chhuang a. Tunah pawh hian kalpui mek a ni a, eng emaw zat selection an ti tawh a, pawisa pawh pek chhuah an ni tawh a. Ka hriat sualloh chuan nuaih 4,000 vel tunah hian department kutah a awmin ka hria a. Selection neih a ni tawh a, hetiang traffic jam anih zel si chuan kan pawisa kawl te pawh pek thuai thuai a va tha em; selection kan neih vek tawh, kan thlan tawh, a hmun pawh verify vek tawh te kha chu pawisa pe thuai thuai ila, traffic jam te pawh hi a ziaawm mahna tih te kha ka tarlang duh a.

Tin, hemi paha ka sawi duh chu, tuna selected, pawisa dawng tawh te leh tihpuitlin tawh te hi Aizawl khawpui chhung ai chuan khaw hmawr fem deuha awm anni tlat mai a. Lungbial-ah PAHOSS sum kha ti zozai mai han pekchhuah khan kan traffic jam kha a tiziaawm ang em aw ka ti a. 'Khawpui laili-ah PAHOSS dil duh an awm lo' tih te kha a ni ta a, a dikin ka ring a. Khaw hmawr fem deuh leh khaw lailia mite chu an hlutna a inang thei lova. Chuvangin phalna ang te pawh kha kan ngaihnatthiam a ngaiin ka hria. A hmawr deuh, veng tlafem deuh leh khawpui chhunga mi, khaw lailia mi chu a rate kha a inang theih lovang. Chuvangin, a rate siam danglam ta ila, traffic jam tireh tak tak tur Dawrpui, Chanmari, Treasury Square area angah te pawh a remchang ang ang kha chu, sorkar hian an lungawina tawk a offer mai loh chuan traffic jam hi a ziaawm lovang tih ka hlau deuh hlek a.

Tin, PHE hnuaiiah hian Septage Management Unit a awm a, chu chuan Bio-digester Manufacturing Facility te a keng a, crore 3.61 hmangin 2021-2022 khan peih a nih tih a lang a, kei pawh ka va kal tawh a, kan unau pa tan a tank te pawh ka lei ve a. Tunah hian an titawp tih ka hre tlat mai a. 2021-2022 ah crore 3 leh tih sengin hawn a ni tih zia kan hmuh laiin a function leh tawh lo em ni? Hei hi thil tha tak a niin ka hria a, septic tank pangngai aiin a tha zawk a, a rim te pawh a awm lova, a tui lo chhuak te pawh a awm lova. Chuvangin kan hmang uar tur a nih lain, engatinge a tawp tak daih mai aw tih kha ngaihtuahna ka nei a. Chuvangin kan Minister hian helai hi lo en tha leh ta se.

Pu Speaker, point pakhat chiah - Fire Hydrant hi tha ka ti em em mai a, PHE ten an cluster-ah pipe chhuahna tur, kangmei thelhna tur an vuah hi uar deuh sela thain ka hria. Motor kal theih lohnaah pawh tui pipe an kaltir mai a, kang thelhnan hian a tha em emin ka hria a. Department pawh hian uar deuh hian kalpui ta sela tih kha ka tarlang duh a ni. Pu Deputy Speaker, ka lawm e.

DEPUTY SPEAKER : Aw le, tunah chuan member zahawm tak Pu H. Biakzaua ilo sawm ang u.

PU H. BIAKZAUA : Pu Speaker, ka lawm e. Demand No. 38, Rural Development atang hian tan ila. Pu Deputy Speaker, Rural Development hi a hming ang chiah hian thingtlang tihmasawntu tur department a ni a. Chuvangin thingtlang bialtute tan chuan kan inngahna leh 'kan nu leh pa ber' ti ila kan sawi sual awm love. Thingtlanga kan hmasawna lang thei leh thil lian tham pui pui awm lo mahse, khaw hrang hranga hna tenau te te, tlema duhawm ve deuh te pawh Rural Development atanga thawh a ni deuh vek mai a, chuvang chuan, kan inngahna ber department a ni a. Kan Minister viak tha tak leh a nachang-hria in he department a enkawl pawh hi a

thlamuanthlak a, hmasawna tam tak hmel hmuh tur a awm mek zel niin ka hria a, lawmawm pawh ka ti khawp mai.

Tin, MGNREGA-ah hian job card neihtute'n tun hmain *Ni 100 Inhlawhna* ni mah sela, ni 100 hi an thawk mang lo thin a, tun kum kal mekah pawh hian *Ni 100 Inhlawhna* pawh hi anihna ang hian kan kalpui theih tawh niin ka hria a, lawmawm ka ti khawp mai a. (*Dr. K. Pachhunga, Panel of Chairman-in Chair a la.*)

Pu Chairman, ka sawi chhonzawm nghal ang a. Tin, material component chungchangah pawh kan hmuh zel a, hmasawna kan mipui lamah hian, thingtlang lamah nasa takin a lang tan zel niin ka hria a. Heng avang hian kan Minister zahawm tak hmalak zuina leh kan thawh chak dana zira sum leh paite pawh hi lo awm thei niin a lang a, a lawmawm ka ti khawp mai.

Keini bial hi BADP area, international border-a awm kan ni a. Ka bial hi BADP-ah pawh hna kan hmu thin a, a lawmawm ka ti khawp mai a. Chutiang a nih rual chuan BADP-ah hian lan beisei ang khuate a cover loh lai a awm thin a, '0 - 10' ti ang chi te emaw a lo nih hian a teh dan kan hre ve chiah lova, a cover tam deuh zawka siam theih dan te a awm ang em aw, ka ti a. Chuvangin, ramri hrula khua awmte chuan kan tangkaipui khawp a. Hei aia tam khua hi cover thei phei sela chuan a tha hle ang tih te pawh min hriatsak se ka duh khawp mai.

Tin, Social Education lam hi BADP-ah tunhma khan a awm thinin ka hria a, tunah hian a awm leh tlat tawh loh mai a, enge a awmzia aw, kan minister zahawm tak hian min hrilhfiah theih se ka duh khawp mai a. Hei hi awm thei sela chuan border-a awm lo hei aia tam zawk hi kan cover theih dawnin ka hria a. Chuvang chuan tan lak a ngai lehzual ni te pawhin ka hria a ni.

Tin, Rural House Scheme, rangva sem hi thingtlang lam tan chuan a tangkai khawp mai a, thingtlang hmun tam takah rangva chih loh In a la awm a, rangva inchung nei loten rangva inchung nei se, fur laiah rangva atangin tui tam tak a dawh theih a. Thingtlang mi tam tak rangva sem nghakte hi an awm thin a, kan Minister chak tak hian kum tharah hian rangva min sem sak thei se tih te pawh ngenna ka siam duh a ni.

Tin, IWMP hi a tawp dawn an tiin ka hria a, (a tawp tawh pawh a ni mai thei a) a thlakna tur scheme dang a awm dawn niin sawi a awm a, hei hi a awm dawn a nih chuan engtia kalpui chi nge ni tih kan minister zahawm tak hian min hrilh thei bawk se ka duh khawp mai.

Tin, ka bial chhung Siachangkawn hian community hall an nei lova, sak a ngai khawp mai a, hall an mamawh a. Kan minister zahawm tak hian hall neilo thingtlang khuate a ngaihven thin a, ka biala mi pawh hi min ngaihven sak turin ka ngen a. Tin, Sangau-I ah pawh community hall sak mek, sak zawh loh, hmabak laklawh deuh mai a awm a, sak zawh theih ni se chuan tangkai taka hman theih tur a ni a. Hei pawh hi kan minister zahawm takin min hriatsak se ka duh khawp mai.

PMAY gramin chungchang hi, Pu Chairman, 'kan minister-in min hriatsak se' tia ka ngen leh duh chu, ka bial chhungah AAWAS-Plus list siam tharah khan khaw panga - Sangau-II, Sangau-IV, Lungtian-I, Lungtian-II leh Siachangkawn khuate an tel lova. Tin, Mizoram hmun dangah pawh (he AAWAS Plus an siam lai kum 2018-a an siam kha a ni a) a lang lo khua a awm niin ka hria a. Hengte hi PMAY Gramin han sem dawn se a dawngtu tur an thlan hunah a khuain an tel ve dawn lova. Chuvangin hei hi min ngaihven sak se tih vawiinah hian kan minister chak tak hnenah ka ngen duh bawka ni.

Demand No. 25, PHE Department-ah hian tawi te han sawi duh ka neih chu, tui hnianghnar leh thianghlim kan neih theihna tura min enkawltu ber leh hmalatu chu he department hi a ni a. Kan Dy. CM zahawm takin he department hi hneh takin min enkawl mek a, JJM-ah hma nasa takin lak mek zel a ni a, a lawmawm hlein ka hria a. Tun kum kal mekah hian ka bial chhungah pawh JJM atangin khaw pariat laiah tui lakna tur leh in tina tui connection pekna tur min siamsak hi a lawmawm ka ti khawp mai.

Tin, ka bial chhung khaw pakhat, Pangkhua-ah NABARD hnuai atangin gravity hmanga tui lakna cheng nuai 214 vel senga buaipui a ni a. Tunah hian tui a haw thei tawh a, kan Dy. CM zahawm tak hnenah lawmthu ka sawi a. Tui tha takin a haw thei tawh a, minute 1-ah 45 litre a haw thei a, lawmawm kan ti em em a, khawtlang mi an lawm a, anrawn phone nasa a. Hetiang tui harsatna hmuna (hman kumah khan tui kan semna hmun a ni a) hetia tui a han haw thei ta mai hi kan minister chungah lawmthu ka sawi a.

Tin, chuti rual chuan, NABARD sum 40% hi release loh a la ni a, reservoir, intake leh filter te siamloh a la ni a. Reservoir hlui hmangin tui a leak bawka si a, a buaithlak deuh hlek a. Chuvangin NABARD sum release loh 40% hi kan Dy. CM zahawm tak hian hma min laksak se tiin ka ngen bawka a.

Tin, Greater Lawngtlai Water Supply Scheme chungchang hi he House zahawm takah hian ka sawi tawh thin a, siam a nih lai khan Lawngtlai kha *rural* a ni a, an siam zawh hmain *urban*-ah a lut leh a. 40 LPCD-a tih a ni a, chu chu tunah hian Lawngtlai mipuiin an kham lo em em mai a 70 LPCD-ah min hlankai sak turin kan Dy. CM

zahawm tak hian min chhinchhiah sak se tih ka ngen duh a. He augmentation scheme hi a DPR pawh siamfel vek tawh leh thehluh vek tawh a ni a. 70 LPCD-ah urban a nihna ang tak a min hlankai sak turin vawiinah hian ka ngen duh bawk a.

Budget Session-ah ka sawi tawh thin a, budget session vawi thum kan neiha ka sawi ziah chu, heng department - PWD, PHE, Electric Deptt., Supply Deptt. te, Lawngtlai district chhung ni si, Siaha district leh Lunglei district-a awm te Lawngtlai district-a min dahsak turin ka ngen thin a. Supply Deptt. chuan min tihsak tawh a, tun hi chu a sawi hun a ni lova, lawmthu sawi tur ka ba nasa khawp mai a. Vawiina ka sawi duh chu, PHE Deptt. Lawngtlai district chhunga Sangau RD Block area hi EE Saiha-in a la awp a, mipuiin harsatna tam tak an tawk a, sorkar anga hmalakna pawh mahni district thuneituten an awploh chuan harsatna tam tak an tawk mek a. Chuvangin, PHE Deptt. Sangau RD Block huamchhunga khua Saiha EE hnuaia awmte hi Lawngtlai EE hnuaiah awm tawh turin kan Dy. Chief Minister zahawm tak hian min chhinchhiah sak se, min dahsak se tih ka ngen duh bawk a ni e. Ka lawm e.

CHAIRMAN : Aw le, tunah chuan MLA zahawm tak Er. H. Lalzirliana i lo sawm ang u.

ER. H. LALZIRLIANA : Pu Chairman, ka lawm e. Khalaiia thut kha i inhmech khawp mai. Vawiinah kan Minister zahawm takte pahnih - Pu Lalruatkima leh kan Dy. CM, Pu Tawnluia-te demand sawi theia ka awm hi lawmawm ka ti a. Lawmthu sawina tlem leh bial chhung thilte han sawilan ve ka duh a ni.

Demand No. 6, Land Revenue & Settlement-ah hian kan Minister chungah lawmthu sawi ka duh a. Hun rei tak tihfel loha awm Mamit Govt. High School leh Higher Secondary School ram inthen hran mumal lo, hma han lak dawna lak hleih theih loha awm reng kha tunah hian demarcation mumal tak min siamin *Provisional Certificate of Land Lease* min tihchhuah sak ta a, a chungah kan lawm hle a, lawmthu ka sawi a ni.

Revenue Deptt. hi a pawimawh kan ti a, department lian a ni a, enkawl pawh a harsa tih kan hria a. Mamit district-ah khuan dedicated Revenue Officer hi kan neihlohna a rei tawh hle a, tuna kan MCS officer fel tak Pu Nohro khuan a hmui a. Tunah hian kan Minister Pu K. Beichhua hian 'PS turin a lachhuak dawn' tih te a ni lehngal a, chutiang a nih phei chuan kan nei leh lawk lo mai thei bawk a. Tin, staff hrim hrim pawh kan indaih lo hle a, surveyor pawh an indaih lova, a building hrim hrim pawh khu a chhe tawh a ni. Ka tlawh tawh a, hmanah pawh khan ka sawi tawh a, hei hi ngaih pawimawhah te min lo neih ve se la tiin mamawh ka han thlen ngal ni se.

Information & Public Relation-ah hian ka han sawi duh chu, chanchinbu mite aiawh te pawh a ni ang a, ‘ngenna min lo sawi sak the’ ti te pawh an awm avangin ka han sawi sak ang a. “Advertisement bill rei thei lutuk hi” a ni a, a kum dawn te nghah a ngai a, hei aia chak zawk hian sorkar advertisement an lo chhuah thinte hi min tihsak thei se tiin ngenna an siam a, chu chu ka han convey sak a ni e. Tin, I&PR website-ah hian mizo leh english section te a awm a. Hei aia nasa zawk hian english hian news update ni se la, a bik takin issue pawimawh, boundary issue tih vel te pawh. Kan focus duh ber chu central lamte an ni thin a, khuti lam media te han ti zung zung tur, directorate lam hian hetiang issue a nih pheih hi chuan han uar lehzuah se la tih kha thahnemngaihna thilah ka han sawi ni se la.

RD department hi, keini tana lungchhiatthlak tak mai hi ka han sawi leh ang a. MLA bial (constituency) zinga RD Block pali handle awm chhun kan ni a, ka bial chhungah RD block pakhatmah a awm lo thung a ni. Chuvang chuan, tam takin lawmthu an sawi sup supnaah khan lawmthu sawina tur hi kan nei lo ang reng khawp mai a. Amaherawhchu, hmalakna a awm lo tawp tihna ni lovin eng emaw chen chu a awm ve thova. Lengpui bik hi Zawlnuam RD Block hnuaiah a awm a, ka bial chhungah an awm lo phawt a. Tichuan khu lai khaw pariat – Rawpuichhip, Nghalchawm, Lengte etc tih vel hi Reiek RD Block, Pu Rintluanga bialah headquarter chu an thu leh a. Tichuan khuti lama hnufual - Khawhnai. Tuirum, Dampa Rengpui, Rajiv Nagar etc. khu lam zawng zawng khu Phaileng RD block hnuaiah an awm leh a. Mamit leh a chheh vel - Phaizau, Dampui, Suarhliap etc. te khu Zawlnuam RD Block hnuaiah an awm leh daih a. Chuvangin RD Block thuthmun khu chuan an ram leh a chheh vel hi an lo hre deuh zel a, proposal-ah pawh hian an lo dah tam deuh thin a. Keini bial khuan RD Block kan neih leh neihloh pawh hre lo hi tam tak an la awm a ni. A kal pawh la kal miah lo, Phaizau, Dampui tih te khuan Zawlnuam RD block khu an la hmang tangkai miah lo a ni. Chuvang chuan RD Block thar hi kan Chief Minister hnenah pawh vawi duai lo kan thlen tawh a. A theih chiah lo a nih pawhin eng emaw rintlak ve deuh tur, khulai bialin kan han hman tangkai theih tur mumal tak insiamsak theih dan awm se chuan hei ai hian kan hmang tangkai zawk awm e tih kha ka han sawi duh a.

Tin, I&PR-a request pakhat ka han neih duh chu, motor khu an nei ve a, (hun rei tak an nei lova) gypsy hlui tawh tak repair deuh reng ngai an nei a, ‘chhanloh aiah, Luka’ tih ang deuh vel a ni ang chu. Driver an nei lova, mahse staff zinga mi han pawh mai turte an awm a, khungte khu engtin emaw min ngaihtuah sak thei sela. Staff khu an indaih lo em em a, tunhma chuan anmahni office OE atang pawhin an han ti lawp lawp a, tunah khatiang provision kha a awm tawh siloh avangin tunah hian IPRO Pu Paula hian a thahnemngaihna-in thlatin sangriat hlawhin Pi Lalrinkimi a lo ruai ve ringawt a ni. Chungte chu min lo hriatsak se la.

Kan Deputy Chief Minister demand PHE hi chu kan lawm a. JJM hnuaiah, ka bialah pheih chuan complete tawhna - Damdai, Suarhliap, Tuirum-ah te hian complete tawh a ni a. Tui harsatna em emah tunah chuan tui an herh haw ve pur pur tawh a, bial mipuite aiawhin lawmthu ka han sawi a.

UD & PA hi kan dil tam ngai lova, kan dil chhun hi pawimawh tak a ni a, min tih sak bawk a. Kan Minister zahawm tak hian Mamit playground khu min tihsak a, tunah khuan a zual zapui chu kan zo deuh vek tawh a, pavillion kan la hmabak a, cheng nuai 300 min pe a, kan lawm hle a ni. Tunah hian kan bial chhungah chuan Lengpui leh Mamit hi UD & PA cover awm chhun kan ni mai a, Lengpui hi khawpui thang tak a ni a, Airport hmun te a ni bawk a. Chuvangin Lengpui-ah hian ‘multipurpose-cum-community hall min sak sak ve sela’ tih kha ka han request a, a hnenah pawh kan sawi tawh a. Lengpui-ah khuan han kal khawm chana han inhmukhawmna tur hi kan nei tha lo a ni. Rual awh a na a, hmunhma an nei a. Chuvangin kan Deputy CM hian khawngaihtakin min lo hriat sak sela, ka han request a ni.

Tin, RD Department-ah hian ka han let leh lawk ang a. West Serzawl leh Dapchhuah-ah khuan hall ban ding, hall tura tih niawm tak a awm a. Khu khu a dinna a rei tawh a, MLA fund hmangin khutiang deuh chiah khu Lengte-ah ka complete tawh a. West Serzawl leh Dapchhuah-a structure ding tawh khu min complete sak thei se la, tin, Khawhnai-ah nen tih kha ka han request a ni. Min tih sak theih chuan kan lawm ngawt ang.

Vawiinah kan minister te pahnih demand hi, ‘i pawmpui ang u’ tih ka rawn thlen ve a ni e. Ka lawm e.

CHAIRMAN : A lawmawm e. Hun i hmang thiam hle mai. Tunge sawi leh ang? Tunah chuan MLA zahawm tak Pu Lalrindika Ralte i lo sawm ang u le.

PU LALRINDIKA RALTE: Pu Chairman, ka lawm e. Lawmthu sawinain ka han tan ang a. Demand No. 38, Rural Development hi a changtu minister hian kan ngennate ngaipawimawhin ka bial chhhung Thinghlun khaw bul, Assam nena kan inrina bulah khuan Lei pawimawh deuh mai a awm a. Min dawh sak turin kan ngen a, kan ngenna te chu min tihhlawhtlin sak a. Assam nena ramri buai kan neih pawh khan kan hmang tangkai hle a, lawmthu ka han sawi duh a ni.

Tin, mamawhte thlen ve ka duh bawk a, ka bial Bungthuam-ah khuan hall la sak zawh lovin a awm a, a structure chu a ding ve uaih a, khu khu sum tam tak pawh a ngai tawhin ka ring lova, kan minister hian min sak puitlin sak se tih hi ka ngen duh a. Mizo

khaw lian ve tak a ni a, community hall neih khu an phu vein ka hria a. Bungthuam-a community hall khu min complete sak turin ka ngen a ni.

Demand No. 6, Land Revenue & Settlement-ah hian, Zawlnuam velah khuan harsatna kan nei deuh a. LSC siam duh mah ila harsatna kan nei a. Gas pipeline a kal dawn a, ‘LSC pekchhuah theihloh’ tih hi sawi dan a ni a. Hie hi kan minister hian min sawi fiah sak se a thain ka hria a. Mipuite hian thil an hrechiang chiah bawk si lova, gas pipeline te chu lo kal tur a ni reng em, chungte chu kan harsatna a ni em tih te min hrilh se ka duh a, ka ngen bawk a ni.

Ka bialah khuan *international boundary* a awm a, inter-state boundary, Assam leh Tripura nen a ni bawk a. Sorkar tirah khan, ‘ramri duhsak bikna tur’ tih sawi rik te kha a awm a. BADP cover khu tlem a awm a, BADP hmalakna-ah pawh hian nichin khan an sawi tawh a, a huam chin km-te tihzauh theih dan a awm em tih kan minister hian min ngaihtuah sak se a thain ka hria a. Kan ram tan pawh hian development kan duh leh kan mamawhte central lam atang development lo kal thei tur a nih vangin. A area hi tunah hian km 10 niin ka hria a, heng hi a hma kha chuan zau deuh hlek kha a ni a, hengte hi tihzauh leh dan te a awm ang em tih te min lo ensak se thain ka hria a ni.

Demand No. 25 hi sawi ka duh bawk a. Kan Deputy CM bial hlui hi ka bial a ni a, a lo bial thin tawh avangin a department-ah hian beiseina sang tak kan nei a, kan mipuite pawhin tui lamah harsatna kan nei a. ‘Zawlnuam’ tih hming te pawh khu MNF sorkar laia siam that kha niin ka hria a, ka hre dik em ka hre lova. ‘In ba’ chu ka ti chiah lova, amaherawhchu, ‘ti thei ula chu, in tihawm ve tak chu a ni’ tih te chuan ka ngaihtuahnah a awm a. Tin, kan Deputy CM bial hlui te a ni a, a hming te pawh an sawi ri ve deuh reng thin a. Khulaiah khuan an nupa hming te pawhin, khaw hming ‘Luimawi’ te a awm a, Luimawi te pawh khu an khaw zauhna engtin tin emaw kan tihsak ve a, churang chuan, ‘in ba’ chu ka ti chuang lova, amaherawh chu chungte avanga min ngaih pawimawh sak theih pheih chuan kan lawm khawp ang.

Zawlnuam tui lakna khu helaiyah hian a rawn sawi a, ‘tunah hian a *concept-note* theihluh a ni’ tih a ni a, amaherawh chu khawiah nge theihluh a nih, NEC-ah nge tih hi min hrilh thei se thain ka hria a. Zawlnuam khu khaw lian ve tak mai a ni a, Zawlnuam area pheih chu khaw 3 infin ang a ni a. Thuampui a awm a, Borai a awm a, tuna kan tui tlan khu a thianglim tawh lo niin kan hre bawk a, kan minister zahawm tak hian min hman hmawh sak se a thain ka hria a, mipuiten a lakah pawh beiseina sang tak an nei a ni tih kha min lo hriat sak se thain ka hria.

‘Mi rethei insak’ kan ti mai a, kan bial khuan harsatna kan tawh nasa khawp mai a, 2nd installment dawng hleitheih lo leh harsatna tam tak tawkte an ni a, bul an lo tan ve

si a, ‘engtin nge an kal chhoh dan tur’ tih hi min sawifiah sak se thain ka hria a. Harsatna tawk tam tak chhungkua kan bialah khuan an awm a, an khawngaih thlak khawp mai a. Hma te an lo la ve tawh si a, heng ‘Mirethei in sakna’ kan tih te a kal zel dan tur emaw, nghah chhuah tur emaw te a awm em tih te pawh hi kan mipuite hian hria se a thain ka hria a, chu chu min sawifiah sak theih chuan ka lawm ngawt ang.

UD&PA-ah hian ka han sawi duh chu, PAHOSS hi tih tawp thain ka hria a. A chhan chu sum indaihlohna kan sawi a, ‘kan sorkar pawhin sum a indaih lo’ kan ti a, kan budget-ah te pawh sum inrenchem a tul zia kan sawi a, *loan* pawh ni lo, suma peka inpek ringawt mai hi chu kan sorkar hian a thei lovah ka ngai a kei chuan. Chuvang chuan PAHOSS hi eng emaw hun chhung atan hi chuan chawlh a tha lawm ni? Kan sum harsat zual lai hi chuan kan chawlh a thain ka hria a, chuti zawnga hmalak chu ni thei se kan ram tan a that ka ring a ni. Kan Minister zahawm tak pawh hian PAHOSS hi tun dinhmunah chuan a tihtawp rih mai hi a thain ka hria. Chuti zawng chuan hmalak theih ni se a lawmawm khawp ang. (*Dy. Speaker-in Chair a la*)

Tin, Nizung chakna hmanga tui lak hmachhawp hi a awm a, kan bial - Kawrthah, Kanhmun, Hriphaw, Tuidam, Kawrtethawveng, Kawllalian-ah te hmalak turin hmachhawp a awm a, hei hi engtikah nge tihhlawhtlin a nih ang tih hi min sawi chian sak se thain ka hria a. Heng khuate hian tui hnianghnar tak, he nizung chakna hmanga kan la thei a nih chuan, kan biala harsatna zualpui (tui bikah hi chuan) kan inphuhru thei mai ang tih ka ngaihtuah a, a lawmawm khawpin ka hria. Heng khuaa kan tui pump turte hi chak thei ang bera hma min laksak turin ka han ngen bawk a ni. Hemi JJM hnuaia tui pipe chungchangah hian a hma khan steel pipe hman a ni a, tunah hian PVC pipe (Plastic pipe) hi an rawn chhawp hnuk mai a. A hmaa hmalak dan te nen a inan loh deuh bawk avangin kan mipuite khuan an iai ang reng khawp mai a. plastic pipe hman kha sorkar hmalak chhoh dan tur a ni reng em, steel pipe kha engatinge kan hman tak loh tih te hi minister khan min sawifiah sak se thain ka hria.

A hma Kawrtethawveng water supply scheme-ah khan “NEC-ah cheng vaibelchhe 4 leh tih vel project kan theh lut e” tih kha session hmasa lamah khan sawi a ni a, he nizung chakna hmanga kan lak dawn chuan kha kha a tawp mai dawn nge, kha hmalakna kha a kal zel dawn em, Kawrtethawveng-a hmalakna kha hmalam hun zelah hian a kal dan tur engnge tih te min sawi fiah sak se a thain ka hria a.

Eng pawh nise, vawiin nia kan minister pahnihte demand hi kan bial tan a pawimawh hle a, kan lo nghakhlel hle a ni tih pawh min hriat sak bawk turin ka ngen duh bawk a ni. Ka lawm e.

DEPUTY SPEAKER : Tunah chuan Member zahawm tak Dr. ZR Thiamsanga i lo sawm ang.

DR. ZR. THIAM SANGA : Pu Deputy Speaker, ka lawm e. Kan Minister zahawm tak tak pahnihte demand kan sawi dawn a, a lawmawm hle in ka hria. Demand No. 38, Rural Development-ah hian ka han tan ang a.

Rural development hi a bik takin thingtlang miretheite tan leh khawpui mi tan pawh a ni ang chu, *kan fai rel*, kan eibur ber a ni a. Covid-19 hun harsa tak karah kan supply department-in hneh takin buhfai min supply a, rural development lamin a leina tur a lo tum a, *Ni 100 Inhlawhna* tha tak mai ni zaa ni za kan inhlawh thin hi thingtlang miretheite tan chuan lawmthu sawi mawlh mawlh chi a ni. Kan sorkar hian fak a phu a, fak tlak anih hi chuan fak mai turah ka ngai a, engnge maw hliir maia kan sawi thin hi chu a pawh thinin ka hria.

Hei, mahni bial chhungah lawmthu sawina tur tam tak ka nei a. BADP atanga Champhai Vengthlang (North) Hall min han sak sak te, school, sub-centre enge maw zat leh tanky tam tak min siamsak te, heng bakah hian Ngur - Zilhri, Aiduzawl, Hliappui, Pamchung, Chirep, Tuisa leh Phunglian kawng tam tak min sial sak a. Tunah chuan miretheite'n balu phurh nan leh chak tam tak lak nan kan han hmang thei te hi a lawmawm khawpin ka hria.

Sawi hmaih miah lo tur chu, RD atang hian Rangva leh Silpauline te kan dawng thin a, hei hi kan hmang tangkai a ni. Silpauline hi thingtlangah chuan kan hmang tangkai em em mai a, rangva te pawh hi a pawimawh a, tam zawk te hian min pe thei leh se chu tiin kan ngen a. Ka bial chhungah hian MLA Fund leh SRDC Fund atang hian cheng nuai 50 deuh thaw hian Selam - Tuisa kawng hi kan siam tawh a ni. Km 5 kan la hmabak a, a har tawh khawp mai a, hei hi min chhonzawm sak se ka duh a. A chhan chu, Selam-ah alu leh serthlum te a tha a, potential area a ni a, dik tak chuan kawng chu han sial tlang se chuan tunah hian sem tur pawh kan rawn keng leh ang chu, kawng kha a thatloh avangin kan tithei lova. Chuvangin hei hi min laihtlang sak turin nakinah pawh wind up-na ah khan assurance min pek ve ngei chu ka duh khawp mai a, ka beisei a ni.

Sawi tur a tam khawp mai a, Rurban hnuaiah te pawh kan awm ve a, hetah hian agriculture link road te min tihsak a, ka bial chhungah tam tak lawmthu sawina tur hliir a awm a ni. Dilna pakhat awm chu, Champhai North huam chhung, Champhai khawpui tihlohah khi chuan Hnahlan hi kan khawpui ve a ni a. Khitah khian RD Block awm ve a phu khawpin ka hria a, hma min laksak ngei turin ka rawn ngen bawk a ni. Khawvel pian tirha ta Aiduzawl-ah khian hall kan la nei lova, khaw pawimawh a ni a, MNF party

tan phei chuan hmun pawimawh tak a ni tih in hria ang a. Hall sak bul tan nan nuai 4 tihsak a ni tawh a, a ban te kan phun tawh a, nuai 10 vel min pekbelh chuan MLA fund nena tang kawpin kan tih zawh theih mai ka ring a, beiseina sang tak nen ka lo nghak a ni. Tin, Murlen khuaah khian hall kan la nei lo bawk a, hei hi ka beiseina pakhat a ni bawk a.

Demand No. 6, Land Revenue & Settlement-ah hian, kan hriat angin ‘State’ a ni emaw, ‘District’ a ni emaw staff an indaihlo khawp mai a. Kan bialah te pawh surveyor an indaih lova, an tlem a, a rampum ang pawh hian surveyor hi chu lak belh theih ni se a duhawm khawp mai. Kan bial bik New Champhai-ah khian office kan nei a, a thawktu pawh chowkidar nen department office khi kan bun thei tawk tawk a ni a, chuvangin, chowkidar leh a hungna tur sum min tihsak thei se ka duh a. Tin thil pawimawh em em chu, Hnahlan khawpuiah hian cadastral survey min tihsak ve turin kan rawn dil tawh a, tihtumna pawh a awmin ka hria a. Min rawn tihsak ngei turin wind-up naah pawh ka rawn beisei a ni.

Demand No. 26-ah ka kal leh tawh mai ang a. Covid-19 hripui leng karah I&PR Department-in Mizoram mipuite tana hma a lakna hi a ropui a, a chhuantlak a, a changtu minister chungah lawmthu kan sawi takzet a. Tin, a thawhpuite chungah pawh hian waviinah lawmthu ka sawi a ni. A chhan chu, Covid-19 karah, a bik takin Health-ah a hmingin Vice Chairman angin ka awm a, chutah chuan, “*awareness* a ngai e, *talk-show* a ngai e” tiin department hotute kan han be thin a. “A rem thei ang em” kan tih hian, “E, rem e, nangni inrem phawt chuan englai pawhin kan inpeih e” an ti a ni. Chutiang khawpa department inpe chu, a minister hian a zir hle a ni ang, i zirtir emaw ni chu ka ti hial a. A department chungah lawmthu ka han sawi mawlh mawlh a ni. Kha kha lawmthu sawina ni se.

Chutih rual chuan MJA, I&PR-a bet tlat ho demand kha harsa hle mahse, pension an han dil te pawh kha a awm khawpin ka hria a, khangte pawh kha ka han sawipui ve a ni.

Tichuan, mahni bial han sawi leh ta ila. Champhai-ah khian I&PR office building kan la nei lova. District dang, keini aia te zawk leh junior zawk (ti ve mai ila) Serchhip, Lawngtlai, Kolasib leh Siaha zawng zawng hian an neih vek tawh laiin keini chuan office kan la nei lo hi. Ka han sawi duh chu, Champhai Vengthar-ah khian department-in ram tha deuh mai kan nei a, office pawh leng, quarter leh engkim pawh leng a ni a, khi khi khawngaih taka hman min laksak turin ka rawn beisei a. Wind-up naah pawh rawn tihtlan ve nise tih ka sawi duh a ni. Sawi tur tam tak awm karah kha kha I&PR Department-ah chuan ni mai se.

Demand No. 25, Public Health Engineering-ah hian lawmawm ka ti a. Mizoram thingtlang hmun hrang hrang, tui harsatna hmuna tunah chuan tui in tur, mi thenkhat pheih chuan chhipa chhuan ngai tawhlo khan mahni kawtkai leh inchhungah kan han herh haw ham ham tawh mai hi a ropui ka ti a, lawmthu ka sawi a. Nikumah kan biala khaw 4 - Hnahlan, Vaikhatlang, Lungphunlian leh Tualcheng-ah te min han tihsak vek tawh mai a, tui kan hnianghnar tawh khawp mai a. Khaw 13 emaw, 14-ah emaw hma min laksak leh dawn hi ropui kan ti a, lawmawm kan ti a ni. Keilungli-a “Champhai Construction of Dam Reservoir & Development of Recreation” kan tih kha MNF sorkar hian nasa takin tunah hian hma min laksak a, 95% lai mai tunah hian kan thawk tawh a, zawh mai theih tura a han awm te hi achievement ropui tak a ni a, kan lawm hle a ni.

Tichuan, dilna hi a ngai ve thin a, mahni bial chhung tan hian. Champhai Greater Water Supply, Phase-I hi tui kan hnianghnar tawh lova, Phase-II turin hma min laksak mai dawn em ni tih kha, a thawm chu a awm emaw ni tih kha ka sawi ngam si lova, khi khi a tul tawh khawp mai a, Phase-II min siam belh turin kan rawn ngen a ni. Khi khi min tihhlawhtlin sak chuan Champhai-in tui harsatna kan neih zawng zawng a kiam thei dawn a. Tin, tuna kan hman lai mek Champhai Greater Water Supply Phase-I ah hian pressurized steel tank kan mamawh a, RCC tank min dah belh sak a ngai bawk a. Tin, tui pump khawlina tur electric motor dah belh a ngai bawk a ni. Kha kha ka rawn dil a. Tin, Zote, Hnahlan leh Tualcheng-ah khian tui tam mahse, tuizem indaihlohna avangin tuizem lian tawk min dah belh sak turin ka rawn dil bawk a ni. (Pu Dy. Speaker, warning bell a ri tawh naa, ka zo tep e.)

Tichuan UD&PA-ah hian hmuh theiha hmasawna a rawn awm hi lawmawm ka ti a, faktlak a ni a. Ka bial chhung Champhai North ngeiah pawh UD&PA hian hna tam tak, retaining wall bakah footpath tam tak min siamsak a, Champhai District Hospital kawng te pawh tunah widening kan ti mek a, retaining wall pawh tunah hian a then kan ti ve ta bawk a, khing kan hmabakte khi min zawhsak turin ka ngen bawk a ni. Tin, Champhai JE Office hian staff an indaih lo hle a... (Pu Dy. Speaker, reilo te aw) JE leh Urban Infrastructure Specialist pakhat ve ve chiah an awm a. District a lian tham ve si a, estimate leh kawng hrang hrangah khian a buaithlak thin a avangin min han dah belh sak ngei turin ka rawn ngen a. Tin, thil harsa a ni maithei a, Champhai DDO atang khianin bill leh cheque te hi lakchhuah ve theih ni tawh se la, directorate atanga han tih hi lehlamah chuan rawn kal hi a harsa khawp mai a. Min tihsak theih la chu kan lawm khawp ang.

A tawp nan chuan, PAHOSS tihtawp kha an rawn rawt a, Covid-19 ni lo se chuan PAHOSS hi a hlawhtling viau dawn a ni, sum leh paiah harsatna awm lovin a nihna ang tak chuan ni thei se. Mizoram-ah hian parking chungchangah nasa takin hma kan sawn dawn a ni tih a Chiang a. Champhai-ah khian bul kan tan ve dawn chiah si a, khi khi chu

min tihtawp sak lo ula, kan laklawh hi chu min tihsak a ngai a ni. Zawi zawiin a then chu kan ngen a ni.

Tichuan, a tawp nan tak tak, Pu Deputy Speaker, Personnel & Administrative Reforms hi indaih lo hle chung pawhin hna an thawk tha thin a. A bik takin Covid-19 karah pawh doctor-te, lohtheih lohin Anasthetist kan tih te an pawimawh em em mai a. Tunah hian Super-Specialist te pawh an lo awm chho ta a, an post siamsaka kan tih vat vat loh chuan hmun dangah min kalsan leh mai ang tih te pawh kan hlau a ni. Tin, Dental Surgeon pawh hi ka hriatsual loh chuan kum sawm panga deuh tho kan la tawh lova, hengte pawh hi, kan Finance Minister-a awm bawk a remchangah ka han han la a ni.

Kha zawng kha Pu Deputy Speaker, ka rawn sawi theih ni se la. Department pawimawh tak taka kan Minister-te pahnih Demand hi pawm ngei turin keipawhin ka rawn thlen a ni e. Ka lawm e.

DEPUTY SPEAKER : Awle, a lawmawm e. Tunah chuan Member zahawm tak Pu K. Laldawngliana i lo sawm ang u.

PU K. LALDAWNGLIANA : Pu Dy. Speaker, ka lawm e. Kan Minister zahawm tak tak te Demand sawina hun tha tak mai ka nei ve hi ka lawm hle a ni. Demand No. 6, Land Revenue & Settlement Department hi chhungkaw tin kan rohlu enkawltute an ni a, churang chuan a thawktute leh a minister zahawmtak ten tha tak leh fel taka thenawmte nen kan intihbuai lohna turin mamawh an neih, Surveyor indaihlote hi a tam thei ang ber lak annih theihna turin hma la se thain ka hria a. Keini bial Kawnpui pawh hi town area a ni bawk a, khutah khuan Revenue Office awm ve thei se kan duh hle a ni.

Demand No. 26, Information & Public Relation hi a pawimawh hle mai. Kan Minister zahawmtak leh a thawktute an rintlak in hnathawhte ngun taka han thlir hian an fakawm thlawt a ni. An hnuaiah MJA te pawl kum 50-na a lo ni a, ka lawmpui hle a ni tih ka sawi duh a. Chutih rual chuan I&PR hnuaiah hian Mizoram Working Journalist Welfare Society te budget-ah cheng nuai 10 te, nuai 15 te kan dah thin hi ka lawmpui hle ni. Tin, pension scheme an rawn dil te pawh hi ngaih pawimawhsak a tha hlein ka hria. Tichuan, kan beisei chu, a department an rintlak bawk a, kan thu leh hla engkim, mipuite hnena sawichhuak leh tichhuaktu an ni bawk a, mipui tibuai lo chia fel tak leh dik taka tihchhuah thin hi an mawhphurhna pawimawh tak a nih avangin, hei erawh hi chu zawm tha viau se a thain ka hre hle a ni tih kha ka sawilang ve duh lawk bawk a ni.

Pu Dy. Speaker, Demand No. 38, Rural Development hi thingtlang zawk, zokhua zawkte inngahna leh malsawmna thlenna department anih angin, a rampum hian he

department kaltlang hian malsawmna tam tak kan dawng a, kan hmu baw k a, kan hre baw k a ni. Ka bial chhung ngeiah pawh nasa takin khaw tin deuhthawah development tur lolut hi a changtu minister chungah bialtu ka nihna angin lawmthu ka rawn sawi baw k a ni.

Kan hriat angin, *Ni 100 Inhlawhna* min pekah te kan lawm a, kan bial chhunga awm ve lo, bial aiawha ka sawi duh chu, kan Minister zahawmtakin min lo chhinchhiah sak sela, inchung pawp ka bialah a tam khawp mai a, rangva te leh silpouline te mamawhna hi a tam si a, hengah hian min lo hre reng dawn nia tih kha ka sawilang tel duh baw k a ni.

Demand No. 13, Personnel & Administrative Reforms chungchang hi a pawimawh hle mai a, ‘reform’ anih ang hian kan hotute’n ngaipawimawhin Manpower Assessment Committee te an din hi a lawmawm ka ti a, an din chhan ang ngei hian kan rama pawimawh leh tul ang te reform-a, committee hian rawn kalpui zel turin duhsakna ka hlanin ka beisei baw k a ni tih kha kan sawilang tel duh baw k a ni.

Demand No. 25, Public Health Engineering Department hi a pawimawh hle mai a. Mihring piang tawh phawt hi chuan tui lovin kan khawsa thei lova, kan han tawng rei deuh hlek pawh hian tui a hal zung zung a ni a, kan mamawh a, a tel lovin kan awm thei lova. He Department pawimawh takin kan ram chhungah kan mamawh tih hriain JJM hnuaiah nasa takin rampumah hna an thawhna hi ropui kati hle a ni. Ka bial chhung ngeiah pawh tunah khaw 9, tui harsatnaah min han pe tur te hi kan Dy. Chief Minister hnenah kan bial aiawhin lawmthu ka sawi baw k a ni. Chu mai ni lovin, a department tan a pawimawh a ni tih hriain Sub-Division Kawnpui-ah min pek avang pawhin lawmthu ka sawi baw k a ni.

Chutih ruala an rawn sawi tam em em chu, nizan thleng khan a ni a, Hmarchaltlang-ah hian tui an harsa em em mai a, hei erawh hi chu kan minister-in min lo hriatsak se ka ti baw k a ni.

Demand No. 46, UD & PA hi a pawimawh hle mai. UD & PA hi kan hriat angin khawpui cheimawitu a ni a, an office-ah ka va kal a, office pawh saw a mawi em em mai a, engkim mai saw Smart City enkawltu an ni baw k a, an smart em em vek mai a, a hnathawkte an smart a, Director ho pawh an smart-in biak an nuam baw k si a, an entawn tlak em em a ni. An pu berin a zir baw k a niang chu. Chuvang chuan, UD & PA hnuaia atanga Kawnpui area, ka bial chhungah hna tha tak tak mai leh kan mamawhte an lo pek tawh zawng zawngah lawmthu ka sawi a, Bill pawh a tam zawk kan hmu tawh a. Ka hovin kan va kal a, an sum harsatna Covid avangin eng emaw chen bill la pekloh an ni a, hei erawhchu hi chu min lo hriatsak ula, bill pending tlem la awm hi bial

mipuite'n an mawh hle mai a, an rawn phone ngun si a, kei pawhin vawihnih ka va kalpui tawh a, a hma lama min lo ngaihtuah saka min lo ngaihpaawimawh sak turin ka beisei bawka ni.

Pu Dy. Speaker, vawiinah hian sawi tur tam tak awm karah khangte kha ka ngaihpaawimawh zual ka sawi duh te a ni a. Vawiinah kan Minister zahawm tak tak te pahnih Demand an rawn sawi hi pawm ngei anih theihna turin ka rawn thlawp a ni e. Ka lawm e.

DEPUTY SPEAKER : Tunah Pu C. Lalmuanpuia, Member zahawm tak i lo sawm lang u.

PU C. LALMUANPUIA : Pu Dy. Speaker, ka lawm e. Hei, vawiinah kan Minister zahawm tak takte pahnih Demand sawi theia ka awm hi ka lawm hle a, hetiang hun min petu Pathian hnenah lawmthu ka sawi a ni.

Pu Dy. Speaker, kan hun neih te a tlem avangin kan sawi tam hman dawn lova, a tlangpui ka sawi ringawt dawn a ni.

Demand No. 6, Land Revenue & Settlement Department chungchang hi ka sawi duh a. A Minister zahawmtak hian a khai zo hlein ka hria a, tin, Department-te inpekna a hlu a. Chawhma lama *Zawhna leh Chhanna*-ah pawh khan he department pawimawh zia chu a lo langin ka hria a. Sorkar hmalakna lian tham a lo lan chuan leh kawng hrang hranga han thlir hian Revenue Department hi a tel zel mai a, kawngpui, 4-lane kan han tih ang chi-ah te khan an pawimawh zia a lo lang chiang hle mai a. Tin, hei, Rail kawng pawimawh tak maiin min rawn chhun dawn a, chungah te pawh chuan Revenue Department pawimawh zia kan hmu a, chung zawng zawngah chuan an pawimawhna hriain thil tam tak hmachhawn tur an nei a, chulaiah chuan kan Minister zahawmtak pawhin min lo hriatsak se ka duh chu, thawktute an indaih lo hle a ni tih kha kan ngaithla tam a, kei pawhin ka hria a. Kan bial chhungah eng emaw thil tangkai, pawipang kan han tih nikhuaah pawh an indaih loh zia te, indaih lo chung chung min lo ngaihpaawimawh thin zia te ka ngaihtuah hian thawktu indaih lohna phuhruk dan te awm sela tih kha vawiinah hian ka sawipui duh a ni.

Sawi tur tam tak a awm a, nikum April 2021 atanga tun December thla thlenga Covid hrileng karah pawh hian House Pass leh LSC te department hmalakna ka hmuh khan, 'engtin nge hetiang zat zat hma an lo lak theih le' tih mai tur a ni a, an fakawm tak zet a ni.

Pu Dy. Speaker, ka bial chhungah ka lut deuh mai ang a. Ka bialah pawh hian Revenue Department hmalakna kan mamawh hle a, kan Minister zahawmtak hnenah pawh hian ka sawi tawh a, a ho pawh hian kan sawi khawm tawh a. Ka bial chhung Chanmari West khuan thlanmual a mamawhna a nasa a. Kan thlanmual hman mek khu a khat ti tih tawh a, thlanmual thar kan buatsaih mek a, a pillar te pawh kan phun vek tawh a. Enfel ngai lai eng emaw avangin tunah hian la tih fel loh deuh a awm a, he House zahawm tak kaltlang hian kan minister zahawm takin nakinah min react theih chuan min react sela, khu khu khawngaih takin min tihfel sak vat thei sela tih kha ka ngen duh a ni.

Demand No. 38, Rural Development-ah hian han kal leh ila. RD Deptt. hi a pawimawh khawp mai a, member zahawm tak takte pawh khan an sawi tawh a. Hripui leng karah pawh zokhaw lama kan unaute harsatna karah pawh harsa miah lova siam theitu chu an *Ni 100 Inhlawhna* hi a ni a, a chhenfakawm hlein ka hria a, kawng hrang hrangah zokhaw lama an hmalaknate hi a fakawm ka ti takzet zet a ni.

Demand No. 26, Information & Public Relations hi ka han sawilang leh duh a. Member zahawm tak tak ten an sawi tawh ang khan information dik min pe a, covid chungchangah a ni emaw, SOP thar a awm anih pawhin an information a rintlak em em a, kan Minister zahawm tak ho hian a department staff-te an hah hle ang tih ka ring a, chhun zan zawmin khang collect khan an buai em em thin a, an chungah lawmthu ka sawi a. Tin, MJA-te nen thil engkim mai an ti hova, MJA ten pension scheme an han demand-te pawh kha Pu Dy. Speaker, a awm ka tihpui khawp mai a. Thudik min puan saktu mi special anni a, churang chuan hengho tana an dil-te pawh kha he House kaltlang hian awm ka tihpui a, a theihna chen chenah theihtawp chhuahpui turin leh a theih anih chuan tih hlawhtlin sak turin kan ngen pui baw a ni e. Pu Dy. Speaker, sawi tur tam tak a awm a, mahse kan luhchilh vek sen dawn loh avangin ka han kal leh zung zung mai ang a.

Demand No. 46, UD&PA Deptt-ah hian Minister zahawm tak kan Dy. Chief Minister kaihhruaina hnuaiah he department hian chak takin hma a la a, a hmalakna hi a zau em em mai a, a ropui ka ti a. *Sustainable Urban Transport Project* Aizawl City hnuaiah cheng vaibelchhe 2,000 dawn mai a awm te hi ropui ka ti a. Chutah chuan, ka bialchhungah pawh smart city hnuaiah hian hmasawna ruhrel lian tak mai minrawn buatsaih sak a, vawiinah hian he House kaltlang hian lawmthu kan sawi duh a. Edenthar field chu Smart City hnuaiah tunah hian tender mek a ni a, a lawmawm ka ti khawp mai a. Heti khawpa hun harsa leh hrehawm karah hmasawna lian tham tak mai kan han nei tur hi kan bial aiawhin lawmthu kan sawi a. Tin, chu mai bakah tunah hian Zarkawt field min tender sak mek baw a, he department chungah hian lawmthu ka sawi takzet a ni. Smart City hnuaia hma min lakpuina kawng hrang hrangin a lo lang a, step, hand

railing leh kawng engkim maiah ka bialchhung leh Aizawl khawpui chhung min han chei sak te hi lawmawm ka ti takzet a ni.

Tin, UD&PA hnuai atang hian Chanmari West leh Chanmari inrina laiah sawn kawngpui pawimawh deuh tur hi a awm a, Aizawl khawpui laili nisi hi hlang hmanga in zawn te a la ngai a, sawlai kawng kan han siam turah sawn buaina lian deuh mai kan nei a, a kawng chhuahna turah sawn building pakhatin a su buai tlat mai a. UD&PA hnuai hian chu building laihna chu min ruahman saka tunah hian min tihfel sak tawh a, direct purchase hmangin vawiih hian sawikawp a rem khawp mai a. Revenue Deptt. pawh kan tibuai khawp mai a, Revenue Deptt. atangin D.C-ah, tichuan PWD-ah min access sak a, sawlai kawngpui pawimawh tak tur saw ruahmanna min han siamsak hi ka lawm khawp mai. Tin, Chanmari West YMA Hall tunah hian kan buaipui mek a, Hunthar Veng YMA Hall kan buaipui mek bawk a. Electric Veng leh Chhinga Veng inrina laiah sawn kawrpui thuk tak mai, min hlauhawm, fur lai pheichuan a bul vela mite pawh zanah an riak chhuak a, chhunah pawh an awm tha ngam lova, chutiang khawpa kawrpui hlauhawm, min hlauhawm chu UD&PA hmalakna hnuai hian tha taka rem a ni a, la chhunzawm zel theih pawh a ni a. Tunah chuan a bul vela mite pawh thlamuang takin an riak a, an mu thei tawh a, UD&PA Minister zahawm tak leh a department chungah lawmthu kan sawi a.

Tin, sawi hmaih hauh loh tur chu Electric Veng pawh an thlanmual a khah tawh avangin thlanmual thar an mamawh a, thlanmual thar kai dawn chuan leihlawn mumal tak siam a ngai a, chungte pawh chu UD&PA-ah kan va thlen a, an niin ruahmanna feltak min siam sak a, leihlawn min han dawh sak tur te pawh hi lawmawm ka ti takzet a ni.

Tin, AMC hnathawh hi a lawmawm ka ti a, khawpui an chei a, an thawk tha em em a. Kan Mayor leh Dy. Mayor te, Executive Counselor leh Counselor zahawm tak takte leh Deptt. Commissioner leh a thawhpuite chungah lawmthu ka sawi duh a. Ka bialchhungah pawh hmasawna chihrang hrang alo lang a, tun kar mai pawh khan Electric Veng-ah Ralleng Tuikhur minrawn en sak a, Chhinga Veng leh Electric inrina laiah pawh ... **(Dy. Speaker: Minute 1 ila nei e)** ruahmanna min siamsaka ka lawm khawp mai a. Chutah chuan thil pakhat han sawitel duh, AMC-te han ngen duh ka nei a. Parking hi an kuta awm a ni a, 2-wheeler taxi permit-te kan han pe a, two wheeler taxi-te tunah hian an mangang hlein ka hria a. A theihna chen chenah 2-wheeler taxi parking hi ruahmanna lo siamsak thei ula chuan ka lawm ngawt ang. Tin, Aizawl chhungah hian Local Council 83 kan nei a, AMC hnuai hian an awm a. An hnena ka ngen duh chu, in remchanna lai laiah an parking lo siamsak turin kan ngen duh bawk che u a ni e.

Demand No. 25, PHE hi sawi hram ka duh a, Pu Dy. Speaker. Ka bialchhungah ka lut mai ang a... (**Dy. Speaker:** I hun a tawp a) Awle, minute 1 chiah Pu Dy. Speaker. Ka bialchhungah khuan *Chhawnzinga Tuikhuah* kan nei a, a min avangin hun rei tawh tak atangin kan buaipui a. Tunah hian kan Minister zahawm tak leh PHE Deptt-te hmalaknain siamthat leh vek a ni a, karlehah te hi chuan kan hawn theih tawh mai kan beisei a, hawn tumin hma kan la mek a ni. He hmasawanna ropui tak mai mipuite tana tui in tur min rawn ruahman sak leh hi thinlung takin lawmthu ka sawi a ni.

A tawp berah chuan Pu Dy. Speaker, vawiina kan Minister zahawm tak takte demand kan han sawite hi he House zahawm takah hian lawm taka pass ngei turin kan sawm duh a, ka rawn support a ni e. Ka lawm e.

DEPUTY SPEAKER : Awle, tunah chuan Member zahawm tak Dr. K. Pachhunga ilo sawm ang.

DR. K. PACHHUNGA : Pu Dy. Speaker, ka lawm e. Minute 10 hi alo rei hle mai tih kha ka hria a, a sawi kha kan dil kan dil a, minute 10 rei zia chu khatah khan ka hre tlat a, churang chuan min pekbelh ka dil maithei a nia. Kan Hon. Dy. Chief Minister leh Minister zahawm tak Pu Ruatkima Demand-te hi lawmthu sawinain ka han tan ang a.

Demand No. 25, PHE hi, kan hriat angin tlangrama awm kan ni a, tlangchhipah kan awm deuh vek bawk si a, khuta tui kan chawi a, thalah kan harsa tlang a. Chutih lai chuan mahni vengah theuh nuam kan ti bawk si a, In 40 te, 50 te lek lek in hmuntinah kan awm si a, a hrehawm em em mai a, ka bialah pawh chutiang tho chu a ni a. Tui kan harsa a, mahse kan Dy. Chief Minister leh kan Chief Minister-te hmalaknain India Sorkar-in JJM a kalpuinaa pilot project atan kan state an han hmangte hi lawmawm ka ti a. Ka bial thingtlang khaw 31-ah gravity pipeline leh solar pump te min rawn pe dawn a, kan phurin kan lawm takzet a.

Tin, Lunglei khawpui chhungah pawh PHE Service hi a tha hrim hrim a, *Department tha ber*-ah te pawh an thlang thin a, an service a tha ka ti a, an chungah pawh lawmthu kan sawi a. Chutih lai chuan hei NH-54 widening hi kan hriat angin construction an ti mek a, ka bial kawngpui dunga thingtlang khuate tui pipeline a tichhe nasa a, kan VC leh mipuite kan mangang ang reng thin a, keipawhin vawi tam tak ka kalpui thin a, company contractor lamin “kan tihtur a ni lo” an ti a, NHIDCL lamin “kan tihtur a ni lo, PHE tihtur a ni. Pawisa pawh kan pe tawh” an ti a, mahse kan DC te nen kan han sawi a, a nihna takah chuan temporary installation hi contractor-te kut a ni a. Tin, kan mite tawng an thiam tawk lova, an beng per a, tikhan kan buai thin a. “PHE

chuan an kawnglahi zawh hunah permanent restoration an ti tur a ni” tih kha kan mi te pawhin an hriat a tha a. Helai hi enpui deuh chu a ngai ka ti khawp mai.

Tin, solar pump kha ka bial leh Mizoram hmun hrang hrangah tender vek a ni a, tunlai ah tu tute emawin ‘tender loh a ni, chuti khati contract, a sorkar hi a dik lo a ni’ an ti a, ‘kan tender ve bawk a nia’ tih te pawh kha ka han sawi tel ve duh hrim hrim a.

Tin, UD & PA hi kan hriat theuh angin Lunglei-ah *Decentralization of Power*-in municipal kan nei dawn a, a bul tannan nuai 80 min han ruahman sak te, kan lo awhna a rei ve tawh a, hmasawna a in tan dawn ni te pawhin kan hria a, kan lawm tak zet a. Tin, (ka han sawi pawlh lawk ang a) RD Department demand-ah khan Lunglei RD Block hi Haulawng a tanga Lunglei khawpui chhung, sawtah Thingfal, Lawngtlai dai thleng a ni a. Municipal kan nih takah chuan, “Tawipui tlangdung hian RD Block kan mamawh awm mang e, kan duh hle mai” tih kha min lo hriatsak ula, Mamit-in an ngah viau a, 4 an nei a, keini hi kan intawm thui lutuk a, Tawipui tlangdung RD Block kha min chhinchhiah sak ula kan duh viau mai tih kha.

Demand No. 46 hi ka han sawizawm leh ang a. *Housing for All* hi kan han study a, kan han hmuhchhuah dan chuan sorkar hmasain a lo select ho kha 1st Installment te an pe a, a thenin hma an la a, a thenin an la tha lova, chuvangin, central-ah 2nd Installment report duh ang a luh loh a vangin kan hmu lova. tin, a next phase pawh a tibuai a. A thenin hma an la a, a thenin hma an la tha lova. Chuvang chuan, central duh ang kan hmu lo tih report a awmlo niin kan hria a. Hei hi tun sorkar tan pawh a harsa a, a buaithlak hle niin kan hria a. Lunglei bikah pawh a *data* tak chu ka sawithei lo nain kan mu tana chu, lo select tawh, lo dawng tawhte an hmalakna duhthusam ni lo, central-in a a demand ang ni lo te a nih a vangin 2nd installment-ah kan buai niin kan hria a. A *data* dik tak chu ka hrechiang lova, ka sawi lo mai ang e.

Demand No. 38, No. 26 leh No. 6-ah hian, Revenue hi kan hriat angin a pawimawh khawp a, Revenue Department leh a changtu minister buai dan tur chu ka hrethiam ang reng khawp a. Ramri-ah pawh kan intibuai nasa em em a, u leh naute, a Kohhran Upa thlengin ramri buaiin kan buai a, a ninawm hi ka ring a. Chutihlai chuan thil pakhat min han react se ka duha, chu *Village Land Committee* kan nei a, Inhmun pek theihna an nei nge nei lo tih lai tak hi, thingtlang zawng zawngah, Mizoram pumah hei hi kan problem niin ka hria a.

Tin, District Council hunlai khan kan ram hruaitu hmasate’n ram an lo ngaihven a, kawngpui dung, chhak leh thlang Forest Reserve an lo siam a. Mahse vawiin niah chuan reserve chu sawiloh, a kawng hi kan nek ral zo ti tih a, a pawl em em mai a ni tih hi.

Tin, Demand No. 26, I & PR-ah khan, I & PR kan sawi chuan Publicity leh kan nihna diktak ziaktu MJA-te Mizoramhmunthinah an awm a, an performance pawh a tha a, tin, an quality pawh a rawn tha zel a. Chanchinbu hi a neutral tur a ni a, a neitu chu eng party pawh kan ni mai thei a, Chanchinbu-hi chu a neutral-in a dik tur a ni. Chu taka chu a *value* a ni tih hi ka sawi tel hrim hrim duh a. Tunlaih hian mobile phone leh Information Technology avang hian ‘half-truth’ kan tih, thudik chanve, *broken information* hi kan uar ta hle mai a. Vawiin niah pawh kan House-a kan thusawi eng emaw lai te an la a, an thehdarh a, a complete-in an ti duh si lova, mipui kan ti chi-ai a, Mizo rilru kan ti hrisel lova, vuivaina leh rilru natnate kan siam nasa em em a. Chuvangin, hei hi mitinin sim a thain ka hria. Thudik chu ‘dik’ ni mai sela, a diklo pawh ‘diklo’ angin sawi ila, *thudik chanve* kan thehdarh nasa lutuk a, kan mipuite kan ti khawngaihthlak a ni. Hei hi a tha lo takzetin ka hria a, ka sawi duh bawk a ni.

Tin, RD chungchangah NREGS kan hria a, a changtu minister a che tha hlein ka hria a. *Ni 100 Inhlawhna* hi thingtlangah chuan kan tangkaipui takzet a, a hlu a, tin, ni 100 kan thawk thin pawhin ka hria a. Sorkar hmasate khan kan thawk thalo em em a, vawiin niah chuan ni 100 te kan thawk complete a, fakawm ka ti a, mipuiin kan hlut takzet a ni tih te kha ka sawi duh a.

Tin, material component leh thildangah te pawh tu tuten emaw politics inbeihnaah te, sawisel leh inhek te pawh a awmthei a. Ka bial bikah chuan Gram Sabha leh BDO-te nen work proposal pangngaiin a guidelines ang leh dik takin kan thawk a, Party in kan chang lem lo a ni. Minister bulah pawh ka vui thin a, “hengte chu kan sorkar ve a, min tihsak ve rawh” kan tih pawhin,” VC, VEC leh DC-te nen dik takin kan kal a ni” tih kha he House-ah hian kan sawi ve duh hrim hrim a.

Pu Deputy Speaker, kan Demand No. 6, No. 26, No. 38-te leh No. 13, No. 25 leh No. 46-te hi, “kan ram leh hnam tan hmasawna ropuitak a thlen theih nan i pawm ngei ang u” tiin ka han support a ni. Ka lawm e.

DEPUTY SPEAKER : A lawmawm e. Tunah chuan Member zahawm tak Pu VL Zaithanzama i lo sawm ang u.

PU VL. ZAITHANZAMA: Pu Deputy Speaker, ka lawm e. Vawiinah kan Minister zahawm tak takte pahnih Demand kan sawiho dawn a, department a tam deuh a, a vaiin kan sawihman lo turah ngai ila. A hmasaberin Demand No. 46, UD & PA ah hian ka han lut ang a.

He department changtu kan Deputy Chief Minister hnenah lawmthu ka sawi hmasa duh a. Ka bial chhungah hna pawimawh tak tak... (**Dy. Speaker:** Ngawi lawk

rawh aw. Hun hi kan tihdan pangngaiiah chuan dar 4 thleng khi a ni a, engnge House ngaihdan lak a ngai a, kan zo law law mai dawn nge? A nih leh a chawlh hun kha nimin kan thutlukna ang kha kan pawm leh mai dawn em ni ang, dar 5 kha? A lawmawm e. Han sawi zawm leh la, dar 5-ah kan chawl dawn a nih chu.) Awle, hei UD & PA hi department pawimawh tak, department naupang te mah ni se thangduang tak a ni a, kumin pheih chu an budget hi a pung nasa hle mai a, 65.31%, cheng nuai 27,839 zetin a pung a ni. Keini bial pawhin kan chhawr ve dawn hlein ka hria.

Ka bial chhungah kan mamawh tak tak pathum hna min rawn thawhsak mek a. Chuvangin, kan Dy. Chief Minister hnenah hian thinlung takin lawmthu ka sawi a. A pakhatna chu - Community Centre-cum-Car Parking at Maubawk a ni. Maubawk-ah Community Centre kan mamawh em em a, Maubawk hi veng upa zet mai a ni a, wawiin ni thlengin Community Centre or Community Hall an la nei lova. Mizoram-a VC nei hmasa ber veng a ni a, veng upa leh hlun tak a ni. Chutichung chuan, an mamawh ngawih ngawih tunah hian bul tan mek a ni a, amaherawhchu 1st installment hman zawh tawh niin February Ni 25, 2022 khan *site-inspection* an rawn nei a, tun thal chhung hian chhonzawm leh thei turah kan inngai a, kan Minister zahawm tak hnenah hian tun fur hma ngeia min chhonzawm sak leh turin ka han ngen nghal a ni.

Chutiang tho chuan Bungkaw Community Hall sak mek a ni a. Kan Dy. Chief Minister hian a lungphum a rawn phum a, kei pawh min sawm ve a, hlim takin chawhlui te kan kil a. Saw an sak mek pawh saw tha taka min zawhpui kan beisei a, kan lo thlirin kan lawm hle a ni.

A pathumnaah chuan Khatla YMA Hall sak mek a ni bawka. Hall awm sa thiatin a bul kan tan a. Bus stand saw kawng a chep deuh avangin fit 6 laia kawngpui zauh a ni a. Chutiang chuan, tunah sawn hma lak mek a ni a. Amaherawhchu 1st installment hman zawh a ni tawh a, chumi kawngah chuan, hei kan budget te hi a pung tha bawka, heng kan mamawh tak tak pathum hma min lak sak mekte hi min zawhpui ngei kan beiseiin kan dil a. Tin, ka bial mipuite aiawh pawhin lawmthu ka sawi nghal bawka a ni.

UD & PA-ah hian kan budget kha ka han en a, *Salary head*-ah hian zawhna pakhat han zawh ka duh a. Nikum ai khan cheng nuai 4,900 bawr vel daih maiin a tlem a, hei hi engnge a chhan, hetiang hian hlawh kan inpe thei dawn em ni tih kha kan zawt tel nghal ni se la. Tin, ka bial chhungah BSUP a awm a, mi chi hrang hrang awmkhawm anni a, a buaithlak ang reng viau mai a. Thil pakhat kan department hotute leh kan Dy. Chief Minister hnenah ngen kan duh chu, block tinah khuan room ruak pahnih tal min dah sak se ka duh a. Khat vek lo se, chhiat ni that niah kan buai thei em em mai a. A in a te si a, ruah sur fur lai pheih chuan chhiat ni that ni-ah harsatna kan tawka thin a.

Chuvangin block khatah khuan room hnih khat tal min tihruah sak theih chuan kan lawm ngawt ang tiin ka han ngen zui a ni.

Demand No. 25, PHE hi department pawimawh zet mai a ni a, Aizawl chawmtu pipeline hian ka bial chhung hi a paltlang ruih mai a, hnathawkte nen pawh kan in belchiang ang reng viau thin a. Ka bial chhung Lawipu thlangah khuan PHE hnathawkte nitin an kalna, Pump House No. 2 bulah khuan km 2 vel kawng chhe zet mai hi a awm a. Kan Dy. Chief Minister zahawm tak hian PHE a enkawl hmasak lai khan kawng chhuat chhe zual lai khu boulder lungin a phah vek tawh a, mahse hmalak zui a ni ta lova. Amah bawkin he department a lak leh takah chuan km 2 lek a ni bawk a, min chhunzawm sak leh ngei turin ka ngen nghal a ni, ama hmalakna tho kha.

Tin, Aizawl khawpui chawmtu tur phase 1 leh 2 hi kan khawp kham lo tan a, tunah pawh Dihmunzawl bulah khawl pakhat a chhia a, tui kan hmu tha lo hle tlang mai a. Tunah hian phase 3 Laipuitlang-a SIPMIU-in Setlak, Tlawng atanga a pipe chhoh tur hi zawh tep niin ka lo hria a. Hmanah khan ka zawt tawh a, September, 2020-a zawh hman tura beisei kha a ni a, mahse an peih hman ta lova. Nikuma ka zawh leh khan, September-a zawh hman tak loh kha ‘March, 2022 hian zawh hman beisei a ni’ tih kha chhanna ka dawn a ni a. Kha kha an zo hman dawn em tih kan zawt tel a. Tuna khawl te a chhiat tak avang leh thal a lo nih tak avangin Aizawl tui mamawhna a sang hle si a, hei hi kan zawh hman chuan min chhawk nasa dawn em a ka han sawi tel a ni e.

Tin, tui pump man kan budget-a a lan dan chuan 2020-210-ah cheng nuai 3,000 a ni a, 2021-2022-ah cheng nuai 5,488. Tin, tun kum kal mekah hian cheng nuai 2,550 kan dah a, a tlem thla ta riau mai a, a chhan ka hriathiam chiah loha vangin ka han zawt tel nghal ni se la. Hei, thal laiin tuiah kan buai ta hle mai a, Aizawl khawpui hi harsatna kan tawk ta fo mai a, tuihna a lo tlem telh telh a. Tuna kan mamawh mai ni lovin, ka rilruah chuan Tlawng hnar lam hi uluk zawka kan enkawl a ngai a ni. Tlawng chawmtu kan hmuh phak Serlui leh Vailui te pawh a kang chat ti ti a ni mai a. a hnar lam atanga theih tawpa hma kan lakloh chuan nakinah harsatna lianpui kan tawk ang tih a hlauhawm a, chu te chu ka han sawi tel a ni.

Land Revenue & Settlement-ah hian ka han lut ang a, Demand No. 6 hi. Kan sawi zung zung ang a, Pu Dy. Speaker. *Digitalization of Land Record*-ah hmarchhak bialah a ti tha ber pawlah kan tel niin ka lo hria a, lawmthu kan sawi a ni. He department hi nidanga ka sawi tawh thin ang khan department sum lalut hnem ber zinga mi ni si, office building leh quarter tih changtlunna budget-ah dah a ni ngai lo hi nakumah chuan dah sak ve tawh a tha lo em ni tih kan ngensak a ni. Kumin mai ni lovin kum dangah pawh hian kan hmu ngai lova. Tin, ram zau pui pui (Pu Dy. Speaker, hun tlem min pek belh la, ka han sawi zung zung ang a, a rei tawh lovang) mimalin an neih enkawl siloh

control tur hian land reform committee te kha chhunzawm a la ni zel em tih ka han zawt duh bawk a.

Tin, Revenue cess 15% thuam thatna atanga vaibelchhe tam tak kan lak kha Mizoram Land Revenue Rules hmangin lak niin ka hria a, hei hi a neitute hnena pek let leh tura court a kalpui mek a ni a, hei hi sorkar hian engtin nge a kalpui dawn? Tin, thawktu indaihlohna kha an rawn sawi a, Pu Deputy Speaker, ka han sawi ve leh hram ang a. Surveyor mai nilo Revenue Inspector te pawh khu an indaih lo a, a post ruakte hnawh khah nise chu chhiah pawh tam zawk a lo lut ngei ang tih ka ring a ni.

Tin, I & PR chungchang Demand No. 26 hi ka sawi loh chuan a fel awm lo e. Press enclave neih thuai an mamawh a, an neih thuai theihna turin I & PR Minister hian tan la teh se. Tin, advertisement bill hi rang zawkin department mite hian kan chanchinbu mite hi pe thei se tiin ka rawn ngen sak a, pawisa awm sa vek a ni tlangpui thin a, bill pawh a tam ngai lova. Tin, I & PR Department hian english press release a tam thei angin siamin website-ah dah bawk thin sela. Tin, advertisement-a color printing rate hi siam ve ni theih se tih leh journalist pension hi peih thuai ni thei se tih te kha hmanhmawh deuhin ka rawn ti ri ve leh hrim hrim a ni. Pu Deputy Speaker, ka lawm e.

DEPUTY SPEAKER : Tunah chuan Member zahawm tak Dr. Vanlaltanpuia ka sawm e.

DR. VANLALTANPUIA : Pu Deputy Speaker, ka lawm e. Minister zahawm tak pahnih, Deputy Chief Minister leh Pu Lalruatkima te Demand ka han sawi ve leh ang a, Demand No. 25 hian bul kan tan ang a.

Ram changkang kan tehna hi thil enge maw zat a awm a, tui thianghlim in tur tha a awm em, education a tha em, inkalpawhna kawngpui a tha em, health lam a tha em tih te a tehna lar a ni a. Mizoram kan hnufualna em em pakhat chu tui thianghlim duh tawka herh haw tur kan neilo hi a ni a, chumi kawng atan chuan PHE Department-in nasa takin hma a la a, kan bial Lunglei North te pawh hian hma kan sawnpui tak zet zet a, kan Deputy Chief Minister zahawmtak hnenah hian lawmthu ka sawi duh a. Kan bialah hian khaw 21 a awm a, Lunglei khawpui chhunga veng pali vel tih loh chu tui herh haw tur nei bar hi kan awm lova. Tun kan ministry chhung hian tui herh haw tur enge maw zat kan nei chho ta a, Mualthuam North leh Chhipphir-ah te tui min pump sak tawh a, tunah hian tender min chhuahsak leh nual a, chung zingah chuan lian pui pui Pangzawl leh a chhehvel khuate'n an hman tur composite scheme cheng vaibelchhe 17 man lai mai tunah hian min tender sak a, ka lawm em em a, ka bial mipuite aiawh pawhin lawm thu ka sawi duh a ni. Hetiang khaw lian pui pui in 500, in 600 chuang

tawh te pawhin tui herh haw tur nei lovin an la awm a, chungte chuan reilo teah hian *tap-water* an hmang ve tawh dawn a ni tih te kan han hria hi a lawmawm kan ti a.

Tin, tunah hian Haulawng leh Hmuntlang atan te tender min chhuah sak a, tin, Zote South, Kanghmun South, Lungmawi, Phaileng South, Ramlaitui leh Bualpui ‘V’ tan te hian reilo teah tender min chhuahsak dawn niin kan hria a, kan Minister hnenah hian kan lawm em em a ni tih ka sawi duh a ni. Tin, tun hnaiah hian retro fitting atangin Sekhum leh Zotuitlang-te pawh min tih sak tawh a, reservoir lian pui puite min siam sak a, kan lawm em em a ni tih hi ka han sawi duh a ni.

Tin, a dawt lehah chuanin Deputy Chief Minister-in a chan tho, Personal & Administrative Reforms hi kan sawi vak lova, hei hi han sawi lawk ka duh a, kan Chief Minister te duhsaknain Mizoram Youth Commission-ah hian Chairman nihna te kan chang ve a, hetah hian thil pawimawh deuh mai he House-ah hian sawi ka duh a. 2008-ah khan kan Chief Minister zahawm tak hian Youth Commission te min lo din sak a, amaherawhchu sanction post eng emaw zat pek ve kan ni chungin staff thenkhat te hi a ngai reng hian an la awm a, Secretary te, Under Secretary te leh officer post hi pali panga vel kan nei a, hengte hi chu deputation-a kal tur an ni a, kan House Leader zahawm tak Finance changtu pawh a awm bawk a, an pahnihin an awm lai a ni a, khawngaih takin kan staff-te hi inhlawh dan mumal pangai sorkar-in a pek dan thin mumal chiah lova an awmna hi a rei tawh a, khawngaihtakin hei hi DP & AR lam te pawh hian post te hi min peka min regularize theih chuan tiin a thawktute hi ka han ngen sak a. Rei tak, hei kum 10 chuang fe lo thawk tawhte an ni a, chuvangchuan an khawngaihtlak hlein ka hria a. Hei hi min ngaihtuhsak theih chuan ka lawm hle ang tiin wawinah hian kan sawi duh a ni.

Tin, UD & PA, Demand No. 46 hi kan sawi ve duh a. Kan bial chauh ni lovin Mizoram khawpuite hian hma kan sawnpui em em a. Kan bialah chuan Serkawn Indoor Stadium-ah carpet tha tak tak te min phah sak a, tin Ramzotlang-ah Hall lian tak min sak sak a, retaining wall mawi tak tak khawpui cheina min pe bawk a kan lawm em em a, kan bial te pawh a thang sawt sawt mai a, he department kaltlang hian tih te ka han sawi duh a.

Chutih lai chuan ka ngen duh pakhat chu, kan bial aiawhin, Lunglei khawpui daifem deuha awm kan ni a, Lunglei khawpui atan hian hei motor te alo pung ve zel a, truck terminal hi kan la nei lova, kan awmna veng hi hmun remchang lai tak tur niin ka hria a, khawngaih takin truck terminal te, solid waste management tihna tur hmun te hi min pek theih chuan khawpui tan thil tangkai tak a ni dawnin ka hria a ni tih kha ka sawi duh a ni.

A dawl lehah chuan Demand No. 38, Rural Development Department hi ka han sawi ve ang a. Hei hi ka hmaa mite sawi tawh ang khan department tangkai tak a ni a, thingtlang lam eizawngtute tan chuan kan ei bar tapna tak tak te an ni a. Kan Minister hi a fel em em a, silpaulin te, tarpaulin te min pe thin a, kan lawm em em a. Heng hi mi harsa zawk te a thleng ve zel a ni tih kha ka sawi duh a. Material component min pek te hian khawtlang tan thil hlu tam tak kan siam ve tawh a ni tih kha ka sawi duh a.

Tin, *Ni 100 Inhlawhna* thingtlang lam ten an hmu tha em em mai a, Ni za-ah ni za an inhlawh thei hi a lawmawm ka ti a, kan Minister chak tak hmalakna niin ka hria a. Tin, han biak hrim hrim te hian a fel em em mai a, min ngaihtuah em em mai a, kan lawm a ni tih ka sawi duh a.

Chutih lai chuan PMAY, mi harsa zawkte chenna, in sakna turte hi kan Ministry hian thlan mumal kha kan la nei lova. Ministry liam ta a hmalakna kan la buaipui deuh te a awm a, Geo-tagging te leh eng eng emaw tih te a lo ngai nen. Khawngaihtakin hei hi min um chhuah sak theih chuan kan lawm ngawt ang. “Thingtlang mi ten kan nghak thap a ni” tih ka sawi duh a.

Tin, RD Block hi ka phak tawkin ka han zir ve a. Northeast hrang hrang-ah hian RD block nei tlem ber kan niin ka hria a Mizoram hi, 26 emaw chauh kan neiin ka hria a. Chuvang chuan kan bialah hian RD block hi kan mamawh khawp mai a Pangzawl leh Chhipphir tlangdunga tan te a tan kan dil ve a ni tih kha ka sawi duh a. RD Block hi min pek theih chuan kan lawm hle ang tih kha.

Tin, kan Minister hian min chhinchhiah sak se ka duh a awm a. Pangzawl-ah sawn Tourist Lodge Tourism Department hian a nei thin a, mahse tuna NHIDCL ten road widening project lian tak an kalpuiah hian Tourist Lodge kha min tihchhiat sak vek mai a, a awm tawh dawn lova. Sawlai tlangdungah sawn MLA-te tan pawh bial han fana han riahna tur hmun kan nei ta miah lo mai a. Engpawhnise RD Resthouse min sak sak theih chuan kan lawm hle ang tih kha ka sawi duh a. Kan Minister te leh Chief Minister te hial pawh pawimawhah han zin ta pawh ni ula thlenna tur hmun hi kan nei miah lo a ni helai tlangdung ah hian tih ka sawi duh a. Khawngaih takin hei hi min ngaihtuah sak thei se, kan official-te pawhin min chhinchhiah sak thei se tiin ka ngen duh a he House-ah hian.

Tin, a dawl lehah chuan Land Revenue & Settlement, Demand No. 6-ah hian thil serious tak tak he House-ah hian sawi ka duh a. Ka sawi chhuak tawh thin a, *Zawhna leh Chhanna* hunah te, mahse vawiinah hian sawi leh ka duh a. He Department hi thil tha tam tak titu, chhungtin ten kan in leh lo kan registerna hmun a ni a. Tha takin

kalpuiin digitalization te pawh tha takin an kalpui a, an ti tha hle a ni tih kan hria a, a lawmawm hle a ni.

Ka bial Pukpui leh a chheh velah hian issue lian tak mai kan nei a, Chu chu min lo ngaihthlak sak sela uluk takin tih kha ka sawi duh a.

Peace Accord sign a nih atangin 1986-ah sipaiin ram an luah te hi an chhuahsan a, amaherawh chu, a rent an pe tha lo em em a, 2007 thleng chauh khan rent hi pek niin ka hria a. Chu chu a list khatna assessment milin Ministry of Home Affairs atanga pek a ni a. Amaherawh chu thankhat te Court-ah kalin an va hneh a, list vawi hnihna siam a lo ni leh ta a. A hnu ah ministry te thlak a lo ni a, Defence lamah he dilna te hi a in *switched-over* a. Amaherawhchu Ministry inthlak atang hian rent hi kan hmu ta reng reng lo mai a. Chuvang chuan *overdues* tam tak a awm ta a. Hei hi min ngaihtuah sak theih chuan kan lawm hle ang tih kha ka sawi duh a ni.

Tin, Kawmzawl-ah hian sipaiin hmun thenkhat an nei a, chu chu *protected area*-ah puan a ni a. 1992-ah khan protected area-in a awm a, chumi area-a in hmun neite hian an ram angin tumahin an claim thei lova, tunah hian buaina namen lo an tawk a ni.

Sawlaiah sawn thil buaithlak deuh deuh hi a awm a, he House-ah pawh hian ka sawi chhuak tawh a. Air Force-in ram an acquire tum leh mek te pawh a awm a, tin, tlang bawh thenkhat Assam Rifles ten an la luah chhunzawm te a awm bawh a. Chuta buaithlak deuh mai chu, Cadastral Survey te pawh kha ka dil thin a, khawngaih takin kan Minister zahawm tak hi a hmun ngeiah he kan harsatna te hi min ensak turin ka sawm duh a ni. Khawngaih takin nakin a windup hunah pawh “ka lo zin dawn, chu mi ni ah chuan” tih te in emaw a rawn sawi theih chuan ka lawm khawp ang. Hei hi min ensak turin ka sawm a ni. Sawlai hmunah sawn buaina tam tak a awm avangin ram neitute an mangang a ni. An rent chungchangah te, an ram neih tur chungchangah te, sipai thenkhatin an la acquire tum leh mekte pawh a awm a ni tih kha ka sawi duh a. Heng zawng zawngah hian kan Minister hian min lo hriatpui se tiin ka sawi duh a ni.

Tin, Mizoram University South Campus hmun te pawh hi ngaihtuah fel a la ngaiin ka hria a. A chhan chu Forest lam atangin ‘riverine area’ tih thawm te pawh a lo ri leh a. NIT hmuna kan harsatna ang pawh hi kan tawk ang tih a hlauhawm em em a. Chungte pawh chu min hriatsak se ka duh a ni tih ka han sawi duh a.

Pu Dy. Speaker, vawiin a kan demand rawn pharh tak te hi he “House zahawm tak hian I pass pui ang u” tiin ka rawn thlawp a, kan bial harsatna thenkhatte pawh he House zahawm takah hian ka rawn thlen a ni e. Ka lawm e.

DUPUTY SPEAKER : Awle, a lawmawm e. Tunah chuan Member zahawm tak Dr. F. Lalnunmawia i lo sawm ang u.

DR. F. LALNUNMAWIA: Pu Dy. Speaker ka lawm e. Awle, tihian hun a chep avangin ka han tan nghal mai ang a. Dy. Chief Minister zahawm tak Pu Tawnluia department chan Demand No. 46, UD & PA-ah hian ka han tan ang a.

A hmasain Pu Dy. Speaker, thil lawmawm tak mai kan hmuh chu, Aizawl khawpuia chengte leh kan thalaite rualawhna puhru turin *Aizawl Sustainable Urban Project* kalpui anih tur thu te kan lo hria a, a lawmawm hlein ka hria a, hetiang anga hmasawna thil ropui min siamsak tura kan CM zahawm tak leh kan Dy. CM zahawm tak ten hma an la hi lawmthu ka sawi a ni.

Ka bialah hian UD & PA chhawr thei veng 3 an awm a, Hlimen, Saikhamakawn leh Melthum te an ni a. Heng veng 3-ah hian kuthnathawka ei zawng antam ve khawp mai a, LAD leh RD te an chhawr thei ve lova, UD & PA-ah hian tam tak an innghat a. Chuvang chuan kan Dy. CM zahawm tak hianin chu chu min hriatpui a, min duhsak tawh thin a, kum kal leh turah pawh hian min duhsak leh ang tih beisei chungin, pangchang takin ka han ngen ngawl a ni.

Tin, Pu Dy. Speaker, Smart City Mission hnuai hnathawhah hianin playground leh hmasawna project eng emaw zah thawh a ni a, a dik takin ka bial Hlimen-ah Football Ground siam tum mek a ni a. Smart City Projecta kan sharing pattern hi kan hmuh angin 50:50 anih laiin a guideline-in a phal angin hmunhma leh infrastructure kan neihsa te hi State matching share-ah pawm theih dan hi kan hotu ten an hre fuh hi tha ka ti a. Hei hi Pu Dy. Speaker, sorkar hmasaah khan an hre fuhlo nge, hetiang taka hma an lo lak loh le ka ti a. Chuvang chuan, state sorkar tan phurrit vak ni si lovin project hei zat kan hailut thei hi lawmawm ka ti a, kan CM zahawm tak leh kan Dy. CM zahawm takte remhriatna hi ropui ka ti a. Hetianga thalaite rualawhna playground leh hmunhma tha tak mai kan han nei thei hi ka lawm a, a bik takin ADFA President ka nih angin leh football lama tui mite aiawh pawhin lawmthu ka han sawi a ni.

Tin, Pu Dy. Speaker, ka bialah hian hei kan AMC Mayor leh ka thawhpuite hmalaknain hmasawna hna eng emaw zah min han thawh sak hi a lawmawmin ka hria a. Tin, Trinity Damdawi-In thlen hma quarry chhak lawkah sawn AMC term hmasaah khan multi-purpose project siam tura proposal kal kha a ni a, mahse tih hlawhtlin a ni ta lova, hei hi min tuaithar sak leh se ka han duh khawp mai tih kha ka sawi duh a ni.

Demand No. 25, PHE hi ka han sawi leh ang a. Hei, mipui pung zel mamawhna puhru turin PHE-in hma a la a, JJM hnuai-ah thingtlang mite tui connection pek mek

a ni a, ka bial khaw eng emaw zatin kan chhawr mek a ni. kan lawm em em a, heng a la tel rih lote pawh hi min telh sak zel ang tih ka beisei a. A bik takin Pu Dy. Speaker, ka biala tui harsat zualna bik Saikhamakawn leh Hlimen Vengthar te harsatna hi ka han tarlang duh a, a then chuan tuikhur tui chawi ngai tein an la awm a ni. Hengah hian tanky an mamawh khawp mai a, hei hi kan Dy. CM zahawm tak hian min lo chhinchhiah sak se ka duh khawp mai a, a theih ve leh heng vengte tan hian tanky min siamsak thei em tih kha kan zawt pah bawk a ni. Tin ka bial Chamring leh Sailam-ah te solar water pump hmanga tui lakna siam a ni a, nasa takin mipui ten an chhawr a, kan lawm em em a ni tih kha kan sawi duh bawk a ni. PHE demand ah chuan khati zawng kha ni sela, Pu Dy. Speaker.

Kan hon. Minister Pu Lalruatkima chan Demand No. 6, Land Revenue & Settlement-ah hian ka han kai leh ang a. Nasa takin hei a department minister kaihhruaina hnuaiah hna an thawk a, land record siamthat te, computerization leh *Digitization of Land Record* tih ang chi te, nasa takin hna an thawk a ni. Tin, land survey leh house-site planning-te pawh an buatsaih a, hemi hnuaiah hianin thingtlang khuaa inhmun LSC a siam turin project an kalpui a a lawmawm hlein ka hria. Hei Aibaw Block hian khaw 10 a cover mek a, heng khua te hianin LSC te an la nei ve thei ang a, nakinah loan lak te pawh an tan a la awlsam ve dawn a ni. Chutiang chuan Mizoram pumah hmalak tum ni te pawhin kan hria a. Kan Minister zahawm tak kaihhruihna hnuaiah he department hian mumal zawkin hma a han la chho a, LSC chungchanga harsatna awmte pawh a ziaawm chho viau pawhin ka hria a, lawmthu ka sawi duh a ni.

Pu Deputy Speaker, Demand No. 38, RD hi ka sawi leh ang a. Thingtlang mipuite inngahna a ni a, *Ni 100 Inhlawhna* hi kan chhawr tangkai hlawm hle mai a, ni 100 inhlawh hi kan lawm em em a ni. Tin, MC hmangin khawtlang hmasawna tam tak thawh a ni a, a bik takin SPMRM, Urban Mission hmangin ka bial Aibaw ah hna hrang hrang thawh a ni a, Futsal Ground te, pa khawina te leh khawtlang hmasawna hrang hrang hna thawh a ni. Tin, Maubuang-ah Mizoram-a hmasa ber atan 'Mizoram Orchids Centre' hawn a ni a, kan lawm em em a. Tin, Model Village atana kan hman Phulpui-a *Zawlpala Thlan* panna kawng leh waiting shed te min siam sak a, kan lawm em em bawk a ni. Tin, MZSLRM-a tarlan ka duh a, hemi hnuaiah hian, ar vulhtute tanpuiin department-in nasa takin hma min lak sak a ni. Pu Deputy Speaker, helaia rawtna ka neih chu, VLA kum tam tak lo thawk tawhte hi a tahtawla dah theih dan a awm em tih kha ka zawt duh a ni. Aibaw Block-ah sawn mi 10 an awm a, Mizoram hmun hrang hrangah thahnem tak an awmin ka ring a.

Tin, PMAY (in sak tanpuina) hi 'kan beisei hnai tawh em' tih kha ka zawt duh bawk a ni. Kawng hrang hrangah RD Department-in nasa takin min tanpui a. Urban hian RD Block hmarlam zawng, Maubuang thleng a cover a, Thiak atanga chhim lam

zawng saw kan tel ve lova, remchangah min telh ve theih ang em tih kha ka zawt duh bawk a ni.

A tawp ber nan, Demand No. 26, I & PR chungchang hi ka sawi ve ang a. Mipuite hnena sorkar thu leh hla puangchhuaktu department pawimawh tak a ni a. Hemi kawngah hian a changtu minister zahawm tak te, department official te leh journalist te thawhhona a tha hle a. Kan hriat angin Covid pandemic kum hnih chhungin kan ram dinhmun te, mipui tana hriat tur tul te min chhawpchhuah sak thin a, a bik takin kan minister-in zing tin leh tlai tinin a hunah tak min chhawpchhuah sak thin a, a ropui ka ti a. Covid positive a nih ve tuma *Home Isolation*-a a inenkawl chung pawh khan a thulh chuang lo a ni. Hetianga hna inpe kan neih hi a lawmawm hlein ka hria a ni.

Tin, Pu Deputy Speaker, kan ramah Covid pandemic chhung tein kan tawmim a, social media te kan hman nasa a. Hengahte hian mahni ngaihdan thu leh hla hrang hrang kan siam a, sorkar demna ang zawng leh ziaktu hming pawh tarlang ngamlo, mahni ngaihdan tih ve tawp tawp te an tam em em a ni. Chung karah chuan I&PR logo hmanga thu rintlak tak mai mipuite'n an rin theih tur min han tihrik sak reng theih mai hi a ropui a, an chungah lawmthu ka sawi a ni. He Department hi hmalam hunah pawh a thang zel ang tih ka beisei a, Journalist-te hamthatna, a bik takin kei pawh Minister duhsaknain Journalist Welfare ngaihtuatu Board member ka ni ve a, chungah chuan an Healthcare chungchangte kan ngaihtuah thin a. Mi eng emaw zatin he hamthatna, *free medical treatment* te an ti thei a, pension te pawh hi chenpakawm takin ngaihtuah sak ni se a lawmawm hlein ka ring a ni.

Tichuan, Minister zahawm takte pahnih, Deputy CM Zahawm tak Pu Tawnluia leh kan Minister zahawm tak Pu Lalruatkima te Demand vawiina kan sawiho takte hi han pass pui pawh hi a phurawm hlein ka hria a, “phur takin support ang u” tiin ka han thlawp ve a ni e. Ka lawm e.

DEPUTY SPEAKER : Tunah chuan Member zahawm tak Pu Lalchhuanthanga ilo sawm ang u.

PU LALCHHUANTHANGA: Pu Deputy Speaker, ka lawm e. Demand No. 46 atang hian bul han tan ta ila.

PAHOSS hi 2019-2020 atang khan bul an tan a. Tichuan 2020-2021-ah khan thawh chho a ni a, amaherawhchu nikum leh kuminah hianin chhunzawm loh niin ka lo hria a, engnge chhunzawmloh a nihna chhan hi hriat ka duh a. A chhunzawm tlak vak loh nge ni a, he scheme hian eng chen nge traffic jam a tih ziaawm tih leh a chievement

pawh hriat kan chak khawp mai. Tin, PAHOSS atan hian sum engzat nge pek chhuah a nih tawha, tunah hian sum engzat nge la awm tih kha ka hre chak bawk a ni.

Hei, Smart City te kan sawi a, ka bial kham phei saw PWD-ah pawh report kan thehltut thin a, mahse hmalakna a awm lova. Kan sawi a, tarpouline, silpouline te ka chah sak thin a, tuna kan silpouline zar saw a tet tuar mai a, a smart loh em em mai a. Sawlai hmun saw min siam sak theih dawn lo anih chuan kan thil zar saw chu min thlak sak theih ula kan duh khawp mai, a smart loh em mai.

Ka Bial hi veng 11 kan awm a, veng hrang hrangte hi an inanglo khawp mai a. Veng upa tak tak leh changlung tak takte an awm lain, veng thenkhat chu hmasawn ngai, chhawmdawl ngai tak takte an ni a. Aizawl South-II hianin State kan nih atang khan minister hi kan la nei ve miah lo mai a, chuvang chu a ni ang, veng chhung development khawih tur a tam khawp mai a. Salem Veng leh Mualpui te pawh khu an thang khawp mai a, Local Council neih ve te pawh an sawi ut ut tawh a, veng chhungah develop tur tam tak a awm a ni.

Hmanniah ITI Veng atangin NGO hruaitute an lo leng a, an rualawh thu an rawn sawi a. ITI veng chu veng lian ber leh population pawh tamna ber a ni a. “Kan veng development hian min ngaihtuahpui teh; kan vengah hian step (tile chequered) pawh pakhat mah hmuh tur a awm lo” an ti a, an khawngaihthlak khawp mai a. Chutiang chuan veng lian leh mipui tamna hmunah pawh hian floor tile phah pawh a la ni lova. Theih ang tawkin kan fund hmangtein hma kan la thin a, mahse kan indaih lo em em mai a. Chuvangin, UD & PA Minister zahawm tak, Dy. Chief Minister hian ngaihtuah thei sela kan duh khawp mai a. Tunah khuan NGO-te intel khawmin Project Committee-te an indin a, kan Dy. Chief Minister pawh hi hmuh tumin kan inkau mek a ni. Tin, hmanni lawkah khan T. Romana College kha Republic Vengah an hawng a. Khulaiah khuan ITI atanaga Republic Veng han kal pawhna mai tur hian balcony meter 150 emaw vel lek han siama awlsam tea kha college kalpawh theihna kha a awm a, chung te pawh chu min lo hriatpui se; college student-te tana remchang tak tur a ni.

Demand No. 6, Land Revenue & Settlement hi sawi leh ila. Ka hmaa mite khan an han sawi an han sawi a, Revenue Department surveyor indaihlohna an sawi te kha a dik a. Mipuite’n Land Revenue hi kan dawr nasa em em a, amaherawchu surveyor-te hi an indaih lo em em a. Chuvangin, “Surveyor sanctioned post hi engzat nge awm, engzat nge post hi hnawhkhah a nih” tih te pawh kan Revenue minister khan min rawn hrilh thei se a lawmawm khawp ang.

Tin, Chekbawk Farming Society chungchang thil sawi tur a awm a. Chekbawk Farming Society hi kan hriat theih dan tur chuan Kulikawn local council area chhunga

mi a ni a, World Bank Road thlang, Saikhamakawn zawn thla saw a ni. Sawlaih sawn nikum December thla atang khan Revenue Department hian kawng an rawn lai vak mai a, sawlai hmunah sawn mi 40 velin huan nghet an nei a ni. An kawng lai hian thlai a tichhe teuh mai a, hetah hian a bu an rawn siam a, thlai a tichhiat hrang hrang chi 24 an rawn ziaik a. Helai huan neitute hi mi 40 an ni a, a thente hi chu kum 10 nei tawh te, kum 15 nei tawh te, kum 20 nei tawh te an ni a, an huante pawh a puitling tawh viau a, mi tam tak hian eizawn nan tak tak an hmang a ni.

Tichuan inhrilhlawk pawh awm mumal lovin an rawn lai vak mai ni awm tak a ni a, an thlamte a chhia a, ka va kal a a hmunah ka va hmu a. An huanthlaite a chhe nasa em em a, an khawngaihthlak em em a ni. Chu chu ‘min lo sawisak the’ an ti a. Dik tak chuan an rilru a na a, an mittui a tla a ni. Amaherawchu, sorkar hian eng anga hmalak nge a tum, thil tha zawk a rawn siam dawn pawh a ni mai thei a, chung chu an hre lova. Helai huan neitute hian tunhma atang khan pass neih ve duhin Revenue Department-ah te an kal thin a. Revenue Deptt. hotute chuan, “Pass siam a ngai hleinem; in huan thlai kha in pass chu a ni mai a lawm” an ti a. Chutiang chuan pass pawh nei lem lo hi a mi tam zawk an ni. Engpawh chu ni se, hei hi Revenue Minister khan min lo hriatpui se, *Zangna-dawmna* pek te a theih em, eng ang chhawmdawlina nge awm thei tih te min lo enpui se.

Tin, sawlaih sawn kan lo hriat ruk danin inhmun siam tum ni awm tak a ni a, chutiang a nih si chuan anni hi an huan hmunah tal saw chuan house pass ang chi te pawh hi an pek ve theih dawn lo em ni ka tihpui a. An huanthlaite a awm a, chu chu an pass neih chu a ni mai a, tun dinhmunah chuan. Chuvang chuan an huan hmunah sawn a tam zawk saw chuan pass an nei lo kan tih kha, pass neite pawh an awm a, pass la nei lo tan inhmuna an thet anih chuan pass siam sak ve ni se tih ka ngenpui a ni. An rilru a na a, an mangang khawp mai. An chhiat tawh saw a lian a, mahse zaidawh takin, nem takin, te reuh tein an vui thu ka rawn sawi a ni. Ka lawm e.

DEPUTY SPEAKER : Member zahawm tak Dr. Vanlalhlana i lo sawm ang u.

DR. VANLALTHLANA : Pu Dy. Speaker, ka lawm e. Vawiin hi kan nalh hlawm hle mai a, kei chu thawhtanni atang khan ka tial tawh a, tun kar chu *Chapchar Kut* helai hmunah hian ka rawn hmang quit thak a ni.

Dy. CM zahawm tak Pu Tawnluia demand-ah khan han lut tan nghal ila. UD&PA budget kha a pung vak mai a, *Housing for All* khan a rawn nawr chho vak a ni tih te kan hria a, a vaia budget kha nuaih 28,000 dawnin a rawn zuang a ni. Hnathawh tur a tam dawn khawp mai. Aizawl Smart City-ah khan han lut leh nghal ila, a buatsaih dan leh

kalphung kha chu Congress Legislature Party Leader, Pu Zodintluanga, MLA zahawm tak khan a rawn sawi tawh a, ka sawi zui tawh lo ang a. Amaherawhchu khata *core infrastructure element* pawimawh kha han tarlan leh lawk ka duh a. Project siam a nihin “heng lamah hian kal rawh se, heng lam hi ngai pawimawh ang” tih thin a ni. Hetah hian saptawngin a inziak a, ka han chhiar mai ang a -

1. Adequate water supply;
2. Assured electric supply;
3. Sanitation including solid waste management;
4. Efficient urban mobility and public transport;
5. Affordable housing;
6. Robust IT connectivity and digitalization;
7. Good governance esp. e-governance and citizen participation;
8. Sustainable environment;
9. Safety and security of citizens particularly women, children and elderly;
10. Health and Education tihte a ni.

Tin, *Aizawl Smart City* hian action plan a siam a, khulama pawisa lakchhuah nan. Chutah chuan area-based development-ah hian an ngaih pawimawh zual 14 an tarlang a, chungte chu –

1. FASSAT Improvement;
2. Multi-utility Facility Centre;
3. City Cultural Centre;
4. Aizawl Tourism Corridor;
5. Urban Molibilty and Transport;
6. Solid Waste Management;
7. Water Supply;
8. Plan City Components;
9. E-governance;
10. Sanitation System,
11. Power and electric etc.

Kan ngaih pawimawh lamah hian i kal ang u. Heng thil dangah hian kan mamawh a, 50:50-in kan kal a. A hmun hi sorkar-in kan thawh ve tur 50% ah khan a hman theih tih kha chu an rawn sawi tawh a. Sports Deptt. chauh hian ram a nei bik lova, school-te pawhin an nei, hospital-te pawhin an nei a, an hmang ve thei vek a ni. A hmun awmna phe chu a to hlei hleiin ka hria a, ram man te pawh. Chuvang chuan kan mamawhah hian hmasawna hi khairualin kal rawh se. Inkhel mi ka ni, sports thatna lam chu ka duh lutuk, mahse thil tam tak mamawh kan nei a, education-ah te. NABARD loan hi thingtlangah bak a hman theihloh; mahse Aizawl-ah pawh hian kan duh ve a ni. Kan bialah school chhe tak tak a awm a, sak that te pawh kan duh ve. Mahse, tender

chhuak chanve tawp sports-a a kal kha chu a fuh ka ti thei lova. Rem leh rem lova mi project, scheme-a lo inrawlh hi chu, mahniin kan dil chhuak thei a lawm. “1005 kan hmu thei a lawm” tia kan sawi kan sawi chung a hetia kan inrawlh zel hi chu a fuh lovin ka hria.

NULM scheme hi tha ka ti khawp mai a, ‘National Urban Livelihood Mission’ a ni a, Flipkart leh Amazon-te nen an inkungkaih a. Hei hi khawpuia cheng tam takin lei rem an lo rah theiha, an lo intodelh theihna tura tana scheme a ni. Ka bialah sawn theih ang tawkin kan han ti ve a, MoU society pakhat nen kan sign a, nuai 20 dawn a ni ve a. Chutah chuan “Common Facilities Center for Food Packaging” tih a ni a. Delhi-ah ka zuk en vek a, an khawlte pawh. *Common Facilities Center for Home Trade* - electric wiring, plumbing, steel fabrication, aluminium fabrication te an zirna tur a tan sanction te ka han siam a. Kan bial thalai ten helai hmunah hian an zir ang a. Tin, *Common Facilities Center for Bakery & Confectionery* tih te, nak kum lampangah *Common Facilities Center for Food Processing* tih kan tum leh a ni. Atam lo, mahse tum chuan a theih a, engnge kan thlen dawn a hriatloh; kan han pen chawt a ni.

Handloom lamah hian ‘Livelihood Mission’ kan ti ve a, cheng 50,000 in MoU ka sign pui a, kan entrepreneur pakhat, chutah chuan *la* kha a thlawnin kan pe a. MOU ka sign-ah chuan, *la* kha kan pe ang a, an puan tah kha midang hnenah an hralh tur a ni lo. Thenzawl Golf Course-a mizo puantah an hmante pawh kan bial nuho puan tah a ni. Union Textile Minister rawn kal turah pawh khan, ‘kan bial nuhovin rawn tlawh rawh se’ ti khan; mahse a rawn kal ta lova. Hmanni lawka UD&PA hotunu rawn kal khan CS a hmuh zawhah khan kan bialah a rawn kal nal nal a, kan puan tah ho kha a rawn tlawh a, thil pekte kan lo pe nghe nghe a ni. Kan kal pui danah khan, *la* an dawn kha an hralh leh khan pawisa-in an chan tir a, 70% kha pawisa a ni a, a bak chu *la* baw an lo pelet leh a. *La* kha tih tur dang a awm lo an tah leh a ngai a ni. A tira cheng 50,000 ka sen kha tunah sawn a la vir mek a, lockdown lai khan hna an thawk a, a thenin Almirah an lei a, a thenin Fridge an lei a, a thenin sitting room dawhkan tur te an lei baw a. Tunah sawn phase-II kan kalpui mek a ni.

Ka sawi duh chu, Livelihood Mission kan kalpuia market nen kan thlunzawm hian nuhote, pahote leh thalaite hi an taima em em a ni. Kan thlunzawm peih pauh leh an ni ho hian thanna tur hmun an nei dawn a, hetiang scheme tha tak a awm te hi lawmawm ka ti hle a ni.

Solar light chung chang ka han sawi leh lawk ang a. Chhiah a tam a, Local Council Member ten ka hnenah leh ka hnen lemlo-ah te pawh an sawi a. An buai hle a, ‘a siamtu pa hi a induh hle mai’ an ti deuh reng mai a. Hei hi chu kan en a ngaiin ka hria a.

Tin, 2-wheeler taxi permit kan pe teuh mai a, an dinna tur stand te ruahmanna kan lo la siam fel lo nge ni harsatna an tawk nasa hle hi chu kan ngaihtuah sak a ngai khawpin ka hria.

Tin, Ramhlun South Hall sakna turah harsatna kan tawk a, ka zawhna chhannaah chuan ‘contractor damlohna avangin’ tih a ni a. An tihloh chhan chu ka hria a, a lei chhawngtute pawh ka hnenah an rawn kal a ni. Damloh vang chu a ni chiah lovin ka hria. Chuvang chuan sawlai saw en fel a ngai ka ti khawp mai.

Tin, 15th Finance Commission hnuaiyah Urban Local Body-ah khan vaibelchhe 35 kum tharah hian dawn tur a ni a. Lunglei Municipal Council hi dina tih nghal deuh thei mai tur angin kan sawiin ka hria a, kum tharah hian kan la inthlang dawn lo ni turah ka han ngai a. A chhan chu vaibelchhe 35 kha a vaiin Aizawl Municipal Corporation-ah a la kal a ni. Chuti a nih chuan Lunglei-ah lo inthlang pawh ni ta sela anni tan hnathawhna tur a awm dawn lo. Nuai 80 kha hnathawhna tham a ni dawn lova, chuvang chuan councillor kan lo thlang anih chuan AMC tana budget-a dah tawh pawhlet kha a harsa tawh awm si a, Councillor ten tih tur an nei lo ang. Kum 2023 inthlan dawn kumah hian Lunglei Municipal Corporation hi chu kan nei mai awm mang e tih te rilruah kan nei a.

Tin, PAHOSS building turte ka bihin ka zawt nasa a, tunah hian mi 11 chauhin an la sa zo a, nak kum lamah engnge a an kan en ang. Lungbial saw parking tur nge, garrage tur tih hi rilruah a lian a, parking kan tih chuan a bul hnaiah hnathawh tur leh tlawh turte kan neih vang a ni. Sawlaia park-a, let leh vang vanga kea motor la tura kal leh vang vang tur chuan a harsa khawpin ka ring. Kan en chhun zawm zel ang.

Thil lawmawm deuh sawi ka duh a. New Secretariat Complex-a parking hawmna-ah khan kan Minister zahawm tak hian Minister hlui Pu Zodintluanga kha a sawm a, ‘a ni hian bul a lo tan tawh a ni’ tia an han infak tawn kha a lawmawmin a mawi ka ti a.

Demand No. 25 hnuaiyah storm drain leh, link drain te hi kan ngaihtuah a ngai a, MLA fund pawh ka sen tamna ber pawl niin ka hria a. Fur a rawn intan leh dawn, kan luikawrte tihfai leh a ngai a ni. Vengthlang lam an mangang leh ang a, kan tlan thla leh ang a. Khang vel kha tun atang inbuatsaih a tulin ka hria. A bak chu ka lut tawh lo mai ang.

Pu Lalruakima, Minister zahawm tak demand-ah ka han lut leh ang a. RD website-ah ka lut a, update a ngai khawpin ka hria a, a ni hi information changtu a ni a. Research te kan han bei a, thil hre duhin kan han lut a, amaherawhchu, ‘annual plan’ tih

te engmah link kha a awm lova, link awmlo a tam khawp mai a, hei hi en that a ngaiin ka hria a.

Tichuan, State Rural Livelihood Mission-ah hian ka lut leh duh a. Anni hian self-help group, 'Self-help' kan tih mai 1029 an enkawl a, SRLM-te hian mi tam tak eizawna tur an siam sak a, NLUM pawh a ni. Hetiang lampangah hian hma kan lak a ngai niin ka hria a. hetiang kan tanpuite hi capacity building an lo ti nasa a, anmahni an tihchak hnuah an han tanpui a, mi tam takin eizawna ngelnghet an han nei a. Kuminah hian nuai 6730 hi hnathawhna tur an nei a ni.

Ka rilrua awm chu, 'heti zah hi company kutah dah ta ila engtin nge hma an lak ang le' tih a ni a, a department tan pawhin. SLRM tan pawh *chona* karawn siam a nih chu. Professional rualin enkawl ta sela, eizawna lamapangah te, mi harsa chawikanna lampangah te, entrepreneurship-ah te engtin nge an hman ang tih kha *chona* atan ka han hman duh a.

Tin, Value Addition lampangah kan tan a ngai khawp mai a, hetah hian ka lut zawk duh a. Ka sawi fo thin sawhthing hi a changin kg-ah cheng 15/- a ni a, a changin cheng 35/- a ni a, khulai gate-ah. Kum hnih chhunga Research ka han ti ve, keima thiam ang tawkin, amaherawhchu, sawhthing rate hi kum hnih chhungin cheng 5/- chauhin a danglam a, a to em em lehngal a, cheng 70/- atangin 75/-ah a sang a ni, Gram 300-ah. Chuvang chuan kan thil neih aieng te, hmarcha te leh thil chi hrang hrang kan siamte kan harh tan viau a, hei aia kan harh lehzuah a ngai a. MLA te hian kan theih phei chuan nichina ka sawi ang khan, *Common Facility Center for Food Processing* chungchang te, food packaging te hi tuna ka sanction hi nuai 5 chauh a ni. Chuti chuan a tih theih si a, a financial te kan han ti ve a. Commerce lam mi kan ni a, a tih theih a. Hmalak dan hrang hrang a awm a, kan thil neihte keini bak min hlutsaktu tur an awm lova. Keiniin kan hlut chuan, hmarchate te hi kan hlut viau chuan vai hovin min hlut sak lutuk dawn a ni tih kha ka han sawi duh a.

Tin, central project-ah hian Mizoram-in kan export theih tur potential hi tunah hian project ka nei mek a ni. Amaherawhchu, ka ti ka ti a, ka hmuh chhuah tak chu, "Export a ngai lo, India market hi a lian tawk" tih hi a ni. Chuvang chuan SRLM te, NRLM te, LESCE leh department dangte pawh a ni ang a, Planning hnuai ah ECDC te pawh an awm a, chungho tangkawp chuan kan mipuite, kan thalai leh nu leh pate ho hi fuihin i tanpui the ang u, 'tun aia nasa hian hma i la teh ang u' tih te ka han sawi duh a. (Pu Dy. Speaker, ka zo tep e.)

BADP chungchangah hian bungraw Health department-in thil an lei an dah deuh tawpte BADP-ah hian a tam a. DRDA hnathawkte dah ngheh anni hi lawmawm ka ti hle a, Minister-in nasa taka a beihpuina rah a ni a, a lawmawm hle a ni.

Demand No. 6, Revenue Department-ah ka han lut lawk ang e. Ramhlun Sport Complex saw ka biala awm a ni a, leimin tuartute dah khawmna a ni a, LSC an nei thei lo a ni. Sawtah sawn leimin tuar ni lem lo te pawh dah niin ka lo hria a, en fela ngaihtuah a ngai khawp mai.

A tawpna berah Demand No. 26, I&PR-ah hian ka han lut leh lawk ang a. Kan Minister nen hian journalist tawh thin ka ni a, kei hi cartoonist thin ka ni a. Kan CM zahawm tak lem pawh hi ziaik thiam tak ka ni a. Journalist-te pension-na tura hmalak a ni hi a lawmawm ka ti a. Amaherawhchu, bill tang rei lutukte an la pe hlei thei lova, “department pakhat journalist-te advertisement la pe miah lo awm hi enchian a ngai a” an rawn ti a. Chutilai chuan, Pu Dy. Speaker, sorkar website tam zawk hi update loh a ni a, ka lut nasa a. Chuvang chuan, I&PR department atang hian update tura ngenna te hi awm se a tha lo maw tiin rawtna ka han siam nghal a ni e. Ka lawm e.

DEPUTY SPEAKER : Hun a chep thin si a, tawng ran hi zir a tha khawp mai. Engpawhnise, kan hun a tawp a, dar engzatah nge kan luh leh ang, Dar 5:30-ah hian kan hman ang em? Awle, kan rorel tur a chhah si a, kan chawl ang a, kan ineipuar zawh dar 5:30-ah kan lut leh dawn nia.

5:30 PM

DEPUTY SPEAKER : Tu nge han sawi leh ang? Pu Lawmawma Tochwawng i lo sawm ang.

PU LAWMAWMA TOCHHAWNG: Pu Deputy Speaker, ka lawm e. Kan Minister zahawm tak leh kan Deputy CM zawhawm takte pahnih demand pawimawh tak tak ka han sawi ve dawn a ni a. A chung laimu kan hmu lova, kan han phawhlawh hlek hlek ang a, keini chuan kan sawi reilo thei em ang chu maw tih te ka ngaihtuah a. Demand No. 25, tui lam department PHE hian bul han tan ila.

PHE hi mihring hnuk khawih, a lova kan awm theihloh tui lampang department khawih tu a ni a, mihring hriselna lampang pawh a khawih tel bawk a ni. Tui mamawhtu kan pung zel si a, keini a hmangtute fimkhur loh leh ngaihtuah thuiloh avang hian ram kan ti kang duai duai a, a tui hna lam a tlem tual tual a, thil pawh tak a ni. Global warming avang hian tui hna pawh a lo tlem ta tial tial zel a ni. Humhalh a tul a ni, kan siam thei si lova, kan thar chhuak thei bawk si lova, kan ti pung thei bawk si lova. Chuvang chuan

van tla, a hun taka Pathianin min pek te hi kan theih ang tawk leh kan thiam ang tawka humhalh a tul ta tak zet zet a lang a, chuti lo chu rei loah kan ram hi semi-desert ah emaw, desert-ah emaw tui awm lohna, tui harsatna hmunah kan siam mai dawnin a lang a, fimkhur a ngai. Chutiang chuan Pathian min pek, a hun taka ruah a rawn sur thin te hi a khawlna mumal tak kan nei deuh deuh theihna tura in zirtir a va ngai em ve aw. Tui renchem kawnga inzirtirna pawh hi te reuh te te emaw kan tih lai pawhin tih a ngai ta a, sawi dawn ila thui tak sawi tur a awmin ka hria. A thei fa ten In lian pui pui an saknaah te hian ngei ngei tur ang chi, tui dah khawlna tur te hi siam turin ngaihtuahna te nei ta ila a tha ang a, inzirtirna pawh uar zawkin nei ta ila a tha awm mang e ka ti.

Kan lui dunga fur tui luang, furah ruah a lo sur a, a lo luang liam hum humte pawh hi, kan tunlai thiamna mawl te te si, zopa pawhin kan lo tih ve thin cabiel structure leh check-dam tuikhuah te siam khan a dan khawl theihin a lang a, a hnuah leiah a lut leh a, tui hna a ti pung a, tui luang ral tur leh niin a em ral tur a lo veng thei a, ruahmanna fel tak kan neih tul khawpin ka hria. ‘Mipui hriselna kawnga inthiarna ek-in neih ngei ngei tur a ni’ tih zawng te pawh hian kalpuiin helamah pawh hian hna tha takin an thawk a, a lawmawmin ka hria a, mipui hriselna kan ngai pawimawh a ni.

Pu Deputy Speaker, lawmthu sawina tur ka nei teuh mai a. Kan Deputy CM leh PHE changtu kan Minister chungah hian a department-te leh ama tlawmngaihna te, remhriatna te, thawhrimna te avang hian Lunglei pawhin tui pipe leh khawl tha taka thlakna tur project Lunglei tui existing pipeline te, khawl leina tur te min rawn pe a, vaibelchhe 5 man a ni. Tunah hian kan kalpui mek a, chumi piah lamah chuan kan bial bik Zobawk-Tlawng hnara *check dam* siamna turin Sasken hnuaiah khan min tih fel sak bawk a, tender pawh an ti mek a, kan lawm tak zet a ni. Tui harsa kum hlun Zobawk pawhin tui an nei thei tawh turah kan ngai a.

Ka han sawi nawn leh loh theih loh chu, hmanni lawkah pawh solar pump hmangin NABARD hnuai atanga hmalakna in kan Deputy CM zahawm tak thil phalna avangin tui pump kan hawng tawh a, vaibelchhe 2.07 a siam a ni a, kan herh haw tur tur mai a, a hmuh nuam khawp mai a, lawmthu kan sawi a, kan lawm tak zet zet a ni. Lunglei tui tlan ber mai Tlawng Lui-a Pialthleng pump saw khawngaih takin min lo hriat sak bawk se la, remchang hmasa berah kan Deputy CM zahawm takin a panna kawng saw a chhe lutuk a, diesel han inpek te, thawktute harsatna kawngah te emergency-a siam tura zuk kal maina tur kawngah te hian harsatna a awm a ni. Fur lai pheii chuan harsa tak a ni a, kea han kal ngai te a awm a, saw saw tih makmawh te zingah kan dah a, khawngaih takin min lo chhinchhiah sak se kan duh khawp mai.

Pu Deputy Speaker, kan nghah hleh leh kan sawi bang theih loh Lunglei Greater Water Supply Scheme hi beiseina thar kan neih tur a awm em le, a awm chuan

khawngaih takin min hrih thei se la kan lawm ngawt ang. JJM hnuaiia in tina tui herh haw theihna tur ram pumpuia hmalakna hi thil lawmawm tak a ni a, Lunglei district-ah pawh mi tam takin kan chhawr dawnin a lang a, kan lawm tak zet a, tui leh a hna hum halhna kawngah erawh chuan herh haw tur tui kha a awm reng theihna turin hma kan lak a thain ka hria a. Tui thianghlim in tur kawngah erawh chuan mahni thli ei zawnga khaw din thin kan ni a, tuna tanga rei lo teah hian tui thianghlim hi kan nei lo mai ang tih erawh chu a hlauhawm khawpin ka hria.

Pu Deputy Speaker, Demand No. 46, Urban Development and Poverty Alleviation chungchang-ah tawi te ka sawi duh chu, an hmalakna hnuaiia a thunawn ang maia lawmthu ka han sawina chu, Lunglei Municipal Council kan neiha saw a ni a, saw sawn hmasawna leh tangkaina tam tak kan khawpui tan a nei dawn tih a lang reng mai a, lawmthu ka han sawi nawn leh a, rorelna tha leh Lunglei mipui tana chenpakawm tak din ngei kan tum bawk dawn a ni. UD & PA hnuaiia hian khawpui chhunga cheng khawsak harsa tak tak 'Urban poor' kan tih maite hi tun ai nasa hian ngaihtuah an ngaiin ka hria a, khawpui chhunga cheng ve si berh tak tak, ei bar zawna kawngah pawh harsa tak takte tan uar leh zuala kalpuia, ruahmanna fel fai kan neih sa te bakah a tam zawk pawh han nei thei ila ka ti khawp mai. PAHOSS Lunglei tan pawh hian ruahmanna min siam sak a ni a, motor a lo pung a, mihring kan pung zel bawk a, dinhmun hlauhawm takah kan awm thei ta a, Lunglei tan PAHOSS min ruahman sak a hma thei ang hian min pe chhuak se kan va ti em, min lo chhinchhiah sak leh se khawngaih takin ka duh tak meuh meuh a ni.

Demand No. 2, Land Revenue and Settlement-ah hian lawmna tam tak kan neih lai hian lawm lohna emaw pawh han sawi rik zeuh ngai awmin ka hria; min chah miau avangin ka han sawi chhuak tel ang.

Anni hi kan ngaihthlak tawh ang khan mitin, khawtin khawih department an ni a, mi nazawng thiam ve loh hna ching chi vet vel tu an ni a, an buai na rawh e. Kan ngaihthlak tak ang khan kawngpui leh ruahmanna ruangam lian deuh awm phei hi chuan an buai hi a kaihhnawih ang hian a nasa leh zual a ni. Ram leilung neih leh ram leilung enkawl kawnga mimal leh vantlang ram neih dan, inkaihhraina dan mumal hi tunhma atanga sawi ni tawh 'land ceiling nei ang u' tih te a ni a, tangkai zawkin hengte pawh hi ngaihtuah a ngai a. An ni hi sorkar sum hnar pui ber zinga pakhat a ni a, sum tam tawk sorkara chhun luh anih theihna atan hmalak a tul hle a ni. Khawngaih takin kan minister-te min lo hrethiam turin ka chah a, chhungkaw tin deng department a nih avangin fakna karah mi tam takin vui leh vaina an nei a ni. Chu chu hreh tak chungin kan sawi chhuak teh ang. Ram teh tur emaw, teh fel turah emaw, a thawktu thenkhat koh harsa, koh hleihtheih loh, a chawlhkar, a thla te pawh a awm thin a ni awm e. Sawi nuam a ni lova,

hna pending te pawh a lo awm thin a ni ang, min chahtu an tam ve si avangin hreh tak chungin ka han sawi chhuak a ni.

Pu Deputy Speaker, Lunglei District leh a thenawm district thlengin ram chinfel ngai awm niin ka hria a. Chu chu Bangladesh nena kan inrina Khawthlang Tuipui leh saw mi hrulah sawn border fencing a kal a, Bangladesh nena kan inrina karah sawn. **Dy. Speaker:** Hun a tawp a) Ka sawi zo tep e. Khawngaih takin Pu Deputy Speaker, sawlaiah sawn fencing siam a ni a, fencing leh kan ramri tak tak border inkarah sawn ram ruak thui tak, ram tha em em, han cheibawla awmze nei deuha han tih chuan kan potential area ni tur a awm a ni. Kan MLA zahawm tak Pu Nihar-a pawh a lo bu tlah tlah, a hria niin ka ring. Sawlai saw mumal taka sorkar nen pawh ena tangkai zawka hman theih turin khawngaih takin kan Revenue Minister ten min lo ngaihtuah sak se la ka duh khawp mai.

A tawpna atan chuan, RD leh Information lam chu kan thian ten an sawi tawh kha ka ring mai ang e. NREGA inhlawhna tha zawk te, Covid laia ration lakna tur kan lo pe thei te, tin, he scheme hnuuia hmasawna tam tak awmte hi a lawmawm a. RD hnuuia ran in leh vawk in kan sa thei te, tin, terrace tha tak tak a han awm te hi a lawmawm tak zet zet a, min sak chhonzawm sak zel kan beisei a. Tin, rangva leh silpouline mamawh em em reng mai a, mamawhin *tawpin tai a neilo*, pek pawh kan in pe ve nual e, kan Minister-te zarah. Khawngaih takin midangte pawhin tangkai taka an hman turin, thingtlangah leh khawpuiah pawh a mi chenbeh zawk ten a an lo hman theih turin min pe leh thei hram se, kan RD Minister leh a department-te ka han ngen ngawih ngawih bawka ni. Pu Deputy Speaker, ka lawm e.

DEPUTY SPEAKER : Tunah chuan Member zahawm tak Pu C. Ngunlianbunga i lo sawm ang u.

PU C. NGUNLIANCHUNGA: Pu Deputy Speaker, ka lawm e. Minister pahnihte department sawi tur a ni a. Demand No. 6, Land Revenue & Settlement-a thawktu indaihlohna hi a hretute zinga mi ka ni vein ka hria a, a tuartu zingah pawh ka awm ve a. Session apiangin kan sawi a, hei hi chu kan House Leader pawhin min ngaihpaawimawh saka, Revenue Department hi chu ‘thuam that an ngai khawp mai’ tih kan thiante sawi kha ka support a.

Tin, a pahnihna Information & Public Relation pawh ka thiante sawi kha ka rawn support a. Journalist-te pension pawh kha tun kum chhung hian tihfel sak hram thei i la tha ka ti em em. Tichuan, kan Minister ina min react tura ka duh chu, Ni 1.11.2021 ah khan Pu Sanjay Kumar, Under Secretary to the Govt. of India in a Secretary Principal/Secretary, Rural Development, ‘All State and UT’ a tiha DRDA tawp tur,

District Council-te awmnaah chuan hetiang hian a ti a, Pu Deputy Speaker, i phalnain ka han chhiar chhuak lawk ang e. “In North-Eastern States, the DRDA may be merged with District Council and any other body as may be decided by the State Government” tih hi engtin nge kalpui a tum tih lai tak hi khawngaih takin min react se la. DRDA saw eng tia kalpui tur nge, a tawp tak si ah chuan tih kha, ‘Council area a awm te saw Council kutah an pe mai dawn nge, body dangah’ a tih lai kha DC ah an dahchhuak dawn tih kha min react se ka duh a.

PMAY Gramin chungchang hi kan bial bikah harsatna kan tawp nasa khawp mai a. 2016-2017 ah khan final (fourth) installment hmu lo hi mi 194 an awm a. Tichuan, kan Minister pawhin a sawi thin ang khan, he scheme hi a kal chak lo em em a, kum 2017-2018 ah khan Lawngtlai BLock te, Bungtlang Block te, Chawngte leh Sangau Block-ah te khan mi 632 in an la hmu lo a ni. A then chu an khawngaih thlak khawp a, in an lo sa ve a, a bangah tile te an hmang a, a chungah silpouline te an zar pawp mai a, chutiang chuan harsatna namen lo an tawp a. Hei hi engnge a chanchin khawngaihin min hrilhfiah thei se, min react thei se ka duh a.

Chutih rual chuan hei, official-te an awm bawp a, rawtna pakhat ka siam duh chu, PMAY Gramin hi fourth installment-a a kal hi a fuh lo, Installment hnih tal hian a siam ni se la. Chuti a nihloh chuan an han thawk a, sing thum vel te an la a, a reh vang vang a, thing a lo mawih a, a lo chhe hman a. Chutiang chuan thingtlang miretheite leh chanhaite in leh lo sakna turah hian a nih tur angin a ni thei lo a ni tih lai hi a hmutute kan niin ka hria a, rawtna ka han siam ve a ni.

Tin, *Ni 100 Inhlawhna* chungchang hi a pawimawh khawp mai a. Thingtlang kilkhawr ber thlengin a cover a. Kan bialah a bikin MDC Constituency-a an kalpui dan saw a fuh lo khawp mai a. Gram Sabha te an han ti a, District Council-ah MNF sorkar a ni a. EM bial anih avang te pawh a ni ang a, Gram Sabha ten mipui an hneh si lova, tihluhnain khaw thenkhatah chuan field laih nan ni 14 atangin ni 6 te an cut sak pawp pawp mai a, an khawngaih thlak em em mai a ni. Chuvangin, kha lai kha kan Minister-in ‘*Ni 100 Inhlawhna* pawisa, job-card holder-te remtihna tel lo khan an lo cut lui thei reng em’ tih lai leh, a theihloh anih chuan min enzui sak se ka duh khawp mai.

Tin, BADP chungchang hi he House-ah hian ka sawi thin a. Vawiina ka sawi duh em em chu Pu Deputy Speaker, kan sorkar hian hna tha takin thawk se la, oposition-te hi sawi nawu tur neilo hian min siam mai rawh u. Chutia nih chuan, an fel loh chuan kan sawi zel dawn. Vawiinah pawh ka sawi duh chu, ka biala Nghalimlui hi *model village*-a thlan a ni ve a, Nghalimlui-ah (he House-ah pawh hian ka sawi tawh) field kan siam a, retaining wall a chhanna tur, an thawh atanga karkhatah a chim vek a. A hmunah ka kal a, thlalak pawh kan minister zahawm tak pawh ka pe tawh a. Hei hi pawisa la

pek zawh loh a ni a, ‘kan siam ang’ a ti a, waviin thleng in siam ala ni lova. Tin, T. Dumzau ah hall an sa a, a chung kha *steel structure* tur a nih laiin *thing* an hmang a. “A tha tawh lo a ni” ka ti a, “kan siam tha ang e” a ti a, mahse waviin thlengin siam a awm lo. Khawngaih takin kan Minister zahawm tak tak ten he House-ah hian thudik min hrilh thin u la ka duh khawp mai. Keini pawh kha lamah khan kan lo thu ve tawh a, member ten an sawi chu a theih ang angin kan lo umzui ve a. Mihring kan ni a, famkim kan ni lo, chutih rual chuan, ‘kan ti ang’ kan tih chu tih hram hram a tha ka ti a.

Nimin lam Question leh Demand-ah pawh ka sawi tawh a, field hi kan bial ten an mamawh ve a, an mamawhna hi a sang khawp a ni. Pu Deputy Speaker, i phalnain, field chungchang a ni a, BADP cover area a ni. Tunhma chuan BADP guidelines-ah hian, “BADP area-a MLA awmte chu consult tur a ni” tih a ni. Amaherawhchu scheme an siam zawh vek hnuah, “Sir, hetiang hian kan lo ti tawh si a, min pawmpui mai rawh aw” an ti a, pawmpui lo thei lovin min siam thin a, kan bialte mamawhna a puhru zo lo em em thin a ni. Tin, PMJVK cover area kan ni a, ka bial hi, kan khawpuiah a sanga sang tel a awm laiin thingtlangah chuan Joint Meeting minute lehkha an pek hi ... Pu Deputy Speaker, i phalnain, tawi te a ni a, ka han chhiar chhuak lawk ang a.

“To.

*The Controller/Manager, VSBI Construction,
PMJBY Road.*

*Subject: Tuichawng Tlang Playground chungchanga Joint Action
Committee thu thlenna.*

Ka pu,

*Waviin Dt. 19.2.2022 zana Tuichawng Tlang All NGOs leh VC-te
Joint Action Committee chuan football field chungchangah hetiang hian
thutlukna kan siam a ni. Hei hi a kawng laih hna thawktu ten an ngaih pawimawh
sak atan kan rawn thlen e.*

*Tuichawng Tlang football field chungchang hi YLA leh VC ten kan
bialtu MDC Pu Lallawmsanga Apeto, EM (PWD) etc. LADC kan sawipui a, a
niin engpawh nise department-ah ka thlen sak ang che u a ti a. October Ni 21-
ah Pu Lalhmingmawia, EE (PWD) Lawngtlai hnenah ziaka a thlen thu kan
dawng a. Thla 5 lai a ni tawh a, PWD, Mizoram atangin thu chhia leh tha
engmah kan dawng lova, hei hi min ngaih pawimawh lohna leh min hmuhsitnaah
kan ngai a. Chuvangin, thu Chiang fumfe tak kan hriat hma chuan he kawng
laitute Dt. 21, February, 2022 atang hi chuan an hnathawh hi kan phal lovang.*

He thutlukna hi min ngaihpawimawh sak lohva kut in thlaklo a nih chuan, in chungah engpawh thleng se mawh kan phur lovang tih kanrawn hriattir a che.

*Rokhuma,
YLA President*

*Vanromawia,
Village Council President”*

tih a ni.

Kha kha kan biala field kan mamawh zia tilang Chiangtu a ni. Hei hi Bungtlang BDO hnuai a ni a, kan RD Minister pawhin kha kha, kuminah hian BADP scheme siam a nih tawh leh tawh loh ka hre lova. Khatiang deuh tho khan a tlak lam te pawh kan hunlai khan a khaw thenawmah kan siam a, kan siam zo hman lova, mamawhna a sang em em a ni.

Kha kha nimirah khan *Zawhbelhna*-ah ka zawt a, PWD Minister-in min chhang a, contractor-te kha an awm ngam tawh lova, an chhuak vek a ni. Chutiang khawp chuan kan thalaite an tuihal a ni. Kha kha min hriatsak atan ka duh em em a ni.

BADP hna chungchangah hian Border Area Development Scheme a ni a, chutih lai chuan infrastructure-ah chiah hma a sawn a, a mipui chawikanna a awm tlem em em a. Kan sorkar ve lai khan, (hei vawiina Power Minister zahawmtak hian RD a chan lai a ni a), khang hun lai kha chuan 100% chu a area-a mite pawhin an chang thei lo e, mahse 60% emaw, 70% emaw vel tal chu a area-a miten an chang a. Chuvang chuan, khuain hma a sawn a, a mihring pawhin hma an sawn a. Vawiinah erawh chuan, hmanni lawkah bial fangin ka kal a, MNF sorkar hnu kumthum chung hian hnathawh in nei tawh em ka ti a, “Ka Pu, engmah kan thawk ve lo, engmah kan hmu lo” tih vek a ni. Scheme erawhchu an khuaah a awm a, Aizawl atang te, Lawngtlai atang te, hmun hla tak tak atangin thawhsak vek an ni a, an khawngaihthlak em em a ni. Kum hnih sorkarin hun a la neihnaah hian a area-a mite, MNF an nih pawhin thawk rawh se kan duhsak a ni. A area-a mi ten thawk ve hrim hrim sela, tih kha ka sawi duh a.

Pu Dy. Speaker, nang pawh he lama i thut lai khan i duhthawh theih em kha, min hrethiam rawh aw.

PHE-ah hian sawi tur ka ngah nasa mai si a. Nichina Lawngtlai East bialtu Pu H. Biakzaua sawi, Sangau RD Block hnuai PHE Department, Siaha-in a enkawl a tih kha 100%-in ka thlawp a, chutihruai chuan Sangau RD Block chungah khian PHE Sub-Division khawiah emaw ber khian dah ni sela, chu chuan enkawl bawk sela tih kha karawn ngen duh bawk a.

Tin, Lawngtlai Greater Water Supply Scheme hi helaiah pawh hian ka sawi tawh a wawi tam tak. Ka bial Thingkah saw cover a ni ve lo tlat mai a, Lawngtlai town chhunga awm si saw, ‘augmentation kan tih hunah a ni ang’ tih a ni a, hei, term a tawp dawn tlat mai a. Kan sorkar lai khan buaipui a ni a, pipe te pawh phum a ni a, amaherawhchu, wawiin thlengin an la hmu lova, kha kha khawngaihtakin kan Minister-in min hriatsak sela. Tin, Lawngtlai saw tui har tak a ni a, kan sorkar lai khan pump a ni a, a pump-na hmun kha motor-a kal ngai a ni a, black-topped a ni lova, kal a harsa em em mai a, a kalkawng hi Black-topped theih dan awm hram hram se a pawimawh hle a ni tih kha ka sawi duh bawk a ni.

Tichuan, pahnih chiah ka sawi leh ang, Pu Dy. Speaker. Kan sorkar lai khan combine solar pumping hmangin tui kan pump a, khatih hunlai khan sawi tawh ang khan tuihna a lo tlem zel a, a pump tur kha duhtusamin an khawp kham ta tlat lo a ni, khaw pali tan pump a ni a. A thlang deuh mai metre 300 velah khan tuihna kha a la awm tha a, khalai kha kan Minister leh kan sorkar hotute pawhin min hriatsaka, han tihbelh hlek dan awm sela chuan khaw pali te khi hnianghnar takin tui an hmu thei ang tih ka ring a.

Tin, Mampui khua hi Lawngtlai atang km 18 a hla a ni a, gravity-a lak tur pakhatmah tui a awm lova, hei pawh hi Lawngtlai atanga pek theih dan kawng awm thei sela tih kha kan sawi nawn leh a.

A tawp berah chuan, sorkar-a kan awm vel ai khan Hmawngbu-ah BADP-ah special scheme a awm dawn a, project lian tham deuh, “enge i bialah i ngaihpawimawh” an ti a, “khaw pathumah Solar Pumping Scheme siam a ngai a ni” kan ti a, an siam a, a lo chhuak ta a. Hmawngbu-ah nuai 249 a ni a, Mautlangah nuai 60, Tuisentlangah nuai 69. Ka sawi duh tak chu, Hmawngbu-ah hian tunah nuai 249 in RD hnuai atangin tender pawh a chhuak a, hna pawh thawh mek a ni a. Chutah chuan JJM hnuai hian Hmawngbu tho kha pump leh tur angin a lo awm tihna a nih chu. Khaw lian vak lo kha nuai 249-in kan pump chhuak ang a, tunah JJM atangin pump leh ta se, a tui pump tur lam zawk, a source kha a buaithlak dawn a, khalai kha en ngun deuha, a dang la mamawh em em khua tam tak a awm a, khatah khan her rem ni se tih kha wawiinah hian ka sawi duh a ni. Kha kha min hriatsak se, a chhan chu khaw tereuh tea solar pumping set pahnih awma kha mamawhna aiin hnawksak a ni thei dawn a ni tih lai kha ka sawi duh a nih chu. Chu chu ni tawh mai rawh se. Ka lawm e.

DEPUTY SPEAKER : Awle, tunah chuan kan Member zahawmtak Pu Lalduhoma, ZPM Group Leader sawm ila, ani hian minute 15 a nei a ni. Tunah ilo sawm ang.

PU LALDUHOMA : Pu Dy. Speaker, ka lawm e. Land Revenue & Settlement atang hian kan tan ang a.

Kan lo sawi tawh vawiinah khan Govt. Complex-a in leh lo nei tawh si, pass la neilote chungchang kha kan lungual viauin ka hria a. Hei hi Brig. T. Sailoa'n ngunthluk taka a lo ruahman kha a ni a, a hnuah roreltute zinga mi, dan siamtute zinga mi ngei ngei a bawhchhetuah a han tang hmasa a, chungte chuan in leh lo thapui pui an neih tawh laiin miharsa te te, an In khawr ve tawh leh an huan thlaite pawh puitling tawh eng emaw zat an awm a, chu mite chu hlauthawngin kan siam a ni. He thu hi he House-ah hian vawili ka sawina a ni tawh a, hei hi a tawpna ni tawh sela, House rilru a hriat tawhin ka hria a. Minister zahawm tak hian rawn bawhzui se, lo tihfel sak maithei sela ava tha dawn em ka han ti phawt a ni.

A dawt leha chuan kan Budget Allocation han en hian Revenue Deptt. sum chan hi a tlakhniamna lai te a awm a, salary-ah phehi hi chuan nikum lama kan hman ang zat dah kan department zingah hian an awm manglo a ni, ka en chinah chuan. Engtin nge kan sorkar hnathawkte hlawh hi pek kan tum aw ka ti a. Kan pe theilo leh ang a, kan nghah tir leh ang a, khawi emaw lai pawisa remchang kha kan hnuk khawm leh dawn em ni? Hengte hi chu *committed expenditure*, a ngei ngeia lokal tur Chiang sa anih avangin, hlawh te hi chu kum khat daih department tin hi han dah sak thei se a tha hlein ka ring a. Tin, pension phehi hi chu pakhatmah dah miah loh department an la tam em em a ni, tun tum kan budget-ah hian. Chuvang chuan, a budget hrim hrima hi hman ngaihna awmlo tur leh min daihlo tur saa ruahmana bul kan han tan leh thin hi chu tihtawp dan kan ngaihtuah a tha hlein ka hria.

Tin, Surveyor indaihloh chu kan sawi zing tlang hlein ka hria a, Minor Head 102-na hnuaiyah khan sanction posts 45 awmin, tunah hian 20 a awm niin ka hria a, 103-na Head hnuaiyah khan sanction posts 36 a awm lain, pakhatmah Surveyor an awm lo a ni. He department hi revenue earning department a ni a, kan thum that hian sorkar-in investment kan ti a ni. He department hi chak se, sum pawh alo lut hnem ang. Covid era-ah hi chuan kan duhsak tur a ni a, a bik takin Surveyor tihpun atul zia hi kan vei tlangin ka hria a, hei pawh hi huaisen taka a changtu Minister tan chuan rawn bawhzui chiah ka ngai a.

Tin, Serchhip-ah hospital thar kan nei dawn a, a hmun turah kan buai ang tih kan hlau a, Chhiahtlang Village Council (South) area chhungah tur a ni a, Pukpui ramah. Tunah chuan hetah hian tumah an awm lovin kan hria a, amaherawhchu P & E hian an intitatu lek lek a. P & E hnenah hian khawi VC mahin no-objection certificate an la pe lova, eng document mah an nei bawk lo a ni. Serchhip Thalai Pawl-in helai rama

compensate lo lak tuma pass lo nei leh hmante an awm ang tih an hlau em em a... (**Dy. Speaker:** Chair kan han inthlak lawk ang e.)

SPEAKER : Awle, chhunzawm rawh le.

PU LALDUHOMA : Hei hi kan Minister-in min lo hriatsak sela, a hmunah kan buai lohna turin tih kha kan sawinawn leh duh a.

Tin, compensation chungchangah tunah hian National Highway-306 package 6 Bualpui kaltlang khu namen lovin tunah hian an buai a, In 375 awmna khua a ni a, chutah chuan a tihchhiat tur hi In 36 a ni. Khaw dang zawng zawng - Vairengte, Bilkhawthlir, Kolasib, Thingdawl, Kawnpui te hi chu he kawngpui hian a hel mai a, khua a tibuai ve lo a ni. Amaherawhchu, Bualpui bik hi helna remchang tak chhuah lamah hian a awm chungin khawlaiah kaltlang tir a ni a, tihchhiat a ngah ta a, chu chuan compensate a tipung ta em em a. Chumi chu hre ranin (sawi hrehawm mahse kan sawi mai ang a), an VC ten pass lem an siam nasa em em a, Pu Lalrintluanga, kum 2006-2008 inkara VCP anih hunlai hmang khan an ti a, tunah hian compensate dawng tur mi 125 an awm tawh a ni. YMA ten hei hi an duhlo em em a, FIR-te pawh an thelut tawh a, thlanmual ram a tichhe dawn a, a tihchhiat bak chu inphumna tur a awm tawh lova, Nepali thlanmual zau tak a tichhe dawn bawk a, YMA ram a tichhe dawn bawk a, Soil Deptt. ram a tichhe dawn bawk a. Soil Deptt. ramahte hian pass an siam a, hei hi list-a pek a ni. Tin, ‘sorkar ram’ a ti a, chu chu VC ho chan tur a ni, Pu Speaker. Hmuntin maiah hian VC-te corruption hi kan hria kan hre ta mai a, hemi tireh thei hi chu vawiina roreltute hi an ni.

Amaherawhchu, tihreh a hneka inthlun zawmna leh hlauh neilo deuh maia kan village level-ah hlemhletna-in bu a khuar ta hi a pawl ka ti ngawih ngawih mai a. YMA-in FIR an thelul pawhin mumal a nei theilo reng reng a, heng hi kan House Leader zahawm tak awmlai a ni bawk a, a alignment hi khawchhunga kal lovin a helna tur remchang zawkah hian awm sela, sum pawh sen tlem a ni zawk ang a, khawtlang mipui an lungawi dawn a. Hei hi min rawn bawhzui sak thei ula ka duh hle a ni.

A dawt leha chuan Keifang-ah National Highway-06 (emaw ni khilai khi) MNF VC-te bawkin compensate siam turin pass an siam teuh a, chu chu Keifang Land Owner Association ten an complaint ta a, chu an thubuai chu *Ombudsmen*-in a rel a ta a. *Ombudsman* chu Pu H. Laizika a ni a, thutlukna pawh a siamfel tawh a. Chu a thutluknaah chuan an diklo ngei a ni tih a finfiah a, ‘VC hi dissolve ni rawh se’ a ti a ni. Vawiin thlengin dissolve an la ni lo, ‘chhantu nei’ an in ti a, thil diklo, hlemhletna pawh awm sela, ‘pute min hautu tur chuang an awmla’ ti niawm fahranin khitiang hian village

level thleng hian kan ram hi *a ram mualpho* hian kan mualpho tawh tih hi a lang a, a pawih ngawih ngawih a ni.

Chutiang bawkin chhimlamah NH-302 ah Tuichawng, Phairuang kamah assessment fel vek tawh, company pawhin compensate tur sum Revenue Department-ah a chhunglut daih tawh, hei hi tuin nge kawh, a pung a awm em, a pung chu engtia eitur nge? Chu pawh chu a department lam a tang bawh hian tikhawtlai ni lehin a lang ta a, a pawih ngawih ngawih a ni. Tunah hian working season a zo mai dawn, tun chhunga hna an thawh hmanloh chuan nakum an nghak leh ang a, development hi mipuiin an chhawr tlai dawn a ni. Hlemhletna a thatloh bakah development a kal muan phah hi a pawih em emna a ni. Diktak chuan Tuirial Hydel Project-a compensate a vanga development kan tih khawtlai dan te, kan hnam a mualpho dan te kan hre vek a ni.

Tin, Pu Speaker, Session hmasa-ah khan helaiiah hian motion putluh ka tum a, tuna Bilkhawthlir leh Sairang inkar compensation pek dan diklo zawng zawng, i phal tlat loh a vangin Press Conference ka ko ta a ni. Heng zawng zawngah hian ka sawinawn tawh lovang kha kha chu. Helai hnuai corruption a lo awm ... (**Speaker:** Tun Session hi min ngam riau mai a..) a chung lama miten diknaa rorel chu niselangin a reh mai ang. Amaherawhchu, chunglama mite nen inthlun tlatna a awm zel a vang hian kan ramah hian hlemhletna hian tawpin tai a nei lova, a zual tual tual a, a pawih ka ti tak zet zet a ni. Chuvangin, a rangthei ang berin heng thilte hi bawhzui ni se kan duh a.

Tichuan, Rural Development Department-ah ka pakai ang a. Hei kumin-ah hian *Supplementary Demand*-ah khan SRLM leh SPMRM-ah hian cheng nuai 3,988 kha dil a ni a, kan pe a. Hei hi tunkum kal laia tan hi chuan ka hrethiam, mahse kum hmasa 2020-2011 a tan daih khan a ni a. BADP-ah nuai 136, MGNREG-ah nuai 3554, heng zawng zawng hi nikum hmasaa tan vek khan a ni, state matching share an rawn dil hi. Kumin *Supplementary Demand*-a an rawn dil hi tun kum kal laia tan ni lovin, kum hmasaa tan a ni daih mai hi hriatthiam har ka ti khawp mai a, hei hi min rawn hrilhfiyah se ka duh a. Khati reng renga kan kal dawn a nih chuan nikum hmasa lama mite kha tun kumthar budget-a tang hian kan siamrem dawn a nih chuan, khatiayang financial management kha chu rei kan kalpui lovang, kan la tlukpui mai ang tih hi ka hlau ngawih ngawih a ni.

Tin, hei Rangva leinan budget siam laia dah duh si lovin, cheng nuai 350 lai mai kha *Supplementary Demand*-ah khan an rawn dil a, Pu Speaker, kan hriat ve in hlau deuh nge ni, Ruling ho chauh insem tur a ni a, a ruk deuhin, 'ti hian i ti ang' ti te pawh in ang lek lekin ka hria. A chhan chu kan dawng ve miao lova. Hengte hi chu engatinge huaisen takin budget siam lai khan BE ah khan in rawn dah mai loh, kan lo pawmpui em em ang che u, ka han ti duh a ni.

Tin, *Model Village* hi min thlantir ve a, term tinin MLA ten, mahse awmzia a nei reng reng lo. Kan thlante hi keimahni fund a tanga kan duat deuh tih bakah sorkar hian min hriatpui lo, eng department mahin *Model Village* hi a awm a ni tih pawh hi min hriatpui lo. Vawiinah hian kan Minister zahawm tak hi ka ngen duh chu, DC tinte hnenah *written instruction* min pek sak la, kha District-a department tin khan MLA ten Model Village kan thlanah hian eng emaw tal rawn ti theuh rawh se, tichuan Model Village nih man a awm deuh ang tih hi ka beisei a ni.

Tin, *Social Audit* hi tih thin a ni a, tih tawh chin hi a tlem em em mai a, Village Level-a hlemhletna a hluar tawh zia kan hria a. Hemi tireh tur hian audit a awmluh chuan ‘tha rawh u’ pawh ti ila, engmah a ni lovang, camping-ah pawh lut sela an da leh tho ang. Chuvang chuan, *thatloh theihlohna*, hlauh tur kan pek hi a ngai a, he *Social Audit* hi sorkar tha kan siam duh a nih chuan kan uar hle a ngai tih kha kan sawi duh bawka.

Tin, PHE ah kan pakai ang a. Budget Allocation hi a tlemna hi a tam lutuk deuhin ka hria a. Heti em ema tui kan harsat laia department budget a han kiam ta hi a pawh hlein ka hria a. *Minor Works*-ah ringawt hian tun kum kal laia cheng nuai 9,630 a nih lain, kumtharah cheng nuai 7,320 a ni dawn ta a. *Major Works*-ah hian tun kum kal laiah nuai 33,609 a nih laiin, tunah erawh nuai 26,448 chauh a ni ta a. Chuvang chuan, hengte pawh hi kan department zinga mipui ngheng/mipui mamawh tak tak enkawltu an ni a, vawiinah hian Pu Speaker, a changtu Minister zahawm tak Pu Tawnluia hi kan senior a ni a, natnain a tlakbuak tih kan han hriat khan, kan senior te an han damloh hian kan thla a lo phang thin a ni. Vawiinah hian damtaka a hmel kan han hmu thei leh hi kan lawmpui takzet a ni tih kha ka han sawi duh bawka ni.

Tin, 2021-2022 ah hian PHE Department hian *pending liability* hi a nghah mah mah a ni. hetiang leibat ngah lutuk department nih hi inngaihtuah deuh chu a ngaiin ka hria a. Tin, *Solar Energy for Pumping* a tan hian nikumah cheng nuai 5,448 dah a nih laiin, tunah hian 2,550 chauh mai dah ani ta a. Tui pump te hi kan kuthnathawktute hian an mamawh ngawih ngawih a ni a, nikuma kan hmanzat ai khan nuai 2,938-in a tlem sa ringawt mai hi, engtin nge agriculture lamah te kan production a pun theih ang, kha kha a kawka ta a. Chuvangin, heng hi budget kan siam lai atang hian rilru nei taka mamawh tin zawna siam a tul hlein ka hria a ni.

UD&PA-ah hian ka han lut ang a. Hei, PAHOSS kan sawi fo a, PAHOSS-ah hian tunah pawisa a la awm nual nia hriat a ni a. A chhan chu 1st installment dawng tawh ten an dawn leh har lutuk avangin, ‘a, hetiang hrim hrim chuan’ an ti a, return leh tawka an awm tih kan hria a ni. Khati a nih chuan a dawngtute lam thiamloh ni lovin, a sorkar lam thiamloh te pawh kha ava ni mai awm ve awka ti a. Kan ti tawh vek vek a,

pawisa awm sa a nih pheih chuan engati nge an duh anga kan pek loh? Thlan sa tawhte pawh return leh hial te an awm a nih chuan inenfiah ngai a awm mai awm mang e tih hi ka ngaihndan a ni a.

Tin, *Smart City*-ah nichinah kan sawi tawh a. MLA zahawm tak Dr. Vanlalhlana'n a rawn sawi kha ka rawn tuihnih duh a. *Smart City*-ah sum a tam khawp mai, a tam leh ang tih pawh ka ring. Hun kal tawhah khan kha sum kha thilphal takin kan Minister zahawm tak hian a theh chhuak a, duhsak bik deuh kha an awm niin kan hria a. Tun hun hi Covid-19 exit protocol kan buatsaih tul hunlai tak a nih laia Sports lama kan vulh tlur tlur hi a hun em? Tun hi inkhelh hun tha ber a ni em? Inkhel mite kan ngaih pawimawh lo lam a ni lo. Vawiinah hian ei tur buaia kan buai lai leh kan economy a tlak chhiat lai hian, khatiang lampang kha priority-a nei thei kan ni em tih hi a ni a. Chuvangin, kan Minister zahawm tak hian a duhsak zawng hi rawn ti danglam deuh hlek se la, mamawh zawnah rawn sem se, a sem leh dawn a nih chuan tih kha ka han ngen duh a ni.

A tawpna berah, Pu Speaker, hei kan *Riverine Forest*, District Council hunlaia kan neih kha, Tuirial compensation thubuai kal zelah High Court (Single Bench) chuan min paih sak a, kan hria a ni. Tichuan, Chief Secretary hovin,' engtin nge kan tih ang' tih an ngaihtuah a, "He High Court rorelna hi i challenge ang u," an ti a ni. Chumi hnu lawkah kan Chief Minister hovin an han meeting leh a, "Challenge lo ang; a a protection i siam zawk ang; a Act tur i siam zawk ang; Revenue Department hian compensate la dawnglote dawn tur zat hi rawn chhutchhuak rawh se" tih a ni a. Kan Revenue Minister zahawm tak hian kha kha in rawn chhutchhuak ta em tih kha a ni a. Mahse, kha kha High Court bawh hian a lo paih leh tawh si a, a hnuah khan. Hmana kan District Council hunlaia kan reserved forest kha a tung nung leh tawh si a, chu chu engtin nge kan sorkar hian a tih dawn tih kha min hrilhfiyah turin ka han duh bawh a ni e. Ka lawm e.

SPEAKER : Member zahawm tak Pu Duha khan nikum lama Motion a rawn putluh ka lo hnawl thu kha a sawi a, vawihnih a sawi ta a, hei. Kan Dan 139-na, 3-naah khan, 'it shall not contain argument inferences' tih kha a awm a. Document pakhat tal kha rawn lut se chuan ka pawm ang a. Mahse, 'inferences' (inpuh chhiatna) tih lai tea kha document a awm loh avang khan, member zahawm tak Motion kha zah tak chungin ka hnawl a. *Special Mention* chu ni se ka phal ang. Kan sawi ve a nih chu.

Awle, tunah chuan kan Minister zahawm tak Pu Lalruatkima, a demand te rawn wind-up turin kan sawm ang a. Tin, sawifiah ngai a tihte rawn sawifiahin House-ah pass rawn dil nghal bawh se. Ka sawm e.

PU LALRUATKIMA, MINISTER: Pu Speaker, ka lawm e. Vawiinah ka Demand pathum - Land Revenue & Settlement, Information & Public Relations Department leh Rural Development Department te sawihona hun tha tak mai kan nei hi a lawmawm tak zetin ka hria a. Member-te thahnemngaihna leh inpekna te a lawmawm ka ti a. Fakna a ri tam em em a, fakna hi ngaihthlak a nuam a, kan ngeih vak lo thung niin ka hria a. Sawiselna hi a ngaihnawm loh nangin, ‘damdawi pawh a khak poh leh kan tan a tha bawk si a’ tih te ka rilruah a awm a ni.

Tichuan, tuna i thusawiah khan, ni e, hei Pu Speaker, “*Discussion on a matter of Public Interest on the rule 139 of the Rules of Procedure & Conduct of Business in Mizoram Legislative Assembly*”-ah khan, nikum September Ni 7, 2021-ah khan kan member zahawm tak Pu Lalduhoma khan hemi chungchang (Vairengte leh Sairang inkar kawng) sawiho kha a dil a ni. Han en vang vang khanin, i sawi tawh a, motion a kha, ‘Seventh Session chhung hian’ a ti a ni. Seventh Session chu a ral daih tawh a, churang chuan, Seventh Session chhunga sawiho kha chu a theih tawh loh hrim hrim a. Pu Speaker, engkim maiah hian a tha ber leh dik ber vekah hian kan inngai thin a, tihsual hi kan lo nei nasa ve thin khawp hian ka hria a. Chungah te pawh chuan, tihsual hi kan in hrih ve deuh loh chuan kan tha thei lo ang tih te pawh kha ka hlau deuh a, ka han tarlang a ni. Hei, a ziak ngei ka kawle.

Hei a lawmawm khawp mai a, Demand No. 6, Land Revenue & Settlement Department hi kan hriat angin development works khawih ve lo kan ni a. Engpawh mai hi, eng hmasawmna pawh hi Revenue Department lam base vek mai a ni a, Revenue Department kaltlanga hmalak ngai a ni. Churang chuan, development hmalakna zawng zawngte inngahna, record siamtu leh vawngtu department kan nih avangin kan pawimawh viau a ni. Chumi chu hre rengin sorkar pawhin ngaihtuahna nasa tak a hmang a, theihtawp a chhuah a, a pawimawh zia kan hria a. Khawvelah ram leh ram indona pawh ram inchuhna a ni tlangpui a ni. Tunah pawh Russia leh Ukraine an indo a, sawi sual a hlauhawm khawp mai a, sawisual tawh avang khan chutiang ang pawh chu ram inchuhna tho kha a ni a. Kargil-ah pawh ram zim te inchuhin India leh China an inep ut mai a ni. Churangchuan, kan decision lak hi tihsual palh chuan thenawmpa leh thenawmpa, veng leh veng, khua leh khua inep ut theihna a ni tih kan hriat a tha a, kan thawktute pawh an fimkhur em em a ni. Chumiah chuan fel lohna tam takte pawh kan nei ang tih ka ring, chungah te chuan min han sawiselnaate pawh kha insiam that nan kan lo hmang zui dawn nia.

Tunah hian manpower chungchanga kan dinhmun hian, hei DP & AR Minister zahawm tak a awm bawk a, official-te an awm teuh bawk a. Kan dinhmun hi tarlan thain ka hria a. Group A post 34-ah 25 kan luah a, Asst. Director of Survey phei chu technical post a ni a, post 10 kan nei mek a, 8 kuminah hian an pension dawn a, pakhat hi medical

refer (kidney transplant) a ni a, chutiang ang chu kan ni a. A hnuai tanga kaisang tura kha service tling (kum thum service) pawh kan la neilo a ni; kan dinhmun a chhia a ni. Group B pawh kan dinhmun a chhe hle mai a, post 260 awm ah 148 kan luah mek a, surveyor post hi 139 kan nei a, chutah chuan 75 hi luah mek niin, post 64 hi a awl a ni. Group C leh D kha sawi ta lo ila. Technical lam a ni a, khang kan harsatna zawng zawng kha hnawhkhat turin *recruitment rules* fel tak neih a ngai a, chutah chuan tun hnaiah Asst. Director of Survey te, Revenue Field Assistant te, Surveyor te kha RR siam that a ngai a nih hi kan ti a, chutah chuan mi thiam zawk BE te, diploma engineer te an luh ve theihna turte, survey lam subject late, geography subject late pawh an luh ve theihna turin kan peih chiah a. Kan hon. Chief Minister hian a vei khawp a, House Leader a ni bawk a, hemi chungchanga kan harsatnate hi “rawn inbuatsaih ula, kan lo ngaihtuah dawn che u nia” a ti a ni. Ka lawm khawp mai a, chumi tur chuan department pawh kan inbuatsaih mek a ni a, khang member zahawm tak ten min veipuina zawng zawng chungchangah khan lawmthu ka sawi nghal ni sela.

Tichuan kha Member zahawm tak tak ten in han sawi a, chutah chuan han react ngai hi keinhia hi chuan mipui ten kan fiah loh palh hi a hlauhawm bawk si a, Member zahawm tak Pu Lalduhoma thusawi atang khan han tan ila.

Government Complex ram khu kan hriat angin sorkar hmun hma turin ruahman a ni a, amaherawhchu bawhzuina mumal a awm tak lohah chuan a hlamzuih chho ta a. Term hmasa lamah khan Pathian leh mipui zarah kan sorkar khan a bialtu, MLA zahawm tak ni thin Pu K. Sangthuama khan, “a nei tur dik takte hnenah pek kan tum dawn a ni” a ti a. MLA zahawm tak, bialtu MLA Pu Zothantluanga khan a vei em em bawk a, hemi chungchang hi vawi tam tak min sawipui a ni. Chutah chuan keimahni kutah ni lovin GAD kutah a awm a. GAD kutah khan Government Complex-ah ram acquire a nih avangin leh chu chu en fel a ngaih bawk si avangin tiin chutiang tur chuan ruahmanna kan siam a. Hei hi sorkar-in GAD kutah a dah a ni. Khang kan zawhna, Member zahawm tak Pu Lalduhoma a zawhna pawh kha kan hriat tho mah nise keimahni lam chan a nih loh avangin, chhan loh pawh ni se kan thiamlohna a awm lo mai thei a ni, Rules of procedure han en khan. Amaherawhchu ka han chhang tho a.

Tichuan Council of Ministers approve turin 2018 leh 2019 ah te thehluh a ni a, Pathian leh mipui zarah kan han sorkar tir, Ni 30th September, 2019 khan GAD chuan arawn thehluh a, kan han ngaituah a. Engpawh nise a hmun hma te tichiingin sorkar-in a acquire chin kha hung fel turin leh valid pass awm zawng zawngte enchian nise tiin thu kan dah ta a. Chutiang chuan Chief Secretary hovin vawi tam tak ngaihtuah zui a ni Tunah hian he House zahawm takina kan rilru ang pu leh a hma lama i ding lama miten kan lo tum sa khiau khiau kha Pu Speaker, i veilama mi thenkhat khan an lo hre thawi deuh a ni ang, *thangthat lak* an tum deuh emaw ni chu aw ka ti a. A pe theitu kha sorkar

tho a ni a, mimal tak chuan ka thu tlukna siam tur ni se pek maia kha a hunin ka hria a, i ngaihdan kha ka tawmpui a nih chu. Chuvang chuan kan sorkar hian a pek ngei pawh ka ringin ka beisei tlat a ni. Kan sawi chho zel dawn nia.

Tin, Bawngkawn kha Phase-I leh Phase-II an ti a, chu pawh chu, Phase-I kha kan chhuah zalen ta vek a, Phase-II kha kan han ngaihtuah leh a, ‘chhuah zalen mai tur a ni’ tih te a awm a ni. Amaherawhchu encroachment, mimal court kal laite an awm avangin, engpawh nise kan official thenkhat ten lo enchiang leh deuh se la kan ti a, thu kan dah a. Engpawh nise, fa pawh hi chungkuaah a soal apiang ‘an soal’ tihna lam nilovin, ngaihsak te an hlawh fo thin a. Sawlai17-ah sawn ‘unauthorised Occupation’ kan ti a, kan Rules 17(a)-ah khan khatianga regularized sak mai te pawh kha a awm a ni. Amaherawhchu, eng anga regularized tur nge, tlema zawng an chawi ve dawn nge tih chu sorkar-in thutlukna ala siam ang a. Kha kha chu tunah hian ‘a hmawr kan bawp tep a ni’ tih kha Aizawl North-I bialtu MLA zahawm tak kha ka hrilh nghal ni sela.

Tin, Compensation 306 leh 06 chungchangah khan, National Highway 4-lane kha tukinah pawh kan sawi nual kha, 306 hi khuta tangin a rawn chho a, Bilkhawthlir-ah, khaiw laiah chiah nge a tawp ka hre lova. Tichuan Bilkhawthlir atangin 06 a rawn chho leh ngar ngar a, via-Aizawl khitah Zokhawthar a han pawh a ni. Chu chu Vairengte-Sairang kha 4-lane turin NHIDCL-in ruahmanna a rawn siam a. Chutah chuan a bik takin MLA zahawm tak Pu Lalduhoma khan, “Bualpu In 375 awmnaah In 36 vel a tichhia a, chutah chuan pass 125 a awm tawh” a ti a. Pathian leh mipui zarah 2021 kan freeze hnuah hian pass pakhatmah kan la issue lo a ni. FIR an thehlut a nih pawhin, Freezing Order Ni 27th May, 2020-ah kan chhuah a, chumi hma lama pass neite chu eng Dan pawhin phalna a pe a. Chuvang chuan Dan ang thlapa nei an nih ka ring a, a hnu lamah kan pek a awm tlatloh avangin tih kha Bualpui bikah chuan ka sawi duh a.

Tichuan Bualpui-ah *Land Lease* te an ti a, Land Lease kha tun hnaia kan freeze hnuah pakhatmah kan pek ka hre lo a ni, government approval awm lo chuan Land Lease kha pek ngawt theih a ni si lova, khalai kha hretlang ta ila. (**Pu Lalduhoma:** ‘Land Lease’ ka tihna kha chu, Soil Department ho ina ram an neih ka sawina a ni. Lease pek a ni a, chu chu mimalin pass an siam hnan ta a nih chu.) Mimalin pass an siam hnan a nih chuan, Land Revenue & Settlement Department chuan a siam sak lova, vawiin thleng hian approval kan la pe lo a ni. Government approval a awm loh chuan a theihloh reng reng a; Village Council-in a lo pe a nih chuan thudang ni ta sela.

Tukinah khan kan hmanhmawh hret a, helai hi chiang deuh hleka sawi loh chuan. Khami Village Perimeter chhungah chuan khami khuate khan VC pass kha ‘Town’ an nih hmaa an lo pek a nih chauh khan ‘a valid a ni’ kan ti a, a hnua pekte khan land value an la dawn lo a ni. Chuvang chuan, VC pass, vawiina mahni ta anga lo cheibawl si rama

kaltlang ho khan land value an la theilo ang a, an thlai man chauh erawh chu an la dawn a ni.

Tichuan, *inthlunzawmna* awm anga han sawi ta mai, thuneitu sang takte nen inthlunzawm ang a sawi kha chu ‘a duhthawh thlak mang e aw’ ka ti a. Khulai mipuite khu sawrkar chuan a hmangaih a, a duhsak a, Dan ang thlapa ram an neih kan duhpui a, Dan ang thlapa compensation an lak pawh kan duhpui a ni. Chumi tur chuan eng ang harsatna nge awm theite pawh kan en zel a. Chutah chuan Pu Speaker, a diltute kha kan han en a, recommend-na VC-te rawn siam a awm teuh a ni, ka hnenah ngei pawh. Chutah chuan MLA zahawm tak (tuna chatuan ram min pansan ta) ngei pawh khan “pass lo siam sak ta che u” tiin vawi duailo min sawipui a ni. Chutih lai bawh chuan Thingdawl-ah pheih chuan (MLA zahawm tak Pu Lalduhoma khan a hria ang a) PC. Lalthangzova hi i hriat mi a nih ka ring a, hei pawh hian a rawn ziak ta viau a ni. (**Speaker:** Chair rawn address la.) Pu Speaker, ZPM VCP maw? Aw, khatiang ang kha a tam em em mai a ni, kan kawh vek si a, thil hrechiang lova sawi chi a nilo. Kawnpui lamah pawh kha tho kha a ni a, keini chuan Dan anga nih chuan pek vek kan duh a ni. Chuvang chuan, keini lam nen ni lo, a lehlam zawk nen khan an lo inthlunzawm reng mai kha a lo ni zawk em tih kha ka ngaihtuahnaah chuan a awm a ni. Pek dan kha kan zawng hram hram a...*(interruption)*

PU LALDUHOMA : Revenue Secretary-in khulai area kawngsir kam zawng zawng kha “freeze a ni” tihna order kha a chhuak ta a, “chumi hnuah chuan pass kan pe miah tawh lo” tih hi Minister-in min assure theih chuan ka lawm khawp ang a. Ram neitu dik takte chuan compensation an lak hi kan duhsak a ni. Amaherawhchu, Revenue Secretary transfer a ni a, a thar a lo lut a, order thar a chhuah a. Kha *frozen* tawhna area-ah pass thar ti leh turin, a ti duhlotu Kolasib-a SO an transfer bawh a, surveyor an transfer bawh a, heta tangin surveyor 6 an tir thla bawh a, tichuan an ti ta mawp mawp a. Khang zawng zawng kha “pakhatmah kan thun ta lo” tih theih anih chuan ka lawm ngawt ang. Khang zawng zawng ti tur khan kan Minister power lo chuan a tlin lo a ni.

PU LALRUATKIMA, MINISTER: Ni e, Pu Speaker, Revenue Secretary ‘an transfer’ a tih kha ka ui em em a ni a. Kan minister zahawmtak, kan Dy. CM bulah pawh ka sawi a. Kan Minister dang, ka thawhpuite pawhin an hre vekin ka ring. ‘Min transfer sak lo hram teh u’ ka ti a, mahse a tul an ti a, min transfer sak a ni.

Kha Revenue Officer khan transfer kha a dil a dil a. A pasal kha (sawi ta lawng lawng ila, ama hming sawi lo pawhin) pastor a ni a, Saiha-ah a awm bawh si a, tichuan SO Kolasib kha Lawngtlai-ah kan sawn pheih ta a ni a. Chuvang chuan sawn loh theihloh dinhmunah khan ama mimal harsatna zawk kha a ni ta zel a. Tichuan amah thlaktu tur

kha kan ngaihtuah a, ‘tunge fel ang’ kan han ti a, an lo tam mai a, kan MCS officer te an fel khawp mai a. Chung zingah chuan 2013-a ka khingpui, nangmahni lam, Pu Speaker, i Vice President hlui fapa ngei mai kha kan han thlang leh a ni. Tranfer loh tum pawh ni ila a theihloh reng reng a ni. A fel a, engmah sawiselna ka nei lo. Chuvang chuan, Ni e, ZPM Vice President hlui fapa kha ka thlang tlat a ni. Kan thawk ho lovang, khatiang zawng chuan, sawrkar hnaah chuan ‘a tluka tha an awm lovang’ tih tur khawpin a tha a ni. Chuvang chuan, *hnung thak inhih tawwna* kha a awmlo reng reng tih kha ka sawi duh a. Khang ang kha kan sawiloh chuanin *half-truth* kha a awm thin a. Hei, recommend-na te kan dawng teuh a nia, tu recommend-na nge tih te pawh hi kan hre zel a. Helamah kan awm si a, Pu Speaker. Chuvang chuan mipuiin thuchiang an hriat te pawh hi a thain ka hria a.

Chuvang chuan, May ni 27, 2020-ah khan freezing order kan pe a, amaherawhchu, ka sawi tawh ang khan kha kan freezing order kha AutoCAD a nih avang khan kan hawng thei lova, a ngai, *existing road* kha kan freeze tlat mai a ni. Chu chu a lo dikloh thu kha 2021 khan min rawn hriattir a, “helai hi in tidik lo a nia” tiin; chuvang chuan kan freeze nawn leh a ni. Chutah chuan *proviso* pawh kan dah vek a, a hmasaah pawh khan; “Ni 27 May, 2020 hmalama dilna lut zawng zawng chu kan teh vek ang” kan ti a ni. Kan pawm a ngai tlat a, a chhan chu Revenue-ah a process a thui a, a kuma kum, 2018 ami te pawh kha approval pek chauh te kan la nei ve tho a ni. Khang ang kha anih avangin, chung mi ten a an chanvo tur dik tak an chan kha sorkar chuan a duh tlat a ni.

Chuvang chuan khang zawng zawngte kha Pu Speaker, Assembly Question No. 137, “Vairengte-Sairang inkar 4-Lane metre 100 huamchhungah hian Village Council Pass, Periodic Patta leh LSC a awm em” tih kan MLA zahawmtak Pu Lalduhoma hian a zawt nghe nghe a, chhan hmanloh a ni ta ni. Unstarred Question a ni a, hemi freezing order-in a huam chhungah hian pek an ni em tih zawhna kha. Heng, Lalneihkimi d/o H. Sangkunga, Khuangpuilam hnenah hian LSC pakhat (1) pek a ni a. A chhan chu House Pass, 2018-a pek a lo nei a ni. Kha kha thiamlohna pakhatmah a awmlo a ni. Tichuan, Vanlalruata s/o Siamkunga House Pass hi 2020, February Ni 21-a pek a ni a, chu chu Ni 1/9/2021 khan regularize a ni a, helai a freezing order nen chuan in a inkalhna a awmlo a ni. “Khang ho lo kha chu tun thlengin Pass hum an la awmlo rih lo” tih hi he House kaltlang hianin kan MLA zahawmtak Pu Lalduhoma thusawi kha ka chhang ni se la.

Tichuan thil a kal zel a, kan fiah lo chho tulh tulh dawn emaw kan tia. Hei, Press Conference, Press Meet kha September Ni 10 (nikum) khan Pu Speaker, kan MLA zahawmtak Pu Lalduhoma hian a nei a. Tichuan Thawhtanniah ‘a dik leh chiah lo’ tih kha, a naute ho khan an la leh dawn lo nia inngaihna kha an nei a ni ang chu, *thupha*,

ZPM office-ah an chawi thu leh, “a dawng tur dik tak, ram neitu dik takte chuan an dawng tur alawm” tiin a rawn tlip leh a ni.... (*interruption*)

PU LALDUHOMA : Ka point ber chu - ram neitu dik tak ten an dawn hi kan duhsak. Chumi ni lova Surveyor paruk (6) i tirh thlak ten VC Pass, Periodical Patta-a an leh ho kha, (amahin min ti a ka ti ve mai a ni, Pu Speaker) Khang ho kha affidavit te an siam a, kan hmu a, a copy pawh ka la kawl teuh a. Ka hmuhah chuan, “za (100)-ah heti zat hi i ei ve dawn nia” tiin affidavit te an siam a ni. Chu chu a dik lo lutuk a, chumi ti tur chuan Surveyor paruk (6) hi a tir thla baw si a, chu chu a ni ka zawhna chu. Freeze a nih tawh hnuah khan, khang an tirh thlak ho tena an tih zawng zawng kha Pass an pe ta lo a nih chuan, a tawh, an pek leh pek loh kha ka hre duh mai a ni. Chu chu, ‘kan pe let tawh lo’ an tih chuan, a hma kha chu Gazette of India-ah an Pass number nen, hming nen, a area nen leh an dawn tur zat nen chhuah a ni vek tawh a, NHIDCL portal ah thun vek a ni tawh a, kha bak thunluh leh tuma hmalakna kha a ni, ka sawi ni. Chu chu min assure theih chuan,” khami bak kha chu kan pe tawh lo” an tih chuan... (**Speaker:** A sawi kal lai mek a ni e.)

PU LALRUATKIMA, MINISTER: Revenue Department hian Dan fel tak kan nei a, chu kan Dan-ah chuan 17 (A) amendment 2020 hi khami boruak hriat hma daih khan an lo siam a, chutah chuan, “sorkar ram reng reng unauthorised occupant ho chu regularise tur a ni e” an ti a, indaih ni ila chu a vai hian sorkar ina pawisa kan hmuh tur ang kan hmuh loh, pass an neihloh avanga pawisa chawi tir theih baw si loha te kha regularise vek kan duh a ni. Chumi chungchangah chuanin Notification kan chhuah a, chu kan Notification chhuah behchhan chuan Ni 19.7.2021 khan, “17 (A)-a regularise theih ang angte regularise rawh u le” kan ti a paruk kha kan thawn thla a ni. Heta mipui hmaa kan MLA zahawm takin a a statement-ah chuan, “DC-in a lo hnawt haw” a ti a, hmannah DC Inah chawh kan ei a, kan sawi chhuak a, a nui hawk hawk a, “chutiang pawh ka lo hre velo reng reng, ka lo hnawt haw reng reng hlei nem mawle” a ti a. Thu chianga kha kan hriat law law a thain ka hria a, chung anga chu kan Dan leh kan Notification-ah hian, “ram nei dik tak helai hmun a awmte chu, ram an neih theihna turin an mahniin an nei tih hriat nan competent authority Settlement Officer (SO) leh Village Council President in *tih chianna* a peka te chauh kan pe ang” kan ti a ni. Chumi bakah chuan, “a hmuna an thlalak a awm ngei ngei tur a ni” an la ti leh ta zel a, kan fimkhur em em mai a ni.

Chutiang ang chuan kan han inruahman a, “Opposition VCP an ni emaw, Ruling VCP an ni emaw, heng mite hi Dan ang thlapa pek theih an ni e” tia an rawn certified bakah, ‘Land Committee’ kan ti a, Land Committee chuan Dan ang thlapin Kawnpui-ah phei chuan SDO Civil Chairman-na hnuaiah din a ni a. Chung angah chuan NGO hrang hrangte leh Political Party zawng zawng (recognise political party), party

thenkhat kha an lo tel kim dawn si lova, hmingmerhin a thenah chuan kan dah ta hial a ni, recognise an nih siloh avang khan. Mahse tel ve se kan duh avangin chung angte pawh chu tel ve kin 'SAAB' kan tih thin Land Committee kaltlang khan SO authority, Land Authority ang type-a kan neih enkawltu SO leh VCP tena an countersigned, 'a chiang ngei e' an rawn tihna chauha kha kan pawm ang kan la ti leh zel a ni.

Chuvang chuan, bye election-ah pawh khan issue lian tak a ni a, pek duh leh duhlo kha vote kan han zawng ta a ni a. Thingdawl tlang lamah chuan pek duh lam kha an lo tam a niang chu, rin loh deuh mai khan inring deuha te kha an tla a, khatiang vel kha a ni a, han sawinawi zui chi pawh a ni lova. He thil hi mipui hmangaihna avang a ni a, Pu Speaker, kan Dan 47 (Sub-section 4)-ah chuan, "House pass, temporary pass zawng zawngte hi 15% sorkar-ah revenue cess angin a lut tur a ni" tih a ni baw k si a, sorkar sum harsatna nen khan a itawm ve baw k si a, sorkar revenue kan hmuh phah teuh dawn baw k si a tih te kha kan ngaihtuah thlenglo theilo a ni. Mipui an hlawk baw k, in leh lo chan tam tak te, Sikul thaa fate pawh kalpui theilo, lirthei pawh neilo te, concrete building sakna tur pawh neilo ten land value an lak theih hlauh chuan, an tan chuan he sorkar hi "*malsawmna* a ni dawn a ni" tih hi kan hmu a, an ni pawhin an in chiang a ni. Chuvang chuan sorkar-ah rinna an nghat a, a lang ta vek mai a ni. Chu chu sawifiah kil kel kha a thain ka hria a, he House zahawm takah hian. Tun dinhmunah chuan helai hmunah hianin khang *Pass neisate LSC-a leh* tih loh kha chu a awm lova. Amaerawhchu Dan ang thlapin, ZPM VCP a ni emaw, MNF VCP a ni emaw, Congress VCP a ni emaw eng party pawh ni rawh se, Land Committee kaltlanga kan phut ang zawng zawng an rawn tihkim theih chuan kan pe ang a, compensation erawh hi chu kan pek tur a ni lo *Kala* kal tlangin NHIDCN-in a pe mai zawk dawn a ni. Keini Revenue Department chuan survey chauh kan tih sak a, assessment leh a tul ang zawng zawngte kha kan ti a, sorkar-ah pawisa min pekchhuah tur, mipui hnena pekchhuah tur kha a hranpain a awm lo e tih kha ka han sawi nise la.

Pu Speaker, "NH-302 assessment a fel vek tawh a, department-ah an chhung vek tawh a, tute nge a pung hlawkpui awm" tih zawhna kha, ka sawi tawh ang khan sorkarah pawisa kan kaw l lo, sawlai saw a awmzia berah chuan District Collector ten an lo enkawl kha a lo awm a, chutah chuanin Tuichawng, Khawthlangtuipui leh Phairuankai-ahte khan compensatory afforestation, "riverine reserve forest chhung a ni e" tiin Forest Department lamin complain an neih avang khan, eng emaw zatin an la tawh si a, eng emaw zatin an la la si lova, chu chu hmanni Lunglei ka kal khan an lo sawi a, 'E, hei chu kan Forest hotute nen remchang hmasaah kan lo sawi dawn nia' kan ti a. Chutiang chuan khang kha, "sorkar-ah pawisa a pung hlawkpui tur kha sorkar leh department-ah an awm lo e, DC kutah him takin a awm khiau a ni" tih kha hria ila. Tin, chung ang ... (*interruption*)

PU LALDUHOMA : A Company tena pawisa an pek fel tawh kha chuan ram neitute hnenah khan engatinge a luh mai loh? Engatinge khatia hrena a awm tlat?

PU LALRUATKIMA, MINISTER: Pu Speaker, forest nena an buai ta kha, forest khan ‘riverine reserve chung a ni a’ ti khan complain an rawn siam avangin Kala emaw, District Collector emaw khan a pe ngam ta rihlo mai ta chauh kha a ni. Chuvang chuan, department-ah emaw composition sum hi sorkar hian kan sem ngailo, DC, (District Collector)-in emaw a ti mai chauh a ni. La sorkar ngailoh hi chuan hriat kim vek hi a lo har ve bawk a ni ang e. Engpawh nise (*interruption*)

DR. VANLALTHLANA : *Point of Order*, Pu Speaker. Kan Minister zahawm takina Pu Lalduhoma Press Note a rawn chhanlet chungchangah khan, “Dr. Vanlalthlana te, Pu VL Zaithanzama te, Pu Lalchhuanthanga te ka rawn” tih kha a rawn telhin ka hria a, kha kha Pu Zodintluanga MLA zahawm tak nen khan an thuin ka hria a, common recess room-ah khan; an sirah ka lo thu a, phone ka en a, an ti ti a, “engnge i ngaihnan” min rawn ti a, ‘A, ka hrethiam lo e’ ka ti a, amaherawh chu khatianga insawifiahnaa hming lama intih chhuah kha chu a fuhlo mang e aw, khatiang kha chuan tih tawh loh nise tih kha kan sawi lawk duh a ni e.

SPEAKER : ‘*Point of Order*’ tih khan, tuna an sawi lai meka a fiahlo lai kha zawh tur a ni a. Nichina kalsan tawh, khawi emaw lai atanga SMS neuh neuh nena tiha, duh lai lai rawn bun leh chawt mai kha chu a buaithlak deuh a ni e.

PU LALRUATKIMA, MINISTER: Pu Speaker, ka lawm e. Ka rawn a lawm, “ngaihnan sawi tur an nei vak lova” tih kha ka dah zui leh mai a, khalaiah khan.

SPEAKER : I thu leh hla nen khan a inang tawh si lova, a thu kha kan kalsan thui lutuk tawh. Tlabung lampang kawng kha sawi tawh rawh le.

PU LALRUATKIMA, MINISTER: Aw, ni e. chumi anih avang chuan district collector khan pawisa kha a pechhuak ngam ta lo a ni; chu mai zawk chu a ni a. Sorkar sum bawmah emaw, department sum bawmah emaw a awm lo, an aiawha an rawn appoint, *appointed* ngeia khan a la kawl a, chung chu a dinhmun a ni. A ram a fel ve leh an inpe leh mai turah ngai ila a tha awm e.

Tichuan, Pu Speaker, Revenue Department hi kan hriat angin department pawimawh tak mai sorkar-a hmalakna hrang hrang nei kan ni a, kan thusawia kha kan MLA zahawm tak Pu Nihar Kanti Chakma pawhin a rawn zawt tho a, khatah khan a fiah mai turah ngai ta ila. Committee chungchangah khan Nunsuri, Hmundo leh Silgoor

i tia mi kha, ka pu? (**Pu Nihar Kanti Chakma**: A dawng tawh e.) Ni e, a dawng tawh a, Tlabung pawh a rawn lut apiang hi kan pending ngailo a ni. (**Pu Nihar Kanti Chakma**: A thehluhna, a dilna chu a rei tawh a. Thenkhat dawng lo hi engnge a awmzia katihna a nih chu.) Aw le, khangte kha a ni a, chuvang chuan thawktu indaihlo kan ni bawksi a, a buaithlak khawp mai a. Engpawhnise, kan MLA zahawm tak Pu Lalrindika Ralte khan, ‘Zawlnuam area gas pipeline tur avanga harsatna tawk’ a tih kha, hei hi kan hre lo maithei a. Pu Speaker, Indradanush Gas Grid Limited hian India hmarchhaka khawpui zawng zawng hi gas pipeline-a thlun zawm vek an tum a ni. Chutah chuan, Tripura atangin Mamit District rawn paltlangin Aizawl a rawn lut dawn a ni an ti a. Mamit district-a khaw 15 leh Aizawl district-a khaw 6 te hi kan *freeze* a, amaherawhchu, chutah chuan *geo-packing* an rawn ti si lova, a khaw pumpui leh a ram pumpui mai lo *freeze* ngawta kha ‘a dik chiah lo e’ an ti a. Kan han sawi a, geo-coordinate kha kan han titha a, chutiang tur chuan Dilzawl, Rawpuchhip, Sihhmui, Lungverh, Sakawrtuichhun, Tuvamit, Aizawl district-ah chuan khang ho kha kan han ti chho ta a. Khang kha a pumpuia ti lo khan a kalna tur chauh kha kan hriat tawh avangin tifel ila kan ti a. Kan freeze-ah chuan IGCL an thawk dawn a, cadastral survey pawh anmahni lam mawhphurhna a ni dawn a ni. A tul anih chuan, Land Revenue & Settlement Deptt.-in phungbawmah sawmin an lo puibawm dawn a ni. A thawktu kan indaih a nih chuan, Zawlnuam a ni emaw, Mamit district a ni emaw, helai Aizawl district-ah pawh khang harsatna kha chu a kiang zui turah ngai ila.

Tin, Pu Speaker, SO office te a tlabal khawp mai a, “kan admin cost atang tein min sak sak rawh u” kan ti a, District Collector te ruahmanna kan siam zel a. Kan Member zahawm tak hian Hnahlan khua survey hi a vei khawp a, ruahmanna kan siam tawh hialin ka hria a. Kan awl ve leh kan tihsak theih turah ka ngai a. Tin, MLA zahawm tak Pu C. Lalmuanpuia khan, “kan thlanmual ram tur hi min tih fel sak thuai thuai the” a ti a, a dik khawp mai a, kan sawi, kan sawi a. Mizoram Public Investment Board phei chuan a remti tawh a ni. Amaherawhchu, fimkhur thuah khan kan han ti a, Maumual khu en chhuah vek kha a ngai a. House Leader hianin a vei bawk a, “enfiaktu tur kan din ang, pawisa pawh i seng ang” kan han ti a, a la lum ther therin ka hria, Pu Muanpui, vaviinah hian expenditure cheng nuai 50 min rawn pe a ni. Hei hi kan lo enzui dawn a ni. Kan tihfel thuai turah ngai ta ila.

Pu Speaker, Mizoram Land Revenue Rules, 2017 ‘A’ kha MLA zahawm tak Pu Zaithanzama khan “15% cess kha engtin nge ni ang” a ti a, a dik khawp mai a. Nichina ka sawi ang khan, temporary House pass Land Lease, short pass, sold pass khang zawng zawngah khan “compensation a awm a nih chuan 15% sorkar-ah revenue cess atan a chhunglut ang” tih a ni. Amahereawhchu, kan Dan kha kan han amend ta a, chu *Writ Petition* (C. No. 36 of 2021)-ah hian judgement a rawn awm a, chumiah chuan thiamloh min rawn chantir ta tlat mai a ni, kan Dan kha, kan inveng viau emaw kan tih laiin. Kan

sawi khawm vat a, AG te kan hanrawn a, ‘engtia kalpui tur nge ni ang’ kan ti a, kan cess tlingkhawm Revenue-a chhunluh mai tur te a crore tel a awm tawh si a, kan mangang a ni. Engpawh nise, ‘kan appeal leh phawt mai ang’ kan ti a, an han appeal a, engnge kan thlen dawn kan hre lova, a mangan thlak khawp mai a. Dan hian min um reng a, dan lakah mipui a him a, ram a him a, sorkar a him theihna tur khan kan duh tlang ber a. Chuvang chuan, chhe te kan tihsual kha thenkhat tan hlawkna a lo awm theih thin avangin tihsual lova engtik lai pawha fimkhur turin kan inchah nawn mawlh mawlh a ni.

Member zahawm tak Dr. Vanlaltanpuia khan “Pukpui MHA-in rent a pe tha lova, MHA atanga switch-over-in Ministry of Defence-ah a lut a” a ti a. Sawlai hmun saw a hma chuan sipai pangngai an awm thin a, tunah chuan Air Force an awm tawh a ni, Pukpui-ah sawn. Tichuan Land Owner ho khan court-ah an khing a, land rent an pek thatloh avangin court chuanin, ‘acquire mai rawh u’ an ti a, acquire turin hma an han la a, an han ti an han ti a, mahse, eng emaw public interest kha a lo awm chho ve leh a, harsatna kan tawk chho ve zel a. Chutah chuan Kawmzawl *protected area*-ah hian tunhma khan notification (hriattirna ti mai teh ang) a lo awm a. Chutah chuan 1992, November Ni 17 khan, “Pukpui Kawmzawl hi *protected area*-ah awm sela, allotment pekloh ni se, House site atan” tih kha a ni a. Chumi nemnghet tur chuan Ni 27 August, 2004 khan corrigendum (hriattirna) a lo awm leh a, hriat pawlh theih a nih avangin sipai ram luahtute hnen atangin sawifiahna an rawn dil a. Chuvang chuan, “notification hian Pukpui village-area a huam tel lova, Kawmzawl area chauh a huam tel a ni” a rawn ti leh a, Tunah hian Department lamah kan enchiang mek a ni.

Pu Speaker, ka rei lutuk dawn a, Revenue hi a har viau mai a, mahse, ka tui phian mai a, duh aiin. Chekbawk hi MLA zahawm tak Pu Chhuanthanga khan a rawn sawi a, “Chekbawk ram in tichhe vek a” a ti a. Chekbawk-ah hian 1997-ah khan house-site plan, plot 306 kan pe a, 2002--2009 chung khan plot 227, avaiin 523 allotment pek tawh a ni. Chekbawk khu a ramhnuai a, mahse town area anih avangin huan atan a hman theih ta lo a ni. Chulai taka chu, House site emaw, settlement atana pekah hian nakinah chuan, ‘vawk ka lo vulh’ tih emaw, chenna atan nilo thildanga tan kan hman anih chuan miin court-ah min la khing fo dawn a ni. Chuvang chuan, a nihna dik taka hman hi kan inzirtira, kan inhrihriat pawh a pawimawh khawp mai.

Revenue Department hian pawisa kan dil a, kan ram, kan inhmunah te hi kawngchhak a an emaw, kawngthlang emaw an vek sela, house-site plan mumal tak neih hi kan nghakhlelh a, kan duhthusam a ni thin a ni. Chumi tur chuan kan Finance Minister zahawm tak hnenah pawisa kan dil a, min pe hlauh mai a, 28th September, 2021 khan detailment siamin order kan chhuah a, ‘helai hmun hi Dan angin kan siam tha dawn e, kan enfel dawn e,’ kan ti a. Chulaiah chuan thil hriat fuhloh te pawh a awm

ang. Anmahni house-site plan-ah hian plot thar hi, tuna plot awmsa 523-ah sawn tuna kan beisei dan chuan 1083 zet mai house-site plot a awm turah kan ngai a. Chuti anih chuan inhmun lo ram neilo tam takin inhmun kan neih phah theih mahna tih kha sorkar-in a thlir tel bawk a. Chumi tur chuan ngaihtuahna kan siam avangin, vawiinah hian in leh lo han tihchhiat palh a awmin zangnadawmna te kan inpe zel a, sawlaia mite harsatna kan siam chungchangah pawh an hritthiamna kan ngen nghal ni se. Amaherawchu *huan* atan ni lovin, town-area hi chu nakinah chuan *settlement area* tur a nih avangin, helai hi chu kan inhrilhhiat fo a tul khawp mai.

PU LALCHHUANTHANGA: Ni e, khalaiah khan passs kha an nei bik lova, mahse kum 20 chuang te an lo enkawl ve a, khalaia an lo pekte khan an enkawl lo pawh a ni mai thei a, ka hre bik lova. Engpawh ni se, khang ho, mahni ram anga kum 20 chuang an lo enkawlte kha chu tuna house-site plan-a in siam dawn a nih chuan ‘a duhsak theih ve lo em ni’ ka han ti a nih chu.

PU LALRUATKIMA, MINISTER: E, kan duhsak sa reng a, kan hmaih lo turah pawh kan inngai. Midang ho pawh kan theih ang angin inhmun neilote duhsak tel kan tum a, a len dana zirin. Khang kha chu kan duhsak sa, kan rilrua kan ngaihtuah sa vek a ni e.

Tichuan, kum 20 luah avang khan ram nei kha kan ni ngawt lova, Competent Authority-in min pekloh chuan nakinah thiamloh kan chang chho zel dawn a, fimkhur a ngai a, kan inzirtir lehzual pawh a tha awm e.

Engpawhnise, MLA zahawm tak tak ten an han sawi a, “Ramhlun Sports Complex-ah sawn leimin tuar ni lovin inhmunte an nei” tih kha, khang victim ho dahna tura tih kha keimahni kha *allotment authority* kan nih rualin DC khan District Disaster Committee Chairman a nihna angin a rawn recommend a, chung chu kan pe zel thung a ni.

MLA zahawm tak Pu Lawmawma Tochwawng khan, ‘Ram chinfel, border fencing’ a tih kha, *border fenced-out* khu a awm a ni. Hei hi Union Minister Pu Kiren Rijuju pawh helai House committee angin Pu PC Zoram Sangliana ho khan kan zu sawipui a. Chutah chuan, *fenced out*-te hi ramtha, fertile land, thlai chinna pawha ram tha tak takte a nih avangin, ‘a uiawm ang’ an ti a, ‘zing lamah an feh thei ang a, tlai lamah an rawn lut leh mai dawn ni’ a te kan ti a. Hei hi chu keimahni Revenue ta chiah pawh nilo, ‘Ministry of Home Affairs ta a ni e’ tih kha kan han tarlang ni se.

Engpawhnise, district hospital sakna tura ruahman Chhiahtlang VC South huam chhung ‘Pukupui ram’ an tih pawh kha, ni e, khalai kha NoC VC-ten an pekloh chuan kan lo pe thei ngawt lo a ni.

PU NIHAR KANTI CHAKMA: Pu Speaker, *Point of Clarification*, Minister zahawmtakin a sawifiah lai hian - Khami fencing chungchang kha keipawhin vawi tamtak sessison-ah ka sawichhuak tawh a, fencing pawnah khuate a awm nual a, kha mite kha engtia tih chi nge? Entirnan, fencing chhungah lut ta se sorkar-in ram hi a ngaihtuhsak theih dan a awm em tih chiang deuhin min hrilhfiyah thei se ka lawm ngawt ang.

PU LALRUATKIMA, MINISTER: Ni e, Pu Speaker, a zawttu khan kei aiin a hre zawk daih a. Delhi-ah pawh kan kal ho vek a, ama agenda zel kha a ni a. Chuvang chuan, a tihdan tur pawh resettlement te, rehabilitation-te pawh ngai vek tur chi kha a ni a. A bial a ni a, a vei em em a, he House-ah pawh vawi tam tak a sawi a ni. A tula ram awl kan neih phawt chuan khang kha chu sorkar-in a la ruahman zel turah ngai ila. Amaherawhchu Ministry of Home Affairs khan engangin nge ruahmanna a siam ka hre lo le.

Pu Speaker, *Stamp & Registration* chungchang hi kan la hmelhriat vakloh thil a ni a, directorate pawimawh tak mai a ni a. ‘Directorate of Stamp & Registration’ kan ti a, September Ni 27, 2013 khan Directorate thar hawn a ni a. Registration Act, 1908 leh Stamp Act, 1899, a hnua ‘India Stamp Act’ lo ni zui ta te Dan hlui zet mai kha kan hmang thin a. British ho lo duan a ni a, a tha khawp mai a, Dan rem hre tak a nihna chen a awm a ni. India ram state tam takah chuan an revenue hmuh tamna ber a ni bawk a ni. Kum tam tak lo kal chhoh pui tawh hnuah keini pawhin bul kan han tan chho ve ta a. Tunah hian district 6, Lawngtlai leh Saiha District Autonomous District Council-te sawn *Land Act* hran an nei tih hi hria ila. Sawlai vel kan han sawi sawn *Act* hran a nih avangin kan ngaihfin leh zauh thin a, mipuite pawhin kan hriata tan ka sawi duh a.

Chutiang chuan District Revenue-a thawktuten registration fee leh stamp duty-te khawn hna an thawk a. Ram lei, ram inpek, ram hawh, ram dahkham, inremsiam leh document eng pawh mai kha Registration Act, 1908 hnuaia register ngai zawng zawngte a register vek a. Registration Act hi chhiah lakna ngawr ngawr a ni lova, kan lehkha pawimawhte kha sorkar kan vawnthat tir a ni. Court-ah thubuai a lo awm a, kan register loh chuan thubuai neitu khan thiam kan chang lo fo thin a, hei hi chu kan tihmakmawh a ni. Pawisa chawi ngai a nih avangin chu chu sorkar-in revenue a hmuhna tur pawimawh tak a ni.

Tin, National Generic Document Registration System *computerization* atan a hmalakna hi kan nei leh a. Kum 2016-ah India ram pumah Registration of Computerization kalpui turin ‘DoLR’ kan ti a, Department of Land Resources, Govt. of India chuan ruahmanna a siam a. He hna hi National Informatic Centre, Pune chuan thawkin software develop turin Software Develop Unit, NIC, Pune chuan India ram puma inang vek turin ruahmanna min siamsak ta a. Tichuan National Generic Document Registration System software chu an lo siam ta a ni. Tichuan, 6th September, 2019-ah Pu Tawnluia, hon. Deputy Chief Minister hoin Mizoram-a hman theih turin kan lo hawng ve ta a ni. Tunah hian *online registration* tih theih turin hma lak mek a ni bawk a, NE zingah chuan a hmang hmasa ber pahnihna kan ni a. Kolasib leh Serchhip-ah te NEGDRS hi kan launch tawh a, kar leh mai hian Lunglei, Champhai leh Mamit-ah te launch leh mai turin kan inbuatsaih a, hmanrua pawh engkim kan inpeih fel vek tawh a ni. Chumi a nih avang chuan registration leh stamp duty-ah hian kan sum hmuh pawh nasa takin a lo pung chho ta a. Chumiah chuan mipuite pawhin theihtawp chhuahin awarness kan neih zawm a pawimawh khawp mai.

Tun hma khan Revenue ram teh chu measuring tape-a han pawh duai duai te kha a ni a, a lo ni tawh lova. GPS hmangin total station te kan ti a, khang kan hma lakna turah khan khawl changkang tak takte kan lo hmang ta a. *coordinates* a nih avangin office lama kan teh ang ang kha a lo lut chho ta a ni. *Belthleng* ang deuh mai khawl a awm a, chutiang ang te chu a ni a. Drone survey te hi kan han ti a, kan han kalpui zel a.

Tin, Survey Training Institute neih hlan kan nghakhlel a, chumi tur chuan Hualngohmun-ah sawn ram kan nei a, Ministry lamah te umzuiin, a sakna turte kan han dil a, ‘kan hlawhtling mai dawn e’ kan tih laiin covid-19 vangin duh angin thil kan kalpui hleitheh lova. Computerisation of Land Records, Digital India Land Record Modernisation Program hlawhtlinna turin NIC internet kaltlanga land record vawna tur software e-SHRAM software min siam sak mek a, kan peih tep bawk a ni. A nghahhlelhwam khawp mai.

Tunah hian NEC atangin project pakhat “Development of Comprehensive & Integrated GIS Best System for Maintenance & Management of Land Records in Mizoram” tih hi priority sorkar-in min pek avangin cheng nuai 640 min rawn pe a, chungte pawh chu hma kan la mek a. SVAMITVA, “Survey of Villages & Mapping with Improvised Technology in Villages Areas” kan ti a, April Ni 24, 2021 khan Prime Minister Pu Narendra Modi’n a launched a. He scheme-in a tum ber chu Drone Survey hmangin thingtlang khua *survey operation* la neihlohna hmunah te mihring chenna inte a chunglam atanga thlalak hmang chuan ram neitute, ‘ram neitu an nihna’ nemngheh a ni a. Survey of India hian drone hmanga thla an lak te scalable zel niin, Revenue Department *ground-truthing* tih fel puin *property card* LSC ang khan kan siam dawn

a ni. Chutiang chuan kan han inbuatsaih a. Vawiin khan Thingsat leh North Khawdungsei te kan zo fel chiah a, Aibawk RD block-ah hian a enchhin nan khaw sawm kan zo fel a. Darlawn Block huam chhungah khaw 12 kan zo fel bawk a. Naktuk hian Vaitin leh Khawpuar kan hmabak leh bawk a ni.

Chutiang chuan Revenue Department hi kan pawimawh takzet a, kan hmalakna zawng zawngah hian min phurpuitu leh kan harsatna min hriat puitu kan House Leader, Finance Minister ni bawk kan nei a, kan harsatna kan thlen te a rang lamin min ngaihtuahpui thin a.

Tin, Land Revenue-ah hian Socio-Economic Development Board kan nei bawk a, Land reform chungchangah theihtawpin hma kan la a, chumi bakah chuan Saitual khua pawh teh fel turin tunah hian sanction kan hmu bawk a, hma kan la mek zel bawk a ni.

Pu Speaker, Demand No. 26, I&PR hi chu lawmthu sawina lam hlir a ni a, a tlangpuiin Assembly *Live telecast* a nih chungchangah te, Press te nena kan relation chungchangah te, Journalist Welfare Fund siam chungchangah te, pension scheme chungchangah te, he sorkar hian Journalist Welfare Fund atan cheng nuai 20 a dah a, tun thleng hian dah zel a la ni a, a lawmawm ka ti khawp mai a. Tunah hian sorkar chuan a tul ang zela bawhzuiin Journalist Pension Fund tur kha ruahmanna a nei chho zel a. Dan angin kawng a zawh chhoh zel kha a ngai bawk a, chumi tur chuan Finance lamah te, Law lamah te *vetting* a ngai a, chungte chu kan han ti chho zel a ni.

Pu Speaker, Calender kha copy 85,000 kan siam a, mi zawng zawng inkim nei ta ilar a hlu lo dawn a ni. A tlem poh leh thil hi a hlu ve a. Kan member-te tana calender leh diary bu copy khat chauh kha chu kan rawn tipung ang a, kan rawn enzui ang, kha kha chu.

Tin, I&PR-a ka awm lai hian MIS pathum laiin MCS-ah min kalsan a, kan indaih lo a ni. District tharah pawh kan la nei thei lova, Aizawl-ah pawh kan indaih chuang lova. Lirthei kan nei chhe bawk si a, kan mangang a ni. *Austerity Measure* a vangin thil duh angin kan ti thei lova, chung kan harsatna zawng zawng chu kan Chief Minister zahawm tak hian a hria a. Tin, PIO to CM te, PIO to Governor te pawh neih kan duh a, tunah hian kan kalpui mek a. Tin, MPSC lamah hian MIS post pathum exam turin kan inbuatsaih mek bawk a, khangte kha kan dinhmun tlangpui chu a ni a.

Tin, Film & Art, photography chungchangah pawh hian theihtawp chhuahin tan kan han la a. Hengah hian Film competition te, Art-exhibition te, Photo-exhibition te kan han nei thin a, painting lam hi kan thalaite hian an tui a, an thiam em em mai a ni.

Hmasawn zel tur an ni a, hma kan sawn zel theihna turin ngaihhlutna chang pawh kan inhriat chhoh zel pawh a pawimawh a ni. Film lamah pawh chuti tho chu a ni a, hma kan sawn nasa em em a, sorkar-ah ringawt kan inngat thei lova. Chung ang chi hrang hrangte chu *eizawmna-ting* a lo ni chho zel a, kan journalist (kan chanchinbu mi)-te nena kan thawhhona te a tha a.

Covid chung changah te pawh kan thawktute an hah em em a, an tlaivar deuh reng mai a, a hreawm khawp mai. Amaherawh chu an tihur, an mawhphurhna a ni tih an hria a, theihtawp chhuahin tan an la zel a, heng zawng zawng ka department enkawlah te hian keima tih that pakhat mah a awm lova, kan thawktute thawh rimna leh inpekna avangin tun dinhmun hi kan thleng a. Khang zawng zawng, Pu KT Rokhaw khan, “Siaha PR office a chhe hle mai” a ti a, thawktu indaihlohna zawng zawng te pawh kha, keini pawhin theih tawp chhuahin tih that dan tur kan lo ngaihtuah zawm zel dawn a ni.

Tin, Champhai I&PR office kha nuai 50 sanction kan hmu a, PWD-ah kan transfer a, ‘a tlem em mai’ tiin an lo surrender daih mai a, kan ui khawp mai a. Tunah khian Chanem building chung berah kan awm a, chu chu luah zawm zel, Law Department kutah Council of Minister khan a dah a, an hman zui zel loh chuan a chungah awm mai kha kan pawl tilo a ni.

PU K.T. ROKHAW : Pu Speaker, Siaha I&PR office chungchanga sawi ka duh chu - technician 2 leh chowkidar pakhat 1 chiah staff an nei a ni. LDC an neih chhun lah chu February thla khan a pension tawh si a, technician 2 leh chowkider 1 chauh anni a, chuvang chuan LDC kha a thara pek a nih loh chua office run ngaihna a awm lo a ni tih kha kan minister hian min lo hriat sak se ka lawm khawp ang. Tin, office hi tunah hian kum 20 a ni a, Assam type a ni a, a chhe tawh khawp mai a, Khawngaihin a thar min sak sak turin hma min lak sak hram rawh se.

PU LALRUATKIMA, MINISTER: Pu Speaker, Covid hi awm lo se hma kan la duak duak kha a ni a, tunah pawh *Lianchhari Run* sak kan zo tep a, thla 3 thla 4-ah hi chuan hawn theih mai pawh kan inring a. Khang zawng zawngah pawh khan thahnemngaih a na a, duh angin thil a kal hleitheihloh avangin harsatna kan tawh a, in thahnemngaihnaah te lawmthu ka sawi a.

Tichuan, Demand No. 38 - Rural Development Department hi department pawimawh tak mai, thingtlang hmasawmna enkawltu an nih avangin a pawimawh khawp mai a. Hma kan lak dan tlangpuite han sawi hmain House-a kan member zahawm tak tak ten in sawi kha kan note vek a, chhan theih mai turin kan inruahman a ni. Chutah chuan, a tlangpuia khaikhawmnaah chuan Rurban, MJ®S chungchangah hian ni

100-ah ni 100 inhlawhna kan nei thei hlauh mai a, kum 3-na kan nei dawn a. Kum bul lam, sorkar kum tawp dawnah hian empowered-committee an nei thin a, chutah chuan labour budget kan theh lut a, labour projection-a kha min siam sak a, 200 lakh *persons days* kha min han pe hlauh mai a, ni 100-ah 100 kan inhlawh thei a, kan inhlawh theihna chhan hi thawktute mai piah lamah mipuite, VC-te thawh hona a that vang a ni. Chungte pawh chu a ni a, VC kan inchuh luai luai te pawh kha ni 100-ah inhlawh thate pawh kha a ni ve thei a ni. Khatiang kan tan hona kha a ni a, chutah chuan mipui leh khawtlang tana ro tling (assets) tam tak kan siam a, tui dah khawl na water reservoir-te, lei laih (WRC terrace) leh kawng thleng mai pawh kan siam a, step te, lungrem te, faina kawngah te, tui hna humhalh chungchangah te, khatiang zawng zawng *sustainable development* kha hmalakna khan a huam a, chungte chu District Project Director, District Programme Officer leh Block Programme Officer-ten enpuiin an vil zel a ni.

Labour Projection hi kan siam leh turah pawh hian kan tih that dan a zirin a ni a, a buaithlak khawp mai a. Tunlaih chuan geo-tagging vek mai a ni a, system a mumal em em mai a, chungte anih avang chuan kan thawktu thenkhatte phei chu thinga lawn ngai te, han tih tak tak te chuan network a lo chhia a, harsatna kan tawh thin a, ‘ka bei nasa e’ an ti a, an ti dikin ka ring a, a thawktute an fakawm khawp mai. Tun dinhmuna inhlawh tam ber Saitual, Khawzawl, Hnahtial te hian ni 98 an inhlawh tawh a ni. Inhlawh tlem ber district-hi Siaha leh Serchhip niin, ni 92 an ni. Thla khat a la awm a, thla khatah ni 14 aia tam lo inhlawh tur a ni a, kan achieve leh thei dawnin ka hria. Heng kan tih theihna chhan hi kan House Leader zahawm takin pawisa a hun takah sms min pek thin vang a ni. Sms pek that loh chuan khulam atangin a tih theihloh, a thawktu ten a hun takah UC leh engkim tul ang zawng zawngte an tih fel loh chuan min pe thei lo a ni. Chungte chu kan thawhhona, kan inpekna zar kan zo zel a ni.

Tunah hian job card holder hi chhungkua nuai 2,08,273 kan awm a, worker zawng zawngte nen chuan nuai 2,23,095 kan ni a, a hma khan ni 1 ah cheng 211 kan hlauh thin a, cheng 225-ah a chho leh a, kan zuk dil leh a, cheng 233 nikhat rate a lo ni ta a. Hripui len lai pawhin mipui ten harsatna tawh lovin tun hun hi kan thleng thei a ni. Min duhsak hle mai a, y-components leh material components-ah ringawt hian cheng nuai hlir cheng 55,168 min pe tawh a, sms hi cheng nuai 3256 state sorkar atangin kan dawng tawh bawh a ni. Kan economy pawh nasa takin a titha a, kan lawm tak zet a ni. Tin, Central sorkar-in wages te *direct benefit transfer* hmanga minrawn pek zel avangin keimahni account-ah a rawn lut lova, job card holder account-ah a rawn lut zawh a ni.

Pu Speaker, kan mut a chhuak tep mai a. Member tam tak ten an sawia chu, ‘rangva leh silpauline’ kha an rawn ti a, inthlahrung deuh takin kan han sawi a. Rangva hi tunah hianin SPAB an thu tawh a, kan insem hman ang chu kan ti a, order te pawh kan han ti ru deuh a ni. Mahse, eng emaw queries kha a lo awm deuh avang khan kan

han kal kual tir leh rih a, vawiin khan. He Session lai hi chuan kan insem hman lo hret maithei a. Chuvang chuan kan House Leader zahawm tak bulah hian kan sawi a, “E khai, rangva leh silpouline chu a theih anga tam Financial Year tharah, member-te (*interruption*)

PU C. NGUNLIANCHUNGA: Pu Speaker, *Point of Order*. Silpouline kha ni tawh se la, tarpouline kha chu a tlo lo em mai a. Tu emaw ang chu ni ila House-a pawhthler tur chi hi a ni a, mahse kan Minister hi a zahawm em avangin kan insum hram hram a. A tha sem tawh nise la, kan peka te tan khan a hlu lo lutuk a ni.

PU LALRUATKIMA, MINISTER: Ni e, tarpaulin hi a rit ul ringawt mai a, nisaa thlahnih khat a inpho chuan a ram hmuk hmuk mai a. Ni e, Silpouline kha a tha khawp mai. Chuvang chuan kan House Leader zahawm tak chungah pawh RD changtu ka nih angin lawmthu ka han sawi a ni.

Tichuan *Rurban* hi cluster 4 kan nei a, kan vannei khawp mai a, kan tih that avanga hmu kan ni a. An tehkhawng hrang hrang atangin lawmman hi an sem thin a, Covid vang hian engmah an ti thei lova, lawmman pawh an sem thei lo a ni. Mahse kan ti tha a ni ang, January thlaa Delhi kan zuk dawr pawhin an Joint Secretary kha ‘Aizawl rawn zin ta che’ tiin ka sawm a, ‘kan chin fel hunah chauh ka rawn zin ang, chuti lo chu an thik ang che u’ a ti a. RD Block remaining la awmah khan cluster 22 kan dil a, amaherawhchu kan MLA zahawm tak Pu Lalrinsanga Ralte hian a hre ve si a, ‘pakhat chauh an pek che u pawhin pakhat ka chang ang’ a ti a. Pu KT Rokhaw saw helamah hian rawn thut a tum deuh niin ka hria a, a rawn thut dawn chuan Pu Speaker kan duhsak ngei ang. Ramri hrul a awm a ni bawka a, tumahin an thik thei lo turah ngai ta ila. Engpawh nise min han pe phawt se la a tha ang e.

Pu Speaker, lawmawm deuh mai thil kan han nei leh a. PMKSY kha 2018 tawp khan, engtin nge kan kal leh ang aw kan ti a. Tichuan engtin tin emaw a mawng khal kha kan zuk dilchhuak leh hram a, crore 17 min pe a. Tichuan, a tawp tak vang vangah khan Ministry lamin kalpui leh dan tur an la hriatloh avangin tunhnaiah hian min rawn pe leh a. Project 26 kan dilah project 18 min pe a, a lawmawm khawp mai. Ka chhiar chhuak vek lo mai ang a, heng hian ram hectare 44,600 a cover ang a, chutah chuan a vaiin cheng nuai 12,488 a ni. First installment pawh an rawn release leh der tawh a, chuvang chuan theihtawp chhuahin kan MLA zahawm tak ten kan bial chhungah project a awm a nih chuan a hlawhtlin theihna turin min lo tawiawma, min lo enpui zel turin kan han insawm nghal a ni.

Nichina ka sawi ang khan, MGNREGS *Social Audit Unit* leh Gram Sabha te kha kan nei a. Kan MLA zahawm tak Pu C. Ngunlianchunga khan a sawi a, Tuichawng

Tlang te, a bial saw lamah Ngunling khua te, T. Dumzau te, Laitlang tih te kha, khang te tan khan Gram Sabha hian playground laih te kha an lo pass a, *Ni 100 Inhlawhna* atangin ni 5 cut ni se an ti a. Gram Sabha meeting minute hi min rawn thawn a, a nei ve lo nge ni. Gram Sabha in a rel miau chuan tih hi a lo har tawh thin a.... (*interruption*)

PU C. NGUNLIANCHUNGA: Pu Speaker, nichina ka sawi ang khan, sawlaih sawn *veto power* an hmang a ni. Mipui, a zatve aia tlem deuh saw chuan an duh lova, an dinhmun a harsa em em a thingtlang mi rethei tete an ni a. Mahse an EM khan ti tura a tih tlat avangin an ti a, niruk ngawt mai an han cut sak a. Tichuan, mual kha an lai puitling thei lova. Nichina lehkha kan chhiar ang khan contractor-te khan “in laih loh chuan hna inthawk thei lo ang” an han ti zui a. Khangte kha BADP cover area nih kan mamawh zia tilang Chiangtu a ni a. Gram Sabha khan an pass a ni tih nichinah pawh ka sawi a, amaherawhchu an pass dan kha an thuneihna hmanga ‘mipuite duh dan nilo’ ti zawngin sawi ta ila, a tam zawk chu a ni ngei mai a, Gram Sabha chu an ko, mahse inhneh chhuhna deuh a awm a ni. A lai lo deuh a ni.

PU LALRUATKIMA, MINISTER: “BADP scheme-ah telh ni ve tawh se” tih kha telh mai theih a ni lova. Pu Speaker, District Screening Committee-ah kan MLA zahawm tak te hi an tel vek a, khami concern-ah chuan an ko a, an tel lova, an attend lo a nih chuan keini sawi theih a ni lova.

PU C. NGUNLIANCHUNGA: Pu Speaker, meeting an ko ngai lo, amaherawhchu ‘MLA te consult tur’ an ti a, scheme an siam zawh vek hnuah chauh min hrilh. ‘Heti hian kan lo siam a min pawmpui rawh u aw’ an ti a, an tih tawhsa han pawmpuiloh kha tunhma zawng zawng chuan ...

PU LALRUATKIMA, MINISTER: Tun maiah chuan Pu Speaker, a thunluh theih tawh dawn rih lova, a pawh khawp mai. Tihngaihna a awm lo. Tin, kan MLA zahawm tak Pu C. Ngunlianchunga khan ‘Hmunnuam’ a ti nge ni khatah khan ‘Hmawngbu-ah solar water pump project duplicacy a awm thei’ a ti a. Ni e, *non-duplicacy certificate* hi chu kan sign ngei mai a, keini ai chuan a hrechiang tur zawk kha a ni a, a sign tu kha, a bial a ni a. Khalaih kha chuan Pu Speaker, *non-duplicacy certificate* kha min lak tir vek ngei mai a, kan MLA zahawm tak khan i sign ka ring. Engatinge ni aw, khang te kha a lo awm theih ni.

PU C. NGUNLIANCHUNGA: Pu Speaker, ka sawi tak ang khan kan hunlai khan ‘special package a awm dawn’ tiin scheme-ah kan thun a, chu chu JMM-ah khan a rawn thuah ta a ni. JMM lam kha kan hriatpui lova. BADP lam kha chu tunah pawh hian an tan tawh a, BADP lam kha chu kan mawh a ni chiah tawh lova. PHE demand ka sawi tumna zawk a nia, kha kha.

PU LALRUATKIMA, MINISTER: Aw le, a lawmawm e. Eng pawh nise tunah hian BADP pawh tha takin kan kalpui chho zel a. Tunah hian first installment kan hmu a, second installment kan nghak leh a. Tun current financial year-ah hian allocation kan hmu tawh a, sanction hi kan nghak a. Chungte chu kan dinhmun a ni a, thingtlang hmasawna turin theihtawp kan chhuah a. PMKSY kha chu kan sawi zui tawh lo mai ang.

PU B.D. CHAKMA : Pu Speaker, *Point of Order*. BADP implementation scheme chungchangah hian BDO ringawt a ni a. Kha kha mimal anga pek theih dan a awm lo em ni?

PU LALRUATKIMA, MINISTER: Pu Speaker, guidelines-ah khan *departmental work* kha a ni mai a, a guideline ang khan kal a ngai si a, in hre vek tho a, ka sawi tawh kha. MLA fund ang deuh tho kha a ni a, MLA fund pawh kha a tihloh theihloh a, thawktu an awm lo thei lova. Khalai te kha chu kan MLA zahawmtak pakhatin, ‘an sorkar hunah an la ti ve tho ang’ a tih ang deuh kha a ni. Party worker ten an thawk lo thei lova, chung ang te chu a ni e.

Tichuan, hei NABARD, RIDF atangin ‘Spring shed Development for Drinking Water Supply Area’ kan siam bawk a (*interruption*)

PU C. NGUNLIANCHUNGA: Nichina sawi ang khan implementing agency-ah khan Directorate a nih chu kan hria, mahse chutih rual chuan a ziah loh phenah khan list a awm a, kan hre vek a. Kha kha chu kan va phochhuah vek pawh a tul lova, a area- a mite hian 50% tal hi chu chang ve rawh se, an khawngaih thlak em mai, zaa za chu a theih lohva, 70% pawh a har deuh pawh a ni thei. Kan Minister hian RD Minister a nih hnu hian ka biala mite hi a pe tha duh lo lutuk hi, MNF an tam ve tho a nia.

PU LALRUATKIMA, MINISTER: Pu Speaker, kan inlepse dawn em ni ang? Amah pawh ka pek kha maw le!

PU C. NGUNLIANCHUNGA : Pu Speaker, min pe awzawng lo; mi thawh a ni a, kei hi naia sen pawh min pe lo. Kha kha chu Congress hunlaia kan tihfel loh pakhat a ni a, 2017-2018-a mi phei chu mi chhuh fai vek.

PU LALRUATKIMA, MINISTER: MLA zahawmtak khan, ‘DRDA hi engtin nge a kal zel dawn’ a ti a, sorkar-in a ngaihtuah mek a. Chutah chuan Ni 1.11.2021 khan Ministry lam atangin lehkha kan dawng a, nichin khan a chhiar tawi deuh a, a sentence hi. Pu Speaker, i remtihnain ka han chhiar ang e.

“The State/UT may march the DRDA with Jila Parishad/Jila Panchayat of the State/UT. Where they are no Jila Parishad e.g., in North- Eastern States, the DRDA may be march with District Council or other body as maybe decided by the State Government” a ti a. State Govt-in a ngaihtuah ang a, chutah chuan DRDA kha tunah hian DRDO ti turin ruahmanna kan siam a, chutiang tur chuan tunah hian DP & AR leh Law Department-ah te kan kal tir mek a ni. Chungte chu kan dinhmun a ni. (*interruption*)

PU C. NGUNLIANCHUNGA : Ngawi teh, khalai te chauh kha District Council-a pe lovin, DRDA ni lovin ‘DRDO’ tiin State hnuaiah body pakhatin a awm dawn tihna a ni maw?

PU LALRUATKIMA, MINISTER: Kan han ngaihtuah a, State enkawl tur a ni a, tunah hian 96% hlawha tan a kal tih kara sorkar officer, level 13, mi 40/50 vel hlawh la ho mek va pek belh kha chu, ‘*Zunteii nu-ah ka siam ang che*’ tih ang lek kha a ni dawn a. State tan pawh huphurhawm khawp a ni a, kan lu a hai reng a ni. Chuvang chuan, officer lian tak takin an thut kha a ngai si a, officer dang pali, panga emaw lai an awm vek bawk si a, chuvang chuan ‘District Council tan chuan enkawl rual kha a ni lo’ tih kan hre tel vek a, khalaiah khan in thahnemngaihna a lawmawm a. Enkaw l thei dawn u la chu pek che u kha kan hreh lo maw le.

PU C. NGUNLIANCHUNGA: Pu Dy. Speaker, District Council-ah pe u la, a theih lohna tur a awm bik lo. District Council-ah sawn officer pawh an tam mai, lehkha thiam tak tak MCS exam-a 1st position a awm te pawh an awm ve a nia. Pek a nih rau rau chuan a pawisa nen khan pek ni sela. A nih loh pawhin District Council khan transfer se, khalaia thawh tur a sawi ang khan, NERGA te leh thil dang dangte, District Council chuan ama area-ah khan anmahniin implement mai se, an enkawl thei ang tih kha chu Pu Speaker, ka ring a ni.

PU LALRUATKIMA, MINISTER: I rinna ringawt kha a ni a, rinna ai kha chuan a enkawl theitu khan enkawl mai sela a that ka ring a ni.

Pu Lalrintluanga Sailo, Member zahawmtakin a sawi, ‘BADP area-a dah’ tih kha, kan lo dah fel diam tawh a ni, Pu Speaker. Tichuan, RD Block hi ka sawi tawpna a ni tawh ang a. Hei hi engkim kan inpeih tawh a, sorkar hmasaah khan an ti mai dawn emaw kan ti a, Pu Speaker, harsatna an tawk tlat mai a ni. Cabinet atangin an *defer* reng mai a, a sutlang zo lo a ni. Keini chuan kan sutlangpui chho vek tawh a, Pu Speaker, a thutna hi han sawn mai sela chuan kan pe nghal zatin ka ring, a har lo khawp mai maw le.

Engpawh nise Pu Speaker, sawi tur tam tak a awm a. Kan achievement te, kan hmachhawp ang chi te sawi tur tam tak a awm a ni. Chungte chu vawiih hian kan sawi vek seng lova. Kan MLA zahawmtak Pu Zothantluanga, Aizawl West-I bialtu khan Sihhmui Community Hall complete-na tur kha a sawi zing a. Sihhmui khu chhiat that kan tawk zing a, tuitla te avangin, kan ngaipawimawh a ni. Chuvang chuan kan zawhsak theih ka ring a ni.

Kan MLA zahawmtak Pu Ramthanmawia pawh khan a rawn zia a, “Leithum, Lianpui Community Hall sak zawh loh hi min zawhsak the” a ti a, financial year thar hma chuan kan zawhsak chu ka ring. Tin, MLA zahawmtak Pu Lalrintluanga Sailo pawh khan a ti bawk a, Hall ni lovin Panchayat Bhavan te chu kan saksak theih mai chu ka ring a, lian puiin vawikhatah kan kalpui thei dawn lova, chutiang ang te chu kan dinhmun a ni a. Eng pawh ni se, covid hrileng karah harsatna a nep chho zel a, sawti lama Siachangkawn-a Sangau Hall te pawh a ni vek mai, khang zawng zawngah khan theihtawp chhuahin sorkar a kalchho zel a (*interruption*)

PU LALRINDIKA RALTE : Pu Speaker, Hall chungchang a sawilai khan, Bungthuam Hall sak chhonzawmna turte kha ka sawi ve a, kha kha engnge ni?

PU LALRUATKIMA, MINISTER: A ni maw, ka lo hmah tep a, ka lo la keu thlenglo a ni, Pu Speaker.

Kan MLA zahawm tak Pu Lalrindika sawi kha, sorkar hmasa khan Bungthuam Hall kha a ruhrel ringawt min hnutchhiah a, 2019 ka zuk kal tuma ka paltlang khan, ‘hei hi engnge a awmzia’ ka ti a, nuai 10 niin ka hria kan pek kha, a bang leh a chhuat chu an zo tawh a ni. Tichuan, a zawhna tur kha tunah hian sanction kan pe leh tawh a. Nichin khan Project Director-in, “hemi atan hian ₹2,50,000/- (nuai hnih leh singnga) kan dah khiau a nia” a ti a, kar leh maiah chuan an thawh theih ka ring.

Engpawh nise, sawi tur tam tak a awm a. Hnahlan RD Block tih te, RD Block chihrang hrang Pangzawl, Chhipphir tihte leh hmun hrang hrang kha kan sawi vek seng lova. Aiduzawl Hall phei chu BDO hnenah, “kha kha lo ruahman la, kan khawih laklawh si a” ka ti a. Pawisa MLA fund te nena convergence-in kan zo thei turah kan ngai bawk a ni.

Kelkang te pawh kha tlem tlemin bul kan tan a, convergence scheme-a min tih sak theih chuan kan inhawng viauin ka hria a, chungte pawh chu kan ti thei zel turah kan ngai a ni. Engpawh nise, ka sawi rei ta lutuk a, min lo hrethiam ula. Member zahawm tak ten kan han sawi atang khan hmasawmna tur tam tak kan nei a ni.

Tichuan, MZSRM hi tawite kan sawi leh duh chu - MZSRM hian hmalakna chihrang hrang a nei a, chungah chuan Self-Help Group te kan nei a, DDUGKY tih te, khangah khan thalaiten eizawna tam tak an hmuh phah a, kawng an kawhhmuh bawk a. Tin, *Capacity Building*-ah te khan theihtawp chhuahin tan kan la chho zel a, chungah pawh chuan mipuite nena thawhhona tha leh inpekna tha a awm loh chuan kan hlawhtling theilo a ni. Chuvang chuan kan hlawhtlinna hi mipuiaah a inngat a, mipuite nena kan thawh hona that vang liau liau a ni tih kha hria ila.

Pu Speaker, a tawp lama ka han sawi duh thil pakhat chu, PMAY Grahmin kha a har khawp mai a, dawng tura kan inngaih kha kan dawng hlei thei lova. MLA zahawm tak ten Delhi lamah ‘party induhsak nan an hmang’ an ti a, a lehkha ka kawl a, ruling party-in pakhatmah kan la thleng thei si lova, pek zawh thuai thuaia thlan ve hlan kan nghakhlel a ni. SECC data, 2011 thlan kha a ni a, *auto-generated* anih avangin engmah kan lut thei tawh si lova, an phal tawh si lova, tih ngaihna a awmlo a ni. Central lamah khan kan lo zuk sawi leh thin a, tunah pawh hian endiktu an lo kal a, kan dinhmun ‘state dangte lakah chuan a tha hle mai’ min ti a (*interruption*)

PU B. D. CHAKMA : Hemi chungchang hi, Chawngte RD Block-ah chiang takin evidence kan nei a, *randomize selection*-in an ti thin a, permanent waiting list anga a serial hi kal tur anih chuan tupawhin, party lam ni lovin an dawng ve tur a ni a. Mahse, chutiang ni lovin, *pick and choose*-in an rawn ti vek a, hei hi chu thudik a ni tih ka sawi ngam a ni, Pu Speaker.

PU LALRUATKIMA, MINISTER: Pu Speaker, ‘an cut’ a ti a, an cut lova, *permanent waiting list* atang khan *randomize selection*-a lokal hmasa an awm anih pawhin leh a thawktute kha chu an lo induhsak deuh anih pawhin, a hming awmsa bak pawnlam mi an awmlo tih kha hria ila. Engpawhnise, kan thahnemngaihnhate mipui tana kan sawi zawng zawngte kha kan lo chhinchhiah a.

SPEAKER : Minister zahawm tak kha, kha kha pawimawh deuh mai a ni a. Hei hi tunhmaa lo thlan tawh kha a ni a, In tha deuh mai lo nei leh tawhte kha an lo awm bawk si a, khanglai velte kha engtingge an tih dawn?

PU LALRUATKIMA, MINISTER: Khalaiyah khan tunah hian min rawn teh tha leh thin a, geo-tagging a tih leh vek kha a ngaih avangin khangho kha chu an paih ang a, thi tawhte, pem bo tawhte kha chu an paih zel ang a, kan tlem hret hret ang a, mahse a thar thun kha a rem tawhlo thung a ni.

PU LALDUHOMA : Pu Speaker, min han hrilhfhiah lawk se ka duh a. Serchhip-ah pawh khian problem kan nei a, VC ho khan anmahni thuin rem an lo ruat

a, 1st installment, 2nd installment, 3rd installment nghah kha a rei lutuk avangin sum lokal kha mi pakhat hnenah khan a full-in an pe a, khamite hminga lokal kha midangin an chang ve leh dawn ta a, chu chu an hunchhung khan an lo ti si a, a buai zo ta vek mai a. An ta lo kha an la a, an ta tur kha midangin an lak ve leh te kha a ngai a, kha kha tihchian a ngai khawp mai a, a hnawk em em mai a ni.

Tin, Pu Speaker, i sawi ang khan thi te an lo awm a, pemte an lo awm a, lo sa tawh te an awm a, a ai kha chu district-ah khan kan thlang tawh a ni, kha mite ai tur kha chu. District tinah khan thlan tur zat kha pek kan ni a, kan thlang tawh hlawm a, mahse an hmuh hun tur kha chu a rei maithei a. Ka ha sawiduh chu 1st installment la tawh an va endika 2nd installment la tlak tawh lova an ngaih kha ‘lakkir sak tur’ tih a ni a, engtikawng mahin kan inchhuhsak let tawh lovang hei hi chu, central lam thiam loh a ni pawhin ka hria, a khat lutuk a, a ngaihna a awmlo reng reng. Miin an in an thiat a, an lo sa a, sak zawh an awih bawk si lova, (sa zo thei tan) a dawt leh kha a lokal har ropui si a. Chuvang chuan 1st installment la tawh, la sa zo lo 2nd installment hmu tlak lova ngaih kha chu, an lo nei ni ve mai sela, ‘thing thing tawh lovang u’ ka ti a ni.

PU H. BIAKZAUA : Awaas Plus a tel lo khua ka rawn sawi te kha engtia tih tur chi nge ni ang? Kha kha tunah a list ah khan an lang thei dawn hauh lo mai a, khalai-te kha kan hre duh a ni.

PU LALRUATKIMA, MINISTER: Nia, Pu Speaker, Sangau-II, Sangau-IV, Lungtian-I, Lungtian-II, khatah khan Siachangkawn kha Awaas Plus survey hunlai 2018 khan Awaas Plus survey software-ah khan an awm ve ta lo a ni. Chu chu a buaithlak em em a, chhungkaw 20 kha register anni a, a dawng tura kha Lungtian-II ah register a ni.

PU C. NGUNLIANCHUNGA: Khalam kha ni lovin, hmu tawh si, a then chu 2nd installment hmu tawh, a then 3rd hmu tawh, mahse 4th hmu si loa kha Lawngtlai District-ah khan a tam em em mai a ni. (**Speaker:** Ngawi rawh aw. Member zahawm takin a zawt ve a, a chhan lai tak kha a ni a, chumi a chhan zawhah chuan ti ta la, han chhang phawt selangin.)

PU LALRUATKIMA, MINISTER: Survey neih leh anih loh chuan khang ang kha an tel thei rih dawn lo a ni kan ti a. Mahse, “special case-in min consider thei lo em ni” tiin kan ziaa, hetiang hi a awm teuh mai a, Chhiphir te pawh an tel a ni. Khatiang khan khaw eng emaw zat kha ACC data kha a diklo em a, khang ang kha a ni a, *eligible* lo deuh deuh te kha list-ah khan an lo awm a ni, chung angte chu a ni a.

Hei hi 4th Installment a ni a, cheng 1,30,000/- kha. Mizopa chuan Tualpuk ah kan awm a, in thenawm ten min han puahpui a, chawlhkar thum ang vela kan luahluh mai theih ang kha cheng 1,30,000/- kha chuan. Tunah hian 4th Installment hi kan hmu lo kan hmu lova, 1st Installment kan han hmu thap a, 2nd installment kan han hmu leh a, a thenin an hmu lova, a thenin 3rd Installment an rawn hmu leh si a, kha kha keimahni lam mawhphurhna kha ani si lova. Kan zuk sawi thin a, anmahni khan khatiang te te khan an rawn sanction leh lawi si a, chu chu kan buaina a ni a. *Direct benefit transfer* kha a nih thin a vangin harsatna kha kan tawk fo a ni. Chutihlai chuan SMS ah engzatmah kan neilo a ni.

Thahnem kan ngai tlang a, Pu Speaker, ka lawm khawp mai a. Member zahawm tak tak ten kan department hmalakna chi hrang hrangte phur takin, hmasawna turte thahnemngai takin min sawipui a.

PU K.T. ROKHAW : Kha, a titawp mai dawn a, kha, Lawngban, Siaha District kha min thlang dawn a, ka lawm khawp a. Pu Speaker, inkalpawhna a harsat a vangin Tipa Block-a khaw 4 - Chakhei, Siasi, Siata leh Ianah-te Siaha Block a rinluh a ni a, tunah chuan kawng a tha tawh a, Tipa Block-a rin luh tura ka lo ngenna kha khawngaihni min lo hrilhfiah sela ka lawm khawp ang.

PU LALRUATKIMA, MINISTER: Pu Speaker, ni e, kha kha ka react vek hman lova, khang ang kha ziaik ten kan office-ah te in lokal in lokal a, ziaikin emaw rawn thlen mai ula, action kan la ang a, kan chingfel mai thei tur kha a ni a. He House kaltlang kher lo pawh khan ininthlahrung hauh lovin lo leng zel ula. Kan chanvo in ang, kan tih theih ang anga kha, i dinglama thu anni emaw, i veilam a thu anni emaw Pu Speaker, “*Van lal nau ang a tahna..., an dang chuang lo e*” an tih kha maw, a lawmawm e, thahnem min lo ngaih pui zel teh u, hmasawna tur zel a ni.

Pu Speaker, he House zahawm taka ka Demand-te:

Demand No.	Purpose	Amount (in ₹)
6	Land Revenue & Settlement	31,96,34,000.00
26	Information & Public Relations	11,16,85,000.00
37	Rural Development	4,36,17,47,000.00
TOTAL		4,79,74,66,000.00

House zahawm tak hian min pass pui turin ka rawn ngen e. Ka lawm e.

SPEAKER : Awle, tunah chuan Minister zahawm tak Pu Lalruatkima'n a Demand-te:

Demand No.	Purpose	Amount (in ₹)
6	Land Revenue & Settlement	31,96,34,000.00
26	Information & Public Relations	11,16,85,000.00
37	Rural Development	4,36,17,47,000.00
TOTAL		4,79,74,66,000.00

House ah pass a rawn dil a, remti a piangin, ‘*remti*’ ti rawh ule. Remti lo kan awm em? Remti lo kan awm chuan, ‘*remti lo*’ ti ula.

Awle, tunah chuan Minister zahawm tak Pu Lalruatkima Demand-te:

Demand No.	Purpose	Amount (in ₹)
6	Land Revenue & Settlement	31,96,34,000.00
26	Information & Public Relations	11,16,85,000.00
37	Rural Development	4,36,17,47,000.00
TOTAL		4,79,74,66,000.00

House-in lungrual takin a *passed* ta a ni. (**Pu Lalruatkima, Minister:** Pu Speaker, ka lawm e.)

SPEAKER : Tunah chuan Dy. Chief Minister zahawm tak Pu Tawnluia ka sawm ang a. Kan sawihona te rawn windup-in, sawifiah ngai a tih te rawn sawifiah se, ka sawm e.

PU TAWNLUIA, DEPUTY CHIEF MINISTER: Pu Speaker, ka lawm e. Vawiinah ka department chan pathum te House-ah kumina kan sum hman tur ruahmanna budget kan neihte tui takin, phur takin member ten in rawn sawi a, an hnenah lawmthu ka sawi a ni.

Ka department pakhat DP&AR hian sawi a hlawh vak lova. Mi pahnihin an rawn sawi a, tawi te in ka han sawi hmasa lawk ang a.

DP&AR hi kan hre theuh a sawrkar hnathawkte appointment siamna kawngah te, an service chungchangah te, pension chungchangah leh disciplinary action chungchang zawng zawngah te, promotion-ah te, service rules-ah te enkawltu, a khaikhawmtu ber a ni a. Chuvangin, a hah pawh an hah a, file-te pawh hi a intiang ur zel mai a ni, reilo te chhung hian. Chutianga enkawltu chu anni a. Kan hotute Pu L.

Thangmawia leh Dr. Tanpuia khan an rawn sawi ri a, midang kha chuan kan sawi lang vak lova.

Dr. Vanlaltanpuia khan, “MYC-ah hian hnathawktu tur hi mumal zawka kan neih dan te a awm lo em ni” a ti a. Hei hi kan lo ngaihtuah tawh thin a. MYC Act, kum 2008-a siamah khan Chairman leh Members lak dan tur a awm a, amaherawhchu hnathawktu dang lak dan tur kha a lo awm mumalloh avangin DPR-in han lak dan maia kha a hriat rihloh avangin mumal zawkin hei hi chu, ‘staff dang’ (ti mai ila,) mamawh danga hi chu, khami Dan kha han siam hnuah ngaihtuah theih turah ngai ta ila a tha ang a. Tin, Pu L. Thangmawia khan “department zawng zawnga post ruak te hi a hnawhkhah theih loh em ni, a tul zual chu” a ti a. Hei pawh hi sawrkar-in a lo bawhzui tawh a, DP&AR Secretary hovin vawi li, vawi nga an thukhawm tawh a. Tuna pension mai turte emaw, an post ruah dan te leh tun atanga kum 5 chhunga pension turte, “mahni department theuhah lo enfel vek ula, tichuan kan sawiho leh ang” tiin. Post ruak hnawhkhah emaw, kan dinhmun tak tak hi i hrechiang teh ang an ti a. Chu committee chuan nakinah Manpower Assessment Committee hnenah an la thlen ang a, chutiang chuan sawrkar-in mumal zawkin a la enzui turah kan ngai a ni.

Tin, DP&AR atanga kan sawi duh chu, Pu Speaker, DP&AR hi department zawng zawng enkawltu nimahse hriat a hlawhlohna chin hi a awm chungin, Mizoram sawrkar-ah DP&AR hian *Govt. website Excellence Award*, 2nd prize kan dawng a. Hna an ngah teh lul nen, an invawngfai thain hetiang hian an hnathawhnaah lawman te pawh an dawng thei a ni tih kha kan sawi duh a. Tin, ‘good governance’ chungchangah Home Ministry-a Personal Public Grievances Pensions, Govt. of India in Sector 10 chhungah Indicator 58 hmangin State Govt. hrang hrangte endikna a siam a. Mizoram hi Hill State category-ah kan awm a, kan department performance, All India Hill State hrang hrangte zingah telin hetiang dinhmun hi kan lo hlawhchhuak ve tih kha vawiin niah hian ka sawi duh a ni. –

1. 1st position in Agriculture & Allied Sector;
2. 1st position in Public Health Sector;
3. 5th position in Commerce & Industries Sector;
4. 3rd position in Public Infrastructure Utility Sector;
5. 2nd position Economic Government Sector;
6. 3rd Social Welfare Development sector;
7. 5th position in Judiciary and Public Security Sector;
8. 5th position in Citizen Centre Government Sector;
9. 5th position in Commerce and Industries Sector;
10. 2nd position in All round development.

All India level-ah pawh Mizoram sorkar department hrang hrangte performance tehnaah hetiang dinhmun kan thleng thei kha kan Chief Minister kaihruaina hnuaiia kan sorkar hnathawktute thahnemngaihna leh an efficiency a awm a ni tih kha an rawn tarlang chiang hle a ni.

DP & AR hian ‘Subordinate Service Election Board’ kan tih kha kan enkawl pakhat a ni a, a dang leh chu Administrative Training Institute (ATI) saw kan enkawlina hnuaiia awm a ni bawk a. Tin, DP & AR atang hian Mizoram Public Service Commission-a ngaihtuah tur promotion emaw, recruitment thar emaw pawh hi vawi 83 kumin chhung khan proposal an thawh tawh a, Mizoram Subordinate Service Section Board-ah hian recommendation 76 an siam tawh bawk a ni. Thil pakhat kan information ah, kan Head of Department zingah MCS te, IPS te, IAS te tun kum chhung khan 21 zetin min pension san a, hei hian promotion pawh a siam rualin kan officer duhawm tak takte an lo chawl ta a ni. DP & AR-ah chuan khati zawng kha ni mai se.

Tin, kan peng pakhat ‘MSSEB’ kan tih, Mizoram Subordinate Service Election Board hi MPSC hnathawh a rit em em avangin non-gazette ho hi chu ‘MSSEB hian ngaihtuah rawh se’ tiin Board hi keimahniin kan siam a, chuvangin Group-B non-gazette chin hi recruitment, promotion leh departmental exam te an ti ve thin a, tunah hian an hnathawh te pawh an rawn tarlang ve a. Tam tak an thawk a, hei hian MPSC te a chhawk zangkhai tha em em a ni.

A dawt leh ah chuan, UD & PA hi tukin ah khan Member zahawm tak kan Minister lo ni tawh, UD & PA pawh lo enkawl tawh thin Pu Zodintluanga khan an mahni sorkar hun laia chelhtu alo nih angin UD & PA bul an tan dan te kha a rawn sawi a, kha kha file record-ah awm vek a, an sorkar chhunga an hnathawh a sawite kha kan zavaiin kan appreciate thiam pawh ka duh khawp a ni.

Tin, Smart City chungchanga ‘funding pattern 50:50’ tih kha vawiin ni thleng hian kha kha a awm a ni. Amaherawhchu 90:10 tur hian State tin te hian kan nawr a, chung an nawrna chu a kal zel a, order leh thupek awm chiah lo mah sela harsatna nei lovin kan la kal zel a ni tih kha ka sawi duh a ni.

Kan Minister zahawm tak hi Delhi-ah cancer inenkawla ka awm laia a lo lenin kan sawi thin a, “ka aiawh pawhin Minister i theih theih lo kawm rawh” ka ti a, a ni sawi kha ‘a dik tho’ tih kha ka sawi duh a ni. Khalai kha Pu Zodintluanga’n a rawn sawi leh sawitu hmasa ber a ni a, ani hi a hawihhawm a. “Vawiin chu business dangah ka kal a ngai a, i windup pawh ka ngaithla hman dawn lova min lo hrethiam teh” a ti a. Hawihhawm takin mi a rawn ngaihven a, kan lawm khawp a ni.

Tin, Smart City-ah hian PMC (Project Management & Consultant) firm hi rawih a ngai a, chu chu WAPCOS ho an ni a. A sawi ang khan anni khan a tirah an thawk tha duh lo a, keini khan sawrkar kan siama kan han chelh pawh khan kum khat chhung kha chu kei kha ka lo damlo bawk nen, CM-in alo enpui hman lutuk lo bawk nen khan kan kal hleithei lova. Pathian zarah damtea office ka han kal theih atang khan theihtawp kan chhuah a. Tunah hi chuan chhawr hrehawm lutuk lovin kan kal tlang thei ta a. Khatiang khan anni te nen hian kal kawp lo thei lovin Smart City kenkawhna dan ah khan dan a awm si a. Chu chu vawiina State sawrkar-a kan hna pangngai leh department dangin kan hnathawh ang khan a kal ve lo tih kha ka han sawilan duh pakhat chu a ni. Tunah hian DPR siam tur pawh a tam tawh lova, tam tak hi tihian kan kengkawh chho a ni tih kha ka sawi duh a ni.

UD & PA-ah chuan heti zawng hian Pu Speaker ka han sawi ang a. Member-te thusawi kha an lo record vek a, kan officer ten a chhanna tur te pawh an buatsaih vek mai a. Amaherawhchu, vawiin ah hian heng zawng zawng hi chhiarin chhang dawn ila kan hun te a rei lutuk palh ang tih te ka hlau a, tihian ka theih ang ang ka han sawi ang a.

Pu Zodintluanga Ralte in SIPMIU chungchang ‘Phase 3’ kan tih Setlak bul Tlawng, Tanhril ram atang Laipuitlang-a pump chhoh tur kha a sawi a. Hei hi kan hna a kal mek a, SIPMIU atang a kan thawh a ni a. Tunah hian Vaivakawn, Zohnuai leh Hunthar veng inkar, a lun lai tak khu hun rei tak harsatna kan nei a, ‘kawng kan siam thei dawn lo a nih hi’ a tiha objection lian deuh a awm hnuin theihtawp kan chhuah a, a tawpah chuan khulai khawtlang hotute leh in neitu te nen pawh inremin tunah chuan kan siam chho thei ta a. Khu khu thla 3 vel chhung chu a awm mai awm mang e; uluk takin pipe lianpui khu concrete-in a chung leh a hnuaiah nen kan hung kha a ngai a, chutiang lo chuan siam kha a har tlat mai a. Mipuiin tui kan duh si a, ‘a to leh, a to deuh mai a ni ang chu’ ka ti a. Kan officer te chuan hautak pawh an ti chungin mipuite hmingin kan kal a, tunah khuan kan ti chho mawlh mawlh a. Traffic jam pawh a siam thin a, kan kaltlang chang pawhin kan hre dawn nia.

Tichuan phase 3 hi kan kalpui zel a, a bak Tlawng-a *intake*, a tui kan dawhna tur lai tak kan siam khu tui tlem, thal-va-ek-char lai a ngai si a, tunah khuan a siam tan theih chauh emaw a ni ang a. Kan rin dain khu khu an siam zawh rual hian tui lak hi kan nei pum thei ang a. Tichuan, tuna kan neih bakah hian Aizawl khawpui hian tui nitin 37 million litre/day kan nei thei dawn a, kum tawp lamah te chuan kan nei ve thei tawh ang em kan ti a.

Tin, Pu Zodintluanga khan, “thal tuichawi te hi a va ngai leh ta ve, engtingge ni” a tih kha, kan theih tawkin Aizawl khawpui tui tlan tur hi kan ngaihtuah a. Engpawh

nise, tuna kan tui pump chhuah pangngai hi chu kan khawpkham tawh lo reng reng a, chawi hi chu englai pawh hian, fur lai pawh chawi kan la ngai a, private ina tui an zawrh te hi chu a bang thei tak tak dawn lova, a ban theihna tur chuan tunah kan scheme thawh mek chu kan nghak a ni. Tin, Tawi tlanga tanga kan tui lak thlak kha a la kal zel bawk a, hei hi Aizawl khawpuiah kan tihpuitlin hunah chuan tui kan mamawh ang te kan nei thei turah kan ngai a ni.

Tin, Smart City hnuiaia kan hna pakhat, New Market chungchang kha han sawi ka duh a ni. New Market chu kan hria a, Aizawl-ah kan bazar hlun ber, a lun ber leh a pawimawh ber a ni. Tunah chuan Commerce & Industry atangin theihtawp an chhuah a, saw building hrang hrang pawh a awm a. Tichuan, Smart City atanga kan hmalakna tur pakhat hian, 'Modernization of Bara Bazar' kan ti tawp mai a. Building pakhat kha Commerce & Industry Department in an thiat a, tichuan keiniin Smart City lam atangin kan sum neih angin han thawh kan tum chhoh karah khan, sawlai bazar-a lo thute sawn duhdan te pawh an nei ve a, harsatna eng emaw chen kan neih hnuin duhdan kha Commerce & Industry te nen sawiho zelin a inpawh chho ta a. Kan ngaihthlak tawh ang khan, tun thla chhung hi chuan tender hmanin, sawlaih saw chuan hma kan la thei tawh turah kan ngai a ni.

A man tur hi a tirah chuan ₹34 crores angin, khami mil, kan pawisa neih daih khan, 'i sa ang' kan ti a. Mahse bazar-a thu thin te khan 'kan leng lo' an ti bawk si a. Pawisa kan nei lo kan ti a, mahse khatia kan tih kan tih hnuah khan a tawpah chuan anmahni leng ngeiin bazar pawh chu chhawng sarih laia sangin hma kan la thei dawn ta a, chu chu kan kal tum dan a ni. Chawhmeh dawr te, nepnawi dawr te, tea stall te, thumhna dawr te, secondhand dawr te a awm ang a. seat kha helaia ruahman ang hi chuan seat 1106 kan siam dawn a. Association member te chu 1093 niin an leng vek dawn a, tlem a bang dawn tihna a nih chu. Chu bakah chuan motor parking a awm ang a, LMV - 31 leh 2-wheeler - 78 a leng dawn a. Tin, Lift, bungraw kalna leh mihring kalna a awm ang a, Cold Storage a awm ang a, cctv a awm ang a, ATM leh Food Court a awm ang a, Office leh Small Conference Room a awm bawk ang a. Sawlai chu changtlung deuh a siam kan tum a ni.

Chutiang chuan mamawhna han dahkhawm khan block hnih (2) a ni dawn a, a block hnih chuan a man pawh a sang lo thei ta lova, cheng vaibelchhe 42.83 a ni a. A hma khan vaibelchhe 34 kha allocation kan siam a ni a, chu chuan a daih tak loh avangin Smart City sum khawi emaw laia mi tlem kan save theih chuan kan belh mai ang a. A nihloh pawhin khawimaw lai sum atangin a daihlohna hi chu kan ti mai dawn nia kan ti a.

Hetah hian Pu Speaker, ka sawi duh chu, a man pawh a to a, survey chhung pawh a rei a. Geology & Mining hotute leh Smart City hotute nasa takin an tang a, an survey hnuah a design te pawh competition an siam a, uluk tak a tih vek a ni. ‘Sum kan nei daih si lova’ tih laia ka rilrua awm chu, tun bak hi hetah hian kan sa zen zen tawh dawn si lova, chuvangin, ‘tuna mamawh phuhru tur hian hma i la mai ang’ tih kha ka ngaihndan a niha vangin hetiang hian kan kal tlang chho thei a. Pathian zarah dam tea kan awm chuan tun thla chhung ngeiah tender pawh kan chhuah theih ka ring.

Tin, “Smart City sum hi sport lam hlir maiah, field in siam tam” tih te kha a awm a, kha kha a awm nual lah tak a. Amaherawh chu keini chuan kan dan te, Smart City dan te kan en pawhin a tul angin heng hi chu a her rem theih zel a ni tih hriain leh kan sportsperson leh thalaite lam atangin beiseina pawh a sang tih kan hria a. Chuvangin tunah hian Hlimen-ah te, Tuivamit-ah te, Edenthah-ah te, Durtlang-ah te leh Zemabawk-ah te field lian tak tak kan siam dawn a, a then chu kan tender tawh a, a then chu tender turin kan peihfel tawh a ni tih kha ka sawifiah duh a ni. Dan khan a phal a, tin, kan thalaite tan sports facilities, khang ground te kha a lo awm chuan an mahni tuaihriamna leh zirna (education) pawh a ni tho a lawm maw le, khati zawng pawh khan ngaihtuahna kan hman dawn nia tiin ngaihtuahna kan nei a ni.

Tichuan, Smart City-a tkan hmalakna pawh hi tlem han tarlan kan duh a. Hemia kan Consulting Firm chu MS Workers Limited a ni a, chu chu project management consultant niin, engkim an mahni tel khan ngaihtuah a ngai ta a ni. Kha kha kan ruai a, tichuan tun dinhmunah hian project pahnih kan zo tawh a, *Procurement of Traffic Bollards* leh *Pelican Crossing System* hi kan zo tawh a, tunah hian project thawh mek, ‘Integrated Command & Control Centre’ (Triple C) kan ti a, Trerasury Square chungah sawn va kal ula, a hmuh nawm tawh khawp mai a, hei hi May thla velah a hawn theih kan ring a (*interruption*)

PU LALRINDIKA RALTE: Pelican Crossing System-ah hian engzatnge pawisa sen a nih tih kha min hrilh lawk thei em aw?

PU TAWNLUIA, DEPUTY CHIEF MINISTER: ‘Zebra Crossing’ kan tih te pawh hi a ni ang a, ‘Bollards’ kan tih chu hei, an hun thliah thliah te pawh hi a ni ang chu. Tin, Reverse Vending Machine, Maintenance of Tourist Guidance Centre (Kiosks), Digital e-Library leh Refurbishment of Mizoram State Museum te hi tunah hian kan thawk mek a ni. Tin, tender neih mek Common Bio-Medical Facilities, Waste Treatment Facilities Construction, Entrepreneurship Development Centre Incubation Centre and Start-up Hub, Construction of Indoor Stadium at zuangtui, Construction of Playground at Mitlamual Zemabawk tih te a ni a. Tin, Construction of Outdoor

Recreational Centre leh LED street light chungchang nichina an sawi te pawh kha tunah hian a huam thei ta a.

Tin, Energy efficiency te, Construction of Playground at Edenthar, Tuivamit, Hlimen leh Durtlang tih te, tin Zemabawk-ah playground lianpui siam kan tum a, tuna kawngthlanga mi saw kan dawh belh ang a, chu chu 20 crore chuang man a ni dawn a ni. Tunah hian Steps & Stairs Improvement kan ti a, Aizawl khawpuiah hian hemi Assembly House leh Chanmari Kawn inkarah hian step hrang hrang siam mek bawk a ni. Chu chuan khawpui pawh a ti mawi ang a, step kal tlang Treasury square leh helai ami pawh hi mawi hnai taka siam turin a thawktute pawh ruat vek tawh a ni. Tunah hian tender mek kan neih chu, Construction of High School Field (multipurpose Ground) leh Construction of Playground at Chite te an ni. Tichuan tender document buaipui mek Durtlang leh Zemabawk ami kha a ni a, 15 hi tender document kan buaipui mek a ni.

Chuvangin Smart City atanga kan project hrang hrang neih hi uluk taka tih a ngaih avangin leh kan PNC te nen a inhmutilang taka engkim tih a ngaih avang te, department pakhat chauh nilo entirnan, helaia Pelican Crossing tih te Traffic Bollards tiht e pawh kha Traffic SP te nena sawi vekin. Tin, Law and Order concern a nih chuan Home, Bazar lam a nih chuan Commerce & Industry, Damdawiin lam a nih chuan Health, tiangin Trauma Centre hi Civil Hospital-ah sawn siam kan tum a. An ni hianin an duh zawng an la sawi thiam lutuk lova, khang kha kan hmabakah a awm bawk a, thil tam tak a awm a ni. Chuvang chuan, Smart City hi a bula khan thuhmasaah kan neih avang khan ka sawi thui deuh a nih chu. Pu Speaker, kan CM min enpuina hnuaiah hma kan la leh char char a ni e tih kha ka sawi duh a ni.

Tichuan, UD & PA ah hian sawi tur tam tak a awm a, in rawn sawi nual bawk a, mahse ka sawi ang khan thil tam tak kha sawi vek dawn ila, kan hun hi a chep tawh deuh bawk si a. Chuvang chuan thil tam tak ka sawilo mai ang a.

Tin, kan hotute ina insawi kan han zirchiannaah thil tam tak han chhan nghal mai remchange pawh a awm a. Pu Lalrinsanga Ralte khan, “SEDP hnuaiah New Builum leh Goshen Veng, Rengtekawn-ah 2019 khan hall sak a bul tan tawh a ni” tih, khami chhonzawm zela pawh kha, tunah hian bawhzui zel a ni a. Hall sak zawhna tur hian sum nuai 16 vel a la ngai tih hriat a ni a, sum remchan ve leha thawh turin kan lo chhinchhiah e.

Tin, Pu KT Rokhaw khan thil chithum a sawi - football ground, sinking areas chei tih leh town beautification tih te pawh kha kan lo chhinchhiah a, a theih ang zelin kan lo en ang e.

Tin, Pu Lalrintluanga Sailo khan “West Pahileng VC pahnihin hmasawna tura rawtna anrawn siam” a tih kha, tunah hian sorkar-in a chhinchhiah vek a, sum dinhmunin a zir ve leh heng hi kan bawhzui dawn e. Tin, “Aizawl khawpui chhunga electric ban tin cable hnawk lutuk chinfel nan hmalakna a awm em” tih kha, hei hi UD & PA chuan a hria a, remchang kan dap hnuin Smart City hnuaiyah Multi-utility Power Project 25 crore man zet duan a ni a, reilo teah a hna tan theih tura beisei a ni a, kan lo bawhzui ve tawh e.

Pu Lalrindika Ralte leh Pu Nihara-te Zawhna, “Tlabung leh Zawlnuam HFA 1st Installement chauh kan dawng a, 2nd Installment hi engtin nge” tih kha, *Housing For All* scheme hi a kalphung kan sawi ngun tawh a, amaherawh chu, nichina RD lam sawi ang khan, Insak hi mirethei leh harsa tete te tan a ni lo thei lova. Sum pe mah ila, an tan hna han thawh te a lo har a, hetia installment-a tih hi an tan problem a ni tih chu kan hre chungin, tunah keini pawhin 2nd Installment turin central-ah kan vawm thla vek tawh a. Amaherawhchu, a hmaa minrawn pek tawh sa covid avangin K-Deposit eng emaw zat a awm thin a ni. Thudik ka sawi a ni a. Mizoram miputen sum covid dona atana mamawhna karah kawng danga kan hman turte K-Deposit atanga la chhuah hleihtheih loh, remchang lo a awm a. Chungte avang chuan, *Housing For All* scheme-a sum awmsaa ngaih pawh kha a che hleithei lova, chu chu kan Member zahawm takte pawhin min hriatthiampui kan duh a ni. A rawt rawta thil kan sawiloh chuan eng emaw kawng zawnga indem palh te a awm thei a, khalai te kha kan sawi duh a ni.

Tin, PAHOSS chungchang sawina pawh a tam hle a, zawhna pawh a tam a. PAHOSS hi dilna tam tak kan neih tawh te, approved tawh hnu pawh a then chu anrawn in withdraw a, tunah hian 11 tihpuitlin tawh a ni. Hmanniah pali anrawn in report a, ‘kan tipuitling tawh e’ an ti a. Tunah hian kan hawn tawh hoa kha chu hman tangkai zel a ni. Member zahawm tak thenkhatte khan ‘tihtawp mai a tha lawm ni’ tih te kha a sawi a. Tih tawp lampang hi sorkar rilruah a awm lova, tunah pawh hian covid avangin kan pawisa hman tura sorkar-in min ruahman sa pawh K-Deposit ah nuai 4,000 chuang a awm a ni. Amaherawh chu covid avangin helamah hian hma thar la lovin, kan ‘go-slow e’ kan tih kha, kan hriatthiam mai ka ring. Kan siam tawh hi chu a tangkai tih ka hria a, hnungtawlh mai zawng chuan ngaihtuahna a awm rih lo e.

Tin, hei hi kum 20 hmalamah khan lo tih tawh ni se chuan tunah hian kan traffic jam hi a ziaawm phah em em dawn tih hi a chiang em em mai a, churang chuan hei hi chu sorkar-in a kengkawh chho zel dawn a. Tin, hetah Kolasib, Champhai, Lunglei-ah tih pawh kha pawisa kan dah vek tawh, mahse covid avang bawkin kan la hmanhmawh theilo a ni e. Khang kha hnuhkir lampang a nilo tih kha ka sawi duh a ni.

Pu Ramthanmawia khan “notified town-a puan thar-ah hmasawna ruhrel” tih kha, panga a ni a, kan hria a. CM hnenah pawh han sawi ta ila. Town-a puan thar dang te kan nei si a, SEDP atang pawh hian eng emaw zat han siam chu a tha lawm ni an ti a. Aizawl khawpui-ah te, Lunglei-ah te hmun dangah te pawh *town* a nih avangin tuna JJM scheme-ah te an tel thei lova, ‘khulai-ah hna neuh neuh i siam ang hmiang’ ka ti a. Amaherawhchu, “ngawi rawh, Covid hianin tlemin min la tibuai a, kal chak hi a remchang rih lo e” kan ti a, kan hrethiam tlang a. Chutiang chuan kan dinhmun kha a rawt rawtin ka sawi a nih chu. Thil hi sawifiah loh chuan eng emaw a awm thin a, kha lai kha ka sawi leh ni sela.

Tin, Pu Vanlalhlana khan, “Dawrpui pheih kawng lun laiah hian PAHOSS hi tih dan a awm ang a” a ti a, kan CM pawhin hei hi a zawng a, in lei tur hi. Mahsela, mi hian in hi an lo hlut thiam tawh a, thenkhat withdraw te pawh hian an ui leh hnunawh a. Sawi tawh ang khan, sakna tur kan pe a, a parking fee kha anmahniin an pumbilh leh bawk si a. Chuti chung chuan miin an inhmun te an pe mai remchang lo tih kha kan hriatah ka sawi duh a ni.

Dr. ZR Thiamsanga khan, “bill leh cheque te hi DUDO Office-ah tih sak ve theih a ni ang em” a ti a, UD & PA hnuai DUDO Office-ah hian cheque an khawih ve theih nan *Accounting Code* mumal tak siam a ni tawh a, fund kan hmuh ve leh hman tawh tura beisei a ni. A hlawtling sa a nih chu.

Tichuan, Pu Dawnga’n, “Kawnpui PHE SDO Office, “engtikah nge” a tih kha, englai pawhin kan hawng theih tawh a. Amaherawhchu Session te kan neih avangin hian March thla chhung hi chuan kan thei dawn lawm ni, kan ti a ni. Kawnpui pawh a ni ang a, Kolasib leh hmun dang pawh a ni ang a, UD & PA hnuai atanga khawlai hna, step siam, railing siam te kha tunah hian a chanve hian kan la tawh ang em tih kha, Covid avang bawkin Finance atangin a tahtawl chuan a rawn chhuak ve reng a, mahse, a *huk* khan a kal thei bik lova, kha kha kan nghah thiam pawh a ngai e.

Member zahawm tak Pu Zaithanzama khan lawmthu te a rawn sawi a, keini pawh kan lawm khawp mai a, khatiang tawngkam kan hria te kha keinite tan chuan a nuam ve khawp mai. Tichuan, Maubaw-k-a kan Hall sak pawh kan chhonzawm ang a. A Phase-wise a kal lo theih loh a ni a, vawikhata zawhna tur sum hi a nghah theih si lova. Bungkawn Hall sakna tur pawh saw a phase-wise in kan ti ang kan ti a, tunah pawh hian 200 kan dahin ka hria a. Khatla Kawn pawh saw kan theih ang angin kan chhonzawm ang a, Ramhlun North Community Hall pawh saw khatiang te te khan a kal chho ang. Ramthar Hall pawh saw chutiang chuan a tahtawl te tein, a phase-wise te tein kan kal chho ang a, *ongoing work*-in kan kal chho a ni tih kha kan sawi duh a. Ramhlun South-

ah pawh car parking kan sa a, Ramthar Veng-ah Hall kan sa bawk a. Aizawl North-II bial te pawh kan hlamchhiah bik lo a ni tih kha ka han sawi duh bawk a ni.

Tin, Pu Zaithanzama bawk khan, “tun tum Salary, kum kal mekah 4900/- vela a tlemna chhan kha sawifiah ni se” tih kha, kan Officer ten an han enfiain kum 2022-2023 Salary requirement hi Finance department-in formula felfai tak a siam hmanga siam a ni. DA hi pung lo tura siam a ni a, hei vang hian Salary hi kum hmasa aiin a tlem ta a ni. Hei hi UD & PA chauh ni lovin department dang *salary head*-ah pawh kum hmasa aiin fund a tlem ta vek a ni

“Lunglei town truck terminal leh solid waste management centre-te a ruahman ve theih em” tih kha, Lunglei Solid Waste Management Centre hi NLCPR hnuaiah project kal lai mek a ni a, central atang a funding a rawn chhuah tak avangin tunah hian crore 2 leh a chanve vel emaw ni chu a lo kal leh tawh a, hna hi chhunzawm zel tur a ni e. Truck terminal erawh kha chu, a hmun pawh zawn fel a ni tawh em ka hre lova, Lunglei MLA ten kha kha hnaah lo neih ve mai teh u.

PAHOSS chungchang chu ka sawi tawh khan a hrilhfiah maiin ka ring a. 2-wheeler taxi stand chungchangah Pu C. Lalmuanpuia, MLA khan zawhna a siam a. Tunah hian 2-wheeler taxi stand hi Aizawl khawchhung veng hrang hrang hmun 28-ah neih mek a ni. Kum thar 2022-2023-ah 2-wheeler taxi tan parking area dang hmun 15-ah siam belh tur a ni e tih kha ka chhanna a ni.

Dr. Vanlalhlana khan, “Ramhlun South Utility Centre sak mek hi a vuaicha deuh a min enfiain pui theih em” a ti a. Contractor hi kan tur ve mawlh mawlh a, ‘kan hria e’ tih kha ka chhanna ni se. Tin, Pu Duha leh Pu Thlana khan zawhna intawm ang deuhin Smart City hnuaia infrastructure chungchang kha an han sawi a. Hei Smart City project kan khawih tur te hian Mission guideline-ina a sawi *Care-infrastructure* project-te hi a khawih kim hle a, sports ringawta inthlurbing anga sawi kha chu a dik hlel deuhin kan hria. Kan project turte hi chu a awm ve nuaih mai a, ‘khatah khan kan inthlurbing lo e’ tih kha ka han sawifiah ni se.

ULB Gram, ‘Lunglei Municipal Council tan’ tih kha Dr. Vanlalhlana khan a sawi bawk a. Budget buatsaih lai hian LMC hi notify a la ni lova, tunah hian hnathawh bul tanna turin notify a ni tawh a. Hetiang a nih takah chuan sorkar kum tharah Finance Department nen a taka hnathawk nghal theih turin kan buaipui ang a. Tin, Fifteenth Finance Commission sum chungchang pawh ennawn theih a ni ang. Chuvangin, LMC inthlan pawh tih tur ngai hrang hrangte tihfel a nih chuan a rang theih ang bera neih theih kan in beisei a ni. Tun budget-a awmsa hi chu a bul kan tanna, office thil leh thil dang han nawrna tur a ni a, a dang kha chu tikhan state sorkar atang pawhin a tul ang chu kan

ti ve thei mai a. Tin, ULB hi a lo kal hunah chuan kan chanvo tur percentage kha a awm ve hrim hrim a, Aizawl pawh, Lunglei pawh, a percentage kha pawisa lo kal reng rengah khan a awm dawn a ni tih ka sawifiah duh a.

Lunglei hi tunah hian Municipal Council nei turin kan ti a, thenkhatin eng emaw a hlawkna le te kan ti a. Hmanniah pawh enfiah a ni a, tha takin an va inkawm a, an inhrilhfhiah tawh a. Tunah chuan notification hrang hrang leh a tul tih ngai kan ti zo tawh a, office pawh hawn theih thuai kan tum a. A tak takin Lunglei Municipal Council hi kan kengkawh dawn e tih kha House-ah ka sawi duh a. Kha kha UD & PA-ah chuan ka sawi theih ni mai se.

PHE kha han sawi veleh ila. PHE hi kan hre theuh a tui lak hi kan hna ber chu a ni mai a. Mahse vawiinah Mizoram hian vanneihna deuh kan nei a, India ram pum huapa JJM Scheme, khaw tina chhungkaw tinte tui pipeline-a thlunzawm turin an inbuatsaih a. Nichina kan sawi tawh ang khan, kuminah hian solar pumping ringawt pawh 100 chuang kan tender a ni. Tunah hian an en mawlh mawlh a tender chu, chutiang chuan hma kan la a. Nichinah zawhna pakhat ‘plastic pipe in hmang em’ tih kha, thawk khat lai khan pipe man a to lutuk a, central lam nena inrawnin, ‘lo hmang chhin teh u’ an ti a, kan han chhin a ni. Kha kha chu department lam pawhin sawrkar remtihna thlapa ti kan ni. A lo that dana zir khan kan en zel turah pawh kan ngai a. Tui connection atan hrim hrim hi chuan a tha pangngaia ngaih a ni tih kha ka han sawi duh pakhat chu a ni. Tin, tui lak chungchangah PHE hian theihtawp chhuahin tan kan la a. JJM scheme-ah phei hi chu minister hian a ngai pawimawhin, tunhnai maiah pawh hian vawi hnih meeting Guwahati-ah a rawn ko a, session te a ni si a. Kar lehah khian regional an ti leh ang a, ‘North-East-ah ni lovin hetah tal hian rawn kal rawh u’ an ti a, nizan khan lehkha pawh kan hmu a. Mahse, session kan neih vangin kan kal thei dawn lova.

Hna thawh a chak leh sum a lokal chak mai a ni. Chuvangin kum 2023 tawp hma khian Mizoram thingtlang khaw tin hi tui connection peka, tui pawh an kham khawp pe turin project bawhzui theih a awm a. Hemi atan hian zawhna tam takah pawh khan thil pakhat ka hmuh chu, ‘state share te hi in hmu em’ tih hi a ni a. Mahse, vawiina ka sawi duh chu, kan Chief Minister hian vantlangin kan chhawr tur ang hi chu sum awmlo chung pawhin ngaihtuah hram hram a tum thin a, State *matching share* hi JJM-ah hian vawiin ni thleng hian harsa lovin min la pe thei zel a, kan lawm khawp a ni.

Tichuan, JJM scheme hi kan department chuan nakum 2022, 2023, 2024 thleng hian program kan siam vek a ni. Chu mia tan kan sum mamawh zawng zawng pawh chu tunah hian finance hian administrative approval min pe vek a ni. Pawisa khulama tanga a lo thlen dana zir khan finance-in expenditure sanction min pe leh a. Khulam chuan, ‘UC nena in rawn tih phawt chuan kan rawn pe zel dawn che u’ an ti a. Chutiang

dinhmunah chuan kan din a vangin lawmawm pawh kan ti a. PHE-ah hian theihtawpin tan kan la a, kan vanneihna lai pawh kha han sawi thain ka hria a ni.

PHE-ah hian zawhna leh han react tur hrang hrang pawh kha a awm a. Pu Lalrinsanga Ralte khan, ‘Saipum khua tana Tuirial tuikhuah atanga pump hna eng chen nge kalpui a nih tawh’ tih chhanna chu, DPR siam zawh a ni a, sanction tawh niin hma lak thuai a ni ang. Tin, ‘Vairengte-ah PHE SDO thuthmun dah theih a ni ang em’ tih kha, tunah hi chuan sawrkar pawhin ngaihtuahna kan la hmang chiah rih lo tih kha ka chhanna ni se. ‘Vairengte hmar lama Police Duty awmnaa tuizem dah tum kha engnge a chanchin’ tih kha, cheng nuai 50 estimate siam a ni a, financial sanction kan hmuh hunah bawhzui nghal theih a ni e.

Tin, “Siaha District in tina FHTC connection kha engzat nge awm tawh” tih kha Siaha District hi In 7967 awmna a ni a, chung zinga a chanve deuhthaw In 3191-ah tui connection pek tawh a ni e tih kha ka chhanna a ni. Tin, “Zero-Point khua tan *emergency water supply* pek ni se” tih kha, NHIDC hi tuikawng tichhetu an ni a, anni saw a mawh kan pe ve deuh hlek a, ‘hei hi chu lo phuhru rawh u’ tiin a mawh kan pe a ni. Kha kha Pu KT Rokhaw rawn sawi kha a ni a. Tin, ‘West Phaileng PHE complex approach road thalo kha, hnathawhna tur pawisa ngaihtuah mek niin, thawh thuai a ngaih avangin kan bawhzui mek e.

Tin, Pu Nihar Kanti Chakma zawhna, ‘Hmundo Water Supply Scheme improve a theih em’ a tih kha, Hmundo Water Supply Scheme hi JMM-in kum 2022-2023-a thawh tura a sanction tawh a ni. ‘Puankhai Water Supply scheme hi a in improve theih em’ tih pawh kha, Puankhai Water Supply scheme hi improve-na tur sanction tawh a ni a, tender pawh chhuah tawh a niin, tan thuai a ni ang. Puankhai scheme hi a lian a, civil works kan tih pawh solar pumping tur a ni a, tender tunah hian en fel mek a ni. Dr. BD Chakma zawhna “Lawngpui water supply hi tihthat tum a ni em” tih kha, 2021 - 2022 hnuaia JJM sanction tawh a ni a, hma lak tan mek niin, hna an thawh mek a ni.

Tin, “Boranpansuri I & II distribution line extend theih a ni em, hei ih JJM 2021-2022 telh a ni em” tih pawh kha, Borapansuri-ah hma lak mek a ni a, kei pawhin ka hre Chiang Khawp mai hei hi chu. Pu Hlana Khan “Septage Management by Digestive Scheme a tawp ta em ni; engnge a chanchin” a tih kha, hei hi a lar vak si lova, a tharopui si a. A chhanna chu – “He scheme hi tawp lovin la kalpui zel a ni. A mamawh ten pawisa an deposit a, chumi hmang chuan hnathawh chhunzawm zel a ni. Hei hi a la tawp lova, chhunzawm zel theih a la ni e” tih a ni. “Kawrtethawveng water supply scheme hi engnge a dinhmun” tih kha, hei hi a bialtu pa kha a awm maw? Kawrtethawveng hi Bungmun khua nen *combined water supply scheme* ruahman a ni a, 2021-2022 khan JJM-ah sanction tawh niin, tender chhuah tawh a ni. A hna pawh tan

thuai a ni ang. Kawrte hian tui an mamawh tam a, a scheme pawh a lian a, tunah hian chutiang chu kan lo bawhzuina a ni.

Dr. F. Lalnunmawia khan “Saikhamakawn leh Hlimen Vengthar-ah tanky min siam sak thei em” a ti a, Saikhamakawn-ah hian tanky hunna tur hmun kan hmu zo lova, Hlimen Vengthar-ah erawh chuan tanky dah tum a ni a, a siamna tur sum ngaihtuah mek a ni. Saikhamakawn hi committee-ah khan an sawi ka hria a, a hmun a har riau mai a, lo enpui theih anih chuan kawng a su kaw huain ka ring. **(Dr. F. Lalnunmawia: Pu Speaker, a hmun chu theih tawpin kan lo dap dawn nia.)**

Pu Ngunlianchunga khan, “Sangau RD Block hnuiaia khuate hi Siaha Division atang ni lovin Lawngtlai atangin bial ni thei se” a ti a, kha kha chu RD lam chan a ni. Inkalpawhnaa awlsam zawk avangin Siaha Division bial tir a ni a, a remchang zawk baw mai thei a. Hei hi chu a bialtu MLA pawhin a rawn sawi tawh a, kan lo thlir ang e. District pakhat a awm pawh kha a sual lo mai thei baw. Tin, “Mampui tui lakna pipeline hi engtikah nge thawh a ni ang” tih kha, tunah JJM hnuiaiah thawh mek a ni. “Greater Water Lawngtlai approach road to pump-house hi black top theih a ni ang em” tih pawh kha, Lawngtlai water supply scheme augment tura DPR siam a ni. Sanction theih a nih hunah kawng pawh hi black top theih a ni ang.

Greater Lawngtlai Water Supply Scheme, Greater Lunglei Water Supply Scheme leh Champhai Greater Water Supply Scheme pathumte hi tunah hian consultancy firm pakhatin a hmun te tlawhin DPR siam mek a ni a, ministry atangin sum leh pai pawh hmuh theih an inbeisei a ni. Khatiang khan hemi khawpui pathumte hi kuminah hian a sanction an hmu hman ang em tih khawpin kan beiseina a sang a, amaherawhchu ‘beiseina’ a ni a, ‘chumi hunah’ tih lam chu ka sawi thei lova, tun dinhmun a kan hmuh phak chinah chuan, ‘a beisei awm khawp mai’ tih kha ka han sawi chin ni se la a tha ang a.

Pu Lawmawma Tochhawng khan, “Greater Water Supply Scheme Pialthleng road hi repair theih a ni ang em” a ti a. I thusawi kha engnge ni, a ri a mawi viau nge ka hre tho mai a, a rem tho mai ang chu maw. CM hian a lo hria a, nichin a i sawi kha, ‘Special Assistance atangin kan thawk nghal ang’ a ti anih chu. Pialthleng kawng saw kei pawh hmanah vawihnih vel chu ka kal tawh a, a thui angreng a, kan tui pump kawng hi, a buaithlak khawp mai a. Mahse hetiang CM, kan hotute meuhin i sawi an han ngaihthlak khan, ‘kan ti dawn nia’ an ti mai a, ka va bekbawr pawh a ni lova. Pa chan chang thiam deuhin khatiang khan kan hotuten mamawh in sawite a rawn thailang a, a lawmawm ka ti khawp mai.

Thil pakhat kan sawi leh duh lawk, min hriatpui tura kan duh chu, tunhmain a sang atanga a hnuai zawng *gravitation scheme*-in tuihna kan la thin a, tunah chuan a sang zawk atanga tui lak tur a awm tawh lova, hnuai lam atanga pump loh chuan khaw chhungah tui a awm mai tawh si lova. Chuvang chuan pumping scheme hian kan kal lo thei lova. *Pumping scheme* tih dawn chuan solar hi a tlawm zawk a, a maintenance-ah, Chuvang chuan *solar scheme* hian kan kal ta a ni. Tunah hian *solar scheme* hi sawm hnih, sawm thum tih hlawhtlin tawh a ni a, kum li, kum nga kal tawh atanga lo tih tan tawhte pawh hi a la tha viau hlawm a. Chuvangin ‘hei hi chhonzawm ang’ kan ti a. Ka sawi tawh ang khan tunah pawh JJM scheme atangin 100 zet kha kan tender a ni. Chutah chuan a ti thang kha pahnih pathum chauh an ni si a, khatiang khan inpei zawnin ‘thian thate sawm rawh u’ kan ti a, Zoram mipuite tan kan thawh theih dan dan kan zawng tawp mai a ni. Chuti anih loh chuan kan thawk thei dawn si lova kan ti a. Hetiang bawk hian kum thar 2022-2023-ah pawh hian a scheme dang, khaw dang kan hmabak kha a lo kal leh thei dawnin kan hria a kan lawm khawp a ni.

Heihi mipuite pawhin an *welcome* in kan hria a. Khawchhunga tui lak thlen mai ni lovin In tina connection pek kha a ni lehngal a. Tunah, ‘pawisa in heh’ pawh min ti lo, ‘thawk thuai thuai rawh u, pawisa a tam’ min ti zawk a ni. Hmannia in chek-up a ka kal pawh khan an Secretary khan, “Ka pu, keimahni lam aiin nangmahni lam in pawimawh zawk, thawk chak mai rawh u, ka tiam ang che” a ti tawp a ni. An *pet-scheme* tak tak hi a ni a. Amaherawhchu ‘*State share* erawh chu lo hlah miah suh u’ an ti a, chu chu kan CM pawh hian a hrechiang a. Chutiang chuan hemi scheme hi mipuite tan kan bawhzui ve zel dawn a ni.

Tikhan, Pu Speaker, hun ka hmang tawi ber ang ka ti a, mahse, a theih bik lo ve a. Tichuan, Pu Speaker, ka Demand No. 13 - DP & AR, Demand No. 25 - Public Health Engineering Department leh Demand No. 46 - Urban Development & Poverty Alleviation te a vaim ₹11,80,61,46,00.00 hi he House zahawmtak hian min pass-pui turin ka ngen e.

SPEAKER : Awle, Dy. Chief Minister zahawmtak Pu Tawnluia’n a Demand-te:

Demand No.	Purpose	Amount (in ₹)
13	Personal & Administrative Reforms	4,79,88,000.00
25	Public Health Engineering	4,71,14,09,000.00
46	Urban Development & Poverty Alleviation	7,04,67,49,000.00
TOTAL		11,80,61,46,000.00

House Dawhkanah pass a rawn dil a, remti apiangin, ‘*Remti*’ ti rawh ule. Remti lo kan awm em? Kan awm chuan, ‘*Remti lo*’ ti rawh u le.

Awle, tunah chuan, Deputy Chief Minister zahawm tak Department chan - Demand No. 13, 25 leh 46 te hman tur, a vaiin ₹11,80,61,46,000.00 hi House-in lungrual takin a *pass* ta a ni. (**Pu Tawnluia, Dy. Chief Minister:** Pu Speaker, ka lawm e.)

Awle, wawiina kan tih tur chu kan zo leh ta a, kan chawl ang a. Naktuk hi kan Mizo kutpui, *Chapchar Kut* a ni a, kan chawl ang a, Session kan nei lo ang a. Tichuan, karleh, March Ni 7, 2022 (chawhma dar 10:30)-ah kan thukhawm leh dawn nia.

Sitting is adjourned (8:51 PM)